

ኬሲ ማፃኣፕ ዓይያ ካር

ሃይ ኬዘ ማፃኣፕ ኬኤዘሂ ዒሰራዔኤሌ ዴራ ዓይሉሞና ናንጌ ጊብፄ ዓጮይዳፕ ኬሰኬሂ ዛሎ ማዓዛ፣ ማፃኣፕሎኮ ሃይሂ ጴኤፕ ጴኤፕ ቤሲ ዓኣያኬ።

1. ዔብሬ ዓሶኮ ዓይሉማፕ ኬዘና ሲና ዲኮ ባንሂ ዓኣዲያ ኬኤዘኔ።

2. ያኦሲ ዴርና ዎላ ጫኣቄ ጫኣቄሞንታ ዓሲ ዎላ ኮሺ ናንጌ ናንጋንዳ ጎይሂኮዎ ካኣሺ ዛላ ዎጌ ዔያቶሞ ዒንጊንቴሂ ኬኤዘኔ።

3. ዒሰራዔኤሌ ዓሶሞ፣ ዩያጉዲ ሃሃ ቄኤሴ ማዒ ማዲሂና ያኦሲ ካኣሽኪሂ ዛላ ዒንጊንቴ ዎጌ ዛላ ኬኤዘኔ።

ቢያፕ ባሼ ሃና ማፃኣፕሎ ዔርዘሂ ዓይሉሞና ናንጋ ዴር ዓይሉማፕ ያኦሲ ኬሴሂኮ ጊንፃ፣ ሴካ ቤርታ ዔያታ ዎዛ ዓኣ ዴሬ ማዓንዳጉዲ ዔያቶ ዎይቴ ጊኣጊሼቴያ ኬኤዘኔ።

ሃና ማፃኣፕሎይዳ ዔርቴ ዓሂ፣ ዴር ጊብፄ ዓጫፕ ዒዛሞ ኬሳንዳጉዲ ያኦሲ ዶኦሬ ሙሴኬ፤ ማፃኣፕሎይዳ ዔርቴያ ማዔ ቤዛ ያኦሲኮ ታጳ ዓይሂፃ ፃኣፕንቴ ዓይ. 20ኬ።

ማፃኣፕሎ ዲማ ዲማ ዓርቄ ባኮ

ዒሰራዔኤሌ ዓሶኮ ጊብፄ ዓጮ ዓይሉማፕ ኬዘ (1:1—15:21)

- 1. ዓይሉሞና ጊብፄይዳ ናንጊያ (1:1-22)
- 2. ሙሴኮ ሾይንቶና ዒ ናንጌ ናንጎ (2:1—4:31)
- 3. ሙሴና ዓኣርኔናኮ ጊብፄ ካኣቴ ኮይላ ዳኪንቴያ (5:1—11:10)
- 4. ዑሃ ዓኣዲያ ቦንቾ ኬሎና ጊብፄፕ ኬዘ ዛላ (12:1—15:21)

ዘቄ ባዛፕ ዴንዲ ሲና ዲኮ ሄሊያ (15:22—18:27)

ያኦሲ ዒንጌ ዎጎና ጫኣቄ ጫኣቄሞና (19:1—24:18)

ዓፕላና ማዢንቴ ያኦሲ ካኣሽኪንታ ማኣርንታ ካኣዢ ዎጎንታ (25:1—40:38)

ዒሰራዔኤሌ ዓሳ ጊብፄ ዓጮይዳ ናንጋኣና ዔያቶሞ ማዲንቴ ጌኔ ማዶ

¹ ፔቴ ፔቴ ፔኤኮ ማኣር ዓሶና ዎላ ማዒ ጊብፄ ዓጮ ዴንዴ፣ ዒሰራዔኤሌ ጌይንቴ ያይቆኦቤኮ ናኣታ ሃካፕ ሊካ ፓይዲንታ

ናኣቶኩ። 2 ርኦቤኤሌ፣ ሲሞኦኔ፣ ሌዊ፣ ዪሁዳ፣ 3 ዪሳኩኦሬ፣
 ዛብሎኦኔ፣ ቢኢኒያሚ፣ 4 ዳኣኔ፣ ኒፕታኣሌኤሚ፣ ጋኣዳንታ
 ዓሴኤሬንታኩ። 5 ፒዜ ያይቆኦቤ ሾዔ ዜርፃ ዋሊ ዑፃ ለንካይታሚ
 * ማዓዛ፣ ዮሴፔ ቤርታዲ ገብፃ ዓጮይዳ ናንጋያኩ። 6 ሚርጌ ዋዴ
 ዴዔሰካፓ ዮሴፔንታ ዒዛኮ ጌርሲንሢንታ ዬኖ ሾይንቶኮ ዓድንሢ
 ማዔ ዓሳ ቢያ ሃይቄኔ። 7 ያኣዒ ማዔቶዋ ዔያቶኮ ዜርፃ ማዔ
 ዒሰራዔኤሌ ዓሳ ሾይንቲ ሾይንቲ ዴንዴም ፓይዳ ሚርጌሢር
 ገብፃ ዓጮ ዔያታ ኩሚኔ፤ ሚርጌና ሃሣ ዋለቃዳያኣ ማዔኔ።

8 ዬካፓ ዮሴፔ ገብፃ ዓጮም ማዴ ባኮ ዛሎ ዔራዋ ዓኪ ካኣቲ
 ገብፃ ዓጮይዳ ካኣታዴኔ። 9 ዒዚ ዴርም ኬኤዛዮ፡- «ሃኣዛጉዋቲ፤
 ሃኣቶ፣ ዒሰራዔኤሌ ዓሶኮ ፓይዳ ኑገዳፓ ዑሣ ዓኣዴ ዲቤኔ፤
 ሃሣ ዔያታ ዲቢ ዋለቃዳያኣ ማዔኔ። 10 ዬያይዳፓ ዔቄያና ኑ
 ሞርኮና ዋላ ማንገ ኑና ዔያታ ያላኒ፤ ሃሣ ዓጮይዳፓኣ ቶሊ
 ኬሰኪ ዓኣዳኒያኣ ዳንዳዒ፤ ዬያር ፓይዳ ዔያቶኮ ሚርጌ ሚርጌ
 ዓኣዲዋጉዲ ሃኒ ዬዑዋቲ፣ ኑ ጎይሢ ኮዖም» ጌዔኔ። 11 ዬካፓ
 ካኣቲ ዴኤሢ ማዴና ዔያቶ ሜታሳንዳጉዲ ዓሲም ሚጨንቲዋ ፑርታ
 ማዔ ማዲሻ ዓሲ ዔያቶ ዑፃ ዶኦሪ ጌሣኔ፤ ዬያይዳሰካፓ ሚርጌ
 ባኣዚ ቡኩሲ ጌሦያ ማዔ ፒቶሚና ራምሴ ጌይንታ ካታምንሢ
 ካኣቲም ዔያታ ማዢኔ። 12 ጋዓንቲ ዔያታ ዒሰራዔኤሌ ዓሶ ሄርቄ
 ሜታሴ ዋድና ፓይዳ ዑሣ ዓኣዴ ሚርጌ ሚርጌ ሳዔሎዋ ኩሚ
 ኩሚ ዓኣዴኔ፤ ያዲ ማዔሢር ገብፃ ዓጮ ዓሳ ዒሰራዔኤሌ ዓሶ
 ዒጊጨኔ። 13 ዬያይዳፓ ዔቄያና ሚጨንቲሢባኣ ፑርቲሞና ዓይሌ
 ማሃ ዔያቶ ማዲሺሢ ዓርቄኔ። 14 ዔያታ ማዲሻ ጎይፃ፡- ቶርጳ
 ሄርቄሲሢና ፀኡቤ ጌይንታ ዓጨፓ ዲንቄ ማኦሪ ማዢ ባኣዚ
 ማዢሲሢና፤ ሃሣ ጎዢይዳኣ ሚጨንቲዋ ዴኤፒ ማዴ ማዲሺሢና
 ናንጎ ዔያቶኮ ሜቶ ናንጊ ማሃኔ።

15 ዬካፓ ገብፃ ዓጮ ካኣቲ ዔብሬ ዓሶ ፃጳ ላኣሎ ሾዋ ዋድና
 ማኣዲ ሾይዢ ፃፓራና ፑሃ ጌይንታ ላምዖ ላኣሊሰኬንሢ ዔኤላዮ፡-
 16 «ዔብሬ ዓሶ ፃጳ ላኣሎ ዒንሢ ሾይዢና ናዓ ዓቲንቄ ማዔቶ
 ቤዛና ዋዋዲዋቲ፤ ዉዲር ማዔቶ ጋዓንቲ ዋዲፖቲ» ጌዔኔ።
 17 ሾይዢ ላኣሎንሢ ጋዓንቲ ያኦሲ ዒጊጨያታሢር ገብፃ ዓጮ

1:4 1:4 ማዢ. ማፃ 46:8-27። * 1:5 1:5 ለንካይታሚ ጋዓዛ፡- ዔብሬ ዓሶ ሙኤጮ
 ማፃኣፖ ሚናኣሲ «ለንካይታሚ» ጋዓኔ (ማዢ 46:27 ዛጌ።) ሸምፖና ዓኣ ባኣዚ ናንጊ
 ዳንዳዑዋ ባዘ ኮራፓ ጴዴ ማፃኣፖና ለንካይታሞ ዔር ዓሶ ማፃኣፖናይዳ «ለንካይታሚ
 ዳንጎ» ጋዓኔ (ዳኪ. ማዴ 7:14 ዛጌ።) 1:7 1:7 ዳኪ. ማዴ 7:17። 1:8 1:8
 ዳኪ. ማዴ 7:18። 1:10 1:10 ዳኪ. ማዴ 7:19።

ካኣቲ ዔያቶ ዓይሄ ጎይፆ ማዲባኣሴ፤ ጉቤ ዓቲንቆ ናኣቶዎ ዎዲዎፆ ሃሼኔ። 18 ዩካፓ ጊብፄ ዓጮ ካኣቲ ሾይዣ ላኣሎንሣ ዔኤሊሳፆ፡- «ዓቲንቆ ናኣቶ ዎዲዎፆ ዒንሣ ሃሼሣ ዓይጎርዲይ?» ጌዒ ፆኦጮኔ።

19 ዔያታ ማሃፆ፡- «ዔብሬ ዓሶ ፃጶ ላኣላ ጊብፄ ዓጮ ላኣሎጉዲቱዎሴ፤ ዔያታ ኮሺ ደዲ ዓሲ ማዔሣር ሾይዣ ዓሳ ሃጊ ዔያቶ ባንሣ ሙኩዎንቴ ቤርታዲ ፔኤር ፔቲታፆ ማታባኣፆ ሾዓኔ» ካኣቲም ጌዔኔ። 20-21 ዩያታ ሾይዣ ላኣላ ፆኦሲ ዒጊጮፆታሣር ፆኦሲ ዔያቶም ኮሺ ባኣዚ ማዳኔ፤ ዔያቶ ፔቲ ፔቲሣ ማኣሪፆ ጌቲሴኔ፤ ፆዲ ማዒፆና ዒሰራዔኤሌ ዳራ ፓይይና ማርጊ ማርጊ ሃሣ ደዲ ማዒ ማዒፆኣ ዓኣዳኔ። 22 ዩካፓ ካኣቲ፡- «ዔብሬ ዓሶ ፃጶፓ ሃጊ ሾይጎታ ዓቲንቁ ናይ ቢፆ ዔኪ ዔኪ ዳኤፖ ዓባዔ ዎርይዳ ኬኤሩዎቲ፤ ጩድር ናኣታ ጋዓንቴ ዓቶንጎ» ጌዒ ጊብፄ ዳር ደዲ ዓይሥሣ ዓይሣኔ።

2

ሙሴኮ ሾይንቶ

1 ዩኖ ዎድና ሌዊ ዜርፆይዳፓ ማዔ ፔቲ ዓሲሰኬይ ሌዊ ዜርሣ ማዔ ላኣሊሰኬኖ ዔኬኔ፤ 2 ዒዛ ጎጶዲ ዓቲንቁ ናይ ዒዛም ሾዓፆ፡ ናዓሣ ማርጊና ማዛጶ ማዔሣ ዛጊ ሃይሃ ዓጊኒ ጉቤ ፔጌይዳ ጴዲዎጉዲ ዓኣቼኔ። 3 ፆዲ ማዔቶዎ ዩያፓ ዑሣ ዓኣዳ ዒዛ ዓኣቼ ጌሣኒ ዳንዳዒባኣሣ ዔራፆ ኮታ ጎይሣ ዎኦሺጉዳ ባኣዚና ኮሺንቴ ባኣዚ ጊኣጊሺ ዎኣሣ ጌሉዎጉዲ ሺዲና ማኤቸ ናዓሣ ዒዛ ጋር ጌልዜሰካፓ ዔኪ ዳንዲ ዎር ዓጮ ዓኣ ማጮር ባኣካ ጌሣኔ። 4 ናዓሣኮ ጌሬላ ዒዛይዳ ሃላ ባኮ ዛጋኒ ሃኬ ዔቁ ካፓኔ።

5 ዒማና ካኣታሣኮ ናይሰኬና ዑሣ ማሰታኒ ዎር ኬዳዛ፡ ዒዛም ማዳ ማዳ ላኣላ ዎር ዓጮይዳ ሴካ ሃንጋ ሃንታኔ፤ ዒዛ ማጮር ባኣኮይዳ ጌሣንቴ ፔቲ ኮታ ማላ ባኣዚ ዳንቁ ዒዛም ማዳ ላኣሎ ዳኪ ዔኪ ዩዒሴኔ። 6 ዩካፓ ዒዛ ዩኖ ባኬሎ ቡላፆ ፔቲ ናይ ጋርይዳ ዳንቁኔ፤ ዒማና ናዓሣ ዩኤካፆታሣር ዒዛ ማጮጎታፆ፡- «ሃይ ዔብሬ ዓሶ ፃጶ ናኣቶይዳፓ ፔቲፆኬ» ጌዔኔ።

7 ናዓሣኮ ጌሬላ ካኣቲ ናዎ ኮራ፡- «ሃፆ ናዓሣ ኔኤም ዳንሥሣ ዲቻንዳ፡ ዔብሬ ዓሶ ፃጶ ላኣላፓ ፔቲ ላኣሊ ታኔኤም ዔኤሎንድ?» ጌዒ ፆኦጮኔ።

1:22 1:22 ዳኪ ማዳ 7:19። 2:2 2:2 ዳኪ ማዳ 7:20፤ ዔብ. 11:23።

8 ካአቲ ናኣ ማሃፖ፡- «ሂዮ! ታአሞ ዴንዲ ዔኤሌ» ጌዔሢር፣ ናዓላ ዴንዲ ናዓሢኮ ዒንዶ ዔኤሌ ዔከ ዩዔኔ። 9 ዩካፓ ካአቲ ናኣ ላኣሌሎ ኮራ፡- «ሃያ ናዓሢ ታአሞ ዔከ ዳንሥሢ ዲቼ፤ ኔኤም ኮይሳ ባኮ ታ ጨጋንዳኔ» ጌዔኔ፤ ዩያር ላኣሌላ ናዓሢ ዔከ ዴንዲ ዳንሥሢ ዲቼ። 10 ናዓሢ ዑጋዛ፣ ዒዛ ዔከ ካአቲ ናዎ ኮራ ሙኬኔ፤ ናዓሢያ ካአቲ ናዎ ናይ ማዔኔ። ዩያር ዒዛ «ዎአሢዳፓ ታ ኬሲ ዔኬያታሢር ሱንፃ ዒዛኮ ሙሴ * ናንጎንጎ» ጌዔኔ።

ሙሴኮ ሚዲያሚ ዓጮ ቤቲዎ

11 ሙሴ ዑጋዎ ፔቲ ኬሊ ዒዛኮ ፃጰ ማዔ ዔብሬ ዓሶ ዛጋኒ ዓኣዴኔ፤ ዔያታ ናሽኪባኣ፣ ዎልቄና ዴኤሢ ማዶ ዔያቶ ማዲሾንቴ ዒ ዛጌኔ፤ ሃሃ ጊንሃ ፔቲ ጊብፄ ዓጪ ዓሲ ዒዛ ፃጰ ማዔ፣ ዔብሬ ዓሲሰኬያ ጳርቃንቴ ዒዚ ዴንቄኔ። 12 ሙሴ ዒማና ኮይሎ ሽሪ ዛጋንቴ ዎኣኒያ ባኣሢ ዔራዎ ጊብፄ ዓጮ ዓሢ ዎዲ ሌዘ ማኣሻላይዳ ዓኣቺ ዴኡኬኔ። 13 ዚር ጉቲሎ ጊንሃ ዒዛ ቤዘ ዓኣዲ ላሞዎ ዔብሬ ዓሲ ማዔይ ዎላ ዑራዳንቴ ዒዚ ዴንቄኔ፤ ጊቲቃይዶ ማዲ ዳቤ ዓሢ ዒዚ ዛጋዎ፡- «ኔኤኮ ፃጰሢ ኔ ዓይጋ ጳርቃዎ?» ጌዒ ዎኣጫዛ፣ 14 ዓሢ፡- «ኔና ኑ ዑያይዳ ዎይሃያና ዎጋ ሱኡጌ ማሂ ዴኦሪሢ ዎናዳይ? ኔኤኒ ጊብፄ ዓጮ ዓሢ ዎዶ ጎይዎ ታና ኔ ዎዳኒ ኮዓ?» ጌዔኔ፤ ዩያር ሙሴ ሚርጌና ዒጊጪ «ሃይሾ ታ ማዳ ባኮ ዴራ ዔሬኔ» ጌዒ ፔ ዒኖና ማሌኔ። 15 ማዲንቴ ባኮ ቢያ ካአቲ ዎይዛዎ ሙሴ ዎዲሻኒ ኮዔኔ፤ ሙሴ ጋዓንቴ ካአቲ ቤርታፓ ሚዲያሚ ዓጪ ቤቲ ዓኣዴኔ። ዒኣካ ዒ ፔቲ ኬሊ ዔቲ ዎኣሢ ዓቺዳ ዴዒ ዓኣንቴ፤ 16 ዒዛ ዓጮ ቄኤሴሰኬያኮ ላንካይ ዉዲር ናይ ዓኣዎ ዔያታ ዩኖ ዔቶ ዎኣፄሎ ቤዘ ሙኪ ፔ ዓዳኮ ማራቶና ዎኣርና ዑሻኒ ጎንጋላይዳ ዎኣዎ ዴዒ ኩንሣኔ። 17 ዒማና ሃንጎ ቆልሞ ናኣ ታ ሙኪ ዩያቶ ዉዲር ናኣቶ ዳውሳዛ፣ ሙሴ ዴዔ ቤዛፓ ዔቄ ናኣ ታ ዔያቶ ዳውሳሢ ላኣጊ ቆልሞዎ ዔያቶሲ ዎኣዎ ዑሼኔ። 18 ዩያታ ዉዲር ናኣ ታ ዔያቶኮ ዓዶ ራጉዔኤሌ † ኮራ ማዒ ሙካዛ «ሃኖ ዒንሢ ዎይቲ ዑኬና ማዒ ሙኬይ?» ጌዒ ዓዴ ዔያቶ ዎኣጫኔ።

19 ዔያታ ማሃፖ፡- «ፔቲ ጊብፄ ዓጪ ዓሲሰኬያ ቆልሞ ናኣቶይዳፓ ኑና ዓይሲ ሃሃ ዎኣዎ ኑኡም ጎንጋሎይዳ ዴዒ ዴዒ ቆልሞ

* 2:10 2:10 ሙሴ ጌይፃ፡- ዔብሬ ዓሶ ሙኤጮና «ኬሲሢ» ጌይሢኬ። 2:10 2:10 ዳኪ ማዶ 7:21። 2:11 2:11 ዔብ. 11:24። 2:14 2:14 ዳኪ ማዶ 7:23-28። 2:15 2:15 ዳኪ ማዶ 7:29፤ ዔብ. 11:27። † 2:18 2:18 ራጉዔኤሌ፡- ራጉዔኤሌ ሙሴኮ ባይሲ ማዓዛ ማሌ ሱንፃ ዒዛኮ «ዮቲሬ» ጌይንታኔ።

ኩሎም ዑሽኔ» ጌሲ ኬኤዜኔ። 20 ዓዳሢ ዔያቶ ኮራ፡- «ሂዳዎ ዩይ ዓሢ ዋካዳይ? ዓይጎር ዒንሢ ዒዛ ሃሺ ሙኩይ? ዴንዲ ዒዛ ዔኤሉዋቲ፤ ሙኪ ሙኡዚ ሙዎም» ጌዔኔ።

21 ሙሴያ ዩያ ዓሢና ዋላ ናንጋኒ ኮዔኔ፤ ዩይ ዓሢ ሙሴም ፔኤኮ ናዎ ሲፓራ ጋዓዛ ዔካንዳጉዲ ዒንጌኔ። 22 ዬና ላኣሌላ ሙሴም ዓቲንቄ ናይ ሸዓዛ ሙሴ «ታኣኒ ሃኖ ዓጮይዳ ሙኩ ዓሲኬ» ጌሲ ናዎ ሱንዎ ጌርሾሜ † ጌዔኔ።

23 ሚርጌ ለዔኮ ገንፃፓ ገብፃ ዓጮ ካኣቲ ሃይቄኔ፤ ዒሰራዔኤሌ ዓሳ ጋዓንቲ ዩያ ሄላንዳኣና ዓይላቶይዳ ማዒ ኮሺ ሜታዲ ማኣዶ ዴንቃኒ ዒላታንቲ፥ ዔያቶኮ ዩያ ዒላቶ ያኣሲ ዋይዜኔ። 24 ሚርጌና ዔያታ ሜታዲ ዒላታ ዒላቶ ያኣሲ ዋይዚ ዓብራሃሚና ዩሳኣቄና ሃሃ ያይቆኦቤና ዋላ ዒ ጫኣቄ ጫኣቄም ጸቄሢኔ። 25 ሃሃ ዒሰራዔኤሌ ዓሰኮ ዩያ ዓይላቶና ሜታዲያ ዛጊ ዔያቶም ዒዚ ማሌኔ።

3

ያኣሲ ሙሴ ፔ ማዳም ዔኤሌሢ

1 ሙሴ ሚዲያሚ ዓጮኮ ቄኤሳሢ ማዔ፥ ባይሲ፥ ዮቴሬኮ ማራቶና ዋኣሮና ሄንቄቤቃ ቆልሞ ዒሺ ዔኪ ያኣሲ ዴካ ጌይንታ ሲና * ሙኩኔ። 2 ዒዛ ቤዘይዳ ናንጌና ናንጋ ጎዳኮ ኪኣታንቻ ካይዚ ባኣካይዳ ዔኤታ ታሚ ሎሰቶና ማዒ ዒዛም ጴዴኔ፤ ሙሴያ ካዮ ታሚ ዓርቃዎ ፔቲታዎ ሙዑዋኣሢ ዛጊ፡- 3 «ሃይ ዓይጎ ባኣዚዳይ? ካያ ዋዲ ሙይንቲዋይ? ሂንዳ ታ ዑኪ ዛጎም» ጌዔኔ።

4 ሂዚ ጌሲ ሙሴ ዩያ ባኮ ዛጋኒ ሙኪ ዑካዛ ናንጌና ናንጋ ጎዳ ዒዛ ዴንቃዎ ካዮ ባኣኮይዳ፡- «ሙሴ! ሙሴ!» ጌሲ ዔኤሌኔ፤ ሙሴያ «ዮ!» ጌዔኔ።

5 ያኣሲ ዒዛም፡- «ሃንጋ ለዒፖ! ኔ ዔቄ ሳዓ ታኣም ዲማዴያ ማዔሢሮ ዲርዘ ኔኤኮ ኬሴ፤ 6 ታኣኒ ኔኤኮ ቤርታኣ ዓድንሢ ዓብራሃሚንታ ዩሳኣቄንታ ያይቆኦቤንታ ያኣሲኬ» ጌዔኔ። ዒማና ሙሴ ያኣሲኮ ዓኣፖ ካር ዛጋኒ ዒጊጮሢሮ ፔ ዓኣፖ ካር ካንቄ ዓኣቹኔ።

7 ሄሊሳዎ ናንጌና ናንጋ ጎዳ ዒዛም፡- «ዴራ ታኣኮ ገብፃ ዓጮይዳ ዋያጉዴ ዋኣዩሢና ሜቶናይዳ ዓኣቲያ ታ ዛጌኔ፤ ዔያቶ ሚታሳ ዓሰይዳፓ ቶላኒ ዔያታ ኮሲ ዒላታ ዒላቶ ታ ዋይዜኔ፤ ዔያቶይዳ

† 2:22 2:22 ጌርሾሜ ጌይፃ፡- ዔብሪ ዓሰ ሙኡጮና «ሙፕ ዓሲ» ጌይሢኬ። 2:24 2:24 ማዢ. ማፃ 15:13-14። * 3:1 3:1 ሲና ባጌያና ኮሬቤ ጌይንታኔ። 3:3 3:3 ዳኪ. ማዳ 7:30-34።

ሄሌ ሜቶቸ ቢያ ታ ዔራሬ። 8 ዩያሮ ዔያቶ ገብፄ ዓጮ ዓሶ ኩጮፓ ዓውሳኒ ታ ኬዴኔ፤ ገብፄ ዓጮፓ ታ ዔያቶ ኬሲ ሃሢ ካኣና ናሳ፣ ሄቴ ዓሳ፣ ዓሞራ ዓሳ፣ ፔርዜ ዓሳ፣ ሂዋዌና ዒያቡሳና ዓሳ ናንጋ ዔኤዘና ዲኢቆና ኩሜ ኮዠ ቤዘ፤ ዳልገ ሃሃ ማሊ ማዔ ሳዔሎ ታ ዔያቶም ዒንገንዳኔ። 9 ሃሢ ጎኔና ታ ዳሮ ዒሰራዔኤሌኮ ዒላቶ ታኣኒ ዋይዜኔ፤ ገብፄ ዓጮ ዓሳ ዔያቶይዳ ማዳ ሚጨንቲፃባኣ ሚታሲፆዋ ታ ዴንቄኔ፤ 10 ዓካሪ ሃሢ ዳሮ ታኣኮ ኔ ገብፄ ዓጮፓ ኬሳንዳጉዲ ገብፄ ዓጮ ካኣቲ ኮይላ ታ ኔና ዳካንዳኔ» ጌዔኔ። 11 ሙሴ ጋዓንቲ ጆኦሲ ኮራ፡- «ካኣቲ ኮይላ ዓኣዲ ዒሰራዔኤሌ ዓሶ ገብፄፓ ኬሳኒ ታናንሢ ዓይጎ ዓሲዳይ?» ጌዔኔ።

12 ጆኦሲ ዒዛም፡- «ዒገጨፖ፣ ታ ኔኤና ዋላ ማዓንዳኔ፤ ዳሮ ታኣኮ ኔ ገብፄፓ ኬሳ ዋዶና ሃሮ ዲኮይዳ ታና ዒንሢ ዚገ ካኣሽካንዳኔ፤ ታ ኔና ዳካፃ ማዔሢኮ ማላታ ማዓንዳሢያ ዩያኮ» ጌዔኔ።

13 ሙሴ፡- «ታኣኒ ዒሰራዔኤሌ ዳሮ ኮራ ዓኣዲ <ዒንሢኮ ቤርታኣ ዓደንሢ ጆኦዛሢ ታና ዒንሢ ባንሢ ዳኮኔ> ጋዓ ዋዶና ዔያታ <ሱንፃ ዒዛኮ ጆናዳይ?> ጌዒ ጆኦጮቶ ዋዚ ጌዒ ታ ኬኤዛንዳይ?» ጌዔኔ።

14 ጆኦሲ ዒዛም፡- «ሱንፃ ታኣኮ ታናኮ፤ ዩያሮ <ሱንፃ ታኣኮ ታናኮ ጌዔ፣ ጆኦሲ ዒንሢ ባንሢ ታና ዳኮኔ> ዔያቶም ጌዔ፤ 15 ዔያቶኮ ቤርታኣ ዓደንሢ ዓብራሃሜንታ ዩሳኣቄንታ ያይቆኦቤንታኮ ጆኦዛሢ፣ ታኣኒ፣ ናንገና ናንጋ ጎዳ ዔያቶ ባንሢ ኔና ዳካፃ ማዔሢ ዒሰራዔኤሌ ዳሮም ኬኤዜ፤ ሱንፃ ታኣኮ ናንገና ዩያኮ፤ ሃገ ሙካንዳ ሾይንታኣ ቢያ ታና ዔራጎዳሢ ዩሮ ሱንፃናኮ። 16 ዓካሪ ዓኣዲጋፓ ዒሰራዔኤሌ ዳሮኮ ሱኡጎ ቢያ ፔቲይዳ ቡኩሴ፤ ዔያቶኮ ቤርታኣ ዓደንሢ ዓብራሃሜንታ ዩሳኣቄንታ ያይቆኦቤንታኮ ጆኦዛሢ፣ ታኣኒ፣ ናንገና ናንጋ ጎዳ ኔኤም ጴዳያታሢ ዔያቶም ኬኤዜ፤ ዔያቶ ባንሢ ታ ኬዲ ገብፄ ዓጮ ዓሳ ዔያቶ ሚጨንቲፆዋ ሄርቂቆላ ቆሊያ ታኣኒ ዛጌሢያ ዔያቶም ኬኤዜ። 17 ሚጨንቲሢባኣ ሄርቂቆ ዋይሥሢና ዔያታ ሜታዳ ገብፄ ዓጮሎይዳፓ ታኣኒ ዔያቶ ኬሲ ሃሢ ካኣና ናሳ፣ ሄቴ ዓሳ፣ ዓሞራ ዓሳ፣ ፔርዜ ዓሳ፣ ሂዋዌና ዒያቡሳና ዓሳ ናንጋ ኮዠ ቤዘ፤ ዔኤሲና ዲኢቆና ኩሜ ዓጮሎ ታ ዔያቶም ዒንገኒ ጮኣቄኔ ጌዒ ዔያቶም ኬኤዜ» ጌዔኔ።

18 ሃሃ፡- «ታኣኮ ዳራ ኔ ኬኤዛ ባኮ ቢያ ዋይዛንዳኔ፤ ዩካፓ ዒሰራዔኤሌ ዳሮኮ ሱኡጎና ዋላ ማዒ ገብፄ ዓጮ ካኣቲ ኮራ ዓኣዳሶ <ዔብሪ ዓሶኮ ጆኦሲ፣ ናንገና ናንጋ ጎዳሢ ኦኡም ጴዳኔ፤ ዩያሮ ኦጆኦዛሢ፣ ናንገና ናንጋ ጎዳሢም ዒንጎ ባኣዚ ዒንገ ካኣሽካኒ ሃይሆ ኬሊ ሃንቲ ዓሲ ናንጉዋ ቦኦሎ ኦ ዓኣዳንዳጉዲ ኦና ዳኮ»

3:12 3:12 ኬሲ ማፃ 6:2-3። 3:14 3:14 የሃ. 8:58፤ ዔብ. 13:8፤ የሃ. ጆፔዳ 1:4፤ 8።

ጌራ ከኤዙዋቱ። 19 ጎኔከ፤ ዴኤፒ ዋልቄና ዓርቂ ዒዛ ሜታሲቦኦንቴ ጊብፆ ዓጮ ካኣቲ ዒንሢ ሃሺንዲዋኣሢ ታ ዔራ። 20 ዬያሮ ሚርጌና ዒጊቻያ ማዔ፣ ታ ዋልቄና ማዲንታ ዓኪ ባኣዚ ታ ማዲ ታኣኮ ዴኤፖ ዋልቆዋ ዳዊ ጊብፆ ዓሶ ታ ሜታሳንዳኔ፤ ዬካፓ ዒንሢ ከሰኪ ዓኣዳንዳጉዲ ዒንሢ ዒ ዳካንዳኔ» ጌዔ።

21 ጊንሣ ሃሣ ያኦሲ፡- «ዒንሢ ከሰካ ዎዶና ታ ዴራ ጊብፆ ዓሶ ቤርቶይዳ ዴኤፑዎ ዴንቃንዳጉዲ ታ ማሃንዳሢር ኩቺ ጉሪ ዒንሢ ከሰካዓከ፤ 22 ዔብሬ ዓሶ ዜርዮ ላኣላ ፔቴ ፔቴሢ ዓሺኒ ማዒ ዋላ ናንጋ ጊብፆ ዓጮ ዓሶ ላኣላ ዔያቶዎ ፔኤኮ ዓፒሎ፣ ዎርቆንታ ቢሮ ዓንጎና ኮሺንታሢንታ ሜሌ ፓልዎ ባኮዎ ዔርጋንዳጉዲ ያኤጮንጎ፤ ዬያ ቢያ ዔኪጋፓ ዓቲንቆ ናኣቶና ዉዲሮ ናኣቶና ዒንሢኮ ማይሱዋቱ፤ ዬያይዲ ዒንሢ ጊብፆ ዓጮ ዓሶ ቡሪ ከሰካንዳኔ» ጌዔ።

4

ያኦሲ ሙሴዎ ዒንጌ ዋልቆ

1 ዬካፓ ሙሴ ናንጊና ናንጋ ጎዳ ኮራ፡- «ዒሰራዔኤሌ ዓሳ ናንጊና ናንጋ ጎዳ ኔኤዎ ጴዲባኣሴ» ጌራ ታ ጋዓሢ ጎኔከ ጎዎ ዒፂ፣ ሃሣ ታ ከኤዛ ባኮ ዋይዚባኣቶ ታ ዔያቶዎ ዎዚ ጋዓንዳይ?» ጌራ ያኦጮ።

2 ናንጊና ናንጋ ጎዳ ማሃዎ፡- «ኔኤኒ ኩጫ ዓርቂ ባካ ዓይጎዳይ?» ጋዓዛ፣ ዒዚ «ኮኦሎኮ» ጌዔ።

3 ናንጊና ናንጋ ጎዳ ዒዛዎ፡- «ሳዓ ከኤሬ» ጌዔ፤ ሙሴ ሳዓ ከኤራዛ፣ ኮኣላ ላኣሚንቲ ሾኦሺ ማዔ፤ ዬያሮ ሙሴ ኮራፓ ሺኢከ። 4 ናንጊና ናንጋ ጎዳ ጋዓንቲ ሙሴዎ፡- «ኩጮና ዑንኮ ዛሎ ዓርቂ ዔከ» ጌራ ዓይሢ፤ ሙሴ ፔ ኩጮና ዔካዛ ጊንሣ ኮኦሎ ማዔ። 5 ናንጊና ናንጋ ጎዳ ሙሴዎ፡- «ዔያቶኮ ቤርታኣ ዓድንሢ ዓብራሃሜንታ ዩሳኣቄንታ ያይቆኦቤንታኮ ያኣዛሢ፣ ናንጊና ናንጋ ጎዳ ኔኤዎ ጴዴያ ማዔሢ ዒሰራዔኤሌ ዓሳ ጉሙርቃንዳጉዲ ዬኖ ማዴ» ጌዔ።

6 ዬካፓ ሃሣ ናንጊና ናንጋ ጎዳ ሙሴዎ፡- «ኩጮ ኔኤኮ ሾኦጳ ዳከ» ጋዓዛ፣ ዒዚ ኩጮ ፔኤኮ ሾኦጳ ዳከ፤ ኩጮ ዒ ጊንሣ ከሳዛ ሻቺጉዲ ቦኦሪ፣ ዑያይዳ ከሰካ ዶርዓሢና ዓርቂንቲያ ማዔ።

7 ናንጊና ናንጋ ጎዳ፡- «ኩጮ ኔኤኮ ጊንሣ ሾኦጳ ዳከ» ጋዓዛ፣ ሙሴ ኩጮ ፔኤኮ ሾኦጳ ዳከ፤ ዬካፓ ጊንሣ ከሳዛ ኩጫ

ሃንሳ ዑዎጉዲ ጌኤሺ ደርዓ ባኣያ ማዕኔ። 8 ናንጊና ናንጋ ጎዳ ዒዛም ኬኤዛያ፡- «ዓካሪ፣ ታ ዋልቆና ማዲንቴ ቤርታሳ ባኬሎ ዔያታ ጉሙርቁ ጎኔኬ ጌዒባኣያታቶ፣ ላምዓሲ ማዲንታ ባኮ ዔያታ ጉሙርቁንዳ። 9 ዩንሢ፣ ላምዖ ታ ዋልቆና ማዲንታ ባኮንሢ ዛጊ ዔያታ ጉሙርቁባኣያ ማዒ፣ ሃሃ ኔ ኬኤዛ ባኮ ዋይዚባኣቶ ዓባዬ ዋራፓ ዳካ ዋኣሢ ዔኪ ፃኣዶ ሳዖይዳ ዋሂ፤ ዓባዬ ዋሮይዳፓ ኔ ዔኬ ዋኣፃ ፃኣዶ ሳዖይዳ ሱጉሢ ማዓንዳኔ» ጌዔኔ።

10 ሙሴ ጋዓንቴ፡- «ናንጊና ናንጋ ጎዳሢዮ! ሃዳራ፣ ዩካ ታና ዳኪፖ፤ ቤርታኣ ማዖም ሃሢያ ታኣና ዋላ ኔ ጌሰቲዮ ዓርቁማፓ ዓርቃዖም ታኣኮ ጌሰቲሢ ዔራቶ ባኣሴ፤ ታኣኒ፡- ታኣኮ ዳንጋ ቁንጫልቃያ፣ ሃሃ ፒዚሲ ጌሰታኒያ ዳንዳዑዋያኬ» ጌዔኔ።

11 ዩካፓ ናንጊና ናንጋ ጎዳ ሙሴም፡- «ዓሲም ዳንጋ ማዢሢ ዖናዳይ? ዳንጋ ጌሰቲዋያና ዋይዚ ዋይዙዋያ፤ ጊንሢ ዓኣፒ ዓኣያና ዓኣፒ ባይቁያና ማሃሢ ዖናዳይ? ዩያ ቢያ ማዳሢ ታና፣ ናንጊና ናንጋ ጎዳቲዋዓዳ? 12 ዩያሮ ሃሢ ዓኣዳ! ታኣኒ ኔኤና ዋላ ማዒ ኔ ጌሰታንዳጉዲ ማኣዳንዳኔ፤ ኔ ዓይጎ ጌሰታኒ ኮይሳቴያ ታ ኔኤም ኬኤዛንዳኔ» ጌዔኔ።

13 ሙሴ ዒማና፡- «ናንጊና ናንጋ ጎዳሢዮ! ሃዳራ ሜሌ ዓሲ ዳኬ» ጌዔኔ።

14 ናንጊና ናንጋ ጎዳ ሙሴይዳ ዳጋዳዖ፡- «ሌዋ ዓሲ ማዔ፣ ኔ ጌርሲ፣ ዓኣሮኔ ዓኣያቲዋዓዳ? ዒዚ ቃራ ጌሰታያ ማዔሢ ታ ዔራኔ፤ ሃሢ ሃይሾ፣ ዒዚ ኔ ኮይላ ሙካኔ፤ ኔና ዒዚ ዳንቃዖ ዒናፓ ኮሺ ዋዛዳንዳኔ። 15 ዒዛም ኔኤኒ ኬኤዛንዳኔ፤ ዒዚ ኬኤዛንዳ ባኮዋ ኔ ዒዛም ዒና ዓኣሢ ኬኤዛንዳኔ፤ ላምዓሢ ዒንሢ ዋይቲ ጌሰታንዳቴያ ሃሃ ዒንሢ ዓይጎ ማዳኒ ኮይሳቴያ ታ ዒንሢም ዔርዛንዳኔ፤ 16 ዒዚ ኔና ማዒ ዳሮም ኬኤዛንዳኔ፤ ኔኤኒያ ዒዛም ዖኣሲጉዲ ማዒ ኬኤዛንዳኔ። 17 ታ ዋልቆና ማዲንታ ባኮ ባኮ ኔ ማዳንዳ ሃሮ ኮኣሌሎዋ ዔኪ ዓኣዳ» ጌዔኔ።

ሙሴኮ ጊብፄ ዓጮ ባንሢ ማዒያ

18 ሙሴ ፔኤኮ ባይሲ፣ ዮቴሬ ኮራ ዓኣዳዖ፡- «ጊብፄ ዓጮይዳ ናንጋ፣ ታ ፃጰ ባንሢ ማዒ ዳንዲ ሸምፔና ዔያታ ዓኣቲ ታ ዛጎም» ጌዒ ዖኣጫዛ፣ ባይሲ ዒዛ፡- «ኮሺ ዳንዴ» ጌይ ዳኬኔ።

19 ሙሴ ሃጊ ሚዲያሜይዳ ዓኣንቴ ናንጊና ናንጋ ጎዳ ዒዛም፡- «ኔና ዋዳኒ ኮዓ ዓሳ ቢያ ሃይቁሢሮ ጊብፄ ዓጮ ማዒ ዳንዴ» ጌዒ ኬኤዜኔ። 20 ዩያሮ ሙሴ ፔኤኮ ማቸንታ ዓቲንቆ ናኣቶንሢንታ ሃሪ

ቶጊሲ ጊብዳ ዓጮ ዓኣዲያ ዔቄኔ፤ ያኦሲ ዋልቄና ማዲንታ ባኮ ዲዎ ያኦሲ ኮኦሎዎ ዒማና ዒ ኩጫ ዔኪ ዓኣዲኔ።

21 ለሚ ጊንሣ ናንጊና ናንጋ ጎዳ ሙሴም፡- «ዓካሪ፥ ሃሢ ኔኔኒ ጊብዳ ዓጮ ማዒ ዓኣዲያይዳ ማዒሢሮ ኔኔም ታ ዒንጌ ዋልቆና ኔ ማዲንዳ፥ ታ ዋልቆና ማዲንታ ባኮ ካኣቲ ቤርታ ኔ ማዲንዳያ ኮይሳሢ ዋሊፖ፤ ያዲ ማዒቶዎ ካኣቲኮ ዒኖ ታ ዶዲ ማሃንዳሢሮ ዴሮ ሹሌዔና ጉሪ ዒዚ ሃሻዓኬ። 22 ዬኖ ዎዶና ታኣኒ፥ ናንጊና ናንጋ ጎዳ ካኣቲም ኬኤዛ ባኮ ሂዚ ጌዒ ኬኤዜ፡- «ዒሰራዔኤሌ ታኣኮ ቶይዶ ናዓሢኬ፤» 23 ታኣኒ፥ ዬይ ናዓሢ ታና ካኣሽካንዳጉዲ ሃሹ ጌዒ ኔኔም ኬኤዜኔ፤ ኔኔኒ ጋዓንቴ ዒ ዴንዲዎጉዲ ላኣኔ፤ ዬያሮ ሃሢ ኔኔኮ ናኣዚ ቶይዳሢ ታ ዎዲንዳኔ። »

24 ሙሴ ጊብዳ ዓጮ ዓኣዲያይዳ ዓኣንቴ ዒዚ ሃውሹ ጉርዶይዳ ናንጊና ናንጋ ጎዳ ዒዛ ዴንቄ ዎዲኒ ኮዔኔ። 25 ዒዛኮ ማቻ ሲፓራ ጳሽኪ ዴንዲ ቲሊንጊ ዓጬ፥ ዔኪ ፔኤኮ ናዖኮ ዓቲንቶ ቤርቶ ቲቄኔ፤ ሙሴኮ ቶኮዎ ዬኖ ቲቄንቴዞና ካንሣዖ ሙሴ ኮራ፡- «ዓካሪ ኔኔኒ ታኣኮ ሱጉሢ ዑኡታኬ» ጌዔኔ፤ 26 ዬካፓ ናንጊና ናንጋ ጎዳ ሙሴ ዎዲዎዖ ሃሽ ማኣሬኔ፤ ዒዛ ዒማና፡- «ዓቲንቶ ቤርቶ ቲቄዖ ዛሎና ኔ ታኣኮ ሱጉሢ ዑኡታኬ» ጌዔኔ።

27 ናንጊና ናንጋ ጎዳ ዓኣሮኔም፡- «ሙሴና ዎላ ካኣማኒ ዓሲ ናንጉዎ ዳውሎ ዓኣዴ» ጌዔኔ። ዒዚ ያኦሲ ዲኮ ባንሢ ዓኣዲ፥ ዒኣካ ሙሴ ዴንቃዖ ሄርቄኔ። 28 ሙሴ፥ ናንጊና ናንጋ ጎዳ ዒዛ ጊብዳ ዓጮ ዓኣዲንጎ ጋዓዖ ኬኤዜ ባኮና ዒዚ ማዲንዳጉዲ ዓይሢ ያኦሲ ዋልቆና ማዲንታ ባኮ ቢያ ዓኣሮኔም ኬኤዜኔ። 29 ዬካፓ ሙሴና ዓኣሮኔና ጊብዳ ዓጮ ዓኣዲ ዒሰራዔኤሌ ዴሮኮ ሱኣጎ ፔቴይዳ ቡኩሴኔ። 30 ዓኣሮኔያ ናንጊና ናንጋ ጎዳ ሙሴም ኬኤዜ ባኮ ቢያ ዔያቶም ኬኤዜኔ፤ ሙሴ ዒማና ያኦሲ ዋልቄና ማዲንታ ባኮ ዴሮ ቤርታ ማዲኔ። 31 ዬያሮ ዴራ ጉሙርቄኔ፤ ናንጊና ናንጋ ጎዳ ዔያቶ ባንሢ ሙኪ ዔያቶ ዛጌያ ማዒሢና ዔያቶይዳ ሄሌ ሚጪንቴዖባኣ ጌኖ ማዲ ዴንቄሢ ዎይዛዖ ጉምዓቲ ዚጊ ያኦሲ ካኣሽኬኔ።

5

ሙሴና ዓኣሮኔናኮ ካኣቲ ቤርቶ ሺኢኪዎ

1 ዬካፓ ሙሴና ዓኣሮኔና ጊብዳ ዓጮ ካኣቲ ቤርቶ ዓኣዲ፡- «ዒሰራዔኤሌ ያኣዛሢ፥ ናንጊና ናንጋ ጎዳ «ዴራ ዓሲ ናንጉዎ ዳውሎ

4:23 4:23 ኬሲ. ማግ 12:29።

ዓኣዲ፡ ቦንቾ ከሊ ገሢ ታና ቦንቻንዳጉዲ ዴር ታኣኮ ሃሽ፡ ኔኤም ጋዓኔ» ገዓኔ።

2 ካኣቲ ማሃዖ፡- «ናገረና ናገጋ ጎዳሢ ምያዳይ? ዒዚ ታና ዓይሄም ሞይዚ ዒሰራዔኤሌ ታ ሃሻሢ ዓይጎርዳይ? ናገረና ናገጋ ጎዳ ጎዖሢ ታኣኒ ዔሩሞ፤ ዒሰራዔኤሌያ ታ ሃሻዓኩ» ገዓኔ።

3 ሙሴና ዓኣሮነና ዒዛም፡- «ዔብሪ ዓሶኮ ምኣዛሢ ኦኡም ጴዳኔ፤ ሃይሃ ከሊ ጎይሢ ዓሲ ናገጉሞ ዳውሎ ዓኣዲ ኦ ምኣዛሢ፡ ናገረና ናገጋ ጎዳሢም ዒጎጎ ባኣዚ ኦ ዒጎጊ ካኣሽካንዳጉዲ ኦና ዳኬ ገይ ኔና ኦ ምኣላኔ፤ ኦኡኒ ዩያ ማዲባኣታቶ ናገረና ናገጋ ጎዳ ኦና ምልዚና፡ ሃሃ ዶርዖና ጋፒሳንዳኔ» ገዒ ከኤዘኔ።

4 ካኣቲ ዔያቶ ኮይላ፡- «ዒንሢ፡ ሙሴና ዓኣሮነና ሞይዙዎቲ! ዴራ ማዶ ቤልጻዳንዳጉዲ ዒንሢ ኮዓሢ ዓይጎርዳይ? ዴንዲ ዒንሢኮ ማዶ ማዲሞቲ! 5 ዒንሢ ገብፃ ዓጮ ዓሶይዳፓ ፓይዶና ኮሺ ዲበኔ፤ ዩይ ዒንሢም ዳካዛ ዓሶ ማዶ ላኣጊ ሺራ ዒንሢ!» ገዓኔ።

6 ዩካፓ ዒማ ከሎና ካኣቲ ፓኣርኔ፡- ሚጠንቱሞ፡ ማዶ ማዲሳ ፑርታ ማዔ ገብፃ ዓጮ ዓሶንታ ማዶ ማዲሻ ዒሰራዔኤሌ ዓሶኮሞ ሱኡጎናም፡- 7 «ጸኡቤ* ኮሾንዶ ፑቆ ዴርም ምንደሲ ጎይዖ ዒንገረፑ፤ ዔያታ ፔኤር ፑቆ ዴንዲ ኮዒ ዔኮንጎ፤ 8 ጋዓንቲ ቤርታ ዔያታ ማኣሢዳፓ ፔቲ ጸኡቤታ ምፓጠሱሞ ማኡ ሺኣሻንዳጉዲ ዔያቶይዳ ምልቃዲሞቲ፤ ኦ ምኣዛሢም ኦ ዒጎጎ ባኣዚ ዓኣዲ ዒንገ ካኣሽካንዳጉዲ ኦና ሃሽ፡ ዔያታ ገዒ ገዒ ታና ማታሳሢ ሚርጌ ማዳ ባኣዚ ባኣሢሮኩ፤ 9 ሉኡዚ ሃይሴ ሞይዛ ምዔ ዔያቶም ጴዲሞጉዲ፤ ሃሃ ቤርታ ዔያታ ማዲሢፓ ባሽ፡ ሃውሾባኣያ፡ ዶዲ ማዶ ዔያቶ ማዲሹሞቲ» ገዒ ዓይሄኔ።

10 ዩካፓ ሚጠንቱሞ ማዶ ማዲሳ ፑርቶ ገብፃ ዓጮ ዓሶንታ ዒሰራዔኤሌ ዓሶኮ ሱኡጎንታ ዓኣዲ ዒሰራዔኤሌ ዴርም፡- «ሃካፓ ሱካ ፑቃ ዒንሢም ዒንገንቱሞጉዲ ካኣቲ ላኣጊኔ፤ 11 ዓካሪ፡ ዒንሢ ዒንሢሮ ዴንዲ ዓንካፓታቶ ሞ ኮዒ ዔኪ ዩዓንዳያ ኮይሳኔ፤ ጋዓንቲ ዒንሢ ማኣ ጸኡብኮ ሚርጉማ ምንደሰካፓ ፓጫንዳያ ኮይሱሞ።» ገዓኔ። 12 ዩያር ዴራ ፑቆ ኮዒ ዔኪ ዩዓን ገብፃ ዓጮ ቢያ ዴንዳኔ። 13 ሚጠንቱሞ፡ ማዶ ማዲሳ ዓሳ፡- ቤርታ ፑቆ ዒንጋዛ ዔያታ ማኡ ሺኣሻማ፤ ዒማ ፓይዶ ኩንሢ ሺኣሻንዳጉዲ ዒሰራዔኤሌ ዓሶ ማታሰሢ ዓርቄ። 14 ዩያታ ሚጠንቱሞ ማዶ ማዲሺሳ ፑርቶ

* 5:7 5:7 ጸኡቤ ዩና ባኤላ፡- ቶርጴ ፑቃና ምላ ሄርቁ ዢኤጤ ዓጠ ጎይሢ ዶዲሺፓፓ ማኣሪ ማኡሢሮ ኮሾ ዳካ ዳካ ላሾ ባኣዚኔ።

ገብጻ ዓጮ ዓሳ ማደ ማደ ዲሰራዔኤሌ ዓሶኮ ሱኡጎ፡- «ቤርታ ማዠሳሣሃጉዴያ ፀኡቦ ማዠሰሲ ዲንሣ ሺኢሹዋኣሣ ዓይጎርዳይ?» ጌዒ ጌዒ ጳርቃኔ።

15 ማደ ማደ ዲሰራዔኤሌ ዓሶኮ ሱኡጎ ካኣቲ ቤርቶ ሺኢካዎ፡- «ካኣቲዮ! ኑና ኔ ዓይሎ ዑጆይዳ ዓይጎ ሃያ ቢያ ባኮ ኔ ዴኤዲሴይ? 16 ፔቲታዎ ፑቃ ኑኡም ዲንገንቱዋንቲ ፀኡቦ ኑ ማዠንዳጉዲ ዓይሣንቲኔ፤ ሃሣ ገንሣ ዬያይዳ ኑ ጳርቁንቲ ጳርቁንቲ ዓኣኔ፤ ዳቢንታ ኑ ገዳፓቱዋንቲ ኔ ዴርፓኬ» ጌዒ ሜቶ ፔኤሲ ኬኤዜኔ።

17 ካኣቲ ዔያቶም፡- «ዲንሣ ማደ ናሽኩዋያ ቤልፃ ዓሲኬ፤ ሐኡኒ ዴንዲ ናንገና ናንጎ ጎዳም ዲንጎ ባኣዚ ዲንገ ካኣሽካንዳኔ፤ ኑና ሃሺ ጌዒ ዲንሣ ጎኦጫሣያ ዬያርኬ፤ 18 ሃሣ ዴንዲ ማደ ማደዋቲ፤ ፔቲታዎ ዲንሣም ፑቃ ዲንገንታዓኬ፤ ጎዓንቲ ቤርታ ዲንሣ ማዠ ፀኡቦጉዴያ ማዠ ማዠ ዲንሣ ሺኢሻንዳያ ኮይሳኔ» ጌዒኔ። 19 ማደ ማደ ዲሰራዔኤሌ ዓሶኮ ሱኡጎ ቤርታ ዔያታ ማዠ ጎይጆጉዴያ ፀኡቤ ኬላ ኬላ ማዠንዳያ ኮይሳሣ ዔሬ ዋደና ሜቶይዳ ዔያታ ኬይሣ ዴንቁኔ።

20 ካኣቲ ቤርታፓ ዔያታ ኬሰካዎ ዔያቶ ካፒ ዓኣ፡ ሙሴና ዓኣርኔና ዴንቁ፡- 21 «ካኣቲ ፓኣርኔንታ ዒዛና ዋላ ማደ ዴኤፖ ዓሶንታ ቤርታ ኑ ዒዲንቲያ ማዓንዳጉዲ ማሃ፤ ሃሣ ጨንቻ ዓፓርናኣ ኑና ዔያታ ዋደንዳጉዲ ማሃሣ ዲንሣታሣረ ናንገና ናንጎ ጎዳ ዲንሣ ማደ ዛጎንጎ! ዒዚ ዋጎንጎ!» ጌዒኔ።

ሙሴ ጆኦሲ ባንሣ ዒላቲ ዒላቶ

22 ሙሴ ገንሣ ናንገና ናንጎ ጎዳ ኮራ፡- «ናንገና ናንጎ ጎዳሣዮ! ሃያ ዴር ዑጆይዳ ሃያጉዴ ሜቶ ኔ ሂሊሳሣ ዓይጎርዳይ? ሃደ ማዔቶ ታና ኔ ሃካ ዓይጎር ዳኬይ? 23 ኔ ኬኤዛ ባኮ ታኣኒ ኬኤዛኒ ካኣቲ ኮይላ ሙከማፓ ዳርቃዎ ዒዚ ሃያ ዴይይዳ ዑሣ ዓኣዴ ሜቶ ዔኪ ዬዔኔ፤ ኔኤኒያ ሃያ ዴር ዓውሳኒ ማሊ ኮዒባኣሴ ጌይሣኬ» ጌዒኔ።

6

1 ናንገና ናንጎ ጎዳ ሙሴም፡- «ካኣቲ ፓኣርኔይዳ ታ ማደንዳ ባኮ ሃሣ ኔ ዛጎንዳኔ፤ ዒ ናሽኪባኣንቲ ታኣኮ ዴኤፖ ዋልቆና ዲሰራዔኤሌ ዓሶታ ዒዛ ሃሽሳንዳኔ፤ ሃሣ ታኣኮ ዴኤፖ ዋልቃፓ ዔቁያና ታዓጫፓ ኬሰኩዋቲ» ታ ዒዛ ጌይሰሳንዳኔ» ጌዒኔ።

2 ጆኦሲ ሙሴም ሂዚ ጌዒ ኬኤዜኔ፡- «ታኣኒ ናንገና ናንጎ ጎዳኬ፤ 3 ታኣኒ ቢያ ባኣዚ ዳንዳዓ ጆኦሲ ማዔሣ ዔርዚ ዓሰራሃሜም፡ ዪሳኣቁም ሃሣ ያይቆኦቤም ታ ጴዴኔ፤ ሩንገና ናንጎ ጎዳ» ጌይንታ

ታኦኩ ደማዴ ሱንጾና ጋባንቴ ታ ዔያቶም ደዲባኣሴ። 4 ሸኦቹ ማዒ ዔያታ ናንጋ፣ ካኣናኔ ባጮ ታ ዔያቶ ዳካልሳኒ ጫኣቄ። 5 ባካሪ ሃሢ ጊብፄ ባሳ ዔያቶ ባይሌ ማሂ ማታሳ ዒሰራዔኤሌ ባሶኮ ማታሂ ዒላቶ ታ ዋይዚ፣ ታ ዔያቶም ጫኣቄ ጫኣቄሞዋ ጸቀህኔ። 6 ዩያሮ ዒሰራዔኤሌ ባሶም ታ ጋባሂ ሂዚ ጌዒ ኬኤዙ፡- «ታኣኒ ናንጊና ናንጋ ጎዳኬ፤ ጊብፄ ባሳ ዒንሂዳ ሄሊሳ ባይሌሞ ማታሰካፓ ባውሲ ታ ዒንሂ ኬሳንዳኔ፤ ታኦኩ ደኤፖ ዋልቆና ማቶ ዔያቶይዳ ዔኪ ሙኪ ዒንሂ ታ ባውሳንዳኔ፤ 7 ታኣኒ ታ ዴሬ ዒንሂ ማሃንዳኔ፤ ጾኦሲያ ታ ዒንሂኮ ማባንዳኔ፤ ታ ዒንሂ ጊብፄ ባጮ ባይሌሞይዳፓ ኬሴ ባሶና ታኣኒ ናንጊና ናንጋ ጎዳ ማዔ ዒንሂኮ ጾኦሲ ማዔሂ ታና ዒንሂ ዔራንዳኔ። 8 ታኣኒ ናንጊና ናንጋ ጎዳኬ፤ ባሰራሃማም፣ ዩሳኣቄም፣ ሃሃ ያይቆኦቤማኣ ዳካልሳኒ ታ ጫኣቄ ባጩሎ ታ ዔያቶ ጌልዛንዳኔ፤ ሃሃ ዔያቶ ባጪ ማሂ ታ ዔያቶ ዳካልሳንዳኔ።» »

9 ሙሴ ዩያ ቢያ ዒሰራዔኤሌ ናኣቶም ኬኤዛዛ፣ ዔያታ ዒዛም ዋይዚባኣሴ፤ ባይጎሮ ጌዔቶ ዔያቶይዳ ሄሌ ባይሌሞ ማታሂ ዛሎና ናንጋ ዔያቶም ዴኤፄሂሮኬ።

10 ጊንሃ ሃሃ ናንጊና ናንጋ ጎዳ ሙሴም፡- 11 «ዴንዴ! ዒሰራዔኤሌ ባሳ ሃሮ ባጩሎይዳፓ ኬሰካንዳጉዲ ሃሾም ጊብፄ ካኣቲም ኬኤዙ» ጌዔ።

12 ሙሴ ጋባንቴ፡- «ታ ፃጰ ዒሰራዔኤሌ ባሳታፖ ታኣም ዋይዚባኣሴ፤ ካኣቲ ታኣም ዋይቲ ዋይዛኒ ዳንዳባይ? ኔ ታና ዛጋሂጉዲ ታ ጌኤሲ ዳንዳባይ» ጌዒ ማህኔ።

13 ናንጊና ናንጋ ጎዳ ሙሴና ባኣሮኔናም፡- «ዒሰራዔኤሌ ባሶ ጊብፄ ባጩይዳፓ ዔኪ ዒንሂ ኬሳንዳጉዲ ታኣኒ ዒንሂ ባይሃያ ማዔሂ ዒሰራዔኤሌ ባሶና ጊብፄ ካኣቲናም ኬኤዙዋቲ» ጌዒ ባይህኔ።

ሙሴና ባኣሮኔና ፃጰ

14 ዒሰራዔኤሌ ማኣሮ ባሶኮ ቶይዳ ሃካፓ ለካ ፓይዲንታ ባሶኬ፡- ያይቆኦቤኮ ቶይዳሂ ሮኦቤኤሌ ናኣታ ሃሮኬ፣ ፓሉ፣ ሄፂሮኔንታ ካሮሚ ጌይንታ ያይዶ ባቲንቄ ናይኬ፤ ዩንሂ ፔ ሱንጾና ሱንጾና ሮኦቤኤሌ ማኣሮ ባሶኮ ባደንሂኬ። 15 ሲሞኦኔኮ ካኣናኔ ባሶ ፃጰ ለኣሌሎይዳፓ ሾይንቴሂ ሻዑሌ ጊዳ ቃሳፖ ዩሙዔኤሌ፣ ያሚኔ፣ ያሃዴ፣ ያከኔና ያሃሬ ጌይንታ ናይ ባኣኔ፤ ዩንሂያ ፔ ሱንጾና ሱንጾና ሲሞኦኔ ማኣሮ ባሶ ባደንሂኬ። 16 ሌዋኮ ጌርሾኔ፣ ቄሃቴና ሜራራ ጌይንታ ናይ ባኣኔ፤ ዩንሂያ ፔ ሱንጾና ሌዋ ማኣሮ ባሶ ባደንሂ ማባዛ፣ ሌዋ ናንጌ ሌባ ጻኤታና ሃይሂታሚ ለንካይ

6:3 6:3 ማኸ. ማግ 17:1፤ 28:3፤ 35:11፤ ኬሲ. ማግ 3:13-15::

ለዕድናኩ። 17 ገርሾኔኮ ሊቢኒና ሸምዒ ገይንታ ዓተንቄ ናይ ዓኣኔ፤ ዒያቶኮዋ ማርገፔ ዜርሢ ዓኣኔ። 18 ቁሃቲኮ ዓምራሙ፣ ሂደሃራ፣ ኩብሮኦንና ዑዚዔኤሌ ገይንታ ዓተንቄ ናይ ዓኣኔ፤ ቁሃቲ ናንጌ ለዓ ጭታና ሃይሢታሚ ሃይሃ ለዕድናኩ። 19 ማራሪኮ ማሂሊና ሙሺ ገይንታ ዓተንቄ ናይ ዓኣኔ፤ ዩንሢንታ ዒያቶኮ ዜርጾንታ ቢያ ለዊ ፃጶኩ።

20 ዓምራሙ ዮኩቤዳ ገይንታዜሎ ዒዛኮ ዓዶ ገሮ ዒካዛ፣ ዒዛ ዒዛም ዓኣሮንና ሙሴና ሸዔኔ። ዓምራሙ ናንጌ ለዓ ጭታና ሃይሢታሚ ለንካይ ለዕድናኩ። 21 ዩፀሃራኮ ቆራሂ፣ ኔፔጌና ዚቢሬ ገይንታ ሃይሃ ዓተንቄ ናይ ዓኣኔ፤ 22 ዑዚዔኤሌኮ ማሻዒኤሌ፣ ዔልፃፓኔና ሰቲሬ ገይንታ ዓተንቄ ናይ ዓኣኔ።

23 ዓኣሮን ናፖሶ ጎሮሢ ገሮ ማዕዘሎ ዓሚናኣዳኣቤ ናዎ ዔልሻባ ጋዓዜሎ ዒካዛ ዒዛ ናኣዳኣቤ፣ ዓቢሁ፣ ዓላዜሬና ዒታማሬ ገይንታ ዓተንቄ ናይ ዒዛም ሸዔኔ። 24 ቆራሂኮ ዓቢሬ፣ ዔልቃና፣ ሃሃ ዓቢያሳፔ ገይንታ ዓተንቄ ናይ ዓኣኔ፤ ዩንሢ ቢያ ቆራሂ ዜርጾኮ ማኣሮ ዓሶ ዓዶንሢኩ። 25 ዓኣሮን ናኣዚ ዓላዜሬ ፑቱዒኤሌ ጎሮሢ ናዎ ዒካዛ ዒዛ ፒንሃሶ ጎሮሢ ሸዔኔ፤ ዩያታ ቢያ ለዊ ማኣሮ ዓሶኮ ዓዶንሢ ማዕ ቶይዶኩ።

26 ዩያቶ ባኣኮይዳፓ ናንገና ናንጋ ጎዳ ሙሴና ዓኣሮንና ዶኦራ፡- «ዒሰራዒኤሌ ዳሮ ፔኤኮ ፃጶና ፃጶና ገብፃ ዓጮይዳፓ ዒከ ኬሱዋቱ» ገዒ ዓይሢኔ። 27 «ዒሰራዒኤሌ ዳሮ ሃሺ» ገዒ ገብፃ ካኣቲና ገሰቴዛንሢ ዩንሢኩ።

ጾኦሲ ሙሴና ዓኣሮንናም ዓይሢ ዓይሢፃ

28 ናንገና ናንጋ ጎዳ ሙሴም ገብፃ ዓጮይዳ ኬኤዜ ዎዶና፡- 29 «ታኣኒ ናንገና ናንጋ ጎዳኩ፤ ታ ኔኤም ኬኤዛሢ ቢያ ገብፃ ዓጮ ካኣቲም ኬኤዜ» ገዒኔ።

30 ሙሴ ጋዓንቱ፡- «ታኣኮ ገሰቴሢ ዒራቶ ባኣያኩ፤ ካኣቲ ታኣም ዎዶቲ ዎይዛኒ ዳንዳዓንዳይ?» ገዒኔ።

7

1 ናንገና ናንጋ ጎዳ ሙሴም ሂዚ ገዒኔ፡- «ዎይዜ፣ ታ ኔና ገብፃ ካኣቲኮ ጾኦሲፊዲ ማሃንዳኔ፤ ኔ ገርሲ ዓኣሮንያ ጾኦሲ ማሊሢ ኬኤዛ ዓሰፊዲ ኔ ዛሎ ገሰታንዳኔ፤ 2 ታ ኔና ዓይሢሢ ቢያ ዓኣሮንያ ኬኤዜ፤ ካኣቲ ፔ ዓጮይዳፓ ዒያታ ኬሰካንዳፊዲ ዒሰራዒኤሌ ዓሶ ሃሸም ገዒ ካኣቲም ዒዚ ኬኤዛንዳኔ፤ 3 ጋዓንቱ ታኣኒ ካኣቲኮ

6:19 6:19 ፓይ. ማግ 3:17-20፤ 26:57-58፤ 1ጾኦሲ. ዓሃኩ 6:16-19።

ዒኖ ደዲሺ ዒጊጩዎን ማሃንዳሢሮ ዋዚጉዳ ዒጊቻን ማዕ ዲቃሢ ሄርሺሳ ባአዚ ታኣኒ ጊብዔ ዓጮይዳ ማዕቶዎ፡ 4 ዒንሢሞ ዒ ዋይዛባኬ፤ ዩካፓ ጊብዔ ዓጮይዳ ዳኤፒ ሜቶ ታኣኒ ኬይሲ ታኣኦ ዳሮ፡ ዒሰራዔኤሌ ዜርዖ ዓጩሎይዳፓ ዔኪ ታ ኬሳንዳኔ። 5 ዩያይዲ ታኣኦ ዋልቆ ኩጮ ዔያቶ ዑፃ ታ ዔቂሲ ዒሰራዔኤሌ ዓሶ ታ ዔያቶ ኩጫፓ ኬሴ ዎደና ጊብዔ ዓጮ ዓሳ ታኣኒ ናንጊና ናንጋ ጎዳ ማዕሢ ዔራንዳኔ፤»

6 ሙሴና ዓኣሮኔና ናንጊና ናንጋ ጎዳ ዔያቶ ዓይሢ ባኮ ቢያ ማዲ ኩንሣኔ። 7 ካኣቲና ዎላ ዔያታ ጌሰቲ ዎደና ሙሴኮ ሌዓ ሳሊታሚ ማዓዛ፡ ዓኣሮኔኮ ሳሊታሚ ሃይሆኬ።

ዓኣሮኔ ኮኣላ ሾኦሽ ማዕሢ

8 ናንጊና ናንጋ ጎዳ ሙሴና ዓኣሮኔናም፡- 9 «ጊብዔ ካኣቲ፡ ሂንዳ ዖኦሲ ዋልቆና ማዲንታ ዓኪ ባአዚ ማዲ ዒንሢኮ ዖኦም ታኣም ፔጋሲ ዔርዙዎቲ» ሂዚ ዒንሢ ኮራ ጌዔቶ፡ ዓኣሮኔ ፔኤኮ ኮኣሎ ዔኪ ካኣቲ ቤርታ ኬኤርንጎ፤ ዒማና ኮኣላ ላኣሚንቲ ሾኦሽ ማዓንዳኔ» ጌዔኔ። 10 ዩያር ሙሴና ዓኣሮኔና ጊብዔ ካኣቲ ኮይላ ዓኣዲ ናንጊና ናንጋ ጎዳ ዔያቶ ዓይሢ ጎይዖ ማዕኔ፤ ዓኣሮኔ ኮኣሎ ካኣቲንታ ዒዛና ዎላ ማዲ ዳኤፖ ዓሶ ቤርታ ኬኤራዛ፡ ኮኣላ ላኣሚንቲ ሾኦሽ ማዕኔ። 11 ዩካፓ ካኣቲ ፔ ዓጮይዳ ዔር ዓሶንታ ማርሾ ማርሻ ዓሶ ዔኤሊ ዔኪ ሙካዛ፡ ዔያታኣ ፔኤኮ ማርሾና ሃሣ ዒማ ጎይዖ ማዕኔ። 12 ዔያታ ፔኤኮ ኮኣሎ ኬኤሬም ኮኣላ ላኣሚንቲ ላኣሚንቲ ሚርጌ ሾኦሽ ማዕኔ፤ ጋዓንቲ ዓኣሮኔ ኮኣላ ዔያቶኮ ኮኣሎ ቢያ ማንዒ ዔኤዳኔ። 13 ዩይ ቢያ ያዲ ማዕንቲያ ካኣቲ ዒኖ ደዲሻዖ ማዖ ዒዳኔ፤ ናንጊና ናንጋ ጎዳ ዔያቶም ኬኤዜሢጉዲ ሙሴና ዓኣሮኔናም ዋይዛኒ ዒ ኮዒባኣሴ።

ጊብዔይዳ ኬዳ ዲማ ዲማ ፑርቶ ባኮ

ሃ. ዋኣዖኮ ሱጉዖ ማዒዖ

14 ዩካፓ ናንጊና ናንጋ ጎዳ ሙሴም ሂዚ ጌዔኔ፡- «ካኣቲ ዒኖ ደዲሺ «ዳር ታ ሃሻዒ» ጌዔኔ፤ 15 ዩያር ዚር ጉቲ ዓሚ ካኣቲ ኮይላ ዓኣዳ፤ ዒዚ ዓባዬ ዎር ባንሢ ኬዳንቲ ጎይዖ ዒዛና ኔ ካኣማንዳኔ፤ ሾኦኦ ማዒ ላኣሚንቲ ኮኣሌሎ ኩጫ ዓርቂ ዎር ዓጫ ዒዛ ካፔ። 16 ዒ ሙካዛ ሂዚ ዒዛም ጌዔ፡- ዔብሬ ዓሶኮ ዖኣዛሢ ዓሲ ናንጉዎ ዳውሎይዳ ታኣም ዔያታ ማዲንዳጉዲ ዳር ኔ ሃሻም ጌዒ ታ ኬኤዛንዳጉዲ ኔ ባንሢ ታና ዳኬኔ፤ ኔኤኒ ጋዓንቲ ሃኖ ሄላንዳኣና ዋይዛ ዒዳኔ። 17 ሃሢ ጋዓንቲ ታኣኒ ማዲንዳ ባኮና ናንጊና ናንጋ

7:3 7:3 ዳኪ. ማዶ 7:36።

ጎዳኮ ያኑሞ ኔ ናሽኩዋዎ ዔራንዳኔ፤ ሃኖ ኮኦሎና ዋሮ ዋኦ ያኑኒ ጳርቃዛ። ዋኦ ሱጉሢ ማዓንዳኔ ኮሺ ዛጌ። 18 ዋኦ ጊዳ ዓኦ ሞላሢ ሲያ ሃይቃንዳኔ፤ ዋሮ ዋኦ ሚርጌ ዛዒያይዳፓ ዔቁያና ጊብፄ ዓሳ ሃያ ዋራፓ ዋኦሢ ዲዒ ዑሽካኒ ዳንዳዒንዲሞሴ።» »

19 ናንጊና ናንጋ ጎዳ ሙሴም፡- «ዓኦሮኔ ፔኤኮ ኮኦሎ ዔኪ ጊብፄ ዓጮይዳ ዓኦ ዋሮንጎ ዳዋሢንጎ ቦቆሎ ዋኦ ሲያሢ ባንሢ ዘንካንዳጉዲ ኬኤዜ። ዋኦ ሲያ ላኦሚንጎ ሱጉሢ ማዓንዳኔ፤ ጎንጎና ያቶና። ዩያጉዲ ዋኦ ዲይንጎ ጌሢንጎ ባኮይዳ ዓኦ ዋኦኦ ዓቱዋዎ ጊብፄ ዓጮይዳ ዓኦ ዋኦሢ ሲያ ሱጉሢ ማዓንዳኔ» ጌዔኔ።

20 ሙሴና ዓኦሮኔና ናንጊና ናንጋ ጎዳ ዔያቶ ዓይሢ ጎይዎ ማዳኔ፤ ዓኦሮኔያ ካኦጎና ዒዛና ዋላ ማዳ ዴኤፖ ዓሶ ቤርጎ ኮኦሎና ዋሮ ዋኦ ጳርቃዛ ዋኦ ላኦሚንጎ ሱጉሢ ማዔኔ፤ 21 ዋሮይዳ ዓኦ ሞላሢ ሲያ ሃይቁም፡ ዋኦ ዛዔሢር ጊብፄ ዓጮ ዓሳ ዑሽካኒ ዳንዳዒባኦሴ። ጊብፄ ዓጮ ሱጉሢ ሌሊ ማዔኔ። 22 ዩካፓ ካኦጎኮ ማርሾ ዓሳ ፔ ማርሾና ዩያጉዲ ማዳዛ። ካኦጎ ቤርጎኦ ጎይዎ ዒኖ ደዲሺ ዋይዞ ዒፃያ ማዒያ ሃሾ ዒፄኔ፤ ናንጊና ናንጋ ጎዳ ጌዔ ጎይዎ ሙሴና ዓኦሮኔናም ዋይዞ ኮዒባኦሴ። 23 ፔቴጎ ዩያ ማዳንጎ ባኮ ሲያ ዔኤቢኬ ጎዑዋዎ ፔ ካኦጎ ማኦር ማዒ ዓኦዳኔ። 24 ጊብፄ ዓጮ ዓሳ ዋራፓ ዋኦ ዑሽካኒ ዳንዳዒባኦሢር ዑሽኮ ዋኦሢ ዴጎቃኒ ዋሮ ዓጮ ዔቴ ቦኦከኔ።

25 ናንጊና ናንጋ ጎዳ ዋሮ ዋኦ ሱጉሢ ማሢ ፑርቴሴሰካፓ ዋኦ ፑርቴያ ማዒ ላንካይ ኬሊ ዴዔኔ።

8

ሌ. ፓንቃሢ ዲቢያ

1 ዩካፓ ናንጊና ናንጋ ጎዳ ሙሴም፡- «ካኦጎ ኮራ ዓኦዲጋፓ ናንጊና ናንጋ ጎዳ ሂዚ ጋዓኔ ጌዒ ዒዛም ኬኤዜ፤ ጎኦም ማዳንዳጉዲ ጎኦኮ ዴር ሃሼ፤ 2 ዒፄኔ ኔ ጌዔቶ፡ ኔኤኮ ዓጮይዳ ፓንቆ ጎ ሚርጊሺ ሜጎጎንዳኔ። 3 ዓባዬ ዋራ ፓንቃሢና ኩማንዳሢር ዩካፓ ኬሰኪ ኬሰኪ ኔኤኮ ካኦጎ ማኦር፡ ኔ ዋርቃ ጋር፡ ኔኤኮ ሻኦይዳ፡ ኔኤና ዋላ ማዳ ዴኤፖ ዓሶና ኔኤኮ ዴርና ማኦር፤ ዩያጉዲ ሃሢ ናኦንጎ ሙኩቆ ቆኦርንጎይዳ ዓቱዋንጎ ጌላንዳኔ፤ 4 ፓንቃሢ ኮኦሚ ኮኦሚ ኔኤና ኔኤኮ ዴርና፡ ሃሢ ኔኤና ዋላ ማዳ ዴኤፖ ዓሶ ሲያሢ ዑያይዳ ሙካንዳኔ» » ጌዔኔ።

7:17 7:17 ዮሃ. ያፔዳ 16:4። 7:19 7:19 ሉቃ. 11:20።

5 ናንጊና ናንጋ ጎዳ ሙሴም፡- «ገንቃህ ከሰኪ ጊብጻ ዓጮ ቢያ ኩማንዳጉዲ ዋሮይዳ፣ ዳዋሂዳ ሃሃ ቦቆሎ ዋኦ፣ ቢያይዳ ኮኦሎ ዘንካንዳጉዲ ዓኣሮኔም ኬኤዜ» ጌዔኔ። 6 ዩያሮ ዓኣሮኔ ጊብጻ ዓጮ ዋኦ፣ ቢያ ባንህ ኮኦሎ ዘንካዛ ገንቃ ከሰኪ ዓጮ ጉቤ ኩሚኔ። 7 ጋዓንቴ ማርሾ ዓሳኣ ዩያጉዲ ፔ ማርሾና ገንቃህ ጊብጻ ዓጮይዳ ሻዲሴኔ።

8 ካኣቲ ሙሴና ዓኣሮኔና ዔኤላዎ፡- «ታኣና ታ ዳሮናይዳገ ሃያ ገንቃህ ሺኢሻንዳጉዲ ናንጊና ናንጋ ጎዳ ታኣም ሺኢቁዋቲ፤ ናንጊና ናንጋ ጎዳም ዔያታ ዒንጎ ባኮ ዒንጊ ካኣሽካንዳጉዲ ዒንሂኮ ዳሮ ታ ሃሻንዳኔ» ጌዔኔ።

9 ሙሴ ዒዛም ሂዚ ጌዒ ማህኔ፡- «ዋዛና ታ ሺኢቃንዳኔ፤ ነናንታ ኔኤና ዋላ ማዳ ዳኤገ ዓሰንታም ሃሃ ኔኤኮ ዳሮማኣ ሺኢቆንዶ ዋዶማ ሌሊ ኬኤዜ፤ ዩካገ ገንቃህ ኔኤና ኔ ማኣሮናይዳገ ቢያ ሃኪ ዓባዬ ዋሮይዳ ሌሊ ናንጋንዳጉዲ ታ ማሃንዳኔ።» 10 ካኣቲ ዒማና፡- «ያዲ ማዔቶ ዘሮ ታኣም ሺኢቁ» ጋዓዛ፣ ሙሴ ዒዛም፡- «ኔ ጌዔህጉዲ ታ ማዳንዳኔ፤ ዩያሮ ኔኤኒያ ኩ ጾኦዛህ ማዔ ናንጊና ናንጋ ጎዳጉዳያ ሜሌ ጾኦሲ ባኣህ ዔራንዳኔ። 11 ገንቃህ ኔኤና ኔ ማኣሮናይዳገ ቢያ፤ ሃሃ ኔኤና ዋላ ማዳ ዳኤገ ዓሰና ዳሮና ኮራገ ቢያ ባይቃንዳኔ፤ ዓባዬ ዋራገ ዓታዛ ሜሌ ቤሰካ ዳዳዓኩ» ጌዔኔ። 12 ዩካገ ሙሴና ዓኣሮኔና ካኣቲ ቤርታገ ከሰኪ ዓኣዲ፣ ካኣቲ ኮራ ዒ ዳኬ ገንቃህ ባይዛንዳጉዲ ሙሴ ናንጊና ናንጋ ጎዳ ሺኢቁኔ። 13 ሙሴ ሺኢቁ ጎይጾና ናንጊና ናንጋ ጎዳ ዓሰኮ ማኣራ ማኣራ፣ ዲሮ ጋሮና ሃሃ ቢያ ቤዘይዳ ዓኣ ገንቃህ ጉቤ ዋዳኔ። 14 ጊብጻ ዓሳ ገንቃህ ቢያ ቤዘይዳ ቡኩሳዛ ዓጮ ገንቃህ ዛዎና ኩሚኔ። 15 ካኣቲ ገንቃህ ሃይቁህ ዛጌዎዋ ናንጊና ናንጋ ጎዳ ጌዔ ጎይጾ ሙሴና ዓኣሮኔናም ዋይዘ ዒዔኔ።

ሚ. ጩጉጩ ዲቢዎ

16 ናንጊና ናንጋ ጎዳ ሙሴም፡- «ሳዎ ሲላሎ ኮኦሎና ጳርቃንዳጉዲ ዓኣሮኔም ኬኤዜ፤ ጊብጻ ዓጮይዳ ዓኣ ሲላላ ቢያ ጩጉቹ ማዓንዳኔ» ጌዔኔ። 17 ዓኣሮኔ ኩጮ ዔቁሲ ኮኦሎና ሳዎ ሲላሎ ጳርቃዛ፣ ጊብጻ ዓጮ ዓኣ ሲላላ ቢያ ጩጉቹ ማዓዎ፣ ዓሰና ቆልሞናይዳ ቢያ ሻዳኔ። 18 ማርሾ ዓሳ ፔኤኮ ማርሾና ጩጉቹ ከሰኪንዳጉዲ ማርሾንቴያ ዔያቶም ሃኒባኣሴ፤ ቤርታኣ ጩጉጩ ሌሊ ቢያ ቤዘይዳ ዳዳኔ። 19 ማርሾ ዓሳ፡- «ሃያ ጾኦሲ ማዳ ባኣዚኬ» ጌዒ ካኣቲም ኬኤዛዛ፣ ካኣቲ ጋዓንቴ ዒና ዶዲሼኔ፤

ናንገና ናንገ ጎዳ ቤርታ ኬኤዜሢጉዲ ሙሴና ዓኣርኔናም ዋይዛኒ
ዒ ኮዒባኣሴ።

ሢ. ሶኦገገቦ ወፃሎ ዲቢዖ

20 ናንገና ናንገ ጎዳ ሙሴም፡- «ዚሮ ጉቴ ዓሚ ካኣቲ ኮራ
ዓኣዲ ዒዚ ዓባዬ ዋሮ ኬዳኣና ዒዛና ካኣሚጋጋ፣ ናንገና ናንገ
ጎዳ ኔኤም ሂዚ ጋዓኔ ጌዒ ዒዛም ኬኤዜ፤ ታኣም ማዳንዳጉዲ
ታኣኮ ዳሮ ሃሼ! 21 ኔ ዒፃቶ ጋዓንቴ ኔኤና ኔ ማኣሮናይዳ ቢያ፤
ሃሃ ኔኤና ዋላ ማዳ ዴኤፖ ዓሶና ኔኤኮ ዳሮ ቢያ ዑፃ ሚርጌ ዳዓ
ሶኦገገቦ ወፃሎ ዔኪ ሙኪ ታ ኔና ማታሳንዳሢ ታና ዔሬ፤ ጊብፃ
ዓጮ ዓሶኮ ማኣሮንታ ሳፖንታይዳ ቢያ ወፃሎ ኩማንዳኔ። 22 ታኣኮ
ዳራ ናንገ፡ ጌኤሴኤሚይዳ ጋዓንቴ ወፃሎ ፔቲታፖ ጌሉዋጉዲ
ታ ዲማሳንዳኔ፤ ዬያ ታ ማዳንዳሢ ታኣኒ ናንገና ናንገ ጎዳ ሃኖ
ዓጮሎይዳ ማዳያታሢ ኔ ዔራንዳጉዲኬ። 23 ኔኤኮ ዳሮና ታ ዳሮና
ባኣካ ዲሙሞ ዓኣያ ታ ማሃንዳኔ፤ ዬያ ታ ዋልቆና ማዳንታ ዓኮ ባኮ
ዚሮ ታ ማማዳንዳኔ» ጌዔኔ። 24 ናንገና ናንገ ጎዳ ካኣቲኮ ካኣቲሞ
ማኣሮንታ ዒዛና ዋላ ማዳ ዴኤፖ ዓሶ ማኣራ ቢያ ወፃሎ ኩንሃዛ፡
ጊብፃ ዓጮ ቢያ ዲቢ ወፃሎና ፑርቴኔ።

25 ዩካፓ ካኣቲ ሙሴና ዓኣሮኔና ዔኤላፖ፡- «ዒንሢ ዴንዲ
ሃይካ ዓጮይዳ ዒንጎ ባኮ ዒንገ፡ ዒንሢኮ ናንገና ናንገ
ጎዳሢ ካኣሽኩዋቲ» ጌዔኔ። 26 ሙሴ ማሃ፡- «ዬያይዳኒ ኦና
ኮይሳያቲዋሴ፤ ዓይጎሮ ጌዔቶ ኦ ጆኦዛሢ ማዔ ናንገና ናንገ
ጎዳሢም ዒንጎ ባኣዚ ማሂ ኦ ዒንገ ቆልሞ ዛሎና ጊብፃ ዓሳ ኦና
ሻኣኪንታንዳኔ፤ ዬያቶ ቆልሞ ኦኤኒ ዔኪ ጊብፃ ዓሶ ቤርታ ናንገና
ናንገ ጎዳም ዒንጎ ባኣዚ ማሂ ዒንጌቶ ጊብፃ ዓሳ ኦና ሻኣኪንቲ
ዲጋና ሹቻ ዲዓዓዳ? 27 ዬያሮ ኦ ጆኦዛሢ ማዔ ናንገና ናንገ ጎዳ
ኦና ዓይሢ ጎይፖ ሃይሃ ኬሊ ጎይሢ ዓሲ ናንጉዋ ዳውሎ ዓኣዲ
ዒንጎ ባኮ ዒንገ ኦ ዒዛ ካኣሽካንዳያ ኮይሳኔ» ጌዔኔ።

28 ካኣቲ ዔያቶም፡- «ፔቶ ዒንሢ ሃኪ ዴንዲዋፖ ዓሲ ናንጉዋ
ዳውሎይዳ ዒንሢ ጆኦዛሢ ማዔ ናንገና ናንገ ጎዳሢም ዒንጎ ባኮ
ዒንገ ካኣሽካንዳቲ ታ ዒንሢ ሃሻንዳኔ፤ ታኣማኣ ሸኢቁዋቲ» ጌዔኔ።

29 ሙሴ ዒማና፡- «ዚራኣ ኬሎ ወፃላ ኔናንታ ኔኤና ዋላ ማዳ
ዴኤፖ ዓሶንታ፡ ሃሃ ኔኤኮ ዳሮንታይዳፓ ባይቃንዳጉዲ ታ ሃሢ
ኔጊዳፓ ፓፓቂንታፖ ናንገና ናንገ ጎዳ ሸኢቃንዳኔ፤ ጋዓንቴ ዳራ
ናንገና ናንገ ጎዳም ዒንጎ ባኮ ዒንገ ካኣሽኮ ካኣኩ ካኣሽካኒ
ዴንዲዋጉዲ ላኣጊሢና ላሚ ኔ ታና ጌኤሻንዳያ ኮይሱዋሴ» ጌዔኔ።

30 ሙሴ ካአቲ ቤርታፓ ኬሰካዎ ናንጊና ናንጋ ጎዳ ሺኢቄኔ፤
31 ናንጊና ናንጋ ጎዳ ሙሴ ጌዔሢጉዲ ቢያ ማዳኔ፤ ወፃሎ ካአቲንታ
ካአቲና ዎላ ማዳ ዴኤፖ ዓሶና ሃሣ ዴር ቢያሢና ቤርታፓ ፔቲታዎ
ዓይሱዎዎ ባይዜኔ፤ 32 ማዔቶዎ ካአቲ ፔኤኮ ዒኖ ዶዲሺያና
ዒሰራዔኤሌ ዴር ሃሾ ዒዳኔ።

9

ሬ. ቆልሞ ጋፓዎ

1 ናንጊና ናንጋ ጎዳ ሙሴም፡- «ካአቲ ኮራ ዓኣዲ ሩዕብሬ ዓሶ
ዎኦዛሢ ማዔ ናንጊና ናንጋ ጎዳ ሂዚ ኔኤም ጋዓኔ» ጌዔ፤ ታና
ካአሽካንዳጉዲ ታኦኮ ዴር ሃሺ! 2 ለሚ ኔ ሃሣ ዔያታ ዴንዲዎጉዲ
ላኦቶ፤ 3 ኔኤኮ ቆልሞ ቢያይዳ ፑርታ ዶርዎ ዔኪ ሙኪ ታ
ባይዛንዳኔ፤ ዬያር ኔኤኮ ፓራሢ፤ ሃራ፤ ጋኣላሢ፤ ባኣታ፤ ማራቶንታ
ዎኦርንታ ጋፓንዳኔ። 4 ዒሰራዔኤሌ ዓሶና ጊብፄ ዓሶና ቆልሞ ባኣካ
ዲሙዎ ታ ጌሃንዳኔ፤ ዬይያ ዒሰራዔኤሌ ዓሶኮ ቆልሞይዳፓ
ፔቲታዎ ሃይቃዓኬ። 5 ታኣኒ፤ ናንጊና ናንጋ ጎዳ ዬያ ቢያ ዚር ማዳኒ
ማሌኔ» ጌዔኔ።

6 ናንጊና ናንጋ ጎዳ ኬኤዜሢጉዲ ዚር ጉቲሎ ዬያ ማዳሢር
ጊብፄ ዓሶኮ ቆልሞ ቢያ ኩዳዛ፤ ዒሰራዔኤሌ ዓሶ ቆልሞይዳፓ
ፔቲታዎ ሃይቁባኣሴ። 7 ካአቲ ዬያ ባኮ ቢያ ያኦጩ ዎዶና
ዒሰራዔኤሌ ዓሶ ቆልሞይዳፓ ፔቲታዎ ሃይቁባኣሢ ዒዛም
ኬኤዚንቲኔ፤ ዬይ ያዲ ማዔቶዎ ካአቲ ዒኖ ፔኤኮ ዶዲሺ ዴር
ሃሾ ዒዳኔ።

ሴ. ዳርጮ ማላ ኪዎ

8 ዬካፓ ናንጊና ናንጋ ጎዳ ሙሴና ዓኣሮኔናም፡- «ዒንሢ ኩጮና
ናኦ ጋርካፓ ዳካ ዲቢንሢ ዑጪ ዑጪ ዔኩዎቲ፤ ዬንሢ ሙሴ
ካአቲ ቤርታ ሺባርይዳ ላኦኦንጎ፤ 9 ዬይ ሲላሊ ማዒ ጊብፄ
ዓጮይዳ ቢያ ላኦኦንቲ ዎዶና ዴርና ቆልሞናይዳ ሚርጌ ሜታሳ
ዳርጮ ማላ ኪሢ ኬዳንዳኔ» ጌዔኔ። 10 ዔያታ ዳካ ዲቢንሢ
ዔኪ ሙኪ ካአቲ ቤርታ ዔቄኔ፤ ዒማና ሙሴ ሺባርይዳ ላኦኦ
ዴርና ቆልሞና ዳኤፒ ዳርጮ ማላ ኪሢና ሜታዳኔ። 11 ዬኖ
ዎዶና ማርሾ ማርሻ ዓሳ ሙሴ ቤርቶ ሙካኒ ዳንዳዒባኣሴ፤
ዓይጎር ጌዔቶ ዔያታ ሃንጎ ጊብፄ ዓሶጉዲ ቢያ ዳርጮ ማላ
ኪያና ሜታዳሢርኬ፤ 12 ጋዓንቲ ሃሣ ናንጊና ናንጋ ጎዳ ካአቲኮ

9:10 9:10 ዮሃ. ያፕ. 16:2።

ዒኖ ደዲሹሢር ቤርታ ሙሴም ኬኤዚንቴሢጉዲ ካኣቲ ሙሴና ዓኣሮኔናም ዋይዛኒ ኮዒባኣሴ።

ሹ. ሻጮ ኬዲያ

13 ዩካፓ ናንጊና ናንጋ ጎዳ ሙሴም፡- «ዚሮ ጉቲ ዓሚ ዓኣዲ ካኣቲ ዳንቃያ ሌብሬ ዓሶኮ ጆኦዛሢ ማዔ ናንጊና ናንጋ ጎዳ ኔኤም ሂዚ ጋዓኔ። ጌዒ ዒዛም ኬኤዘ፤ ታና ካኣሽካንዳጉዲ ታኣኮ ዳር ሃሹ፤ 14 ኔ ዒፃቶ ጋዓንቴ ሳገይዳ ታናጉዳ ያኣሲ ባኣያ ማዔሢ ኔ ዔራንዳጉዲ ኔናኣ ዓይሱዋያ፤ ሃሢ ኔኤና ዋላ ማዳ ዴኤፖ ዓሶንታ ኔኤኮ ዳሮንታ ታኣኮ ዳማ ዳማ ደርዓሢ ዋልቆ ዳኪ ሃሢ ታኣኒ ሜቶይዳ ዒንሢ ዓጋንዳኔ። 15 ኔኤና ኔ ዳሮናይዳ ደርያ ዓጋኒ ታኣኮ ዋልቆ ኩጮ ታ ዋንዳ ዔቁሴያታቲ፤ ቢያሢ ዒንሢ ቤሲ ባይቃንዳያታንቴኬ። 16 ጋዓንቴ ሱንፃ ታኣኮ ዓጮ ቢያይዳ ዔኤሊንታንዳጉዲ ዋልቆ ታኣሲ ታ ኔና ዳዋኒ ኮዔሢሮ፤ ኔኤኒ ሹምፖና ናንጋንዳጉዲ ታኔና ሃሹኔ። 17 ኔ ሃማ ሄላንዳኣና ዒኖ ኔኤኮ ደዲሹ ታኣኮ ዳር ሃሹ ዒፃኔ። 18 ዚሮ ሃይማ ዋይ ጊብፃ ዓጮይዳ ዛጊንቲ ቤቁባኣ ዴኤፒ ሻቺ ዒርዚ ታ ዋርቁሳንዳኔ፤ 19 ሃሢ ሄንፃ ቤዘይዳ ዓኣ ቆልሞና ዩካ ዓኣ ባካ ቢያ ማኣሮ ባንሢ ሙካንዳጉዲ ዓይሢ፤ ማኣሪ ጌሊባኣ ዓሲ ማዔቲያ ቆልሞ ሻጮና ጳርቂንቲ ቢያ ጋፓንዳኔ።» ጌዔኔ። 20 ካኣቲና ዋላ ማዳ ፔቲ ፔቲ ሱኡጋ ናንጊና ናንጋ ጎዳ ኬኤዘ ባኮ ሚርጌና ዒጊጮሢሮ ዔያቶኮ ማዳ ዓሶና ቆልሞና ማኣሪ ጌላንዳጉዲ ማዳኔ። 21 ዓቲ ዓሳ ጋዓንቴ ናንጊና ናንጋ ጎዳ ኬኤዘ ባኮ ቦሂሢና ፔኤኮ ማዳ ዓሶና ቆልሞና ቦኦላ ሃሹኔ።

22 ዩካፓ ናንጊና ናንጋ ጎዳ ሙሴም፡- «ኔ ኩጮ ሌካ ጫሪንጮ ባንሢ ዔቁሴ፤ ሻቺ ጊብፃ ዓጮ ቢያይዳ ዋርቃንዳኔ፤ ዳሮንታ ቆልሞንታ፤ ጎዳይዳ ዓኣ ባቃሎዋ ጉቤ ባይዛንዳኔ።» ጌዔኔ። 23 ዩያሮ ሙሴ ኮኦሎ ዔኪ ጫሪንጮ ባንሢ ዘንካዛ፤ ናንጊና ናንጋ ጎዳ ጉጉንሢና ሻቺና ኬይሴም ሳዔላ ጉጉንፃ ዳፖና ጎሽቴኔ። 24 ናንጊና ናንጋ ጎዳ ሃይና ዩይና ጋዓ ጉጉንሢና ዘኤሊንሢሮ ዋላ ዓኣ ዴኤፒ ሻቺ ዒርዚ ዋርቁሹኔ፤ ዩያጉዳያ ሻቺ ዒርዚ ጊብፃ ዓጮይዳ ዋርቁ ቤቁባኣሴ። 25 ሻጮ ጊብፃ ዓጮይዳ ቢያ ቦኦላ ዓኣ ባኮ፤ ዓሶንታ ቆልሞንታ ዓይጎ ባኣዚያ ዓይሱዋያ ዋዲ ኩርሴኔ፤ ቦኦሎይዳ ዓኣ ቲኮና ባኮ ቢያ፤ ሃሢ ሚያዋ ቢያ ማንሢኔ። 26 ዒሲራዔኤሌ ዓሳ ናንጋ ጌኤሴኤሚይዳ ሌሊ ዩይ ሻጮ ባኣሴ።

9:16 9:16 ሮሜ 9:17። 9:24 9:24 ዮሃ. ያፔዳ 8:7፤ 16:21።

27 ካክቲ ሙሴና ዓኣሮኔና ዔኤሊሳዮ፡- «ዓካሪ ታኣኮ ደቢፃ ታኣም ዔርቲኔ፤ ናንገና ናንገ ጎዳ ፒዜኬ፤ ታኣና ታ ደሮና ጋዓንቴ ኑ ደቤኔ።
 28 ሻጮና ጉጉንፆና ፔቶ ኑኡም ሚርጌሢሮ ናንገና ናንገ ጎዳ ኑኡም ሸኢቁዋቲ፤ ጎኔ ታ ዒንሢሢ ሃሻንዳኔ፤ ሃካፓ ሴካ ዒንሢሢ ሃይካ ናንገንዳ ዎዳ ባኣሴ» ጌዔኔ።

29 ሙሴ ካክቲም፡- «ታኣኒ ካታማፓ ኬኬሰካዎ ኩጮ ታኣሲ ሌካ ጫሪንቺ ባንሢ ደገዲ ዔቂሲ ናንገና ናንገ ጎዳ ሸኢቃንዳኔ፤ ጉጉንፆ ዔቃንዳኔ፤ ሃሢ ሻጮኣ ሃካፓ ሴካ ኬዳዓኬ፤ ዬያ ጎይፆና ዓጫ ናንገና ናንገ ጎዳሮ ማዔሢ ኔ ዔራንዳኔ። 30 ጋዓንቴ ኔናንታኔኤና ዎላ ማዳ ደኤፖ ዓሶንታ ናንገና ናንገ ጎዳ ማዔ ፆኦሲ ዒጊጫንዲዋኣሢ ታ ዔራኔ» ጌዔኔ።

31 ዬሮ ዎደና ዔልዓሢ ሃጊ ቲሾ፡ ታልባሢያ ቡኒሢዳ ዓኣሢሮ ፔቲታዎ ዓቲዎፆ ጉቤ ጋፔኔ። 32 ዛርጋሢ ጋዓንቴ ኔጊ ካፃሢሮ ፑርቲዎፆ ዓቲኔ።

33 ሙሴ ካክቲ ቤርታፓ ኬሰካዎ ካታም ዙሎ ዓኣዳኔ፤ ዒማና ዒዚ ኩጮ ሌካ ዔቂሲ ናንገና ናንገ ጎዳ ሸኢቃዛ ጉጉንፆና ሻጮ ዒሮና ፔቲና ሻንቄኔ። 34 ካክቲ ዬያ ማዳንቴ ባኮ ዛጌዎፆ ጊንሢ ጎሚ ማዳኔ፤ ዒዛንታ ዒዛና ዎላ ማዳ ደኤፖ ዓሶንታ ዒሮ ደዲሻ ዒፃያ ማዔኔ። 35 ናንገና ናንገ ጎዳ ቤርታዲ ሙሴ ዛሎና ኬኤዜሢሢጉዲ ካክቲ ዒሰራዔኤሌ ዳሮ ሃሻ ዒፃኔ።

10

ቄ. ዓቢዎ ሚርጌፆ

1 ዬካፓ ናንገና ናንገ ጎዳ ሙሴም፡- «ላሚ ሃሢ ካክቲ ኮራ ጌሌ፤ ታኣኒ ዒዛንታ ዒዛና ዎላ ማዳ ደኤፖ ዓሶኮ ዒሮ ደዳያ ማዓንዳጉዲ ማሃሢ ዔያቶ ባኣኮይዳ ማሌ ሃሢ ታ ዎልቆና ማዳንታ ዓከ ባኣዚ ማዳኒ ማሊኬ፤ 2 ታ ዎልቆና ማዳንታ ዬያ ዓኮ ባኮ ታ ማዳዛ ጊብፃ ዓጮ ዓሶ ዎማይዲ ታ ማታሴቶዎ ዒንሢሢ ዒንሢሢ ናኣቶና ናኣቶኮ ናኣቶናም ኬኤዛንዳጉዲኬ፤ ዬያ ጎይፆና ታኣኒ ናንገና ናንገ ጎዳ ማዔሢ ዒንሢሢ ቢያሢ ዔራንዳኔ» ጌዔኔ።

3 ዬያሮ ሙሴና ዓኣሮኔና ካክቲ ኮራ ዓኣዳዮ፡- «ዒብሬ ዓሶኮ ፆኦዛሢ ማዔ ናንገና ናንገ ጎዳ ሂዚ ጋዓኔ፡ ታኣም ኔ ዓይሢንቴዎ ዒፃሢ ዓይዲ ሄላንዳኣናዳይ? ሃሢ ታና ካኣሽካንዳጉዲ ታኣኮ ዳሮ ሃሻ፤ 4 ኔ ዒፃያና ደዳቶ ጋዓንቴ ዚራኣ ኬሎይዳ ዲቢ ዓቢሢ ኔ ዓጮ ሙካንዳጉዲ ታ ዓይሢንዳኔ። 5 ዓቢዎኮ ሚርጌ ዲቡሞይዳፓ ዔቄያና ዓጮ ቢያ ካንቃንዳኔ፤ ሻጮይዳፓ ዓቲ ባኮ ቢያ ሚፆዎ

ዓይሱዎን ሙይ ባይዘንዳኔ። 6 ሃሣ ኔኤኮ ካአቱዎ ማኣሮንታ ኔኤና ማዳ ዳኤፖ ዓሳ ማኣሮንታ ኔኤኮ ዳሮ ማኣሮ ቢያ ዓቢፃ ኩማንዳኔ፤ ዩይ ባካ ቤርታ ኔ ዓድንሢ ዎደይዳፓ ሃሮ ሃላንዳኣና ሃሌ ማታሰካፓ ቢያ ባሼ ማዓንዳኔ» ። ጌዔኔ።

ዩካፓ ሙሴ ጊብፄ ካአቲ ቤርታፓ ኬሰኪ ዓኣዳኔ።

7 ካአቲና ዎላ ማዳ ዳኤፖ ዓሳ ካአቲ ኮራ፡- «ሃይ ዓሢ ኦኡዎ ፒሮ ማዒ ማታሰሣሢ ዓይዲ ሃላንዳኣናዳይ? ዔያቶኮ ፆኦዛሢ ማዔ ናንጊና ናንጋ ጎዳ ካአሽካኒ ዒሰራዔኤሌ ዓሶኮ ዓቲንቃ ዓኣድንጎ፤ ኦኡኮ ዓጩላ ባይሰንታይዳ ኬዳሢ ኔኤዎ ጴዲዎዓዳ?» ። ጌዔኔ፤

8 ዩያሮ ሙሴና ዓኣሮኔና ዔኤሊንቲ ካአቲ ቤርቶ ሺኢካዛ ካአቲ ዔያቶዎ፡- «ዒንሢ ዳንዲ ዒንሢኮ ፆኦሲ ማዔ ናንጊና ናንጋ ጎዳ ካአሽካኒ ዳንዳዓኔ፤ ጋዓንቲ ዳንዳኒ ኮይሳዞንሢ ዎንሢዳይ?» ። ጌዔኔ።

9 ሙሴ ዒማና፡- «ኦኡኮ ናኣቶንታ ጋርቾ ዓሶንታ ዓቱዎን ቢያሢ ኦ ዓኣዳንዳኔ፤ ኦኡኮ ዓቲንቆና ዉዲሮ ናኣቶና፡ ኦኡኮ ማራቶና ዎኣሮና፡ ባኣቶዎ ኦኡኮ ኦ ቢያ ዔኪ ዓኣዳንዳኔ፤ ዓይጎሮ ጌዔቶ ኦ ዓኣዳ ቤዘይዳ ናንጊና ናንጋ ጎዳዎ ቦንቾ ኬሊ ማሃ ኦ ቦንቻንዳኔ» ። ጌዔኔ።

10 ካአቲ፡- «ፑርቱዎና ዒፃሢ ማለሢ ዒንሢ ማለሢ ዔርታያ ማዔሢሮ ዒንሢኮ ላኣሎና ናኣቶና ዔኪ ዒንሢ ዓኣዳንዳጉዲ ታ ዒንሢ ዳካዓኬ! ሂንዳ ናንጊና ናንጋ ጎዳሢ ዒንሢና ዎላ ማዓ ጎይፆ ታ ዘጎም፤ 11 ዒንሢ ናንጊና ናንጋ ጎዳ ካአሽካኒ ኮዔቶ ዒንሢኮ ዓቲንቃ ሌሊ ዓኣዳኒ ዳንዳዓኔ» ። ጌዔኔ፤ ዩካፓ ሙሴና ዓኣሮኔና ዳውሲንቲ ኬሰኬኔ።

12 ናንጊና ናንጋ ጎዳ ሙሴዎ፡- «ዲቦ ዓቢፆ ዔኪ ዩዓኒ ኩጮ ኔኤኮ ጊብፄ ዓጮ ቢያሢ ባንሢ ማሃ፤ ዔያታ ሙኪ ባቃሌ ባኮ ቢያና ሻጮይዳፓ ዓቲ ቱኮና ባኮ ቢያ ሙይ ባይዘንዳኔ» ። ጌዔኔ።

13 ዩያሮ ሙሴ ጊብፄ ዓጮ ቢያ ባንሢ ኩጮ ቤኤዛዛ፡ ናንጊና ናንጋ ጎዳ ዩሮ ዎንቶና ሮኦሮይዳ ዓባ ኬሰካ ባንፃፓ ዠባሬ ዠባርሺሴኔ፤ ሳዓ ካራዛ፡ ዓባ ኬሰካ ዛሎና ዔቄ ዩይ ዠባራ ዲቢ ዓቢሢ ዒሺ ሙኬኔ። 14 ዔያታ ሻዲ ሙካፆ ዓጮ ቢያ ባይዘኔ፤ ዩያጉዳ ሚርጌ ዓቢሢ ዩያኮ ቤርታ ጴዲ ቤቁባኣሴ፤ ሴካ ቤርታኣ ጴዲንዳያቱዎሴ።

15 ዓጩላ ሺቢ ዲሚያ ማላንዳያ ሃላንዳኣና ዲቦ ዓቢፆ ሳፆ ካንቄኔ፤ ፔቲ ባኣዚታፆ ዓቱዎንቲ ዲማ ዲማ ሚፆ ዑፃ ዓኣ ዓኣፖንታ ዩያጉዲ ቱኮና ባኮዎ ቢያ ጋፒሲ ሃንቄኔ፤ ጊብፄ ዓጩይዳ ዓኣ ሚሢንታ ቱኮና ባኮዎ ቢያ ፔቲፆ ዓይሱዎን ዓኣዔ ዒላሺ ቢያ ጉኡሊ ሙዔኔ።

16 ካአቲ ሙሴና ዓኣርኔና ዑኩና ዔኤሊሳዮ፡- «ዒንሢኮ ጾኦሲ ማዔ ናንጊና ናንጋ ጎዳሢና ዒንሢኮም ታ ደቤኔ፤ 17 ዓካሪ ሃሢ ፔቴና ደቢንቶ ታኣኮ ዒንሢ ዓቶም ጋዓንዳጉዲ ታ ዒንሢ ሺኢቃኔ፤ ሃያ ፑኡፖ ሜታሢ ታጊዳፓ ሺኢቫንዳጉዲ ዒንሢኮ ጾኦሢ ማዔ ናንጊና ናንጋ ጎዳ ታኣም ሺኢቁዋቴ» ጌዔኔ። 18 ሙሴያ ካአቲ ቤርታፓ ኬሰካዖ ናንጊና ናንጋ ጎዳ ሺኢቃዛ፤ 19 ናንጊና ናንጋ ጎዳ ዓባ ኬሰካ ዛሎና ዔቁሴ ዠባሮ ባሻያ፡ ሃሃ ዓቢጾዋ ፒዒ ዔኪ ደኤፖ ዘቁ ባዘይዳ ዒሺ ዓርሣያ ዶዲ ዠባሬ ዓባ ጌላ ዛላፓ ዔቁሴኔ፤ ዬያ ጎይጾና ጊብፄ ዓጮ ቢያይዳ ፔቴ ዓቢሢያ ዓይሲባኣሴ። 20 ጋዓንቴ ናንጊና ናንጋ ጎዳ ካአቲኮ ዒሮ ዶዲሺ ዒፃያ ማሄሢሮ ሃሃ ዒሰራዔኤሌ ዳሮ ሃሻኒ ኮይባኣሴ።

ቤ. ዲሞ ሜታሢ

21 ዬካፓ ናንጊና ናንጋ ጎዳ ሙሴም፡- «ኩጮ ኔኤሲ ለካ ጫሪንጮ ባንሢ ዔቁሴ፤ ደኤፒ ሻኔ ዲሚ ጊብፄ ዓጫ ማዓንዳኔ» ጌዔኔ። 22 ሙሴ ኩጮ ለካ ጫሪንጮ ባንሢ ዔቁሳዛ፤ ጊብፄ ዓጫይዳ ሃይሃ ኬሊ ጉቤ ሻኔ ዲሚ ዲሜኔ። 23 ጊብፄ ዓሳ ሴካና ሃንጋና ዎሊ ዳንቃኒ ዳንዳዒባኣሢሮ ጾኦኒያ ሃይሃ ኬሊ ሄላንዳኣና ፔኤኮ ማኣራፓ ኬሰኪባኣሴ፤ ዒሰራዔኤሌ ዓሳ ናንጋ ቤዘይዳ ጋዓንቴ ፖዒኬ።

24 ካአቲ ሙሴ ዔኤሊሳዮ፡- «ዳንዲ ዒንሢኮ ናንጊና ናንጋ ጎዳ ካአሽኩዋቴ፤ ዒንሢኮ ላኣሎና ናኣቶና ዒንሢኮ ዎላ ዓኣዳኒ ዳንዳዓኔ፤ ጋዓንቴ ዒንሢኮ ማራቶና ዎኣሮና ሃሃ ባኣቶና ሃይካ ዓታንዳያ ኮይሳኔ» ጋዓዛ፤ 25 ሙሴ ሂዚ ጌዒ ማሄኔ፡- «ያዲ ማዔያታቴ ኑ ጾኦሢ ማዔ ናንጊና ናንጋ ጎዳሢም ሚቹ ዒንጎ ባኮንታ ሜሌ ኩኒኒ ዒንጊ ካአሽካንዳ ባኮንታ ቆልሞዋ ኔ ኩኡም ዒንጋኔ ጌይሢዳ? 26 ዬይ ፔቴታዖ ያዲ ማዓኒ ዳንዳዑዋሴ፤ ኩኡኮ ቆልሞ ቢያ ኑ ዔኪ ዓኣዳንዳኔ፤ ፔቴታዖ ኑ ሃሻዓኬ፤ ኑ ጾኦሢ ማዔ ናንጊና ናንጋ ጎዳሢም ዒንጊ ካአሽኮንዳ ቆልሞ ዶኦሪ ሺኢቫንዳሢ ኑ ኑ ቶኦኪናኬ፤ ዒኢካ ኑ ሄላንዳሢኮ ቤርታ ዒዛም ኩኒኒ ዒንጊ ካአሽካንዳ ቆልማ ዎዚጉዳያታቴያ ኑ ዔራኒ ዳንዳዑዋሴ።»

27 ናንጊና ናንጋ ጎዳ ካአቲኮ ዒሮ ዶዲሺ ዒፃያ ማሄሢሮ ዳሮ ሃሻኒ ዒ ኮዒባኣሴ፤ 28 ካአቲ ሙሴ ኮራ፡- «ለሚ ታ ኔና ዛጉዋጉዲ ታ ዓኣፓፓ ባይቁ! ታ ቤርታ ኔ ጴዴቶ ማይ ኔ ሃይቃንዳሢ ኔና ዔሬ» ጌዔኔ።

10:22 10:22 ዓይኑ. 105:28፤ ዮሃ. ጾፔላ 16:10።

29 ሙሴ ካአተሞ:- «ኔ ጌዔሢጉዲ ማዖንጎ፤ ላሚ ታኔና ዘጋዓኬ» ጌዔኔ።

11

ቴ. ቶይዶ ናኦቶኮ ሃይቦ

1 ዩካፓ ናንጊና ናንጋ ጎዳ ሙሴም:- «ጊብፄ ካአተና ዴሮ ቢያሢና ዑፃ ሜሌ ዶርዖ ታ ዳካንዳኔ፤ ዩካፓ ሃኖ ዓጫፓ ዒንሢ ኬሰካንዳጉዲ ዒዚ ዒንሢ ሃሻንዳኔ፤ ፔቴ ዓሲታዎ ዓይሱዎዎ ዒንሢ ቢያሢ ዒ ዳውሲ ዳካንዳኔ። 2 ሃሢ ዒሰራዔኤሌ ዴራ ዓተንቆንታ ላኦሎንታ ፔኤኮ ዓሺኖ ቢያ ኮራፓ ዎርቄንታ ቢሮ ዓንጎ ፓልማሢያ ዔርጋንዳጉዲ ዔያቶም ኬኤዜ» ጌዔኔ። 3 ናንጊና ናንጋ ጎዳ ዒሰራዔኤሌ ዓሳ ጊብፄ ዓሶ ቤርቶይዳ ዴኤፑሞ ዴንቃንዳጉዲ ማሄሢሮ ጎኔና ካአተና ዎላ ማዳ ዴኤፖ ዓሶና ዴራኦ ቢያ ሙሴ ዴኤፐ ዓሲ ማሃ ዛጌኔ።

4 ሙሴ ካአተሞ:- «ናንጊና ናንጋ ጎዳ ሃዚ ጋዓኔ፣ ሳዓ ጊዲሚሺ ማዓዛ ጊብፄ ዓጮይዳ ታ ሃንታንዳኔ፤ 5 ካአቱሞ ዖይቶ ዳካላንዳ ካአቱ ናኦዚዳፓ ዓርቃዖ ዴንዲ ዎንዖ ዎዳ ካራሞ ላኦላ ሸዔ ናኦቶ ሄላንዳኦና ጊብፄ ዓጮ ቢያይዳ ቶይዲ ማዔ ዓተንቄ ቢያ ሃይቃንዳኔ፤ ዩያጉዲ ቆልሞኮዎ ቤርታኦ ናኦታ ሃይቃንዳኔ። 6 ጊብፄ ዓጮይዳ ቢያ ሃይካፓ ቤርታ ባኦያ ሴካ ቤርቲማኦ ማዓኦዎያ ዴኤፐ ዩኤፐ ዩኤከንታንዳኔ። 7 ጋዓንቴ ዒሰራዔኤሌ ዓሶይዳ ማዔቶዎ ቆልሞ ባኦካ ካኒታዖ ቦጫዓኬ፤ ዩኖ ዎዶና ታኦኒ ናንጊና ናንጋ ጎዳ ጊብፄ ዓሶና ዒሰራዔኤሌ ዓሶናኮ ባኦካ ዲሙሞ ጌሃሢ ዒንሢ ዔራንዳኔ» ጌዔኔ። 8 ሙሴ ዒማና ካአተሞ:- «ኔኤና ዎላ ማዳ ዴኤፖ ዓሳ ቢያ ታ ኮይላ ሙኪ ሎኦሚ ዚጋንዳኔ፤ ዴሮ ታኦኮ ታ ዔኪ ኬሰካንዳጉዲ ታና ዔያታ ሺኢቃንዳኔ፤ ዩካፓ ታ ዓኦዳንዳኔ» ጌዒ፣ ጌኤዞ ሃሼኔ፤ ያዲ ጌዔሰካፓ ኮሺ ዳጋዲ ካአቱ ቤርታፓ ኬሰኪ ዓኦዳኔ።

9 ናንጊና ናንጋ ጎዳ ሙሴም:- «ጊብፄ ዓጮይዳ ሚርጌ ታ ዎልቄና ማዲንታ ዓኪ ባኦዚ ታ ማዳንዳጉዲ ካአቱ ዒንሢም ዎይዛዓኬ» ቤርታ ጌዔያኬ፤ 10 ሙሴና ዓኦሮኔና ዩንሢ ያኦሲ ዎልቄና ማዲንታ ዓኮ ባኮንሢ ካአቱ ቤርታ ማዳኔ፤ ጋዓንቴ ናንጊና ናንጋ ጎዳ ካአቲኮ ዒኖ ዶዲሺ ዒፃያ ማሄሢሮ ዒሰራዔኤሌ ዓሶ ፔ ዓጫፓ ኬሰካንዳጉዲ ዳኪባኦ።

12

ዑሃ ዓኦዲዖ ቦንቾ ኬሎ

1 ናንጊና ናንጋ ጎዳ ሙሴና ዓኣርኔናም ጊብፄ ዓጮይዳ ዓኣንቴ ሂዚ ጌዒ ኬኤዘኔ፡- 2 «ሃና ዓጊኔላ ዒንሢም ሌዎኮ ቤርታሳ ዓጊኒ ማፃንጎ፤ 3 ዒሰራዔኤሌ ዳሮም ቢያ ሃያ ዎሳ ዒርዙዋቴ፤ ሃና ዓጊኔላ ፄኤሬሰካፓ ታጳሳ ኬሎና ፔቴ ፔቴ ዓሲ ፔኤኮ ማኣሮ ዓሰም ማራናይታቶዎ ዋናናይ ጊኢጊሾንጎ፡፡ 4 ፔቴ ማኣሪ ዓሲ ዳኪ፡ ሹኮናሢ ሙዒ ኩርሳኒ ዳንዳዒባኣያ ማዔቶ ዑኬ ዓኣ ዓሺኖና ዎላ ፔኤኮ ማኣሮ ዓሳ ሙዓኒ ዳንዳዒማጉዴያ ማሊ ፔቴሞና ዎላ ሙዎንጎ፡፡ 5 ዒንሢ ደኦራንዳ ቆልማ ማራይ ሃሣ ዋኣሪ ማዓኒ ዳንዳዒኔ፤ ጋዓንቴ ቦሂሳ ባኣዚ ባኣያ ፔቴ ሌዔ ኩሜ ማራናይ ዓዴ ሃሣ ኮላናይዳፓ ማፃንጎ፡፡ 6 ዴንዲ ታጳ ያይዳሳ ኬላ ሄላንዳኣና ካፒ፡ ታጳ ያይዳሳ ኬሎኮ ዋንቶ ዒሰራዔኤሌ ዳራ ቢያ ዬያ ቆልሞ ሹኮንጎ፤ 7 ዳራ ሱኮይዳፓ ዔኪ ዬያ ቆልሞኮ ዓሽካ ሙይንታ ማኣሮ ፔቴ ፔቴሢ ጌሎ ካርኮ ዓጮ ዓኣ ሬኤኮና ዑፃዓኣ ቦኦኮላሃና ተሽኮንጎ፤ 8 ዓሽኮ ዬማ ዋንቶና ሚቺ ሚቺ፡ ጫንቺ ዒላሺና ላኣዳና ዎላ ሙዎንጎ፡፡ 9 ዓሽኮይዳፓ ዓኣዔ ሃሣ ካሦናያ ሙዒፖቴ፤ ጋዓንቴ ቶኦካ፡ ቶካ፡ ጎጾ ባኮዎ ዓይሱዎዎ ቢያ ሚቺ ዓሽኮ ሙዑዋቴ፡፡ 10 ዓሽኮ ዓይሲ ዎይሢፖቴ፤ ዓቲ ዎርቄ ባኣዚ ዓኣቴ ቢያ ሚጮም ታሚዳ ዓጉዋቴ፡፡ 11 ጎይሢ ዓኣዲሢሮ ጊኢጊንቴ ዓሲ ማዒ፡ ማኣዓሢ ማይንቴ ዲርዘዎ ዓኣሢንቴ፤ ሃሣ ኮኦሎዎ ዒንሢኮ ኩጮ ዓርቂ ሩኡሪ ሩኡሪ ሙዑዋቴ፤ ዬና ኬላ ታና፡ ናንጊና ናንጋ ጎዳሢኮ ሰውሃ ዓኣዲያ ቦንቾ ኬሊ ዒንሢም ማፃንጎ፡፡»

12 «ሃሣ ዬና ዎንቶና ታኣኒ ጊብፄ ዓጮ ቢያይዳ ሃንቴ ሃንቴ ዓሰኮ ማዔቶዎ ቆልሞኮ ቤርቶናኣቶ ዎዳንዳኔ፤ ጊብፄ ዓጮ ካኣሽኮ ያኦዘይዳ ቢያ ፑርታ ባኣዚ ታ ዓጋንዳኔ፤ ታኣኒ ናንጊና ናንጋ ጎዳኬ፡፡ 13 ዒንሢኮ ካሮ ዓጮይዳ ዓኣ ሬኤኮ ዑፃ ዳራ ሱኮፃ ዒንሢ ናንጋ ማኣሮ ዲማሲ ዒርዘ ማላታ ማዓንዳኔ፤ ታኣኒ ዬያ ሱኮፃ ዳንቃዎ ዒንሢኮ ዑሣ ያኦኪ ዓኣዳንዳኔ፤ ዬያሮ ጊብፄ ዓሶ ታ ዎዳኣና ዒንሢዳ ፔቴታዎ ሜታ ሄላዓኬ፡፡ 14 ታኣኒ ናንጊና ናንጋ ጎዳ ዒንሢም ማዕ ባኮ ቢያ ጳቂሳያ፡ ዬና ኬሎላ ዒንሢም ቦንቾ ኬሊ ማፃንጎ፤ ዬያ ሙካ ዎዶ ቢያይዳ ቦንቾዋቴ» ጌዔኔ፡፡

ላኣደ ሙዒ ቦንቾ ኬሎ

15 ናንጊና ናንጋ ጎዳ ሃሣ ሂዚ ጌዔኔ፡- «ላንካይ ኬሊ ጉቤ ላኣዳ ሌሊ ዒንሢ ሙዓንዳኔ፤ ቤርታሳ ኬሎ ዒንሢኮ ማኣራፓ ሙኦቆ ፃኣዘ ቢያ ኬሱዋቴ፤ ዓይጎ ዓሲያ ዬንሢ ላንካዎ ኬሎንሢዳ ሙኦቆ ፃኣዘ ጌሌ ካሣ ሙዔቶ ታኣኮ ዳሬ ማፃፓ፡፡ 16 ዬንሢ

12:13 12:13 ሌዋ. ዓኬ 23:5፤ ላሚ. ዎማ 16:3-8፡፡

ለንካዎ ከሎንሢኮ ቤርታሳ ከሎና ለንካሳ ከሎናይዳ ታአም ዲማዳ ቡኪንቲ ዲንሢ ቡኪንታንዳኔ፤ ዩንሢ ከሎንሢዳ ዲንሢኮ ሙኡዚ ሌሊ ገአጊሻንዳኦፓዳቴም ዓይጎ ማደዎ ማዲፖቴ።
 17 ዲሰራዔኤሌ ዳሮ ቢያ ገብፄ ዓጮይዳፓ ታ ከሴሢ ዩኖ ከሎና ማዔሢሮ ዩኖ ለአዶ ሙዒ ቦንቾ ከሎ ዲንሢ ካፒ ቦንቻንዳኔ፤ ሙካ ዎዶ ቢያይዳ ዩኖ ከሌሎ ዳኤፒ ቦንቾ ከሊ ማሢ ቦንቾዎቴ።
 18 ቤርታሳ ዓጊኖኮ ታጾ ያይዳሳ ከሎ ገሊያ ዋንታፓ ዓርቃዎ ለማታሚ ፔታሳ ከሎ ዋንቶ ሄላንዳኦና ለአዳ ሌሊ ሙዑዎቴ።
 19 ዴንዲ ለንካይ ከሊ ሄላንዳኦና ዓይጎ ሙኡቃ ፃአዛታዎ ዲንሢ ማኦሪ ጴዳንዳያ ኮይሱዎሴ፤ ዓጪ ሾይንቲታቶዎ ሙኬ ዓሲ ያና ማዔቶዎ ሙኡቃ ፃአዛ ገሊ ካሣ ሙዔቶ ታኦኮ ዴሬ ማዎፓ። 20 ዓይጎ ቤሰካ ዲንሢ ማዔቶዎ ለአዳ ሙዓንዳፓዳቴም ሙኡቃ ፃአዛ ገሊ ካሣ ሙዒፖቴ።»

ቤርታሳ ዑሣ ዓአዲያ ቦንቾ ከሎ

21 ሙሴ ዲሰራዔኤሌ ዳሮኮ ሱኡጎ ማዔ ዓሶ ቢያ ዔኤላዎ:-
 «ዲንሢኮ ማኦሮ ዓሳ ቢያ ዑሣ ዓአዲያ ማሊ ቦንቾ ከሎ ቦንቻንዳጉዲ ዲንሢዳፓ ፔቴ ፔቴሢ ማራናይታቶዎ ዋናናይ ዶኦሪ ዔኪ ሹኮንጎ፤ 22 ቁኢያ ኩማንዳ ሂሶጴ ገይንታ ባከሎኮ ዒላዠ ዔኪጋፓ ዓንዶ ጋራ ዓአ ሱጉፃፓ ዔኪ ዔኪ ማኦሮኮ ካሮ ዓጮይዳ ዓአ ሬኤኮና ዑፃ ዓአ ቦኦኮላሢያ ቲሽኩዎቴ፤ ዴንዲ ሳዓ ካራንዳያ ሄላንዳኦና ያኦኒያ ፔ ማኦራፓ ከሰኮፓ። 23 ናንጊና ናንጋ ጎዳ ገብፄ ዓሶ ሃይቢና ዎጋኒ ገብፄ ዓጮ ሃንታንዳኔ፤ ካሮኮ ዑፃ ዓአ ቦኦኮላሢያ ዓጮ ሬኤኮናይዳ ሱጉዎዒ ዛጋዎ ዑሣ ያኦኪ ዓአዳንዳኔ፤ ዎዳ ኪኢታንቻሢያ ዲንሢኮ ማኦሪ ማኦሪ ገሊ ዲንሢ ዎዳዎጉዲ ዩይ ለአጋንዳኔ። 24 ዲንሢና ዲንሢኮ ናኦቶና ሃያ ዎጎ ናንጊና ካፑዎቴ፤ 25 ናንጊና ናንጋ ጎዳ ዲንሢ ዳካልሳኒ ጉሙርሴ ዓጮ ገላዎዎ ሃያ ዎጎ ካፑዎቴ። 26 ናኦታ ዲንሢኮ ላይ ዓይጎ ዎጌዳይ? ገዒ ዲንሢ ያኦጩቶ፤ 27 ዲንሢ ላይ፥ ናንጊና ናንጋ ጎዳ ቦንቻኒ ማዲንታ ዑሣ ዓአዲሢ ገዒ ቦንቾ ከሎና ዲንጊንታ ባአዚኬ፤ ዓይጎሮ ገዒቶ ናንጊና ናንጋ ጎዳ ገብፄ ዓጮይዳ ዲሰራዔኤሌ ዓሶ ማኦሮ ሃሽ ዑሣ ዓአዲ ገብፄ ዓሶ ዎዳዎ ኑና ሃሽሢሮኩ። ገዒ ዲንሢ ዔያቶም ከኤዛንዳኔ» ገዒ።

ዲሰራዔኤሌ ዓሳ ዩያ ዎይዛዎ ዘጊ ያኦሲ ካኦሽኬ። 28 ዩካፓ ዴንዲ ሙሴና ዓአሮኔ ዛሎና ናንጊና ናንጋ ጎዳ ዔያቶ ዓይሢ ባኮ ቢያ ዔያታ ማዳኔ።

12:23 12:23 ዔብ. 11:28።

ጊብፄ ዓጮ ዓሶኮ ቶይዶ ናኦቶ ሃይቦ

29 ሳባ ጊዳሚሺ ማዓዛ ካኣቲኮ ዓልጎ ዳካላ ናኣዚፓ ዓርቃዖ ዴንዲ ቱኡዞ ማኣራ ዓኣ ዓሶኮ ቶይዶ ናኦቶ ሄላንዳኣና ጊብፄ ዓጮይዳ ቶይዶ ማዔ ዓቲንቆ ናኦቶ ቢያ ናንጊና ናንጋ ጎዳ ዎዴኔ፤ ቆልሞኮዎ ቤርታሳ ናኦቶ ዎዴኔ። 30 ዬኖ ዎንቶና ካኣቲንታ ዒዛና ዎላ ማዳ ዴኤፖ ዓሳ ሃሃ ጊብፄ ዓጮ ዴራ ቢያ ጊንዓሰካፓ ጴጫንቴ፣ ዓቲንቁ ናይ ሃይቁዎዖ ዓቲ ማኣሪ ፔቲታዖ ባኣሢሮ ጊብፄ ዓጮይዳ ዴኤፒ ዬኤፒ ዒላቲ ዎይዚንቴኔ። 31 ዬኖ ዎንቶና ካኣቲ ሙሴና ዓኣሮኔና ዔኤሊሳዖ፣ «ዒንሢንታ ዒንሢኮ ፃፅ ዒሰራዔኤሌ ዓሳ ቢያ ሃይካፓ ኬሰኩዎቴ! ታ ዓጮ ሃሺ ዓኣዲዎቴ፤ ዒንሢ ዎንዴ ምጠፎ ጎይዖ ዴንዲ ዒንሢኮ ናንጊና ናንጋ ጎዳ ካኣሸኩዎቴ! 32 ማራቶ፣ ዎኣሮንታ ባኣቶንታ ዓኣ ቆልሞ ቢያ ዔኪ ዓኣዲዎቴ! ዒንሢ ምኣዛሢ ታና ዓንጃንዳጉዲ ታኣም ሺኣቁዎቴ» ጌዔኔ።

33 ዓጮሎ ዔያቶም ሃሺ ኬሰካንዳጉዲ ጊብፄ ዓጮ ዓሳ ፔ ቶኦኪና ዒሰራዔኤሌ ዴሮ ሩኡሪሸሢሢና፡- «ዐኩና ዒንሢ ኬሰኪባኣያታቶ ኑ ጋፔኔ» ዔያቶም ጌዔኔ። 34 ዬያሮ ዴሪ ካፂባኣ ዲርኮና ዲኣሎ ቆኦሮይዳ ኩንሢ ዓፒላና ማሪ ጌኤታ ኬዴኔ፤ 35 ዒሰራዔኤሌ ዓሳ ሙሴ ዓይሢ ጎይዖ ማዴኔ፤ ዔያታ ዎዎይይ ጌዔቴ ዎርቆንታ ቢሮ ዓንጎ ፓልማሢንታ፤ ዬያጉዲ ዓፒላኣ ዔያቶም ዒንጋንዳጉዲ ምጠፍ ዔርጌኔ። 36 ናንጊና ናንጋ ጎዳ ዒሰራዔኤሌ ዓሰ ጊብፄ ዓሶ ቤርታ ዴኤፑም ዴንቃንዳጉዲ፤ ሃሃ ምጠፎ ባኮ ቢያ ዔያታ ዔካንዳጉዲ ማሄኔ፤ ዬያይዲዎና ዒሰራዔኤሌ ዓሳ ጊብፄ ዓጮ ቆሎ ቡሪ ዔኪ ዓኣዴኔ።

ዒሰራዔኤሌ ዓሶኮ ጊብፄ ዓጫፓ ኬዞ

37 ዒሰራዔኤሌ ዓሳ ራሚሴ ጎዖ ቤዞይዳፓ ሱኩቴ ዓኣዳኒ ቶኪና ዔቁኔ፤ ዬያ ዓሶኮ ሚርጉማ ላኣሎና ናኣቶና ፓይዲንቴዎንቴ ላሆ ፄኤታ ሺያኬ። 38 ዔያቶና ዎላ ማሌ ፓይዳ ሚርጌ ዓሲ ሚርጌ ማራይ፣ ሚርጌ ዎኣሪንታ ሃሃ ሚርጌ ባይያኣ ዒሺ ዒሺ ኬሰኬኔ። 39 ጊብፄ ዓጫፓ ዔያታ ዔኪ ኬሰኬ ዲርኮና ዲኣሎ ላኣዳ ላኣዴኔ፤ ዓይጎሮ ጌዔቶ ጊብፄ ዓጮይዳፓ ዔሩዎዖ ሩኡሪ ዔያታ ኬሰኬሢሮና ሙዖ ዔያታ ጊኣጊሻኒ፤ ሃሃ ካፄ ካሃ ካሃኒያ ዎዴ ባኣሢሮኬ።

40 ዒሰራዔኤሌ ዓሳ ጊብፄ ዓጮይዳ ናንጌሢ ምይዶ ፄኤታና ሃይሢታሚ ለዔናኬ፤ 41 ምይዶ ፄኤታና ሃይሢታሚ ለዔ ኩማ ኬሎና ናንጊና ናንጋ ጎዳኮ ዴራ ቢያ ጊብፄ ዓጮ ሃሺ ኬሰኬኔ።

12:29 12:29 ኬሲ. ማፃ 4:22-31። 12:36 12:36 ኬሲ. ማፃ 3:21-22።
12:40 12:40 ማፃ. ማፃ 15:13፤ ጋላ. 3:17።

42 ናንጊና ናንጋ ጎዳ ዳሮ ካፒ ጊብፄ ዓጩሎይዳፓ ኬሴ ኬሎና ሳዓ ዲሚኬ፤ ዩና ዋንቴላ ዒሰራዔኤሌ ዓሳ ኬሰካ ዎዶ ቢያይዳ ያኦሲ ቦንቻኒ ላሁዎዎ ዶዲ ካፒ ዎርቃ ናንጊና ናንጋ ጎዳም ዲማዴ ዓቢኬ።

ዑሣ ዓኣዲያ ቦንቻ ኬሎ ቦንቻ ዎጎ

43 ናንጊና ናንጊና ጎዳ ሙሴና ዓኣሮኔናም፡- «ዑሣ ዓኣዲያ ቦንቻ ኬሎኮ ቦንቻ ዎጋ ያዲ ማዎንጎ፤ ሜሌ ዓጩፓ ሙኬ ዓሲ ማዔያ ዓይጎ ዓሲያ ማዎም ዑሣ ዓኣዲያ ቦንቻ ኬሎ ካዎ ሙዎፖ፤

44 ዒንሣም ማዶ ማዳንዳጉዲ ዒንሣ ሻንቄ ዓሲታቶ ጋዓንቴ ቤርታዲ ዓቲንቶ ቤርቶ ዒንሣ ቲቄቴ ሙዓኒ ዳንዳዓ። 45 ዒማና ዓጩይዳ ናንጋ ሾኦቹ ዓሲ፤ ሃሣ ዑኬ ኬሊዳ ዒንሣ ጨጊ ማዲሳኒ ዓኬ ዓሲ ዓኣቶ ሙዎፓ። 46 ሙዓ ቢያ ዩኖ ጊኢጊንቴ ማኣሬሎ ጋራ ሙይንታንዲያ ኮይሳሢሮ ሴካ ካሮ ኬሰኮፖ፤ ማራናኣቶኮዎ ማዎም ዋናናኣቶኮ ሜጌዎ ሜንሣሂፖቴ፤ 47 ዒሰራዔኤሌ ዓሳ ቢያሣ ሃያ

ቦንቻ ኬሎ ቦንቻንጎ፤ 48 ጋዓንቴ ዓቲንቶ ቤርቶ ቲቄንቲባኣ ዓይጎ ዓሲያ ሙዎፖ፤ ሜሌ ዓጩ ዓሲ ዒንሣኮ ባኣካ ዓኣያ፡ ናንጊና ናንጋ ጎዳኮ ዑሣ ዓኣዲያ ቦንቻ ኬሎ ቦንቻኒ ኮዔቶ ቤርታዲ ዒዛኮ ማኣሮይዳ ዓኣ ዓቲንቆ ቢያሣኮ ዓቲንቶ ቤርቶ ቲቄዎቴ፤ ዩካፓ ዓጩ ሾይንቴ ዒሰራዔኤሌ ዓሲ ማዒ ፓይዳንቴ ዑሣ ዓኣዲያ ቦንቻ ኬሎ ቦንቻኒ ዒንሣና ዎላ ፔቴ ማዎንጎ። 49 ዓካሪ ሃይ ዎጋ ዒንሣ ዒሰራዔኤሌ ዓሳም ማዔቶዎ ዒንሣኮ ባኣኮይዳ ናንጋ ሙኬ ዓሳም ዩኖ ጎይዎና ማዲንቶንጎ» ጌዔ። 50 ዒሰራዔኤሌ ዓሳ ዓይሣንታያ ማዒ ሙሴና ዓኣሮኔ ዛሎና ናንጊና ናንጋ ጎዳ ዔያቶ ዓይሣ ባኮ ቢያ ኩንሣኒ ጊኢጌያ ማዔ፤ 51 ዩኖ ኬሎና ናንጊና ናንጋ ጎዳ ዒሰራዔኤሌ ዓሳ ጉቤ ጊብፄ ዓጩፓ ዔኪ ኬሴ።

13

ቤርቲ ሾይንቴ ቢያ ያኦሲም ዲማዴያ ማዒያ

1 ናንጊና ናንጋ ጎዳ ሙሴም ኬኤዛዎ፡- 2 «ዒሰራዔኤሌ ዳሮይዳፓ ማዎም ቆልሞይዳፓ ቤርቲ ማዒ ሾይንቴያ ቢያ ታኣም ማዓንዳያ ኮይሳኔ፤ ዩያሮ ቤርቲ ማዒ ሾይንቴሣ ቢያ ታኣም ማዓንዳጉዲ ዲማሴ» ጌዔ።

ላኣዶ ሙዒ ቦንቻ ኬሎ

12:46 12:46 ፓይ. ማገ 9:12፤ ዮሃ. 19:36። 13:2 13:2 ፓይ. ማገ 3:13፤ ሉቃ. 2:23።

3 ሙሴያ ዳርሞ ሂዚ ጌዔኔ፡- «ሃና ኬላ ዓይሌ ማዒ ዒንሢ ምርቁ ናንጌ ጊብፂ ዓጮ ሃሺ ኬስኬዞ ማዒሢሮ ሃኖ ኬሎ ማሊ ጸቂሡዋቲ፤ ናንጊና ናንጋ ጎዳ ዒንሢ ፔኤኮ ጴኤፖ ምልቆና ዓውሲ ኬሴሢ ሃናኣ ኬሎናኬ፤ ዬያሮ ሃኖ ኬሎይዳ ሙኑቃ ፃኣዛ ጌሌ ካሣ ሙዒፖቲ። 4 ሃኖ ኬሎና፡ ሌዖኮ ዓይያ ማዒ ዓቢቤ * ጌይንታ ዓጊኖና ጊብፂ ዓጮ ዒንሢ ሃሺ ኬስኬዞ። 5 ናንጊና ናንጋ ጎዳ ቤርታ ካኣናኔ ዓሶ ዓጮ፡ ሄኤቲ ዓሶ ዓጮ፡ ዓሞራ ዓሶ ዓጮ፡ ሂዋዌ ዓሶ ዓጮና ዒያቡሳ ዓሶ ዓጮ ዒንሢ ዳካልሳንዳሢ ዒንሢኮ ቤርታኣ ዓደንሢሞ ጫኣቄ፤ ዔኤሲና ዲኢቂና ኩሜ ዬኖ ማሎ ዓጩሎ ዒንሢ ዒዚ ጌልዛ ምዶና ሌዖኮ ዓይያ ዓጊኖይዳ ሃኖ ቦንቾ ኬሌሎ ቦንቾዋቲ። 6 ዬኖና ለንካይ ኬሊ ጉቤ ላኣዳ ዒንሢ ሙዓንዳኔ፤ ለንካሳ ኬሎና ናንጊና ናንጋ ጎዳም ቦንቾ ኬሊ ማሂ ቦንቾዋቲ፤ 7 ዴንዲ ለንካይ ኬሊ ሄላንዳኣና ካፂ ሶልኬ ካሣ ሙዒፖቲ፤ ሶልኬ ካሣኣ ማዖም ሙኑቃ ፃኣዛ ፔቲታዖ ዒንሢ ዓጫ ጳደፖ። 8 ዬና ቦንቾ ኬላ ቦንቾንታ ምዶና ዬያ ዒንሢ ቢያ ማዳሢ ጊብፂፓ ዒንሢ ኬስኬ ምዶና ናንጊና ናንጋ ጎዳ ዒንሢም ማጴ ኮኸ ባኮ ቢያ ጸቂሣንዳጉዲ ማዒሢ ዒንሢኮ ናኣቶም ኬኤዙዋቲ። 9 ዬና ቦንቾ ኬላ ዒንሢኮ ኩጮይዳ ቲኡቲያ፡ ሃሣ ባሊቶይዳ ጌሢንቲ ማላታ ባኣዚጉዲ ጸቂሣያ ማዓንዳኔ፤ ናንጊና ናንጋ ጎዳ ፔኤኮ ጴኤፖ ምልቆና ጊብፂ ዓጫፓ ዒንሢ ኬሴሢሮ ናንጊና ናንጋ ጎዳኮ ምጋ ቢያ ኬሊ ዒንሢ ዳንጋፓ ሸኢኩዋንቲ ላሚ ላሚ ዒንሢ ዳንጋና ዓኤላንዳጉዲ፤ ሃሣ ማላንዳጉዲ ዒንሢም ጸቂሣንዳኔ። 10 ዬያሮ ሃኖ ቦንቾ ኬሎ ሌዓ ሌዓ ጌሢንቲ ኬሎና ቦንቾዋቲ።»

ቶይዲሞ ናይ

11 ሃሣዒ ኬኤዛዖ፡- «ናንጊና ናንጋ ጎዳ ዒንሢና ዒንሢኮ ቤርታኣ ዓደንሢሞ ዒንጋኒ ጫኣቄ ካኣናኔ ዓሶ ዓጮ ዒንሢ ዔኪ ዬዓንዳኔ፤ ዬኖ ዓጩሎ ዒንሢ ዒ ዳካልሳ ምዶና፤ 12 ቶይዲ ማዒ ዓቲንቄ ናይ ቢያ ናንጊና ናንጋ ጎዳም ዒንሢ ዒንጋንዳኔ፤ ዬያጉዲ ዒንሢኮ ቆልሞኮዋ ቤርታኣ ሸይንታ ቢያ ናንጊና ናንጋ ጎዳም ዲማጴያ ማዓንዳኔ። 13 ሃሪይዳፓ ሸይንቲ ቤርቲ ሸይንቲ ጋዓንቲ ዓዴ ማራኔይና ላኣሙዋቲ፤ ሃሮማ ዒንሢ ዔካኒ ኮሲባኣቶ ጋዓንቲ ባቃኖ ማንሡዋቲ፤ ቤርታ ሸይንቲ ማዒያ ዓቲንቄ ናይ ቢያ ዒንሢ ላኣሚ ዒካንዳያ ኮይሳኔ። 14 ሃጊ ቤርታ ሙካ ምዶይዳ ኔኤኮ ዓቲንቆ ናዓ ሃኖ ምጎኮ ቡሊዖ ዖኑጩቶ ሂዚ ጌዒ ኬኤዘ፡ «ዓይላቶና ኑ ምርቁ

* 13:4 13:4 ዓቢቤ ዒብራ ዓሶኮ ዓቢቤ ጌይንታ ዓጊኔላ ማኣሎና ምይቤ ዓጊኒኬ።
 13:12 13:12 ኬሲ ማፃ 34:19-20፤ ሉቃ 2:23።

ጊብፄ ዓጮይዳፓ ናንጊና ናንጋ ጎዳ ዳኤፒ ዋልቁና ኑና ኬሴኔ፤
 15 ጊብፄ ዓጮ ካአቲ ፔኤኮ ዒኖ ደዲሺ ዒፃፃ ማዒ ታ ዒንሣ ሃሻዓ
 ጌዔ ዋደና ናንጊና ናንጋ ጎዳ ጊብፄ ዓጮይዳ ዓሲንታ ቆልሞንታኮ
 ቢያ ቤርቶ ሾይንቶ ዋዳኔ፤ ሃሣ ቤርቲ ሾይንቲ ማዒ ሾይንቲ ዓዴ
 ቆልሞ ናንጊና ናንጋ ጎዳም ዒንጎ ባአዚ ማሃ ኑ ዒንጋሣ ዬያርኬ፤
 ቶይዲ ማዒ ሾይንቲ ኩኩኮ ዓቲንቆ ናአቶ ጋዓንቲ ኩ ላአሚ ዔካኔ።
 16 ዬይ ዋጋ ኩኩኮ ኩጮይዳ ቱኡቲያ፤ ሃሃ ባሊቶይዳ ጌሦና ማላታ
 ባአዚ ማዒ ኑም ጸቂሣኔ፤ ናንጊና ናንጋ ጎዳ ፔኤኮ ዳኤፖ ዋልቆና
 ጊብፄ ዓጮይዳፓ ኑና ኬሴሣያ ኑም ጸቂሣኔ።»

ፒዝ ጌዒ ዔቁ ሻአርና ታሞና

17 ጊብፄ ዓጮ ካአቲ ዴር ሃሺያና ናንጊና ናንጋ ጎዳ ዑኬ ማዔ
 ፒሊሰፄኤሜ ዓጮ ዓአዳ ጎይፆይዴና ዓሶ ዔኪ ዓአዲባአሴ፤ ዬያ
 ዒዚ ማዳሣ ዴራ ዔያቶኮ ቤርቶይዳ ፆልዚ ካፒ ዓአያ ማዔሣ
 ዴንቁቶ ማሊያ ሺርሺ ጊብፄ ዓጮ ማዑዋጉዲኬ። 18 ዬያር ዬኖ
 ጎይፆ ሃሺ ዘቁ ባዘ ባንሣ ዴንዳ ዓሲ ናንጉዋ ዳውሎና ጌዒ ሺርሻ
 ጎይሣ ዔኪ ዔያቶ ዓአዳኔ፤ ዒሰራዔኤሌ ዓሳአ ፆልዚም ጊኢጊንቲ
 ዓሲ ማዒ ጊብፄ ዓጮፓ ኬሰኬ።

19 ዮሴፔ ፔኤኮ ሜጌፆ ዔካንዳጉዲ ዒሰራዔኤሌ ዓሶ ጫአቂሴ
 ጎይፆና ሙሴ ዮሴፔኮ ሜጌፆ ዔኪ ዓአዳኔ፤ ዓይጎር ጌዔቶ ዮሴፔ
 ዔያቶም፡- «ያአሲ ዒንሣ ዓውሴም ዒንሣ ኬሰካ ዋደና ሜጌፆ ታአኮ
 ሃኖ ሳዓፓ ዔኪ ዓአዳቆቲ» ጌዒ ቤርታ ኬኤዜ።

20 ዒሰራዔኤሌ ዓሳ ሱኩቲይዳፓ ዔቁ፣ ዓሲ ናንጉዋ ዳውሎ
 ዓጫ ዓአ ዔታሜ ጌይንታ ቤዛ ዲንኬ፤ 21 ዔያታ ርኦሪና ዋንቲና
 ቢያ ሃንታንዳጉዲ ናንጊና ናንጋ ጎዳ ዔያቶ ርኦሪ ፒዝ ጌዒ ዔቁ
 ሻአራና፣ ዋንቶ ጊንሣ ፒዝ ጌዒ ዔቁ ፖዓ ታሚና ማአዲ ዔኪ
 ዓአዳኔ፤ 22 ዬይ ፒዝ ጌዒ ዔቁ ሻአራ ርኦርና፤ ፒዝ ጌዒ ዔቁ ታማ
 ሃሃ ዲሞና ቢያ ኬሊ ዔያቶኮ ቤርታ ቤርታ ማዒ ዓአዳኔ።

14

ዘቁ ባዘና ፒንቂያ

1 ዬካፓ ናንጊና ናንጋ ጎዳ ሙሴም፡- 2 «ዒሰራዔኤሌ ዓሳ ማዒ
 ሚግደሌና ዘቁ ባዘናኮ ሳዛ ዓአ ፒሃሂርቲ ጌይንታ ቤዘኮ ቤርቶ
 ዛሳ ባዓልፖኒ ኮይሎይዳ ዲንኪ ዴዓንዳጉዲ ኬኤዜ። 3 ዬያር
 ዒሰራዔኤሌ ዓሳ ዓሲ ናንጉዋ ዳውሎይዳ ካራ ባይቂ ዓጮሎኮ
 ዙሎ ሺሪ ሺሪ ሜታዳያ ጊብፄ ካአቲም ማላንዳ። 4 ታአኒያ ዒዘኮ

13:19 13:19 ማዢ. ማፃ 50:25፤ ዒ.ያ. 24:32።

ዒሮ ዶዲሽ ዒፃያ ማሃንዳሢሮ ዒንሢ ዒዚ ዳውሳንዳኔ፤ ዒማና ካክቲና ዒዛኮ ፖኦሊሶና ታኦኒ ባሽ ዳንቃንዳ ባሽፃ ታኦኮ ቦንቸ ማዓንዳኔ፤ ያዲ ማዕሰካፓ ጊብፃ ዓጮ ዓሳ ታኦኒ ናንጊና ናንጋ ጎዳ ማዕሢሢ ዔራንዳኔ» ጋዓዛ፡ ዒሰራዔኤሌ ዓሳ ኬኤዚንቴማ ጎይፃ ማዳኔ።

5 ዳራ ቶሊ ዳንዳሢ ጊብፃ ዓጮ ካክቲ ዋይዛፃ ዒዛንታ ዒዛና ዋላ ማዳ ዳኤፖ ዓሳ ማሊፃ ፔኤሲ ሸርሺ፡- «ሃይ ኑ ማዳ ባካ ዓይጎዳይ? ዒሰራዔኤሌ ዓሳ ዓኣዳንዳጉዲ ኑ ሃሽሢሮ ዔፃታ ኑኡም ማዳ ማዳ ፓጮኔ ጌይሢቱዋዓዳ?» ጌዔኔ። 6 ዩካፓ ካክቲ ሳርጌሎ ያይቶ ጊኢሺ ፖኦሊሶዋ ዔኪ ኬሰኬኔ። 7 ቃራ ዶዲ ላሆ ፃኤታ ሳርጌላ ያይታ ጊዳ ቃሲ ጊብፃ ዓጮይዳ ዓኣ ሳርጌሎ ያይቶዋ ቢያ ያሎሮ ዓኣዳንዳጉዲ ኬሲ፡ ዔፃቶ ዓይሢ ያሊሳ ዓሰዋ ጊኢሺኤ፤ 8 ናንጊና ናንጋ ጎዳ ካክቲኮ ዒሮ ዶዲሽ ዒፃያ ማሃሢሮ ጫርቂ ኬዘይዳ ዓኣ ዒሰራዔኤሌ ዓሰ ዒዚ ዳውሴኔ፤ 9 ጊብፃ ዓጮኮ ያሎ ዓሳ ሳርጌሎ ያይቶንታ ፓራሢንታ ፓራሢ ቶጊ ዔኪ ዓኣዳ ዓሰንታ ዋላ ማዒ ዒሰራዔኤሌ ዓሰ ጊንፃ ዓኣዲ፡ ዒሰራዔኤሌ ዓሳ ዘቆ ባዘኮ ቤርቶ ዛላ ዓኣ ፒሃሂሮቴና ባዓልፃፖኔ ኮይሎይዳ ዲንኪ ዴዒ ዓኣ ቤዛ ዓኣንቴ ሄሌኔ።

10 ዒሰራዔኤሌ ዓሳ ካክቲና ዒዛኮ ያሎ ያላ ዓሰና ዔፃቶይዳ ፑርታ ባኣዚ ማዳኒ ጊኢሺንቲ ሙካሢ ዛጋፃ ማርጌና ዒጊጪ፡ ናንጊና ናንጋ ጎዳ ዔፃቶ ማኣዳንዳጉዲ ዒዛ ባንሢ ዒላቴኔ፤ 11 ሙሴ ኮራ ዔፃታ፡- «ጊብፃ ዓጮይዳ ኑኡኮ ዲኡፒ ቤሲ ባይቂያ? ዔኤዘ፡ ሃያ ዓሲ ናንጉዋ ዳውሎይዳ ኑ ሃይቃንዳጉዲ ዓይጋ ኔ ዔኪ ኑና ዩዔይ? ጊብፃፓ ኔ ኬሴም ኑ ጊዳ ሙኬ ባኮ ሂንዳ ዓካሪ ዛጌ! 12 ሃይ ቢያ ማዓንዳሢ ሃጊ ዒኢካፓ ኬሰኩዋፃ ኔኤም ኑ ኬኤዚባይ? ዩያ ሌሊቱዋንቴ ሃዳራ ኑና ሃሽ፡ ጊብፃ ዓጮ ዓሰም ዓይሌ ማዒ ማዳ ኑ ማዳም ኔኤም ኑ ጌዒናኣኮኬ፤ ጎኔና ሃያ ዓሲ ናንጉዋ ዳውሎይዳ ሃይቂያይዳፓ ዒኢካ ዓይሌ ማዒ ናንጊፃ ቃራታፃ ዓቴኔ» ጌዔኔ።

13 ሙሴያ ዔፃቶም ማሃ፡- «ዶዲዋቴ፡ ዒጊጪፖቴ! ባንሢ ዓኣ ጎይፃማና ዶዲ ዚቲ ጎዑዋቴ፤ ናንጊና ናንጋ ጎዳ ባንሢ ዓውሳኒ ማዳንዳ ባኮ ሃሮ ባንሢ ዛጋንዳኔ፤ ሃኣቶ፡ ሃሮ ባንሢ ዛጋ ጊብፃ ዓጮ ዓሰ ለሚ ባንሢ ዛጋንዳኔ። 14 ናንጊና ናንጋ ጎዳ ባንሢ ዛሎ ያልታንዳኔ፤ ባንሢ ማዳኒ ኮይሳሢ ዚቲዮ ጌዒ ማዓ ባኮ ዛጊ ሌሊከ» ጌዔኔ።

15 ዩካፓ ናንጊና ናንጋ ጎዳ ሙሴም፡- «ታ ባንሢ ኔ ዒላታሢ ዓይጎሮዳይ? ዩያይዳፓ ዴራ ቤርቲም ዓኣዳንዳጉዲ ኬኤዘ፤ 16 ኮኦሎ ኔኤኮ ዴጊዲ ባዘ ባንሢ ዘንከ፤ ዋኣፃ ላምፃ ቤሲ

ገብረገብገዳይ፤ ዲሰራዔኤሌ ዓሳ ፃኣዲ ሳዓና ባዘ ቲቂ ፒንቃንዳይ፤
 17 ገብገፄ ዓጮ ዓሳኮ ዒኖ ታ ዶዲሺ ዒፃ ዓሲ ማሃንዳሢሮ፣ ዴሮ
 ዔያታ ዳውሳንዳይ፤ ካኣቲና ዒዛኮ ፖኦሊሶና ሃሃ ሳርጌሎ ያይቶና
 ፓራሢና ታኣኒ ባሺ ቦንቾ ዴንቃንዳይ። 18 ዔያቶ ታ ባሻዛ፣ ገብገፄ
 ዓጮ ዓሳ ታኣኒ ናንገና ናንጋ ጎዳ ማዔሢ ዔራንዳይ» ጌዔ።

19 ዲሰራዔኤሌ ፖኦሊሶኮ ቤርታ ቤርታ ማዒ ዔኪ ዓኣዳ
 ከኢታንቻሢ ሺሪ ገንፃ ዔቄ፤ ፒዝ ጌዒ ዔቄ ሻኣራኣ ገንሢም
 ዓኣዳ፣ 20 ገብገፄ ዓጮ ዓሳና ዲሰራዔኤሌ ዓሳናኮ ባኣካ ዔቄ፤
 ሻኣራ ገብገፄ ዓጮ ዓሳ ዲሚና ካንቃዛ፣ ዲሰራዔኤሌ ዓሳም ጋዓንቴ
 ፖራ ፖዓይ፤ ዩያሮ ገብገፄ ዓጮ ያሎ ዓሳ ዩኖ ዋንቶ ቢያ ዲሰራዔኤሌ
 ዓሳ ባንሢ ዶጫኒ ዳንዳዒባኣሴ።

21 ዩካፓ ሙሴ ኩጮ ዋኣፃ ባንሢ ማሄ፤ ዩያሮ ናንገና ናንጋ
 ጎዳ ዓባ ኬሰካ ዛላፓ ዴኤፒ ዠባሬና ባዘ ፓቂ ገንሢም ማሄ፤
 ዠባራ ዩኖ ዋንቴሎ ሃሹዋፃ ዠባርሼሢሮ፣ ዋኣፃ ሺኢኬም ሳዓ
 ፃኣዳይ፤ ዋኣፃኣ ላምፃ ፓቂንቴ፤ 22 ዲሰራዔኤሌ ዓሳ ባዘ ፃኣዲ
 ሳዓና ቲቂ ፒንቃኣና፣ ዋኣፃ ዔያቶኮ ሻውሎና ሚዛቆ ዛሎናይዳ
 ኮጩ ማዒ ዔቄ። 23 ገብገፄ ዓጮ ዓሳ ሳርጌሎ ያይቶና፣ ፓራሢና፤
 ሃሃ ፓራሢ ቶጊ ዔኪ ዓኣዳ ዓሳ ጉቤ ዲሰራዔኤሌ ዓሳ ዳውሲ ገንፃ
 ባዘ ሳዘ ጌሌ። 24 ሃጊ ሳዓኮ ገንሢ ዘቁዋንቴ ናንገና ናንጋ ጎዳ
 ፒዝ ጌዒ ዔቄ ታሞና ሻኣሮና ባኣካፓ ገብገፄኮ ያሎ ያላ ዓሳ ለካ
 ዛጋዛ፣ ቢያሢ ዒጊጩ ዋኦቶንዶ ጎይሢ ባይዜ። 25 ናንገና ናንጋ
 ጎዳ ዔያቶኮ ሳርጌሎ ያይቶኮ ሺራሢ ሳፃና ዋላ ዓይሢሢሮ ዩኖ
 ያይቶ ፓራሢና ጎቼሲ ዔኪ ዓኣዳኒ ዔያታ ዳንዳዒባኣሴ፤ ገብገፄ ዓጮ
 ዓሳ፡- «ናንገና ናንጋ ጎዳ ዲሰራዔኤሌ ዓሳ ማኣዲ ኦና ያፃላይ፤ ዩያሮ
 ኦ ዔያቶኮ ቤርታፓፓ ፑኒንቴቴ ቃራኩ!» ዋሊ ኮይላ ጌዔ።

26 ናንገና ናንጋ ጎዳ ሙሴም፡- «ኩጮ ኔኤኮ ባዘ ባንሢ ማሄ፤
 ዋኣፃ ገብገፄ ዓጮ ዓሳይዳ፣ ሳርጌሎ ያይቶና ፓራሢናይዳ ገንሢ
 ማፃንጎ» ጌዔ። 27 ዩያሮ ሙሴ ኩጮ ፔኤሲ ባዘ ባንሢ ማሄ፤
 ሳፃኮ ገንፃ ዘቃኣና ዋኣፃ ገንሢ ዋንዳኣ ቤዘ ማዔ፤ ገብገፄ ዓጮ
 ዓሳ ዋኣፃፓ ጳሽኪ ቶላኒ ማሌ፤ ናንገና ናንጋ ጎዳ ጋዓንቴ ባዘይዳ
 ዔያቶ ዔኪ ዔኪ ኬኤሬ። 28 ዋኣፃ ዋንዳኣ ቤዘ ገንሢ ማዒ
 ዲሰራዔኤሌ ዓሳ ገንፃ ሙካ ሳርጌሎ ያይቶንታ ፓራሢና ያላ ዓሳንታ
 ሃሃ ገብገፄኮ ያሎ ዓሳ ጉቤ ሙዔ፤ ዔያቶይዳፓ ፔቴ ዓሲታፃ
 ዓቲባኣሴ። 29 ዲሰራዔኤሌ ዓሳ ጋዓንቴ ዋኣፃ ሻውሎና ሚዛቆ
 ዛሎናይዳ ዔያቶኮ ኮጩ ማዒ ዔቄሢሮ ፃኣዲ ሳዓና ፒንቄ።

14:22 14:22 1&C. 10:1-2፤ ዔ.ብ. 11:29።

30 ዬኖ ኬሎና ናንጊና ናንጋ ጎዳ ዲሰራዔኤሌ ዓሶ ጊብጫ ዓጮ
 ዓሶ ኩጫፓ ዓይሴኔ፤ ባዘ ዓጮይዳ ዓኣ ጊብጫ ዓሶኮ ሌዘዋ
 ዲሰራዔኤሌ ዓሳ ዛጌኔ። 31 ናንጊና ናንጋ ጎዳ ዋዚጉዴ ዴኤፒ
 ዋልቁና ጊብጫ ዓጮ ዓሶ ባሼቴያ ዲሰራዔኤሌ ዓሳ ዛጋያ ናንጊና
 ናንጋ ጎዳ ዲጊጩኔ፤ ናንጊና ናንጋ ጎዳና ዲዛም ማዳያ ማዔ ሙሴ
 ዑጾይዳኣ ዔያታ ጉሙርቁሂ ጌህኔ።

15

ሙሴንታ ማይራሞንታ ያኦሲ ቦንቾም ዓይናዳ ዓይኑዋ

1 ዩካፓ ሙሴና ዲሰራዔኤሌ ዴሮና ሃካፓ ሊካ ዓኣ ዓይኑዋ
 ናንጊና ናንጋ ጎዳ ቦንቾ ዓይናዳ፡-

«ፓራሂንታ ፓራሂና ያላ ዓሶንታ ባዘይዳ ዔኪ ኬኤሪ

ዴግ ዴግ ጌዒ ቦንቾንቱሂሮ

ናንጊና ናንጋ ጎዳም ታ ዓይናዳንዳ።

2 ናንጊና ናንጋ ጎዳ ታኣኮ ዋልቆሂኬ፤

ታ ዒዛ ቦንቾ ዓይናዳ፤

ታና ዒዚ ዳቁሻያ ማዔኔ፤

ዒዚ ታኣኮ ያኣዛሂኬ፤ ዬያሮ ታ ዒዛ ጋላታኔ።

ታ ዓደ ያኣዛሂኬ፤ ታ ዒዛ ዴጊዲ ቦንቻኔ።

3 ናንጊና ናንጋ ጎዳ ዶዲ ያላያኬ፤

ሱንፃኣ ዒዛኮ ናንጊና ናንጋ ጎዳኬ።»

4 «ጊብጫ ዓጮኮ ያሎ ዓሶ

ሳርጌሎ ያይቶና ዋላ ባዘይዳ ኬኤሬኔ፤

ፖኦሊሶ ዓይህ ዶኦሪንቱ ዓሳኣ ዘቁ ባዘና ሙይንቱ።

5 ሚርጌና ዔታዳ ባዘ ዔያቶ ዲኡኪ ባይዜኔ፤

ሹቹጉዲ ዔያታ ኮላዲ ባዘ ዔቶ ኬዳ።»

6 «ናንጊና ናንጋ ጎዳሂዮ! ኔኤኮ ሚዛቆ ኩጫ

ዋልቁና ቦንቾንቱ፤ ሞርኮዋ ባይዜኔ።

7 ኔኤኮ ዴኤፒ ማዔ ዋልቁና ኔና ዒፃ ሞርኮ ኔ ባሼኔ፤

ኔኤኮ ዳጋ ታሚጉዲ ዔኤቴሂሮ ዲኢሪጉዲ ዔያቶ ሙዔኔ።

8 ባዘ ኔኤኒ ዑኡዜ ዋዶና

ዋኣፃ ኩሊንቱ፤ ዓዳ ኮጩጉዲ ፒዝ ጌዒ ዔቁኔ፤

ዴኤፖ ዔቶይዳ ዓኣ ዋኣፃ ቶርጳዲ ዴዔኔ።

- 9 ሞርኬ ማለፉ፡- ላወሲ ታ ዔያቶ ዓርቃንዳኔ፤
ቆሎዎ ታ ዔያቶኮ ገሽታንዳኔ፤
ታ ሼና ጌዔሂጉዴያ ታ ዔካንዳኔ፤
ታኣኮ ዓፓሮና ታ ዔያቶ ዎዳንዳኔ ሂዚ ጌዔኔ።
- 10 ጋዓንቲ ናንገና ናንጋ ጎዳሂዮ!
ኔ ፔቴና ዑኡዛዛ ባዛ ዔያቶ ዔኤዳኔ፤
ባዘይዳ ዓንገጉዲ ዔያታ ጌሊ ባይቄኔ።
- 11 ናንገና ናንጋ ጎዳሂዮ! ካኣሽኪንታ የኦዘይዳፓ ቢያ
ኔናጉዴያ ያናዳይ? ጌኤሹሞና ሄርሺሳይ ቦንቸናኣ ዒጊቻይ፤
ኔ ዎልቄና ማዳንታ ሄርሺሳ ባኮ
ማዳንዳይ ኔጉዴያ ያናዳይ?
- 12 ሚዛቆ ኩጮ ኔ ዔቁሴ ዎደና ሳዓ ኑ ሞርኮ ዔኤዳኔ፤
- 13 ናንገና ናንጋ ናሹሞና ኔ ዓውሴ ዴሮኮ ቤርታ ኔ ዓርና ማዔኔ፤
ኔኤኮ ደዲሞና ኔኤሞ ዲማዴ ሳዔሎ ዔያቶ ኔ ጌልዜኔ፤
- 14 ማሌ ዴራ ቢያ ዬያ ዎይዜ ዎደና ዒጊቹሞና ጎጋይቄኔ፤
ፒሊሰጻኤማ ዓጮ ዓሳ ዲቃቲሂና ጎይሂ ባይዜኔ፤
- 15 ዔደኦማ ዓጮ ሱኡጋ ኮሺ ዑሃ ዓኣዴ ማታዳኔ፤
ሞዓኣቤ ዓጮኮ ዴኤፖ ዓሳ ዒጊጩ ጎጋይቄኔ፤
ካኣናኔ ዓጮ ዴሮኮዎ ሄርሺንቶ ማሊፃ ባይቄኔ።
- 16 ዲቃቲሂና ዒጊቹሞና ዔያቶይዳ ጌሌኔ፤
ናንገና ናንጋ ጎዳሂዮ! ኔኤኮ ዎልቆ ዔያታ ዛጌሂር
ዓይላታፓ ኔኤኒ ኬሴ ኔኤኮ ዴራ
የኦኪ ዓኣዳንዳያ ሄላንዳኣና ዔያታ ዲቃቲሂና ሹቸጉዲ ዘቲ
ጌዔኔ።
- 17 ናንገና ናንጋ ጎዳሂዮ! ኔኤኒ ዎርቃኒ ማዜ ቤዘይዳ
ኔኤኮ ኩጮ ማዜ ጌኤዦ ማኣሮይዳ
ኔ ዴኔ ማዔ ዲኮይዳ
ኔ ዴሮ ዔኪ ሙኪ ዒኣካ ኔኤኒ ጌሣንዳኔ።
- 18 ናንገና ናንጋ ጎዳሂዮ!
ኔኤኒ ናንገና ካኣቲ ማዒ ናንጋንዳኔ።»
- 19 ዒሰራዔኤሌ ዓሳፃኣዲ ሳዓና ባዘ ቲቂ ፒንቄኔ፤ ጋዓንቲ ጊብጻ
ካኣቲኮ ፓራሂ፤ ሳርጌሎ ያይታ፤ ፓራሂና ያላ ዓሳኣ ቢያ ባዘይዳ
ጌላዛ ናንገና ናንጋ ጎዳ ዎኣፃ ጊንሣ ማሄሞ ዎኣፃ ዔያቶ ሙዔኔ።
- 20 ዓኣሮኔኮ ጌሮ፣ ያኦሲ ማሊሂ ኬኤዛ፣ ማይራሞ ጎየሰኬና
ካራቤ ዔኬኔ፤ ማሌ ላኣላኣ ዬና ጎይያ ፔኤኮ ታሞቡሮ ዔኪ ባዒ
ኮርጊ ኮርጊ ዒዘ ጊንያ ዓኣዲሂ ዓርቄኔ፤ 21 ማይራማ ዓይኦሞ
ዔያቶሞ ዴንሂ፡-

«ፓራሢንታ ፓራሢና የላ ዓሶ ባዘይዳ ኬኤሪ
ጴሌፕ ባሽሢ ሲ ዴንቁሢሮ
ናንገና ናንገ ጎዳም ዓይናዲዋቱ» ጌይሢና ዓይናዴኔ።

ጫንጮ ዋኦፆ

22 ሙሴ ዒሰራዔኤሌ ዴሮ ዘቄ ባዘ ጊዴና ፒንሢ ሹኡሬ ጌይንታ
ዓሲ ናንጉዋ ዳውሎ ዔኪ ዓኦዴኔ፤ ዬኖ ጎይፆ ሃይሦ ኬሊ ጉቤ
ዔያታ ሃንቴኔ፤ ጋዓንቴ ፔቴታፆ ዋኦሢ ሲያታ ዴንቁባኦሴ። 23 ዬካፓ
ማኦራ ጌይንታ ቤሲ ዔያታ ሙኪ ሄሌኔ፤ ጋዓንቴ ዓዘ ቤዘይዳ
ዓኦ ዋኦፆ ጫንቺ ማዔሢሮ ዑሽካኒ ዔያታ ዳንዳዒባኦሴ፤ ማኦራ
ጌይንቴሢያ ዬያሮኬ። 24 ዒማና ዴራ ሙሴ ዑያይዳ ጉንዳሚ፡-
«ዓካሪ ኦኡኒ ዓይጎ ዑሽካንዳይ?» ጌዒ ዒዘ ያኦጮኔ። 25 ሙሴያ
ጴሌፕ ዒላተና ናንገና ናንገ ጎዳ ሺኢቃዛ፡ ናንገና ናንገ ጎዳ ዒዘም
ፔቴሚሢ ዳዌኔ፤ ዬኖ ሚያ ዔኪ ዋኦፆ ዒዚ ዓጋዛ ዋኦፆ ዓኦፆ ዑሽም
ጊኢጋያ ማዔኔ።

ናንገና ናንገ ጎዳ ዒያታ ዋርቃንዳ ዋጌ ዬኖ ቤዘይዳ ዔያቶም
ዒንጌኔ፤ ሃሢ ዔያታ ዒዘም ዓይሢንታቴያ ዓይሢንቴዋቴያ ዒኖ
ዔያቶኮ ሙሪ ዛጌኔ፤ 26 ሢዚ ዔያቶም ዒ ጌዔኔ፡- «ታ ቤርታ ኮሺ
ማዔ ባኦዚ ማዲሢና ታኦኮ ዓይሢያዋ ካፒሢና ጉቤ ዒናፓ ታኦም
ዒንሢ ዓይሢንቴቴ ጊብፆ ዓጮ ዓሶ ዑፆ ታ ዔኪ ዬዔ ደርዓሢዳፓ
ፔቴናታፆ ታ ዒንሢ ሜታሳዓኬ፤ ዒንሢ ዳቂሻ፡ ናንገና ናንገ ጎዳሢያ
ታናኬ።»

27 ዬካፓ ዔሊሜ ጌይንታ ቤዘ ዔያታ ሙኬኔ፤ ዒዘ ቤዘይዳ ታፅ
ላምፆ ዋኦሢ ዓለቃ ቤሲና ላንካይታሚ ታሚሬ ጌይንታያ፡ ሜኤፆ
ማላ ሙያ ሚሢ ዓኦኔ፤ ዴራ ዒዘ ዋኦፆ ዓጮይዳ ዲንኪ ዴዔኔ።

16

የኦሲ ዴሮም ማና ጌይንታ ሙኡዚንታ ፑሮ ማላ ካፖና ዳኬሢ

1 ጉቤ ዒሰራዔኤሌ ዓሳ ጊብፆፓ ኬሰከንቴ ላምዓሳ ዓጊኖኮ
ታፅ ደንጋሳ ኬሎና ዔሊሜፓ ዔያታ ዔቂ ሲናና ዔሊሜናኮ ሳዘይዳ
ዓኦ «ሲኒ» ጌይንታ ዓሲ ናንጉዋ ዳውሎ ሙኬኔ። 2 ዬኖ ዓሲ
ናንጉዋ ዳውሎይዳ ቢያሢ ዋላ ቡኪንቴ ሙሴና ዓኦሮኔናይዳ
ጉንዳሚሢ፡- 3 «ናንገና ናንገ ጎዳ ኦና ዋንዴ ጊብፆይዳ ዓኦንቴ
ዋዲዋፆ ዓይጎሮ ሃሽይ? ዒኢካ ሜሌ ባካ ዓቴቴ ዓሽኪ ማዔቶዋ
ሜሌ ኦ ኮዓሢጉዴያ ሚሮጌ ሙኡዚ ኦ ሙዓኒ ዳንዳዓኔ፤ ዒንሢ
ጋዓንቴ ኦና ቢያሢ ናይዚና ኦ ኩዳንዳጉዲ ሃያ ዓሲ ናንጉዋ ዳውሎ
ዔኪ ኬሴኔ» ጌዔኔ።

4 ናንጊና ናንጋ ጎዳ ሙሴም፡- «ሃይሾ ታኣኒ ዒንሢ ቢያሢም ጊዳንዳ ሙኡዚ ጫሪንጫፓ ዲኢኒሻኒኬ፤ ዴሪ ቢያ ኬሊ ኬሰኪ ኬሰኪ ዒማ ኬሎም ጊዳንዳ ሙኡዚ ማንዒ ዔኮንጎ፤ ዩያይዲ ታኣኒ ዔያቶም ዒንጋ ዎጎ ዔያታ ካፓቲ ታ ዛጋንዳ። 5 ላሃሳ ኬሎና ጋዓንቲ ዔያታ ፔቲ ኬሊ ማንዒ ዔካዘይዳ ቃሲ ፔቲ ኬሊር ዔኪ ጊኢጊሾንጎ» ጌዔ።

6 ሙሴና ዓኣርኔና ጉቤ ዒሰራዔኤሌ ዴርም፡- «ጊብዔ ዓጫፓ ዒንሢ ዔኪ ኬሴሢ ናንጊና ናንጋ ጎዳታሢ ሃሮ ዒባኒ ዒንሢ ዔራንዳ፤ 7 ዘር ጉቲ ናንጊና ናንጋ ጎዳኮ ቦንቾ ፔጋሲ ዲዎ፣ ዓኣፒዳ ዲካ ፖራ ዒንሢ ዛጋንዳ፤ ዒዛይዳ ዒንሢ ጉንዲሚያ ማዔሢ ናንጊና ናንጋ ጎዳ ዋይዜ፤ ዓይጎር ጌዔቶ ኦኡኒ ዒዚ ዒንጋ ዎጎ ማደይዳ ፔኤሻያ ማዔሢር ኦጊዳ ዒንሢ ጉንዲሚሢ ዒዛይዳ ጉንዲሚያ ማዓ።» ጌዔ። 8 ዩካፓ ሙሴ ኬኤዛዎ፡- «ዒዛይዳ ዒንሢ ጉንዲሚሢ ዒዚ ዋይዜሢር ዒባኒ ዒንሢ ሙዓንዳ ዓሽኪንታ ዘር ጉቲ ጊንሣ ዒንሢ ኮዔሢጉዴያ ካሣ ዒንሢም ዒንጋንዳሢ ናንጊና ናንጋ ጎዳኬ፤ ኦ ዓይጎዳይ? ኦጊዳ ዒንሢ ጉንዲሚኔ ጌይፃ ናንጊና ናንጋ ጎዳይዳ ዒንሢ ጉንዲሚኔ ጌይሢኬ» ጌዔ።

9 ሙሴ ዓኣርኔም፡- «ናንጊና ናንጋ ጎዳ ዒዛይዳ ዔያታ ጉንዲሚያ ማዔሢ ዋይዜሢር፣ ጉቤ ዒሰራዔኤሌ ዴሪ ሙኪ ዒዛ ቤርታ ዔቃንዳጉዲ ኬኤዜ» ጌዔ። 10 ዓኣርኔ ጉቤ ዓሰም ኬኤዛዛ፣ ቢያሢ ዓኣፖ ካር ዓሲ ናንጉዎ ዳውሎ ባንሢ ሺርሺ ዛጌ፤ ዩማና ናንጊና ናንጋ ጎዳኮ ቦንቾ ፔጋሳ ዓኣፒዳ ዲካ ፖራ ሻኣሬና ዎላ ጴዴ፤ 11 ናንጊና ናንጋ ጎዳ ሙሴም ኬኤዛዎ፡- 12 «ዒሰራዔኤሌ ዓሳ ታጊዳ ጉንዲሚሢ ታ ዋይዜ፤ ዩያር ሂዚ ጌዒ ዔያቶም ኬኤዜ፣ ሃሮ ዓባ ጌላንዳሢኮ ቤርታ ዒንሢም ሙኡዚ ማዓንዳ ዓሽኪ ዒንሢ ዴንቃንዳ፤ ዘር ጉቲ ዒንሢ ኮዓሢጉዴያ ካሣ ዴንቃንዳ፤ ያዲ ማዔሰካፓ ታኣኒ ናንጊና ናንጋ ጎዳ ማዔ ዒንሢኮ ፆኦሲታሢ ዒንሢ ዔራንዳ።» ጌዔ።

13 ዩሮ ዋንቶ ሚርጌ ፑር ማላ ካፒ ባራኒ ሙኪ ጉርዶ ባይዚ ዴዔ፤ ዘር ጉቲ ጊንሣ ጉርዶ ዓጫ ያልካዴ፤ 14 ዩይ ያልካ ፆኣዴሰካፓ ዳካ ሺኢቹ ባኣዚ ዓሲ ናንጉዎ ዳውሎይዳ ጴዴ፤ ዩና ባካ ሳይይዳ ኬዲ ላሂያ ቦኦሬ ሻኣዣ ባኣዚኬ። 15 ዒሰራዔኤሌ ዓሳ ዩያ ዛጋፓ ዓይጎታቲያ ዔሪባኣሢር፡- «ሃይ ዓይጎ ባኣዚዳይ?» ጌዒ ዎላ ያኦጮ።

ሙሴ ዔያቶም፡- «ሃይ ዒንሢ ሙዓንዳጉዲ ናንጊና ናንጋ ጎዳ ዒንጌ ሙኡዚኬ፤ 16 ዒንሢ ፔቲ ፔቲሢ ዒንሢም ኮይሳ ጎይፆጉዴያ

ሌሊ ማንደ ዔካንዳጉዲ ናንገና ናንገ ጎዳ ዓይሄኔ፤ ዬያሮ ፔቴ ፔቴ ማኣሮይዳ ዓኣ ዓሳ ቶኦካ ቶኦካ ፔቴ ጎሜሬ * ዔኮንጎ» ጌዒ ኬኤዜኔ።

17 ዒሰራዔኤሌ ዓሳ ዬኖ ጎይዖ ማዳኔ፤ ፔቴ ፔቴ ዓሳ ሚርጌ፣ ዛላ ዳካ ቡኩሲ ዔኬኔ፤ 18 ዔያታ ዔካዖ ማካዛ፣ ሚርጌ ቡኩሲ ዔኬህም ዑህ ዓኣዲ ዲቢባኣሴ፤ ገንህ ዳካ ቡኩሲ ዔኬህም ፓጨባኣሴ፤ ፔቴ ፔቴህ ቡኩሲ ዔኬህ ጊዳንዳማ ጉዴያ ሌሊኬ።

19 ሙሴ ዓሰም፡- «ዖና ማዔቶዎ ሃናኣ ኬሎም ኮይሳማፓ ዑህ ዓኣህ ዚራኣሮ ጌህንዳያ ኮይሱዋሴ» ጌዔኔ። 20 ፔቴ ፔቴ ዓሳ ጋዓንቴ ሙሴ ኬኤዜህ ዋይዞ ዒዲ ዬኖ ኬሎም ቡኩሴህዲፓ ፓቂ ዋይሄኔ፤ ዬያሮ ዚሮ ጉቴሎ ዎዒ ዛልቂ ዛዒያ ማዔኔ፤ ሙሴ ዒማና ዔያቶ ኮሺ ጎሬኔ። 21 ጉቶ ጉቶ ፔቴ ፔቴህ ፔኤም ጊዳንዳማ ጉዴያ ቡኩሲ ዔካኔ፤ ዓባ ዖይዳሰካፓ ጋዓንቴ ሳይዳ ዓቴህ ቢያ ዓልቂ ዓልቃኔ።

22 ላሃሳ ኬሎና ፔቴ ፔቴህ ላምዖ ጎሜሬ ማዓንዳያ ቡኩሲ ዔካኔ፤ ዲማ ዲማ ፓቂንቴ ዲቦ ዓሰኮ ሱኡጋ ቢያ ሙኪ ዬኖ ሙዖ ዛሎ ሙሴም ሃይሶ ኬኤዜኔ፤ 23 ዒዚ ዔያቶም፡- «ዚራኣ ኬላ ዒዛም ዲማዳ ሃውሽ ኬሊ ማዓንዳጉዲ ናንገና ናንገ ጎዳ ዓይሄኔ፤ ዬያሮ ሃኖ ዒንህ ላኣዳ ባኮ ላኣዳዋቴ፤ ካህ ባኮዎ ካህዋቴ፤ ዓቴህ ዚራኣሮ ዓቶንጎ» ጌዒ ኬኤዜኔ። 24 ዬካፓ ዔያታ ሙሴ ዓይሄ ጎይዖ ዓቴህ ዚራኣ ኬሎም ጌሄኔ፤ ዬይ ጋዓንቴ ዎዒ ዛልቂ፣ ዛዒያ ዛዒባኣሴ። 25 ሙሴ ዔያቶም፡- «ሃያ ሃኖ ሌሊ ሙሙዑዋቴ፤ ሃኖ ናንገና ናንገ ጎዳም ዲማዳ ሃውሽ ኬሊኬ፤ ዬያሮ ሃናኣ ኬሎና ሙዖ ቦኦሎይዳ ዒንህ ዴንቃዓኬ። 26 ዬያሮ ላሆ ኬሎ ቢያ ዓቴዎዖ ሙዖ ቡኩሱዋቴ፤ ሃውሽ ኬሎ ማዔ ላንካሳ ኬሎና ጋዓንቴ ፔቴታዖ ሙኡዚ ደዲንዳዋሴ» ጌዔኔ።

27 ላንካሳ ኬሎና ዴሮ ባኣኮይዳፓ ዳካ ዓሲ ሙዎ ባኮ ዔካኒ ኬሰኬኔ፤ ጋዓንቴ ፔቴታዖ ዴንቁባኣሴ። 28 ዬካፓ ናንገና ናንገ ጎዳ ሙሴም፡- «ዒንህ ታኣኮ ዓይህዖ ኩንህዖ ዒፃህ ዓይዲ ሄላንዳኣናዳይ? 29 ታኣኒ፣ ናንገና ናንገ ጎዳ ፔቴ ሃውሽ ኬሊ ዒንህም ዒንጌህ ጰቂህዋቴ፤ ቢያ ኬሊ ላሃሳ ኬሎና ላምዖ ኬሊም ጊዳንዳ ሙኡዚ ታ ዒንህም ዒንጋህ ዬያሮኬ፤ ላንካሳ ኬሎና ፔቴ ፔቴህ ማኣራፓ ኬሰኩዋዖ ዓኣ ቤዞይዳ ቢያ ሃውሺ ፔኤቆንጎ»

* 16:16 16:16 ጎሜሬ ጌይንታ ባኬላ፡- ዬኖ ዎዶና ዔኤቢ ማኮ ባኣዚ ማዓዛ፣ ፔቴ ጎሜሬ ፔቴ ኪሎና ዛላና ማዓያኬ። 16:18 16:18 2ቆሮ. 8:15። 16:23 16:23 ኬሲ. ማፃ 20:8-11።

ጌዔኔ። 30 ያዲ ጌይንቴሢሮ ዴራ ላንካሳ ኬሎና ፔቴታያ ማዶ ማዲባኣሴ።

31 ዲሰራዔኤሌ ዴራ ዩኖ ሙያ «ማና»† ጌዔኔ፤ ዩና ባካ ደካ ቦኦሬ፣ ጋኣሺ ዓኣፒ ማላያኬ፤ ዓኣሠማ ዔኤሲና ዋላ ላኣዲንቴ ላኣዳ ጉዴያኬ። 32 ሙሴ፡- «ኑና ዒዚ ጊብፄ ዓጫፓ ዔኪ ኬሴያና ዓሲ ናንጉዋ ዳውሎይዳ ኑ ሙዓንዳጉዲ ዒንጌ ሙዓ ሃያ ማዔሢ ሙካ ሾይንታ ዛጋንዳጉዲ ማና ኑ ጌሦም ናንጊና ናንጋ ጎዳ ኑና ዓይሣኔ» ጋዓዖ፣ 33 ዓኣሮኔም፡- «ፔቴ ዖቲ ዔኪጋፓ ፔቴ ጎሜሬ ማዓንዳያ ማና ዔኪ ዒኢካ ሃጊ ሙካ ሾይንቶም ናንጊና ናንጋ ጎዳ ቤርቶይዳ ካፒንቲ ዴዓንዳጉዲ ጌሣ» ጌዔኔ። 34 ናንጊና ናንጋ ጎዳ ሙሴ ዓይሣ ጎይያ ዓኣሮኔ ሃጊ ሙካ ሾይንቶም ዒኢካ ጌሣንቲ ዴዓንዳጉዲ ጫኣቁም ታኣቦቶ ጌይንታ ሳኣፂኖ ቤርታ ማናሢ ጌሣኔ። 35 ዲሰራዔኤሌ ዓሳ ናንጋንዳ ካኣናኔ ዓጮ ዛጰ ሄላንዳኣና ዖይዲታሚ ሌዔ ጉቤ ዩኖ ማና ጌይንታ ሙያ ዔያታ ሙዔኔ። 36 ዩኖ ዋዶና ዔኤቢ ማኮ ዔርቲ ባኮንሢ ዒፔና ጎሜሬናኬ፤ ዒፔ ጌይንታዛ ታጰ ደንጎ ኪሎ ማዓያ ማዓዛ፣ ጎሜሬ ፔቴ ኪሎና ዛላና ማዓያኬ።

17

ላላፓ ዓልቁ ዋኣዖ (ላሚ. ዋማ 20:1-13)

1 ጉቤ ዲሰራዔኤሌ ዴራ ናንጊና ናንጋ ጎዳ ዓይሣያና ፔቴ ቤዛፓ ሜሌ ቤሲ ዓኣዲ ዓኣዲ ጋዓኣና «ሲኒ» ጌይንታ ዓሲ ናንጉዋ ዳውሎ ሃሺ ዴንዲ ሬፕዲሜ ጌይንታዛይዳ ዴንኪ ዴዔኔ። ጋዓንቴ ዩኖ ቤዛይዳ ዑሽኮ ዋኣሢ ባኣሴ። 2 ዩያሮ፡- «ኑ ዑሽካንዳ ዋኣሢ ኡኡም ዒንጌ!» ጌዒ ሙሴይዳ ዔያታ ዒላቴኔ።

ሙሴ ዒማና፡- «ዒንሢ ዓይጎር ታና ማኪ ጌሰታይ? ሃሃ ዓይጎር ናንጊና ናንጋ ጎዳ ዋይታቴያ ኑ ዛጎም ዒንሢ ጋዓይ?» ዔያቶ ኮራ ጌዔኔ።

3 ዴራ ጋዓንቴ ሚርጌና ዴኤቢንቴያ ማዔሢሮ፡- «ጊብፄ ዓጫፓ ኑና ኔ ዓይጋ ኬሴይ? ኑናንታ ኑ ናኣቶንታ ሃሃ ኑ ቆልሞንታ ዋላ ቢያ ዋኣሢ ዴኤቢና ኩርሲሳኒዳ?» ጌዒ ሙሴ ዑፃ ጉንዲሚያ ሃሽ ዒፄኔ።

† 16:31 16:31 ማና ጌይዖ፡- ዒብሬ ሙኡቹና «ሃይ ዓይጎዳይ?» ጌይሢጉዴያኬ (ፓይ. 15 ዛጌ።) 16:31 16:31 ፓይ. ማጻ 11:7-8። 16:33 16:33 ዔብ. 9:4።

4 ሙሴ፡- «ሃያ ዳር ዓካሪ ታዎዎዳቶ ኮሽካንዳይ? ሃይሾ ሃይ ዓሳ ታና ሹቻ ዲዒኒ ገኢኔ» ጌዒ ናንገና ናንጋ ጎዳ ባንሢ ዒላቲ።

5 ናንገና ናንጋ ጎዳ ሙሴም፡- «ዒሰራዔኤሌ ዳር ሱኡጎይዳፓ ዛላ ዳካ ዓሲ ዔኪጋፓ ዳሮኮ ቤርታ ዓኣዳ፤ ዓባዬ ዎሮ ኔ ጳርቄ ኮኦሎዎ ኩጫ ዓርቄ፤ 6 ታኣኒ ሲና ዲኮይዳ ዓኣ ላሎ ዑፃ ኔ ቤርታ ዔቃንዳ፤ ኔኤኒ ላሎ ሹጮ ጳርቄ፤ ዳራ ዑሽካንዳ ዋኣሢ ጋራፓ ዓልቄ ኬሰካንዳ» ጋዓዛ፤ ሙሴ ዒሰራዔኤሌ ዳር ሱኡጎ ቤርታ ዬሮ ጎይዖ ማዳ።

7 ዬና ቤዛ ማሳሄ * ገንሣ ሃሣ ማሪባ † ጌይንቲ፤ ዓይጎር ጌዔቶ ዒሰራዔኤሌ ዓሳ «ናንገና ናንጋ ጎዳ ኑኡና ዎላዎ? ዎላቱዎይ?» ጌዒ ጉንዲሚያና ሃሣ «ዒ ዎይታቲያ ኑ ዛጋንዳ፤» ጌዔሢርኬ።

ዓማሌቄ ዓሳኮ ያሎና ባሽንቶ

8 ዒሰራዔኤሌ ዓሳ ሪፕዲሚ ጎዖ ቤዛ ዓኣንቲ ዓማሌቄ ዓሳ ሙኪ ዔያቶ ያሌ፤ 9 ሙሴያ ዒያሱም፡- «ዳካ ዓሲ ደኦሪ ዔኪጋፓ ዚራኣ ኬሎና ዓማሌቄ ዓሳ ያሌ፤ ታኣኒያ ያኦሲ ዎልቄና ማዲንታ ዓኪ ባኣዚ ማዳንዳጉዲ ያኦሲ ታኣም ዒንጌ ኮኦሎ ዔኪ ጌሚር ዑያ ኬሰኪ ዔቃንዳ፤» ጌዒ ዓይሣ። 10 ዒያሱ ሙሴኮ ዓይሣያ ኩንሢ ዓማሌቄ ዓሳ ያላኒ ዳንዳ፤ ሙሴና ዓኣርጌና ሃሣ ሁኡሬ ጎዖሢና ጌሚር ኬሰኪ፤ 11 ዩካፓ ሙሴ ፔ ኩጫ ጫሪንጫ ባንሢ ዔቁሳኣና ዒሰራዔኤሌ ዓሳ ያሎና ባባሻ፤ ኩጫ ዒዚ ሊካ ኬይሳኣና ጋዓንቲ ዓማሌቄ ዓሳ ገንሣ ደዲ ደዲ ባሻ። 12 ዬያር ሙሴኮ ኩጫ ደጫሢር ዓኣርጌና ሁኡሬና ሹቹ ዔኪ ዬዒ ሙሴ ዳዓንዳጉዲ ጌሢ ዳይሣ፤ ዩካፓ ሻውሎና ሚዛቆ ዛሎናይዳ ቃሶ ዒዛኮ ኬኤሊንቄ ዓርቄ ዔቄ ዳንዲ ዓባ ጌላንዲያ ሄላንዳኣና ፔኤቄ። 13 ዬያይዲ ዒያሱ ዓማሌቄ ዓሳ ያሊ ባሻ።

14 ዩካፓ ናንገና ናንጋ ጎዳ ሙሴም፡- «ቢያ ዎደና ማሊንቲ ማሊንቲ ናንጋንዳጉዲ ሃሮ ባሽያ ሃይሶ ፃኣፔ፤ ዒያሱማኣ ገንሣ ዓማሌቄ ዓሳ ኩርሲ ታ ባይዛንዳያ ማዔሢ ኬኤዜ» ጌዔ።

15 ሙሴ ዒማና ያኦሲም ዒንጎ ባኣዚ ዒንገ ካኣሽኮንደ ቤሲ ሹቹና ኮሺ፡- «ናንገና ናንጋ ጎዳ ታኣኮ ባሽያ ዔርዛ ባንዲራሢከ» ጌዒ ሱንሢ ጌሣ፤ 16 ዒዚ ሃሣ «ናንገና ናንጋ ጎዳኮ ባንዲር ዳገዲ ዓርቄዎቲ፤ ናንገና ናንጋ ጎዳ ዓማሌቄ ዓሳ ቢያ ዎዳ ያሌ ጎይሣ ዳዓንዳ፤» ጌዔ።

* 17:7 17:7 ማሳሄ ጌይዖ፡- ዒብሬ ዓሳ ሙኡቹና «ዎይታቲያ ዛገሢ» ጌይሢከ።
† 17:7 17:7 ማሪባ ጌይዖ፡- ዔብሬ ዓሳ ሙኡቹና «ጉንዲሚሢ» ሃሣ «ጎሪንቲ» ጌይሢከ። 17:14 17:14 ላሚ. ዎማ 25:17-19፤ 1ገሙ. 15:2-9።

18

ዮቴሬኮ ሙሴ ዛጊያ

1 ጾኦሲ ገብፂ ዓጫፓ ሙሴና ዒሰራዔኤሌ ዳሮና ዔኪ ኬሴያና ዔያቶም ማዳ ባኮ ቢያ ሚዲያሚ ዓጮኮ ቁኤሴ ማዔ፤ ሙሴኮ ባይሲ፣ ዮቴሬ ዋይዜኔ፤ 2 ዬያሮ ሙሴ ዒዛ ኮራ ቤርታ ሃሺ ዓኣዳ ዒዛኮ ማቾ ሲፓራንታ፤ 3 ላምዖ ዓቲንቆ ናኣቶንሢንታ ዋላ ዔኪ ሙኬኔ፤ ሙሴ፡- «ዓሲ ዓጪዳ ታ ሙኬ ዓሲኬ» ጌዒ ቶይዶ ናዓሢኮ ሱንዖ ጌርሾሚ ጌይ ቤርታ ጌሢያኬ። 4 ዬያጉዲ፡- «ታ ዓዶ ጾኦዛሢ ታና ማኣዳኔ፤ ገብፂ ዓጮ ካኣቲ ታና ዋዲዋጉዲ ዓውሴኔ» ጌዒ ላምዓሳ ናዓሢኮ ሱንዖ ዔኤሊዔዜሬ * ጌዒ ጌሢኔ። 5 ዮቴሬ ሙሴኮ ማቾና ዒዛኮ ላምዖ ናኣቶንሢንታ ዋላ ዓሲ ናንጉዋ ዳውሎይዳ ሙሴ ዲንኪ ዳዔ፣ ጾኦሲ ዲኮ ሙኬኔ፤ 6 ዔያቶኮ ሙኪያ ዔርዛኒ ሙሴም ከኢታ ቤርታ ዳኬኔ፤ 7 ዬያሮ ሙሴ ዒዛ ጎይሣ ዔካኒ ኬሰኬኔ፤ ዳንቄ ዋዶናኣ ቶኦኮ ሂርኪዲ ቦንቾ ዔኤሊሢ ዔኤሊ ሄርቄኔ፤ ዔያታ ቢያሢ ኮሺ ማዒያ ዋሊ ጾኦጭሰካፓ ሙሴኮ ማኣሪ ዋላ ጌሌኔ፤ 8 ናንገና ናንገ ጎዳ ዒሰራዔኤሌ ዓሶ ዓውሳኒ ገብፂ ዓጮ ካኣቲና ዒዛኮ ዳሮናይዳ ማዳ ዲቃሢ ሄርሺሳ ባኮ ቢያ ሙሴ ዮቴሬም ኬኤዜኔ። ሃሣ ገንሣ ዳራ ጎይያይዳ ዓኣንቲ ዋዚጉ ዳዲ ሜታ ዔያቶና ካኣሜቶ፣ ናንገና ናንገ ጎዳኣ ዔያቶ ዋዲ ዓውሴቶም ኬኤዜኔ። 9 ዮቴሬ ዬያ ቢያ ዋይዛዖ ናንገና ናንገ ጎዳ ገብፂ ዓሶ ኩጫፓ ዒሰራዔኤሌ ዓሶ ዓውሳኒ ማዳ ኮዦ ባኮና ዋዛዲ፡- 10 «ገብፂ ዓጮ ካኣቲና ዒዛኮ ዳሮና ኩጫፓ ዒንሢ ዓውሴ፣ ናንገና ናንገ ጎዳሢ ጋላቲንቲያ ማዖም፤ ዳሮዋ ዓይላታፓ ኬሴ ናንገና ናንገ ጎዳ ጋላቲንቶንጎ። 11 ናንገና ናንገ ጎዳ ካኣሽኪንታ ጾኦዞ ቢያይዳፓ ባሻያ ማዔሢ ዓካሪ ታኣኒ ዔሬኔ፤ ዓይጎሮ ጌዔቶ ገብፂ ዓጮ ዓሳ ዒሰራዔኤሌ ዳሮ ዑያይዳ ጾቶርቄ ዬያጉዳ ቦርሲሳ ባኣዚ ማዳሢሮ ሃያጉዳ ዲቃሢ ሄርሺሳ ባኣዚ ናንገና ናንገ ጎዳ ማዳኔ» ጌዔኔ። 12 ዬካፓ ዮቴሬ ቢያ ሚቶንቲ ዒንገንታንዳ ባኣዚና ጾኦሲም ዒንገንታንዳ ሜሌ ዒንገሢ ዔኪ ሙኬኔ፤ ዓኣሮኔንታ ዒሰራዔኤሌ ዳሮኮ ሱኡጎንታ ሙሴ ባይሲና ዋላ ካኣዦም ዲሞሶና ሙዖ ሙዓኒ ሙኬኔ።

ዋይሣ ዓሶኮ ደኦሪንቲያ
(ላሚ. ዋሚ 1:9-18)

18:2 18:2 ኬሲ. ማግ 2:21-22። 18:3 18:3 ዳኪ. ማዳ 7:29። * 18:4 18:4 ዔኤሊዔዜሬ ጌይዖ፡- ዔብሬ ዓሶ ሙኤቶና «ጾኦሲ ማኣዳኔ» ጌይሢኬ።

13 ዚሮ ጉቴሎ ሙሴ ዳሮ ባኣኮይዳ ዓኣ ዑርና ማርማሢና ዛሎ ጌሰቲ ዋጋኒ ዳዔኔ፤ ዳራ ዒዛኮ ዓጫ ቡኪ ዔቁም፣ ማዳ ዒዛም ዲቤሢሮ ጉቴፓ ዳንዲ ዒባኒ ሄላንዳኣና ዒ ዳዔኔ። 14 ዮቴሬ ሙሴ ማዳ ባኮ ቢያ ዛጌሰካፓ፡- «ኔ ዋዎይታ? ዳራ ኔኤና ጌሰታኒ ጌዒ ጉቴፓ ዳንዲ ዒባኒ ሄላንዳኣና ኔ ኮሮይዳ ዔቁም፣ ሃያ ባኮ ቢያ ዋይሣ ዓሲ ማዒ ዛጋኒ ዓይጋ ኔ ኔኤሮ ሌሊ ዳዒ ላባይ?» ጌዒ ያኣጩኔ።

15 ሙሴ ማሃዎ፡- «ታኣኒ ሃያ ቢያ ማዳሢ ዳራ ያኣሲ ማሊያ ዔራኒ ታ ባንሢ ሙካሢሮኬ፤ 16 ላምዎ ዓሲ ዋላ ዑራዲ ታ ኮራ ሙኩቶ ዋይ ፒዜታቶዋ ታ ዔርዛኒ ያኣሲኮ ዋኅና ዓይሢያና ዔያቶም ኬኤዛኔ» ጌዔኔ።

17 ዬካፓ ዮቴሬ ሃዚ ጌዔኔ፡- «ሃይ ኔ ማዳ ባካ ቢያ ፒዜቱዋሴ፤ 18 ኔናንታ ዳሮንታ ኔ ጉሪ ላቢሳኔ፤ ኔ ኔኤሮ ሌሊ ማዒ ሃያ ቢያ ማዳኒ ኔኤም ዳኤሢኬ፤ 19 ሂንዳ ታኣኒ ፔቴ ባኣዚ ኔና ዘሮም፤ ያኣሲያ ኔኤና ዋላ ማዓንዳኔ፤ ዳሮ ዛሎ ያኣሲ ቤርቶ ኔኤኮ ሺኢኪያና ዔያቶኮ ዓኣ ባኮ ዒዛ ቤርቶ ሺኢሺያ ፒዜኬ፤ 20 ኔኤኒ ያኣሲኮ ዓይሢያ ዔያቶ ዔርዛኒ፣ ሃሣ ዔያታ ዋይቲናንጋኒና ማዳኒ ኮይሳቲያ ፔጋሲ ኬኤዛኒ ኔና ኮይሳኔ፤ 21 ጋዓንቴ ዬያይዳ ቃሲ ዔራቶ ዓኣ ዓሲ ደኣሪ ዳሮ ዑያይዳ ሺያ ዓሲ ዋይሣያ፣ ያኤታ ዓሲ ዋይሣያ፣ ደንጊታሚ ዓሲ ዋይሣያና፣ ታጳ ዓሲ ዋይሣያ ማሃ ጌሣ። ዬያታ ያኣሲ ዒጊጫያ፣ ጉሙርቁንታያና ዳማና ዒንጎ ባኣዚናኣ ጌሺንቴዋያ ማዓኒ ኮይሳኔ። 22 ዔያታ ቢያ ኬሊ ሙኪ ሙኪ ሚርጌ ዳኤሢሢ ማዓባኣ ባኮ ዛጊ ዋኅንጎ፤ ዔያቶኮ ዑሣ ማዔ ዳኤ፣ ባኣዚ ጋዓንቴ ኔ ኮራ ዔኪ ሙኮንጎ፤ ዔያታ ዬያይዲ ኔ ባሶ ፓቂ ዔኤቶ ማዳ ኔኤም ሺሌዓንዳኔ። 23 ዬያይዲ ኔ ማዳቶ፣ ሃሣ ዬይያ ያኣሲ ማሊሢ ማዔቶ ኔና ኔ ጉሪ ላቢሳኣኬ፤ ዳራ ሺሌዔና ሃይሳ ዔያቶኮ ጋፔም ፔ ማኣሪ ማኣሪ ዓኣዳንዳኔ።»

24 ዬያሮ ሙሴ ዒዛኮ ባይሲ፣ ዮቴሬ ዘሬ ዘሮ ቢያ ዔኪ ማዳይዳ ፔኤሺኔ። 25 ዒዚ ዒሰራዔኤሌ ዓሶ ቢያሢ ባኣካፓ ዔራቶ ዓኣ ዓሲ ደኣሪ፣ ሺያ ዓሲ ዋይሣያ፣ ያኤታ ዓሲ ዋይሣያ፣ ደንጊታሚ ዓሲ ዋይሣያ፣ ታጳ ዓሲ ዋይሣያ ማሃ ዳሮ ዑያ ቢታንቶ ዓኣያ ማዓንዳጉዲ ጌሣኔ። 26 ዔያታ ዳኤሢሢ ማዒባኣ ሃይሶ ዛጊ ዛጊ ዳሮም ቢያ ኬሊ ዋጊሢ ዓርቁኔ፤ ኮሺ ሜታሳያ ማዔ ባኮ ሌሊ ሙሴ ባንሢ ዳካያ፣ ሺሌዔ ማዔ፣ ዑራና ጎሪንቲና ማዔ ባኮ ቢያ ዔያታ ፔኤሮ ጌሰቲ ኩንሣኔ።

27 ዬካፓ ሙሴ ዮቴሬ ሳራሢ ዳኬኔ፤ ዮቴሬያ ፔ ዓጮ ማዒ ዓኣዳኔ።

19

ዒሰራዔኤሌ ዓሳ ሲና ዲኮይዳ

1 ዒሰራዔኤሌ ዓሳ ገብፂ ዓጫፓ ከሰከንቴ ሃይሣሳ ዓገሮኮ ቤርታሳ ከሎና ዓሲ ናንጉዋ ዳውሎ ሲና ሙኪ ሄሌኔ፤ 2 ዔያታ ሬፕዲሜይዳፓ ዔቂ ዓሲ ናንጉዋ ዳውሎ፣ ሲና ባንሢ ዓኣዲ ዲኮኮ ቤርቶ ዛሎይዳ ዓኣ ዳውላ ዲንኪ ዴዔኔ። 3 ዒማና ሙሴ ጾኦሲና ጌሰታኒ ዲኮ ከሰካዛ፣ ናንገና ናንገ ጎዳ ዲኮ ዑጾይዳ ሙሴም ከኤዛፆ ያይቆኦቤ ዜርፆ ማዔ ዒሰራዔኤሌ ዓሰም ሂዚ ጌዒ ከኤዛገዳጉዲ ዓይሣኔ፡- 4 « ታኣኒ ገብፂ ዓጫ ዓሰ ዑጾይዳ ማዴ ባኩንታ ኮኣኬ ፔኤኮ ናኣቶ ጋኣዘና ዔካሢጉዲ ታኣኒያ ዒንሢ ሃማ ቤዘ ሄላንዳኣና ሞዲ ታ ባንሢ ዔኪ ዩዔቶዋ ዒንሢ ዛጌኔ፤ 5 ሃሢያ ሃይሾ ዒንሢ ታኣም ዓይሢንቲ፣ ታ ዒንሢና ጫኣቂ ጫኣቂሞዋ ካፔቶ ታኣም ዲማዴ ዴሬ ዒንሢ ማዓንዳኔ፤ ሳዓ ሞዚ ቢያ ታኣሮ ማዔቶዋ ዒንሢ ታኣም ዶኦሪንቴያ፣ 6 ሃሢ ታኣም ሌሊ ዲማዴያ ጌኤሺ ዴሬ ማዓንዳኔ፤ ቁኤሴጉዲ ማዒ ታኣም ዒንሢ ማዳንዳኔ፤ ዒሰራዔኤሌ ዴሮም ኔ ከኤዛገዳሢ ሂዚ ጌዒኬ።» 7 ዩያሮ ሙሴ ዲካፓ ከዲ ዴሮኮ ሱኡጎ ቢያ ፔቴይዳ ዔኤሌ፣ ናንገና ናንገ ጎዳ ዒዛም ዓይሢ ዓይሢያ ቢያ ዔያቶም ከኤዜኔ። 8 ዩካፓ ዴሪ ፔቴ ዑኡሲና ሞሊ ዑፃ፡- «ናንገና ናንገ ጎዳ ዓይሢሢ ቢያ ኑ ኩንሣንዳኔ።» ጋዓዛ፣ ሙሴ ዩያ ገንሣ ናንገና ናንገ ጎዳም ከኤዜኔ።

9 ናንገና ናንገ ጎዳ ሙሴም፡- «ታኣኒ ዴኤፕ ሻኣሬና ኔ ባንሢ ሙካንዳኔ፤ ዩያሮ ዴራ ታኣኒ ኔኤና ሞላ ጌሰታኣና ሞይዚ፣ ሃካፓ ሴካ ኔ ጋዓ ባኮ ቢያ ጉሙርቃንዳኔ» ጌዔኔ። ሙሴ ዒማና ዴራ ማሂ ጌዔ ባኮ ናንገና ናንገ ጎዳም ከኤዛዛ፣ 10 ናንገና ናንገ ጎዳ ሂዚ ዒዛም ጌዔኔ፡- «ዴሮ ባንሢ ዓኣዴ፤ ናንገና ናንገ ጎዳም ዲማዴያ ማሂ ዔያቶ ሺኣሻኒ ሃናና ዚሮናይዳ ዑጾ ጌኤሻንዳጉዲ፣ ዓፒሎዋ ፔኤኮ ማሰካንዳጉዲ ዔያቶም ከኤዜ፤ 11 ሃይሣሳ ከሎና ዴሮ ቤርቶይዳ ሲና ዲካ ታ ከዳንዳሢሮ ቢያሢ ዩኖ ከሎም ገኣጊንቶንጎ። 12 ኔኤኒ ዲኮኮ ዓጫይዳ ዛጲ ጌሣ፤ ዴራ ዩኖ ዛጲ ገዴና ዓኣዲ ዲኮ ከሰኩዋጉዲ፤ ሃሢ ዲኮ ባንሢ ዑኪያ ዑኩዋጉዲ ከኤዜ፤ ዓይጎ ዓሲታቶዋ ጌሢንቴ ዛጲ ገዴና ዓኣዲ ዲኮ ሄሌቶ ሞዲንቶንጎ፤ 13 ዩይ ዓሢ ጾኣኒያ ሄሌዋንቴ ሹቻ ዲዒንቲ፣ ሃሢ ፓልዔና ዲኪንቴ ሃይቆንጎ፤ ዩኖ ማዴ ዓሲታቶዋ ቆልሞ ዩኖ ጎይፆ ሃይቆንጎ፤ ዴራ ዲኮ ከሰካኒ ከይሳሢ ዴግ ጌዔ ዑኡሲና ዛያ ሞርቂንታ ሞዶና ሌሊኬ።»

19:5 19:5 ላሚ. ሞፃ 4:20፤ 7:6፤ 14:2፤ 26:18፤ ቲቶ 2:14። 19:5 19:5 1ጴ፪. 2:9። 19:6 19:6 ዮሃ. ጾፔዳ 1:6፤ 5:10። 19:13 19:13 ዔ.ብ. 12:18-20።

14 ዲሞና ሙሴ ደካፓ ኩዲ ዳራ ያኦሲ ካኣዮም ገእገገታንዳጉዲ ከኤዛዛ፣ ዳራ ፔኤኮ ባፒሎ ማሰኪ ገእገገቱኔ፤
15 ገንሣ ሙሴ ዳሮም፡- «ሂንታኣ ከሎማኣ ገእገገቱዋቱ፤ ዬኖ ከሎና ላኣለና ላሂፖቱ» ገዔኔ።

16 ሃይሣሳ ከሎ ጉቱ ጉጉንሣ ዑኡሲ ዋይዘንቴኔ፤ ገንሣ ዘኤለንሣና ዲም ገዔ ሻኣሪና ዲኮ ዑፃ ጴዴኔ፤ ዬያጉዲ ደኤፒ ዛዬ ዑኡሲያ ዋይዘንቴኔ። ዳራ ዲንኪ ዳዒ ዓኣ ቤዛ ዓኣፃ ዒጊጪ ጎጋይቄኔ። 17 ዬማና ሙሴ ዔያቶ ጉርዳፓ ዔከ፣ ያኦሲ ባንሣ ከሴኔ፤ ዔያታኣ ደኮኮ ዳማ ሙኪ ዔቄኔ። 18 ዬኖ ባቦ ናንጊና ናንጋ ጎዳ ታሚና ከዳሣሮ ጉቤ ሲና ደካ ጨቢና ካንቁንቴኔ። ጨባ ታሚ ናኣቦይዳፓ ከሰካያጉዲ ዠባሮይዳ ጨቢ ከሰከኔ፤ ዬያሮ ዳራ ኮሽ ዒጊጪ ጎጋይቄኔ። 19 ዛያሣኮ ደኤፖ ዑኡዛኣ ገዳ ቃሲ ቃሲ ዋለ ገንፃ ያኦላሣ ዓርቄኔ፤ ዲሞና ሙሴ ገሰታኣና ያኦሲ ጉጉንሣና ዲዛም ማሃ ከኤዛኔ፤ 20 ናንጊና ናንጋ ጎዳ ሲና ደኮ ቶኦኮይዳ ከዲ፣ ደኮኮ ቶኦኮ ከሰካንዳጉዲ ሙሴ ዔኤሌኔ፤ ሙሴያ ዬያ ደኮ ከሰካዛ፣ 21 ናንጊና ናንጋ ጎዳ፡- «ታና ዛጋጊ፣ ገሣንቴ ዛጳ ገዴና ዓኣዲ ታ ባንሣ ሙኩዋጉዲ ከዲ ዳሮም ከኤዘ፤ ያዲ ዔያታ ማዳቶ ዔያቶይዳፓ ሚርገሣ ሃይቃንዳኔ፤ 22 ማደሮ ታ ባንሣ ሙካ ቄኤሳታፃ ዓቱዋ ፔና ገኤሾንጎ፤ ያዲ ማዒባኣቶ ታ ዔያቶይዳ ፑርታ ባኣዚ ዓጋንዳኔ» ገዔኔ።

23 ሙሴያ ናንጊና ናንጋ ጎዳም፡- « ደኮኮ ዓጮ ቆኦሪ ማሃ ያኦሲም ዲማሴ» ገዒ ታና ኔ ዓይሣ ጎይፃና ማዲንቴሣሮ ዳራ ዛጳ ገዴና ዓኣዲ ደኮ ከሰካኒ ዳንዳዑዋሴ» ገዒ ማሃኔ።

24 ናንጊና ናንጋ ጎዳ ገንሣ፡- «ከዲጋፓ ዓኣሮኔ ዔኪ ሙኬ፤ ቄኤሶ ማዔቶዋ ዳራ ታ ባንሣ ከሰካኒ ዛጳ ገዴና ዓኣዲንዳያ ኮይሱዋሴ፤ ያዲ ዔያታ ማዳቶ ታ ዔያቶይዳ ፑርታ ባኣዚ ዓጋንዳኣከ» ጋዓዛ፣ 25 ሙሴ ዳሮ ባንሣ ከዲ ያኦሲ ዓይሣ ባኮ ቢያ ዔያቶም ከኤዘኔ።

20

ታጳ ዓይሣያ
(ላሚ. ዋማ 5:1-21)

1 ያኦሲ፣ ሃካፓ ሊካ ዓኣ ዓይሣያ ዳሮም ዓይሣኔ፡- 2 ዒሰራዔኤሌ ዳራጉቱ! ዒንሣ ዓይላቶና ናንገጌ ገብፃ ዓጩሎይዳፓ ዔኪ ከሴሣ ታና ዒንሣኮ ያኦዛሣ ማዔ ናንጊና ናንጋ ጎዳከ።

19:17 19:17 ላሚ. ዋማ 4:11-12።

3 ታገዳፓ ዓታዛ ሜሌ ጾኦዞ ካሸኪፖ፤

4 ጫሪንጮይዳ ማፃሞ ሰዓ፥ ሃሣ ሰጾኮ ደማ ዓኣ ዋኣጾይዳ ናንጋ ባኮይዳፓ ዓይጌንዳ ባኣዚኮታፓ ማላታ ኔኤኮ ካኣሸኮ ባኣዚ ማሃ ማዢፖ፤ 5 ታኣኒ፥ ኔኤኮ ጾኦሲ፥ ናንገና ናንጋ ጎዳሢ ሜሌ ጾኦዞ ካኣሸኪንታንዳጉዲ ኮዑዋፓ ማዔሢሮ ዓርሲንቲ ኮሺንቲ ዓይጎ ባኣዚታቲያ ካሸኪፖ፤ ሃሣ ዬያሞ ዘገፖ፤ ታኣኒ፥ ታና ዒፃ ዓሶ ቢያይዳ ፑርታ ባኣዚ ዓጋያኬ፤ ዜርፆዋ ዔያቶኮ ደንዲ ሃይሃና ጾይዶ ሾይንቲ ሄላንዳኣና ኮሚ ታ ኮፃ ጾኦሲኬ። 6 ታና ናሽካዘንሢና ታኣኮ ዓይሢያ ካፓዞንሢሞ ቢያ ጋዓንቲ ደንዲ ሺያ ሾይንቲ ሄላንዳኣና ታኣኮ ናንገና ናንጋ ናሹሞ ታ ፔጋሲ ዳዋያኬ።

7 ታና፥ ናንገና ናንጋ ጎዳ ማዔ ኔ ጾኦዞሢኮ ሱንጾ ማዒባኣ ባኣዚና ዔኤሊፖ፤ ታ ሱንጾ ማዒባኣ ባኣዚና ዔኤሊሢ ቢያ ዳቢንቲያ ማሃ ታ ፓይዳንዳኔ።

8 ሃውሾ ኬሎ ዲማሲ ቦንቹ፤ 9 ኔ ማዶ ኔኤኒ ማዳንዲ ላሆ ኬሊ ኔኤም ዓኣኔ፤ 10 ላንካሳ ኬላ ጋዓንቲ ታኣም ዲማዴ ሃውሾ ኬሊኬ፤ ዬና ኬሎና ዓይጎ ዓሲታቶዋ ማዶ ማዶፓ፤ ኔና ማፃሞ ኔ ናኣታ፥ ኔኤም ማዳ ዓሶዋ ማፃሞ ቆልማ፥ ኔ ዓጮይዳ ሙኬ ዓሲ ማዒ ናንጋ ዓሲ ማዔቲያ ፔቲታፓ ማዶ ማዲፖ። 11 ናንገና ናንጋ ጎዳ ጫሪንጮንታ ሰጾንታ ዴኤፖ ባዞንታ ዬያይዳ ዓኣ ባኮ ቢያ ላሆ ኬሊዳ ማዢኔ፤ ላንካሳ ኬሎና ጋዓንቲ ሃውሹኔ፤ ናንገና ናንጋ ጎዳ ሃውሹ ኬሎ ዓንጃሢና ዲማሲሢ ዬያርኬ።

12 ኔ ዓደና ኔ ዒንዶና ቦንቹ፤ ኔ ጾኦዞሢ ማዔ ናንገና ናንጋ ጎዳ ኔኤም ዒንጋ ሰጾይዳ ጾዶሲ ሌዔ ኔ ናንጋያ ማዓንዳኔ። 13 ዓሲ ዋዲፖ፤ 14 ዓኒ ሃሣ ማቾ ማዒባኣና ላሃፖ፤ 15 ዉኡቁፖ፤ 16 ዓይጌንዳ ዓሲዳታፓ ሉኡዙሞና ማርካዲፖ፤ 17 ሜሌ ዓሲ ማኣሪ ዘገ «ታኣር ማዓኣቢሽ ጌይፖ፤ ዓሲ ማቾታቲያ፥ ማዳ ዓሲታቲያ፥

20:5 20:5 ኬሲ. ማፃ 34:17፤ ሌዊ. ዓኬ 19:4፤ 26:1፤ ላሚ. ዋፃ 4:15-18፤ 27:15።
20:6 20:6 ኬሲ. ማፃ 34:6-7፤ ፓይ. ማፃ 14:18፤ ላሚ. ዋፃ 7:9-10። **20:7** 20:7 ሌዊ. ዓኬ 19:12። **20:8** 20:8 ኬሲ. ማፃ 16:23-30፤ 31:12-18። **20:10** 20:10 ኬሲ. ማፃ 23:12፤ 31:15፤ 34:21፤ 35:2፤ ሌዊ. ዓኬ 23:3። **20:11** 20:11 ማዢ. ማፃ 2:1-3፤ ኬሲ. ማፃ 31:17። **20:12** 20:12 ላሚ. ዋፃ 27:16፤ ማቲ. 15:4፤ 19:19፤ ማር. 7:10፤ 10:19፤ ሉቃ. 18:20፤ ዔፕ. 6:2-3። **20:14** 20:14 ሌዊ. ዓኬ 20:10፤ ማቲ. 5:27፤ 19:18፤ ማር. 10:19፤ ሉቃ. 18:20፤ ሮሜ 13:9፤ ያይ. 2:11። **20:15** 20:15 ሌዊ. ዓኬ 19:11፤ ማቲ. 19:18፤ ማር. 10:19፤ ሉቃ. 18:20፤ ሮሜ 13:8። **20:16** 20:16 ኬሲ. ማፃ 23:1፤ ማቲ. 19:18፤ ማር. 10:19፤ ሉቃ. 18:20።

ባአቶታቴያ፣ ሃርታቴያ፣ ዓሲኮ ቆሎ ማዔ ዓይጎ ባአዚያ ቢያ ዛጊ ታኦሮ ማዓኣቢሽ ጌይፖ።»

ዳርኮ ዒጊጨዖ
(ላሚ. ዋማ 5:22-33)

18 ዳራ ጉጉንዖና ዛያሚናኮ ዑኡዞ ዋይዛዖ፣ ሃሣ ዜኤሊንፃ ዜኤሊንሣሢና ዲካ ጨባሢያ ዛጋፖ ዒጊጨ ጎጋይቂ ጎጋይቂ ሃኪ ዔቄኔ፤ 19 ዩካፓ ሙሴም ዔያታ፡- «ኔኤኒ ኑኡም ኬኤዜ፤ ኔኤሲ ኑ ዋይዛንዳኔ፤ ያኦሲ ኑኡም ኬኤዜቶ ኑ ሃይቃንዳኔ» ጌዔኔ።

20 ሙሴያ ዔያቶም፡- «ዶዶዋቴ! ዒጊጨፖቴ፤ ያኦሲ ሃያይዲ ዒንሢ ባንሢ ሙኬሢ ዒንሢ ዋይታቴያ ዛጋኒና ዒዛ ዒንሢ ዒጊጨ ጎሜ ማዲሢ ሃሻንዳጉዲኬ» ጌዔ ኬኤዜኔ። 21 ዳራ ሃኪ ዔቄ ቤዛ ዓኣንቴ፣ ሙሴ ፔኤሮ ያኦሲ ዓኣ ዲሞ ባንሢ ዑኬኔ።

ያኦሲም ዒንጎ ባኮ ዒንጎ ቤዞ ዛሎ ዓይሢንቴ ዋጌ

22 ናንጊና ናንጋ ጎዳ ዒሰራዔኤሌ ዓሶም ሂዚ ጌዔ ኬኤዛንዳጉዲ ሙሴ ዓይሢኔ፡- «ታኣኒ ጫሪጎጫፓ ዋይቲ ዒንሢም ኬኤዜቶ ዒንሢ ዛጌኔ፤ 23 ዩያሮ ታና ሌሊ ካኣሽካንዳኣፓዓቴም ቢራ ዓንጊና፣ ሃሣ ዋርቄና ካኣሽኮ ያኦዞ ማዢ ካኣሽኪፖቴ፤ 24 ታኣም ደቃሌና ማዢንቴ ዒንጊ ካኣሽኮ ቤሲ ኮሹዋቴ፤ ዒዞ ቤዞይዳ ዒንሢኮ ማራቶና ዋኣሮና ባኣቶናይዳፓ ዛጊ ዶኦሪ ማቸንቴ ዒንጊታያ፣ ዳቂንታም ማዓ ፔቱሞና ዒንጎ ዒንጊሢ ማሂ ዒኣካ ዒንጉዋቴ፤ ታ ሱንፃ ማሊንታንዳጉዲ ጌዔ ታ ጌሢ ቤዞይዳ ቢያ ዒንሢ ኮራ ታ ሙኪ ዒንሢ ዓንጃንዳኔ፤ 25 ታኣም ሹቸና ኮሸና ዒንጎ ቤሲ ኮሻኒ ዒንሢ ኮዔቶ ዓርሲንቴ ሹቸና ማዢና ማፖፖ፤ ዓንጊና ዒንሢ ሄሌያታቶ ዩያ ዒንሢ ዒኣሳንዳኔ፤ 26 ዒዞ ቤዞይዳ ዑዖ ካሎ ማ ዒንሢኮ ጴዶዋጉዲ፣ ሳናና ጊዔ ኬሰኪ ዒንጎ ቤሲ ታኣም ማዢፖቴ።»

21

ዓይሌ ማዒ ማዳ ዓሶም ማዲንታኒ ኮይሳ ባኣዚ
(ላሚ. ዋማ 15:12-18)

1 ሃሣ፡- «ዒሰራዔኤሌ ዓሶም ኔ ኬኤዛንዳ ዋጋ ያዲኬ፤ 2 ዒብሪ ዓሶ ፃጲ ማዔ፣ ማዳ ዓሲ ኔ ሻንቄቶ ላሆ ሌዔ ዒ ኔኤም ማዲንጎ፤ ላንካሳ ሌዖና ፔቲታፖ ጋሌ ባኣያ ማሂ ዒዛ ኬሴ፤ 3 ኔኤም

20:17 20:17 ሮሜ 7:7፤ 13:9። 20:19 20:19 ዔብ. 12:18-19። 20:25 20:25 ላሚ. ዋማ 27:5-7፤ ዒያ. 8:31።

ማዳንዳጉዲ ኔ ሻንቃኣና ዩይ ዓሢ ለኣሊ ዔኪባኣያ ማዔቶ፣ ዒዚ ሃሺ ዴንዳ ዎዶና ፔኤር ዴንዶንጎ፤ ዩይ ማዳሢ ኔ ሻንቃኣና ለኣሊ ዔኪያታቶ ፔ ማቾ ዔኪ ኬሰኮንጎ። 4 ዒዛ ዎይሣ ዓሢ ዒዛ ለኣሊ ዔኪሲም ዓቲንቄና ዉዲር ናይና ሾዔያ ማዔቴ ለኣሌላ ናኣቶና ዎላ ዩያ ዎይሣ ዓሢም ማፃንጎ፤ ማዳ ዓሢ ጋዓንቴ ፔኤር ጋሌባኣያ ኬሰኮንጎ። 5 ማዳ ዓሢ ታና ዎይሣሢንታ ታ ማቾንታ፤ ሃሣ ታ ናኣቶንታ ታ ናሽካኔ። ጌዒ ዴማዲ ኬሰኪያ ኮዒባኣያታቶ፣ 6 ዒዛ ዎይሣ ዓሢ ዎጎ ዎጋ ዓሶ ባንሢ ዔኪ ዓኣዶንጎ፤ ዒኣካ ካር ኮራ፣ ሃሣ ካር ሬኤኮኮ ኮራ ዔቁሲጋጋ ዎዮ ዒዛኮ ሳኣሚና ዑርንጎ፤ ዩካጋ ዒዛኮ ናንጎ ሌዎ ቢያይዳ ዓይሌ ማዒ ዎይሣ ዓሢም ማዳንጎ።

7 «ፔቴ ዓሲ ፔኤኮ ዉዲር ናዎ ዓይሌ ማሂ ሻንቼቶ ዓቲንቆ ናኣቶጉዲ ጋሌ ባኣያ ዒዛ ኬሰኮጋ፤ 8 ዳካ ጌዔሰካጋ ማቾ ማሂ ዔካኒ ኮዔ ዓሲም ዒዛ ሻንቼንታዎ ጊንሣ ዩይ ዓሢ ዒዛ ዔኩዎዎ ሃሹቶ ጊንሣ ዒዛኮ ዓዳሢም ዒዛ ሻንቼንቶንጎ፤ ዓይጎር ጌዔቶ ዒዛ ዎይሣ ዓሢ ኮይሱዎ ማዳ ዒዛይዳ ማዳሢር ሜሌ ዓሲም ዒዛ ሻንቻኒ ዳንዳዑዎሴ። 9 ዩይ ዓሢ ፔኤኮ ናዎም ማቾ ማሂ ዒንጋኒ ኮዔቶ ጋዓንቴ ፔኤኮ ዉዲር ናይ ማሂ ዛጎንጎ። 10 ለምዓሲ ሜሌ ለኣሊ ጊዳ ዔኬቶ ፔኤኮ ቤርታኣ ማቾም ሙኡዚና ማኣዖና ዒንጊያ ሃሾጋ፤ ቤርታ ዓኣ ዎጎዎ ቢያ ዒዛም ጋጩሶጋ። 11 ዩንሢ ሃይሣ ባኮንሢ ዒዛም ኩንሡዎያ ማዔቶ ጋዓንቴ ፔቴታዎ ጋሌ ባኣያ ማሂ ዒዛ ሃሾንጎ።»

ፑርታ ማዳ ማዳ ዓሲ ዎጊንታ ዎጊ

12 «ዓሲ ጳርቂ ዎዳ ዓሲ ቢያ ሃይቃንዳጉዲ ዎጊንቶንጎ፤ 13 ጋዓንቴ ዓሢ ዔሪባኣያ ዎዳያ ማዔቶ ፑኒንቴ ናንጋንዳ ቤሲ ታኣኒ፣ ያኣሲ ጊኣጊሻንዳኔ፤ 14 ያዲ ማዓንዳኣጋቲም ዳጋና ሜሌ ዓሲ ዎዳዎ ሹምፖ ፔኤኮ ዓውሳኒ ታኣም ዓሳ ዒንጊያ ዒንጋ ቤዛ ፑኒ ዓኣዳቶ ዩይ ዓሢ ሃይቃንዳጉዲ ዎጊንቶንጎ።

15 «ዓዶዎ ማፃም ዒንዶ ጳርቃሢ ዎዳንቶንጎ፤

16 «ሻንቻኒ፣ ሃሣ ዓይሌ ማሂ ቆላኒ ማሊ ዓሲ ሹኡሚ ዔካሢ ቢያ ዎዳንቶንጎ።

17 «ዓዶዎ ማፃም ዒንዶ ጫሽካሢ ዎዳንቶንጎ።

21:6 21:6 ሌዊ. ዓክ 25:39-46። 21:12 21:12 ሌዊ. ዓክ 24:17። 21:13 21:13 ገይ. ማፃ 35:10-34፤ ላሚ. ዎማ 19:1-13፤ ዒ.ያ. 20:1-9። 21:16 21:16 ላሚ. ዎማ 24:7። 21:17 21:17 ሌዊ. ዓክ 20:9፤ ማቲ. 15:4፤ ማር. 7:10።

18 «ለምን ዓሰ ዋላ ዑራዳን ፔቴሢ ባጋሢ ሹቻ ዱይ ዑራቶ፣ ሃሣ ኩቸ ሙሊ ዱሊ ኪፃሴቶ ዋዲ ጋባንቴ ዋዲ ባኣያ ማዔቶ ዋዲንቶ፣ ጋባንቴ ዬይ ጳርቄንቴ ባሢ ሃርጊንቴ ሻኣላይዳ ላሄቶ፣
 19 ዬካፓ ዔቂ ኮኦሎ ዔኪ ኮኦላዲ ኮኦላዲ ሃንቴሢ ሳርቄቶ ዒዚ ላሃ ማይሢንቴ ዋድሮ ጳርቄ ባሢ ደቦ ሚኢሼ ጨጎንጎ፣ ኮሺ ባሢ ዳቃንዳያ ሄለንዳኣና ባሢ ማይሃንጎ።

20 «ፔቴ ዓሰ ላኣሊታቶዋ ባቲንቄ ዒዛም ማዳ ዓሰ ኮኦሎና ጳርቄም ኔጉዋን ሃይቄቶ ዬይ ባሢ ሃይቃንዳጉዲ ዋጊንታንዳያ ኮይሳኔ። 21 ጋባንቴ ዒዛም ማዳ ዓሰማ ፔቴ ኬለና ላምን ኬለናይዳ ሃይቄባኣቶ ዋይሃ ባሢ ሃይቃንዳጉዲ ዋጊንቶ፣ ማዳሢዳፓ ባቲፃ ሌሊ ዒዛም ባሳና ማቶ ማባንዳኔ።

22 «ለምን ዓሰ ዋላ ዑራዳን ፔቴ ጎጲንዶ ጳርቄ ዑሰካፓ ኬይሲሴቶ፣ ማሌ ጋባንቴ ፑርታ ባኣዚ ዓሴሎ ሄለባኣቴ፣ ዬይ ዑፃፓ ኬይሲሴ ባሢ ላኣሌሎኮ ባኒ ዒዛ ፆኦሚጉዳያ ደቦ ሚኢሼ ጨጎንጎ፣ ዬይ ጨጋንዳ ደቦ ሚኢሻ ዋጎ ዋጋ ባሳ ጌሰቴ ዔቂሴያ ማፆንጎ። 23 ጋባንቴ ላኣሌሎይዳ ዴኤፕ ፑርታ ባኣዚ ሄሌያ ማዔቶ ዋጋ፡- ሹምፖ ዛላ ሹምፖ፣ 24 ባኣፕ ዛላ ባኣፕ፣ ባቸ ዛላ ባቸ፣ ኩቸ ዛላ ኩቸ፣ ቶኦኪ ዛላ ቶኦኪ፣ 25 ሚቸሢ ዛላ ሚቸንቴሢ፣ ኪፃሲሢ ዛላ ኪፃሲሢ፣ ጳዲ ዛላ ጳዲ። ጋባ ጎይፆ ማፆንጎ።

26 «ፔቴ ዓሰ ዒዛም ማዳ ባቲንቄያ ማፆም ላኣሊኮ ባኣፖ ጳርቄ ዋዴቶ፣ ባኣፖ ዛሎ ደቦ ሚኢሼ ማባንዳጉዲ ማዳሢ ሃንጎ ማዳዜሎ ጉሪ ኬሲ ዳኮንጎ። 27 ዬኖ ጎይፆና ፔቴ ባቸታፆ ማንሢቶ ዬማ ባጮ ዛሎ ደቦ ሚኢሼ ማባንዳጉዲ ማዳሢ ሃንጎ ማዳዜሎ ጉሪ ኬሲ ዳኮንጎ።»

ቆሎ ዓደንሢኮ ባኣ ዓደቶ

28 «ጌማይ ዓሰ ዱይ ዋዴቶ ዬይ ጌማ ሹቸና ዱይንቴ ሃይቆንጎ፣ ባሻካኣ ዒዛኮ ሙይንቶ፣ ጌማ ዓደኮ ደቢንቴ ባኣያ ናንጎንጎ። 29 ጌማ ቤርታኣፓ ሳርቃፆ ዓሰ ዱዓያ፣ ጊንሣ ሃሣ ባኣሢ ዓደም ኮሺ ካፔ ጌይንቴ ላቲንቴያታንቴ ዒዚ ሞኦፆ ቃዙዋን ሃሹም ጌማ ዓሰ ዱይ ዋዴያታቴ ሹቻ ዱይንቴ ሃይቆንጎ፣ ባኣሢ ዓዴያ ዒማይዲ ሃይቆንጎ። 30 ጋባንቴ ባኣሢ ዓዴ ፔ ሹምፖ ዓውሳኒ ደቦ ሚኢሼ ጨጋንዳጉዲ ጌይንቴያታቴ ደቦ ሚኢሹ ቢያ ጨጎንጎ። 31 ጌማ ባቲንቄ፣ ሃሣ ዉድሮ ናይ ዋዴያታቴ ዋጋ ዒማዒ ማፆንጎ፣ 32 ጌማ ባቲንቄ ማዔቶዋ ላኣሊ ዓሰም ማዳያታንቴ ዱይ ዋዴቶ ጌማኮ ዓዴ

21:24 21:24 ሌዊ. ባኬ 24:19-20፣ ላሚ. ዋማ 19:21፣ ማቴ. 5:38።

ዓሢ ሃንጎ ዓሴሎ ወይሠሢም ሃይሢታሚ ሹቺ ቢራ ጨጎንጎ፤ ጌሜያ ሹቻ ዲይንቲ ሃይቆንጎ።

33 «ፔቴ ዓሲ ዔቴ ካራ ወደና ባኣዚ ሺኢሹቶ፣ ሃሣ ዔቴ ቦኦካዎ ካር ወደቀዎ ሃሹም ጌማይ ማዔቶዎ ሃሪ ዩኖ ዔቴሎ ጌሌቶ፣

34 ዩይ ቦኦኩ ዓሢ ቆልሞማ ዛሎ ጨጎንጎ፤ ሚኢሹ ቆልሞ ዓደም ጨጌሰካፓ ሃይቄ ቆልሞማ ፔኤም ዓይሶንጎ። 35 ፔቴ ዓሲኮ ጌማይ ሜሌ ዓሲ ጌማይ ዲይ ወደቶ ላምዎ ዓሶንሢ ሹምፖና ዓኣ ጌማዎማ ሻንቺ ሚኢሹንሢ ፓቁንቲ ዋላ ዔኮንጎ፤ ሃሣ ጌንሣ ሃይቄ ባኣሢኮዎ

ዓሸኮ ዔያታ ዋላ ፓቁንቲ ዔኮንጎ። 36 ጋዓንቲ ጌሜ ዲዓያ ማዔሢ ዔርታንቲ ባኣሢ ዓዴ ሞኦፃ ቃዙዋዎ ሃሹያ ማዔያታቴ፣ ባኣሢ ሃይቄ ዓሣሢም ዲይ ወደ ጌሜ ጨጎንጎ፤ ሃይቄ ጌሜ ጋዓንቲ ፔኤም

ዔኮንጎ።»

22

ቆሎ ዛላ ዋጌ

1 ሃሣ፡- «ፔቴ ዓሲ ፔቴ ጌማይ ሃንጎ ማራይ ወኡቄ ዔኪ ሹኩቶ፣ ሃንጎ ሻንቺቶ ፔቴ ጌማይ ዛላ ደንጎ ጌማይ፤ ፔቴ ማራይ ዛላ ያይዶ ማራይ ጨጎንጎ። 2-4 ዒዚ ወኡቄ ባኮ ጨጨጎንጎ፤ ጨጋኒ ዳንዳዑዎያ ማዔቶ ጋዓንቲ ዒዚ ወኡቄ ቆሎ ዛሎ ዳሶ ሚኢሹ ማዓንዳጉዲ ዓይሌ ማዓ ዓሢም ማደንጎ፤ ወኡቁንቲ ቆልማ ባይ ዒንዳ፣ ሃሪ፤ ሃሣ ማራይታዎ ሳዛና ዓኣ ጎይሣ ዓኣንቲ ዒዛ ኮራ ጴዳቶ፣ ፔቴ ቆልሞ ዛላ ላምዎ ጳንጨፎ ማሂ ጨጎንጎ። ፔቴ ወሲ ዲሚና ዓሲ ማርካ ሙኪ ሃይቄቶ ዒዛ ወደ ዓሢ ሹምፖ ወደያ ማዓ ያኦጨንታንዳያ ኮይሱዋሴ፤ ማዲንቲ ባካ ርኦሪናታቶ ጋዓንቲ፣ ሹምፖ ወደያ ማሂ ዒዛ ያኦጨሳኔ።

5 «ፔቴ ዓሲ ፔኤኮ ቆልሞ ሄንቆ ቤሰካ፤ ሃሣ ጎሺ ዓሸካ ማሂ ዓኣንቲ ቆልሞ ዳንዲ ሜሌ ዓሲ ጎሺ ጌሊ ሙዔቶ፣ ፔ ጎዡይዳፓ ሃሣ ጌንሣ ወይኖ ቱኮ ቤዘይዳፓ ዔካ ባካፓ ዳሶ ጨጎንጎ።

6 «ፔቴ ዓሲ ፔኤኮ ጎዡይዳ ጎሚ ዓጋዛ ታማ ካዮ ጌደና ጌዒ ሜሌ ዓሲ ጎሺ ሄሊ ሃገ ባባቃላ ሜይታቶዎ ታይዚ ናቲ ጌሦና ሜይ ሙዔቶ፣ ታሞ ዓጌ ዓሢ ዳሶ ጨጎንጎ።

7 «ፔቴ ዓሲ ሜሌ ዓሲኮ ሚኢሹ፤ ሃሣ ቦንቺንቲ ዓንጋሞ ፔ ኮራ ጌሣኒ ዔካካ፣ ዒዛ ማኣርይዳፓ ወሲ ዔኬዎ ወዛሢ ዓርቁንቲ ጴዳቶ ጳንጨፎ ማሂ ጨጎንጎ። 8 ወዛሢ ጴዳባኣቶ ጋዓንቲ ዓንጋሞ ፔ ኮራ ጌሣ ዓሢ ዋጎ ዋጋ ዓሶ ቤርቶ ሺኢኪ ዩያ ዓሢኮ ዓንጋሞ ወኡቁባኣያ ማዒያ ጫኣቄ ዔርዘንጎ።

9 «ባይ ዛላ፣ ሃሬ ዛላ፣ ማራይ ዛላንታ ማአፖ ዛላንታ፤ ሃሣ ዩያጉዲ ዓይጌንዴ ባይቄ ባአዚኮ ቢያ ላምፖ ዓሲ ዋሊ ዋጌና ዓይሢሴቶ፣ ቆሎኮ ዓደንሢ ማዒ ዋላ ጎሪንቲ ላምፖ ዓሲንሢ ዋጎ ዋጋ ዓሲ ቤርቶ ሺኢኮንጎ፤ ዋጎ ዋጋ ዓሲ «ዳቤኔ» ጌዔ ዓሢ ዒ ዳቤ ዓሢም ጳንጩ ማሂ ጩጎንጎ።

10 «ፔቴ ዓሲ ሜሌ ዓሲኮ ሃሬ፣ ባይ ዓሲንዴ፣ ማራይ፤ ሃሣ ዩያጉዲያ ዓይጌንዴ ቆልሞታቴያ ቁሪሢና ፔ ኮራ ጌሢንቲ ቆልሞ ሃይቄቶ ገንሣ ሜቄቶ፤ ሃሣ ቡሪንቲ ዔውቴያ ማዔም፣ ማርካ ዒዛኮ ባአያ ማዔቶ፣ 11 ዩይ ዓሢ ዋጎ ዋጋ ዓሲ ቤርቶ ዓአደንጎ፤ ዓሢኮ ቆልሞ ፔኤሮ ዉኡቁባአያ ማዒያዎ ናንገና ናንጋ ጎዳ ቤርታ ጩኦቄ ዔርዘንጎ፤ ቆልሞ ዒ ዉኡቁባአያ ማዔቶ ቆልሞኮ ዓዴ ዳቦ ዒዛ ፖኦጮፖ፤ ቆልማ ባይቄ ዓሢያ ዳቦ ጩጎ። 12 ቆልሞ ዒዚ ዉኡቄያ ማዔቶ ጋዓንቲ ቆልሞኮ ዓደም ዒንሢ ጉዴያ ማሂ ዒንጎንጎ፤ 13 ቆልሞ ሰዓ ሙዔያ ማዔቶ ዓሢ ሰዓ ሙዒ ሃሺ ደም ማርካሮ ዔኪ ሙኮንጎ፤ ሰዓ ዎዳሢ ዛሎኮ ዳቦ ዒዚ ጩጎ።

14 «ፔቴ ዓሲ ሜሌ ዓሲዳፓ ቆልሞ ቁሪሲ ዔካዛ፣ ቆልሞኮ ዓዴባኦ ቤሰካ ቆልሞ ሃይቄቶ፤ ሃሣ ሜቄቶ ዒዚ ቁሪሲ ዔኬ ዓሢም ዳቦ ጩጎንጎ፤ 15 ጋዓንቲ ዩይ ማዔሢ ቆልሞኮ ዓዴ ዓአንቲታቶ ዓሢ ዳቦ ጩጋኒ ኮይሱዋሴ፤ ሚኢሺ ጩጊ ጩጊ ማአዲንታኒ ዔኬያ ማዔቶ ቤርታ ዒንገንቲ ሚኢሻ ጩጌያ ማፖንጎ።»

ዓሲኮ ዓይሉሞና ፖኦሲ ጉሙርቁሢናኮ ዎጌ

16-17 ሃሣ፡- «ፔቴ ዓሲ ፔቴ ኩሙሢ ዉዳሮ ናይ ዎልቄና ዓርቄቶ ማጋጩ ጩጊ ዒዛ ዔኮንጎ፤ ናፖኮ ዓዴ ዒዛም ዒንጋኒ ኮዒባኦቶ ጋዓንቲ ፔቴ ኩሙሢ ዉዳሮ ናይም ዒንገንታ ዳቦ ሚኢሺና ዎላ ሄኮ ማዓ ሚኢሺ ዳቦ ናዓኮ ዓደም ጩጎንጎ።

18 «ማርሻ ማርሻ ላኦሊ ዓኦቶ ዎዎዳ፤

19 «ቆልሞ ዒኢሳ ዓሲያ ዎዳንቶንጎ።

20 «ታና፣ ናንገና ናንጋ ጎዳይዳፓ ዓታዛ ሜሌ ዓይጌንዴ ፖኦሲማኦ ማፖም ዒንጎ ባአዚ ዒንጋ ዓሲ ባይቆንጎ።

21 «ዒንሢ ዓጮይዳ ሙኬያ ማዒ ናንጋ ዓሲ ካራ ባይዚ ሜታሲፖቴ፤ ኔኤኒያ ገብፄ ዓጮይዳ ሙኬ ዓሲ ማዒ ናንጌሢ ጳቄሜ። 22 ዓኒ ሃይቄ ዜኤሮ ዒንዶ፣ ሃሣ ዓደና ዒንዶና ሃይቄ ዜኤሪ ናይ ሜታሲፖቴ። 23 ዒንሢ ዩያይዴም ታኦም ዔያታ ዒላቴቶ

22:18 22:18 ላሚ. ዎማ 18:10-11። **22:19** 22:19 ላዊ. ዓኬ 18:23፤ 20:15-16፤ ላሚ. ዎማ 27:21። **22:20** 22:20 ላሚ. ዎማ 17:20። **22:21** 22:21 ኬሲ. ማፃ 23:9፤ ላዊ. ዓኬ 19:33-34፤ ላሚ. ዎማ 24:17-18፤ 27:19።

ታኣኒ፡ ናንገና ናንጋ ጎዳ ዔያቶኮ ዒላቶ ጎኔና ዋይዘንዳኔ። 24 ዒንሢ
ዑይዳ ታ ደጋዲ ያልዘና ዒንሢ ኩርሲ ሳንዳኔ፤ ላኣላ ዒንሢኮ ዓኒ
ባኣያ፡ ናኣታ ዒንሢኮ ዓዶና ዒንዶና ባኣያ ማዒ ዓታንዳኔ።

25 «ታ ዳሮ ባኣካ ማንቆ ማዒ ናንጋ ፔቴያምታፖ ሚኢሼ ኔ ታልዔቶ
ሚኢሼ ታልዒሳ ዓሲጉዲ ሾይቺና ቃሲ ኔኤም ጨጋንዳጉዲ ዒዛ
ያኦጪ። 26 ዓሲ ዔኤቢ ኔኤኮ ዔኤም ዓይሢ ማሂ ዓፒላ ኔ ዔኤ
ዓሲ ዓኣቶ፡ ዓባ ጌላንዳሢኮ ቤርታ ዒዛም ማሂ ዒንጌ። 27 ዓይጎሮ
ጌዔቶ ጨኢዠሮ ዒዚ ማይንታንዳ ዓፒላ ሜሌ ፔቴታፖ ባኣሢሮ ዒዚ
ዓይጎ ማይንቲ ዋርቃኒ ዳንዳዓይ? ታኣኒ ማኣራያ ማዔሢሮ ዒዚ ታ
ባንሢ ዒላቴቶ ታ ዒዛም ዋይዘንዳኔ።

28 «ያኦሲ* ጫሽኪ፣ ኔ ዳሮኮ ሱኡጌ ማዔሢማኣ ጋዳንቂ።

29 «ኔኤኮ ሃኣኮኮ፡ ዋይኖ ዑዠንታ ሪሚቶ ዛይቶንታኮ ቤርቶ
ታኣም ዔኪ ዩዔ፤ ቤርቲ ማዒ ሾይንቴ ዒንሢኮ ዓቲንቆ ናኣቶዋ
ታኣም ዔኪ ዩዑዋቴ። 30 ዒንሢኮ ባኣቶና ማራቶናኮ ቤርቲ ሾይንቴ
ማዒ ሾይንቴዘንሢ ታኣም ዔኪ ዩዑዋቴ፤ ዩያሮ ቤርቲ ማዒ ሾይንቴ
ዓቲንቂ ቢያ ላንካይ ኬሊ ዒንዶና ዋላ ዴፖንጎ፤ ሳላሳ ኬሎና ታኣም
ዔኪ ዩዑዋቴ።

31 «ዒንሢ ታ ዳሬ ማዔሢሮ ቦፖ ዋዳ ቆልሞኮ ሳሽኪ ሙዒፖቴ፤
ዩያይዲ ዩይዳፓ ካኒም ዒንጉዋቴ።»

23

ጊዜ ዋጌ

1 ሃሃ፡- «ሉኡዚ ሃይሴ ዔኪ ሃንቲ፣ ሉኡቂ ማርካዲሢና
ደቢንቴ ዓሢ ጌኤሽ ዓሲ ማሂ፣ 2 ሚርጌ ዓሲ ፑርታ ባኣዚ ማዳኒ፡
ሃሃ ጊንሃ ዋጎ ዋቢሳኒ ዔቃ ዋዶና ዔያቶና ዋላ ፔቴ ማዒ።
3 ማንቆ ዓሲ ዔኤቢ ፑርቲሲ ዋጌ ቤሲ ሽኢኬቶ ዒዛኮ ማንቁሞ
ዛጊ ዒዛ ዑፃ ጌሰቲ።

4 «ኔኤኮ ሞርካሢኮ ባይ፡ ሃሃ ጊንሃ ሃሪ ባይቁም ኔ ዴንቁቶ
ዒዛም ማሂ ዒንጌ። 5 ጎፖንቴ ዒዛኮ ሃራ ጫኣናና ዴኤዲንቲ ሎኣሚ
ዓኣንቴ ኔ ዴንቁቶ፡ ሃራ ሎኣሜ ቤዛፓ ዒዚ ዔቁሳንዳጉዲ ዒዛ
ማማኣዴ ኮርሳ ሃሽ ዓኣዲ።

22:25 22:25 ለዊ. ዓክ 25:35-38፤ ላሚ. ዋማ 15:7-11፤ 23:19-20። 22:27
22:27 ላሚ. ዋማ 24:10-13። * 22:28 22:28 ያኦሲ ጌይንቴዛ፡ «ዋጎ ዋጋ ዓሶ
ጫሽኪ።» ጌይንታኒ ዳንዳዓያኤ። 22:28 22:28 ዳኪ. ማዶ 23:5። 22:31
22:31 ለዊ. ዓክ 17:15። 23:1 23:1 ኬሲ. ማፃ 20:16፤ ለዊ. ዓክ 19:11-12፤
ላሚ. ዋማ 5:20። 23:3 23:3 ለዊ. ዓክ 19:15። 23:5 23:5 ላሚ. ዋማ
22:1-4።

6 «ዋጎ ዋጎ ቤዘይዳ ዓሲ ዲማሲሢና ማንቃሢኮ ዋጎ ዋቢሲፖ፤
 7 ያና ማዔቴያ ሉኡዙሞና ዋጌና ዓይሢሲፖ፤ ሃሃ ጌኤሺ ዓሲ
 ሃይቃንዳጉዲ ዋጊፖ፤ ዓይጎር ጌዔቶ ዩያጉዳ ፑርታ ባኣዚ ማዳ
 ዓሢ ታ ጌኤሻዓኬ፤ 8 ዓሳ ጎኔ ባኣዚ ዳንቁዋጉዲ ዓሶኮ ዓኣፒ
 ዓርቃያታሢ፤ ሃሃ ጌኤዡ ዓሶኮ ዋጎ ዋቢሲፖ ማዔሢ፤ ዳማና ዓሲጎ
 ሚኢሽ ዔኪፖ።»

9 «ሜሌ ዓጨፓ ዓዲሢና ዳውሲንቴያ ማዒ ሙኬሢ ሜታሲፖ፤
 ዓይጎር ጌዔቶ ዓሲሢ ጊብፃ ዓጨይዳ ዓዲንቴ ዓሲ ማዒ
 ናንጌያታሢ፤ ዓዲንቴ ዳኪንቴ ዓሲኮ ዋዚጉዳ ሜታ ዓኣያታቴያ
 ዓሲሢ ዔራኔ።»

ላንካሳ ሌዖና ላንካሳ ኬሎና

10 «ላሆ ሌዔ ጎዡ ኔኤኮ ዜርቁ ጎሽኪ፡ ሃኣኮ ዔኬ፤ 11 ላንካሳ
 ሌዖና ጋዓንቴ ሳዔሎ ሃሽ፤ ኔኤኮ ዳር ባኣኮይዳ ዓኣ ማንቆ ዓሳ
 ሙኡዚ ዳንቃንዳጉዲ ሳዔሎይዳ ባቃሌ ባካፓ ፔቴ ባኣዚታፖ
 ዔኪፖ፤ ኔ ጎዡይዳ ዓቴ ባኮ ቢያ ሳዖይዳ ዓኣ ካዮ ቦዓ ሙዖንጎ፤
 ዋይኖንታ፡ ሃሃ ዛይቶ ሪሚቶ ሚዖዋ ዩያጉዲ ሃሽ።»

12 «ላሆ ኬሊ ኔ ማዶ ቢያ ማዳ፤ ላንካሳ ኬሎና ጋዓንቴ ፔቴታፖ
 ማዶ ማዳ፤ ዩያጉዲ ኔኤኮ ማዳ ዓሶንታ ኔኤሞ ማዳ ሜሌ ዓጨፓ
 ሙኬ ዓሶንታ ቆልማኣ ኔኤኮ ቢያ ሃውሺ ፔኤቆንጎ።»

13 «ታኣኒ፡ ናንጊና ናንጋ ጎዳ ዓሲሢሞ ኬኤዛ ባኮ ኮሺ
 ዋይዙዋቴ፤ ሜሌ ካኣሽኮ ዖኣዙ ካኣሽኪፖ፤ ሜሌ ዓታዛ ሱንፖታፖ
 ዔያቶኮ ዔኤሊፖ።»

ሃይሃ ዳኤፒ ቦንቾ ኬሊ

(ኬሲ. ማፃ 34:18-26፤ ላሚ. ዋማ 16:1-17)

14 «ሃሃ ታና ዓሲሢ ቦንቾንዳጉዲ ሌዔይዳ ሃይሃ ቦንቾ ኬሊ
 ዓሲሢሞ ዓኣያ ማዖንጎ፤ 15 ጊብፃፓ ዓሲሢ ኬሰኬ ዋይቤ ዓጊናና፡
 ታ ዓሲሢ ዓይሢ ጎይፖ ላኣዳ ሙዒ ቦንቾ ኬሎ ቦንቹዋቴ፤ ዩና
 ቦንቾ ኬሌላ ቦንቹንታ ላንካዎ ኬሎይዳ ሙኡቃ ዖኣዛ ጌሌ ካሃ
 ሙዒፖ፤ ታኣሞ ዓሲሢ ዘጊ ካኣሽካኒ ሙካኣና ዓሲጎ ባኣዚ
 ዔኮዋፖ ዩዒፖ።»

23:8 23:8 ሊዊ. ዓኬ 19:15፤ ላሚ. ዋማ 16:19፤ 23:9፤ ኬሲ. ማፃ 22:21፤ ሊዊ.
 ዓኬ 19:33-34፤ ላሚ. ዋማ 24:17-18፤ 27:19። 23:11 23:11 ሊዊ. ዓኬ 25:1-7።
 23:12 23:12 ኬሲ. ማፃ 20:9-11፤ 31:15፤ 34:21፤ 35:2፤ ሊዊ. ዓኬ 23:3፤ ላሚ.
 ዋማ 5:13-14። 23:15 23:15 ኬሲ. ማፃ 12:14-20፤ ሊዊ. ዓኬ 23:6-8፤ ፓይ.
 ማፃ 28:17-25።

16 «ሃሣ ዒንሣሂከ ማአሎ ዒንሣሂ ቡራ ዋደና ማአሎ ቡሪያ ቦንቾ ኬሎ ቦንቾዋቲ፤ ዒንሣሂከ ዋይኖንታ ዲማ ዲማ ዓሚ ካፃ ሚያ ዓአፖ ዒንሣሂ ማፃአና ሌዖኮ ጋፒንያይዳ ሃአኮ ዓርሣሂ ቦንቾ ኬሎ ቦንቾዋቲ፤

17 ሌዖይዳ ሃይሣ ማይንቲ ዬንሣሂ ቦንቾ ኬሎንሣሂ ቦንቾንታ ኬሎና ዓቲንቃ ቢያ ናንገና ናንጋ ጎዳ ማዔ ያኦሲ ዘገገ ካአሸካኒ ሙኮንጎ።

18 «ዒንሣሂ ታአም ቆልሞ ሹኪ ዒንጋ ዋደና ሙኮቃ ፃአዛ ጌሌ ካሣ ታአም ዒንጎያ ማሂ ሸኢሸፖቲ፤ ዬንሣሂ ሃውሾ ኬሎንሣሂና ሹኪ ዒንገንታ ቆልሞኮ ማሎ ዓይሲ ዋይሣፖቲ።

19 «ሌዓ ሌዓ ዒንሣሂ ጎሽካ ሃአኮፓ ቤርቶ ታና ዒንሣሂከ ያኦዛሣ ማዔ ናንገና ናንጋ ጎዳ ማአሪ ዔኪ ዬዑዋቲ።

«ማራናይ ማዔቶዋ ዋናናይ ዒንዶ ዲኢቆና ካሣፖ።»

ሃገ ማዓንዳ ዋዛ ቃኦላና ያኦሲኮ ዓይሥሣና

20 ሃሣ «ኔ ዓአዳ ጎይያይዳ ዒ ኔና ካፓንዳጉዲ፣ ሃሣ ታ ኔኤም ገኢጊሼ ሳዖ ኮሽና ዒ ኔና ጌልዛንዳጉዲ ኔኤኮ ቤርታ ቤርታ ዓአዳንዳጉዲ ታአኮ ኪኢታንቻሣ ታ ዳካንዳኔ፤ 21 ዒ ኔኤም ኬኤዛ ባኮ ዋይዚ ዒዛም ዓይሣንቲ፤ ዒዛም ዋይዚ ዒዲፖ፤ ታ ዒዛና ዋላ ማዔሣረ ኔኤኮ ዓይሣንቲያ ዒዲያ ዒዚ ዛገ ዛገ ኔኤም ዓቶም ጋዓዓኬ። 22 ዒዛም ኔ ዓይሣንቲቶ፣ ሃሣ ታ ኔኤም ዓይሣ ባኮዋ ቢያ ኔ ኩንሣቶ ኔኤኮ ሞርኮ ቢያ ታ ያላንዳኔ፤ ኔና ዒፃሣያ ታ ዒፃንዳኔ። 23 ታአኮ ኪኢታንቻሣ ኔኤኮ ቤርታ ቤርታ ዓአዲ ዓሞኦሬ ዓሶ ዓጮ፣ ሄኤቲ ዓሶ ዓጮ፣ ፔርዜ ዓሶ ዓጮ፣ ካአናኔ ዓሶ ዓጮ፣ ሂዋዌና ዒያቡሳ ዓሶ ዓጮዋ ዔኪ ኔና ዒዚ ጌልዛንዳኔ፤ ታኦኒያ ዔያቶ ባይዛንዳኔ። 24 ዔያቶኮ ካአሸኮ ያኦዛም ጉምዓቲ ዘገፖ፤ ሃሣ ዔያቶኮ ዔርቲ ካአዠ ማዶ ገንያ ዓአዲ፤ ዔያቶኮ ካአሸኮ ባኮዋ ባይዜ፤ ዔያቶኮ ዳኦሶጉዲ ዔቂሶና ዲማዴ ሹጮዋ ደይሴ፤ 25 ታና፣ ኔኤኮ ያኦሲ ማዔ ናንገና ናንጋ ጎዳሣም ኔ ዘጌቶ ኔኤም ገዳንዳ ሙኡዚና ዋኦሣያ ዒንገ ታ ኔና ዓንጃንዳኔ፤ ደርዖ ቢያ ታ ኔኤኮ ባይዛንዳኔ፤ 26 ኔኤኮ ዓጮይዳ ዑሰካፓ ኬይሳ ላኦላና ሾውዋያ ዞኦኮ ማዓ ላኦላ ባኦያ ማዓንዳኔ፤ ኔኤኮ ናንጎ ሌዖዋ ታ ያደሳንዳኔ።

27 «ኔና ዒዲ ማካ ዓሳ ቢያ ታና ዒጊጫንዳጉዲ ታ ማሃንዳኔ፤ ኔገዳ ያልዚ ቡላ ዴር ዑያይዳ ታ ሜቶ ዔኪ ዬዓንዳኔ፤ ኔኤኮ ሞርኮ ዒጊቹ ታኦኒ ጳሻንዳኔ፤ 28 ገንሣ ሃሣ ዬያ ኔኤኮ ሞርኮይዳ

23:16 23:16 ላዊ. ዓክ 23:15-21፤39-43፤ ፓይ. ማፃ 28:26-31። 23:19 23:19 ኬሲ. ማፃ 34:26፤ ላሚ. ዋማ 14:21፤ 26:2።

ዲታቸው ታ ጌልዛንዳኔ፤ * ኔኤኒ ሴካ ቤርቲም ዓኣዳኣና ሂወዋ ዓሶ፡ ካኣናኔ ዓሶ፡ ሄኤቲ ዓሶ፡ ኔኤኮ ቤርታፓ ታ ዳውሳንዳኔ። 29 ያኣዲ ማዕድያ ፔቲ ለዔጊዳ ዔያታ ባይቃንዳጉዲ ታ ማሃባኬ፤ ያዲ ታ ማዕቶ ሳዔላ ዓሲ ባኣያ ማዕንዳኔ፤ ቦዎ ኔጊዳ ዲባንዳኔ፤ 30 ዬያሮ ዬያይዲያና ኔኤኒ ሚርጊ ሳዔሎ ዔካንዳያ ሄላንዳኣና ዳካ ዳካ ኔኤም ታ ዔያቶ ኬሳንዳኔ። 31 ዲንሢ ዓጮኮ ዛጳ ዓካባ ጌይንታ ባዞ ዓጮይዲፓ ዴንዲ ዲፕራዲሴ ዎሮና፡ ጊንሣ ማዲቲራኒያ ባዛፓ ዴንዲ ዓሲ ናንጉዎ ዳውሎ ሄላንዳኣና ታ ዳልጊሻንዳኔ፤ ዓጮሎይዳ ናንጋ ዓሶ ኔኤኒ ባሻንዳጉዲ ዎልቄ ታ ኔኤም ዲንጋንዳሢሮ ቤርቲም ኔ ዓኣዳ ዎዶና ዔያቶ ኔኤኒ ዳዳውሳንዳኔ። 32 ዔያቶና ዎላ፤ ጊንሣ ሃሣ ዔያቶኮ ካኣሽኮ ያኦዞዎ ማዎም ካሽኪ ዎላ ፔቲታዎ ቡኪፖ፤ 33 ዬያቶ ዴሮ ዓጮይዳ ኔኤኮ ናንጊሲፖ፤ ኔኤኒ ዔያቶ ናንጊሳያ ማዕቶ ጋዓንቲ ሳሜ ማዲሲሢና ታጊዲፓ ኔና ዔያታ ዳሲሻንዳኔ፤ ዔያቶኮ ካኣሽኮ ያኦዞም ኔ ዘጌቶ ሃይቢዳ ኔና ጌልዛ ፒሮ ኔኤም ማዕንዳኔ።»

24

ያኦሲ ዴሮና ጫኣቄ ጫኣቄም ደዲሾሢ

1 ናንጊና ናንጋ ሳዳ ሙሴም፡- «ኔኤኒ፡ ዓኣሮኔ፡ ናኣዳኣቤ፡ ዓቢሁንታ ዲሰራ ዔኤሌ ዓሶ ሱኡጎይዳ ላንካይታሚ ማዕ ዓሲንታ ዎላ ታኣኒ ዓኣ ዲኮ ኬሰኩዎቲ፤ ሃኬ ዓኣዎ ጉምዓቲ ዘጊ ካኣሽኩዎቲ፤ 2 ጊንሣ ሃሣ ኔኤኒ ሌሊ ማሌ ዓሶፓ ዲማዲ ታ ባንሢ ዑኩ፤ ዴራ ጋዓንቲ ኔኤና ዎላ ዲኮ ባንሢ ደጮፓ» ጌዔ።

3 ዬካፓ ሙሴ ዴንዲ ናንጊና ናንጋ ሳዳ ዓይሢ ባኮና ኬኤዜ ዎጎና ቢያ ዴሮም ኬኤዛዛ፡ ዴራ ፔቲዎና፡- «ናንጊና ናንጋ ሳዳ ኬኤዜ ባኮ ቢያ ኑ ማዳንዳኔ» ጌዔ። 4 ሙሴያ ናንጊና ናንጋ ሳዳኮ ዓይሢያ ቢያ ፃኣፔ፤ ዘሮ ጉቲሎ ዓሚ ዲኮ ዴሞይዳ ያኦሲም ዲንጎ ባኣዚ ዲንጊ ካኣሽኮ ቤሲ ሹቲና ኮሼኔ፤ ጊንሣ ፔቲ ፔቲ ዲሰራዔኤሌ ዓሶኮ ፃጳ ሱንያና ታጳ ላምዎ ዳኣቦ ዳኣቤ፤ 5 ሚቲ ዲንጎ ዲንጊያ ናንጊና ናንጋ ሳዳም ዲንጋንዳ ዴጌ ናይያ ዲዚ ዳኬ፤ ዔያታ ሚርጌ ጌማናይ ዔኪ ዓኣዲ ዳቂንታም ማዕንዳ ዲቢ ዓሲ ፔቲዎና ዲንጋ ዲንጊሢ ዲንጌ። 6 ሙሴያ ቆልሞኮ ሱጉያይዲፓ ፓቂ ዔኪ ዓንዳይዳ ጌሣ፤ ሄካሢ ጊንሣ ናንጊና ናንጋ ሳዳሢም ዲንጎ ባኮ ዲንጎ ቤዘይዳ ፑጮ። 7 ዬካፓ ያኦሲኮ ዓይሢያ ፃኣፒንቲ ጫኣቄም ማፃኣፖ ዔኪ

* 23:28 23:28 ዲታቸው ታ ጌልዛንዳኔ ጋዓዞ፡- «ኔ ቤርታ ታ ሃዡ ዳካንዳኔ» ጋዓኒ ዳንዳዓ።

ዑኡዞ ፔኤሲ ዴጊዲ ዴሮሞ ናባባዛ፣ ዴራ፡- «ናገገና ናገገ ጎዳሢሞ ኑ ዓይሢንቴ ዒዚ ዓይሢ ባኮ ቢያ ኑ ኩንሣንዳኔ» ጌዔኔ።

8 ዴራ ያዲ ጌዔሰካፓ ሙሴ ዓንዶና ዓኣ ሱጉዖ ዔኪ ዴሮ ዑፃ ፑጫዖ፡- «ሃይ ዓካሪ፣ ናገገና ናገገ ጎዳ ሃንሢ ዓይሢሞ ቢያ ዒንሢሞ ዒንገእና ዒንሢና ሞላ ጫኣቄ ጫኣቄሞ ዒዚ ዶዲሼ ሱጉዖኬ» ጌዔኔ።

9 ዩካፓ ገንሣ ሙሴ፣ ዓኣሮኔ፣ ናኣዳኣቤ፣ ዓቢሁንታ ዒሰራዔኤሌ ዓሶኮ ሱኡጎ ማዔ ላንካይታሞ ዓሶንታ ዲኮ ኬሰኪ፣¹⁰ ዒሰራዔኤሌ ያኣዛሢ ዛጌኔ፤ ዒዛኮ ቶኮ ዴማ ሚዛጲ ሹቸና ኮሸንቴ፣ ሃሃ ፖፖዓ ጫሪንቸ ማላ ባኣዚ ሂኣሢንቴ ዓኣኔ።¹¹ ዒሰራዔኤሌ ዓሶ ዔኪ ዓኣዳ ዩንሢ ጋርቸንሢ ያኣሲ ፑርታ ባኣዚ ዓገባኣሴ፤ ያኣሲ ዔያቶኮ ቤርታ ዓኣንቴ ዔያታ ዛገ ዛገ ዒዛ ቤርቶይዳ ሙዒያ ሙዒ ዑሽኪያ ዑሽኬኔ።

ሙሴ ሲና ዲኮይዳ

12 ዩካፓ ናገገና ናገገ ጎዳ ሙሴም፡- «ታኣኒ ዓኣ ዲኮ ኬሰኪ ዒኣኣ ዴዔ፤ ታ ኔኤም ላምዖ ዓርሲንቴ ሹቸ ዒንገንዳኔ፤ ዩንሢዳ ዴሮሞ ሞርቆንዶ ጎይሢ ታኣኒ ፃኣፔ ዓይሥሢና ሞጌና ዓኣያ ማዓንዳኔ» ጌዔኔ።¹³ ሙሴና ዒዛኮ ዴማ ማኣዳያ ማዒ ማዳ ዒያሱና ዲኮ ኬዞር ገኣገንቴኔ፤ ዩካፓ ሙሴ ያኣሲ ዲኮ ኬሰኪኔ፤¹⁴ ዩማና ሙሴ ዒሰራዔኤሌ ዴሮ ዔኪ ዓኣዳ ዓሶም፡- «ገንሣ ዒንሢ ባንሢ ኑ ማዒ ሙካንዳኣና ሃካ ዴዑሞቴ፤ ሃይሹ፣ ዓኣሮኔንታ ሁሪንታ ዒንሢና ሞላኬ፤ ዩያሮ ዒንሢ ባኣካ ጌኤሲ ዓኣ ዓሲ ዓኣቶ ዔያቶ ባንሢ ዓኣዳንጎ» ጌዔኔ።

15 ሙሴ ሲና ዲኮ ኬሰካዛ፣ ዲኮ ሻኣሬ ባይዚ ዓርቄኔ፤¹⁶⁻¹⁷ ናገገና ናገገ ጎዳኮ ቦንቾ ፔጋሲ ዳሞ ዓኣፒዳ ዴካ ፖዓ ዲኮይዳ ፖዔኔ፤ ዒሰራዔኤሌ ዓሶም ዩይ ፖዓ ዲኮ ዑያይዳ ዓዔኤታ ታሚ ማሌኔ፤ ዲካ ላሆ ኬሊ ጉቤ ሻኣሬና ዓርቄንቴ ዴዔኔ፤ ናገገና ናገገ ጎዳ ላንካሳ ኬሎና ሻኣሮ ባኣካ ማዒ ሙሴ ዔኤሌኔ፤¹⁸ ሙሴያ ኬሰኪ ዲኮይዳ ዓኣ ሻኣሮ ባኣኮ ጌሊ፣ ዒኣካ ያይዲታሚ ሮኦሪና ያይዲታሚ ሞንቴና ዴዔኔ።

24:8 24:8 ማቲ. 26:28፤ ማር. 14:24፤ ሉቃ. 22:20፤ 1ቆሮ. 11:25፤ ዔ.ብ. 9:19-20፤ 10:29። **24:18** 24:18 ላሚ. ሞፃ 9:9።

25

ጾኦሲ ማኣሮም ዒንጎ ባኣዚ ዛላ (ኬሲ. ማፃ 35:4-9)

1 ናንጊና ናንጋ ጎዳ ሙሴም፡- 2 «ታኣም ዔያታ ዒንጎ ባኣዚ ዔኪ ዩዓንዳጉዲ ዒሰራዔኤሌ ዓሶም ኬኤዜ፤ ዓይጎ ዓሲታቲያ ፔ ሼኔና ዔኪ ዩዓ ዒንጎ ባኮ ቢያ ዔኬ። 3 ዔያቶይዳፓ ኔ ዔካንዳ ባካ፡- ምርቁ፥ ቢራ ዓንጊ፥ ሞኦኖ ዓንጋ፥ 4 ጉኡሢ ሻሎና ዲምና ማኣዓ፥ ማራይ ጋፓኔና ማዢንቴ ዲንኪ ዓፒላ፥ ጋላፒንታ ዘቄ ዓፒላ፥ ሞኣሪ ጋፓኔና ማዢንቴ ዓፒላኣ፥ 5 ዘቄ ቃላሚና ቲሽኪንቴ ዓዳ ማራይ ጎር፥ ጉላምቤ ዜዲ፥ ሻሪ ሚሢ፥ 6 ፖፖ ፖዒሶ ሪሚቶ ዛይታ፥ ቲዡ ዛይታ፥ ዐንጆ ሳውሞ ኮሺ ሳውቁሳ ዲማ ዲማ ዴኤሻ፥ 7 ሜሬጊዴ ጌይንታ ሚዛጶ ሹጫ፥ ቄኤሶ ሱኡጎኮ ኬርኖይዳ ቱኮ ዔፑዴ ጎፖ ባኮና፥ ዳዶ ቡራሽይዳ ጌሢንታ ፔርፆ ጌይንታ ባኮንታኬ፤ 8 ታ ዔያቶኮ ባኣካ ናንጋንዳጉዲ ዴራ ጌኤሺ ማኣሪ ታኣም ማዡንጎ፤ 9 ዓፒሎና ማዢንታ ማኣሮ፤ ሃሣ ጋርይዳ ዓኣ ባኮሞ ቢያ ታ ኔና ዳሞ ጎይያ ጊኢጊሺ ማዡፍሞቴ።»

ጫኣቁሞ ጌሎና ታኣቦቶ ጌይንታ ሳኣፂና (ኬሲ. ማፃ 37:1-9)

10 «ሻሪ ሚሢፓ ፔቴ ሳኣፂኔ ታኣቦቴ ማሢ ዔያታ ኮሾንጎ፤ ፖዶሱማ ላምፖ ሞዳና ፓልፃና፥ ዓጮ ዳልጉማ ፔቴ ሞዳና ፓልፃና፥ ቱሮ ዔጶኣ ፔቴ ሞዳና ፓልፃና ማፖንጎ፤ 11 ጋርንታ ዙሎንታ ጌኤሺ ምርቁና ጳርቄ ኮሺ፤ ዓጮሞ ምርቁና ካንቄ፤ 12 ምርቃፓ ኮሺንቴ ፖይዶ ዢኢሮ ማዢ፥ ላምፖንሢ ፔቴ ዛላ፤ ላምፖንሢ ጊንሣ ባጎ ዛላ ማሢ ፖይዶ ቶኪና ሞላ ዓርቁንታንዳጉዲ ጊኢጊሺ፤ 13 ታኣቦቶ ኬዶንዶያ ዛጶ ሚሢ ሻሪ ሚሢፓ ኮሺጋፓ ዩያ ምርቁና ጳርቄ ኮሺ፤ 14 ዩንሢ ዛጶ ሚፖንሢ ታኣቦቶኮ ዓጮ ዛሎይዳ ዓኣ ዢኢሮንሢዳ ጌልዜ። 15 ዛጶ ሚፖንሢ ታኣቦቶኮ ዢኢራሢዳ ዳኪንቴ ዴፖንጎ፤ ፔቴታፖ ዒኢካፓ ኬሰኮፖ። 16 ዩካፓ ታኣኒ ኔኤም ዒንጋ ዓይሢፃ ፃኣፒንቴ ላምፖ ዓርሲያ ሹጮንሢ ታኣቦቶ ጋራ ጌሢ።

17 «ፖዶሱማ ላምፖ ሞዳና ፓልፃና፥ ዓጮ ዳልጉማ ፔቴ ሞዳና ፓልፃና ማዔ ጎሞ ጌኤሺያ ዔርዛ ጉኡፖ * ጌኤሺ ምርቁይዳፓ ኮሺ። 18 ዩኖኮ ዓጫ ዓጫ ዲይንቴ ምርቁይዳፓ ጋኣሲ ዓኣያ

* 25:17 25:17 ጎሞ ጌኤሺያ ዔርዛ ጉኡፖ ጋዓዛ፡- ታኣቦቶ ሳኣፂና ካሮም ጌሢንቴ ሱንሢኬ። 25:17 25:17 ዔ.ብ. 9:5።

ለምን ከሩቤኤሌ ጌይንታ ከኢታንቾ ማላታና ዓኣ ባኣዚ ማዜ፤
 19 ጎሞ ጌኤሺያ ዔርዛ ጉኡፖይዳ ለምን ዛሎና ዓጫ ዓጫ ማሂ
 ዬያቶ ዔቁሴ፤ ዔያታ ዬኖ ጉኡፖና ዋላ ዓይሂ ማዜንቴያ ማዖንጎ።
 20 ዬንሂ፤ ጋኣዛ ዓኣ ከሩቤኤሎንሂ ጉኡፖኮ ሻውሎና ሚዛቆናይዳ
 ማዒ ሄኮ ዔቁ ዋሊ ዛዛጋያ ማዖንጎ፤ ዔያቶኮ ፒሺንቴ ጋኣዛ ጉኡፖ
 ዓኣቻያ ማዖንጎ። 21 ለምን ዓርሲንቴ ሹጮንሂ ታኣቦቶ ጋራ ጌሂጋፓ
 ጎሞ ጌኤሺያ ዔርዛ ጉኡፖና ካሮ ዋዳ፤ 22 ታኣኒ ዬኖ ጫኣቁሞ
 ሳኣዲናይዳ ኔኤም ፔጋዲ ዴዲንዳኔ፤ ጉኡፖ ዑፃ ማዜንቴ፤ ጋኣዛ
 ዓኣ ለምን ከሩቤኤሎንሂ ባኣካ ማዒ ኔኔኒ ዒሰራዔኤሌ ዴሮም
 ዔርዛንዳ ዋጎ ቢያ ኔኤም ታኣኒ ዒንጋንዳኔ።»

የኦሲም ዒንጎ ካሦ ጌሦ ዴጌ ዳልጎ ሎኦኮ
 (ኬሲ. ማፃ 37:10-16)

23 «ዖዶሱማ ለምን ዋዳ፤ ዓጫ ዳልጉማ ፔቴ ዋዳ፤ ሉካ ዔጳ
 ፔቴ ዋዳና ፓልፃና ማዔ ዴጌ ዖዶሲ ሎኦኮ ሻሪ ሚሂዳፓ ዓርሲ
 ኮሹ። 24 ገንሂ ሃሃ ጌኤሺ ዋርቁና ዑፃ ጳርቁ ገኢጊሹ፤ ዓጫዋ
 ዋርቁና ካንቁ። 25 ሃሃ ዓጫ ዳልጉማ ኬኤላ ዋዳ ማዓያ ኮሺጋፓ
 ዬኖ ዋርቁና ጳርቁ ገኢጊሹ። 26 ዋርቁይዳፓ ኮሺንቴ ዖይዶ ዠኢሮ
 ዛጳ ሚፃ ዳኪ ኬዶንዶያ ኮሹ፤ ዠኢራሂያ ቶካ ዓኣ ዖይዶ ዛላ ማሂ
 ዓይሂ። 27 ዬያ፤ ዴጌ ሎኦኮ ኬዶንዶ ዛጳ ሚፃ ጌላንዳ ዠኢራሂ
 ዓጫ ዛላ ዓኣያ ማዖንጎ። 28 ዛጳ ሚፃ ሻሪ ሚሂፓ ኮሺ ዋርቁና
 ጳርቁ ገኢጊሹ፤ 29 ዓንዳና ሙርሳና፤ ሃሃ ገንሂ ዑኩ ዴዖንዶ
 ጉንጉሎዋ ጌኤሺ ዋርቁይዳፓ ኮሹ። 30 ቢያ ዋዳ ዴጌ ሎኦኮ ዖይታ
 ታ ቤርቶይዳ ጌሂንቶንጎ፤ ታኣም ዒንገንታ ዴማዴ ካሂ ቢያ ኬሊ
 ዬያ ዑፃፓ ባይቆ።»

ፖፖ ጌሦ ሻርና
 (ኬሲ. ማፃ 37:17-24)

31 «ጌኤሺ ዋርቁይዳፓ ሻርና ማዜ፤ ዬኖ ሻርኤሎ ፒዝ ጌዒ
 ዔቃ ቶኪና ዶዲሺ ዔቁሳ ዓንጊ ኮሹ፤ ዑኩ ዑሽኮ ዓንጎ ማላ ቡኒ
 ሃጊ ቡናያ ማሊሲ ሻርኤሎና ዓይሂ ኮሹ። 32 ጎኦቦ ዛሎና ላሆ
 ካኣፒ ዓኣያ ማሂ ኮሹ፤ ሃይሃሂ ፔቴ ዛላ፤ ገንሂ ሃይሃሂ ባጎ ዛላ
 ማዖንጎ። 33 ላሆ ካኣፓ ፔቴ ፔቴሂ ዪሊና ዒላሺና ዓኣ ሌውዜ
 ቡኖ ማላያ ሃይሃ ዑሽኮ ዓንጊ ማላ ቡኒ ዓኣያ ማዖንጎ። 34 ሻርናኮ
 ፒዝ ጌዒ ዔቁ ሚፃይዳ ዪሊና ዒላሺና ዓኣያ ሌውዜ ቡኖ ማላ
 ዖይዶ ዑሽኮ ዓንጊ ዓኣያ ማዖንጎ። 35 ሃይሃ ዋኣዲንቴ ካኣፖኮ ፔቴ

25:30 25:30 ለዋ. ዓኬ 24:5-8።

ፔቴ ዋኦ ዳማ ፔቴ ፔቴ ዲሊ ዓኣያ ማዖንጎ። 36 ዲሎንታ ካኦፖንታ ሻርኖንታ ፔቴ ማዒ ጌኤሽ ዋርቄይዳፓ ዓርሲንቴ ማዢንቶንጎ።
 37 ሻርኖኮ ላንካይ ፖዒ ማዢ ቤርቶ ቤርቶ ዛላ ፖዓንዳጉዲ ዴጊዲ ጌህ። 38 ጋውጮና ጋውጮ ጌህ ዓንደና ጌኤሽ ዋርቄይዳፓ ማዢ፤
 39 ፖዖ ጌህ ሻርኖና ዬያ ማህ ቢያ ኔ ማዢንዳ ሃይህታሚ ደንጎ ኪሎ ማዓ ጌኤሽ ዋርቄ ጊኢጊሼ። 40 ዲኮ ዑዖይዳ ታ ኔና ዳቄ ጎይዖ ማዢ ኮሽ ማሊ ዒና ዔኬ።»

26

ዓፒሎና ማዢንቴ ዖኦሲ ካኦሽኪንታ ማኣር

1 ሃህ፡- «ታኣኒ ካኦሽኪንታንዳ፣ ዓፒላና ማዢንቴ ታኣሞ ዲማዴ ማኣርኮ ጋርይዳ ዲንኪ፣ ጋላፒ፤ ሃህ ዘቄ ሱኡፖናይዳፓ ሱኪንቴያ ዲማሲህረ ጎኦኮንዶ ታጳ ዓፒላኦ ኮሼ፤ ዬያቶ ጊደይዳ ኪሩቤኤሎ ሼኤማና ማይሊ ሲኪ ኮሼ። 2 ፔቴ ፔቴ ጎኦኮ ዓፒሎኮ ዖደሱማ ላማታሚ ዖይዶ ዋዳ፣ ዓጮ ዳልጉማ ዖይዶ ዋዳ ማዒ ቢያህ ሄኮ ማዖንጎ። 3 ጎኦኮ ዓፒሎ ደንጋህ ዋላ ካንህ ሲኬ፤ ሃህ ሃንጎ ደንጋህያ ዒማይዳ። 4 ዋላ ካኣሚ ኮሽንቴ ላምዖ ጎኦኮ ዓፒሎኮ ዓጮይዳ ዓጮይዳ ዲንኪ ዓፒላና ኮሽንቴ ሱህ ጌህ። 5 ጎኦኮ ዓፒሎ ቤርታሳዘኮ ቤርቶ ዛሎይዳ ደንጊታሚ ሱህ፣ ጎኦኮ ዓፒሎ ላምዓሳዘኮ ጋፒንዖ ዛሎይዳ ቤርታሳዘ ሱዖኮ ቤርታ ቤርታ ደንጊታሚ ሱህ ኮሼ። 6 ዬንህ ላምዖ ዛሎንህ ዋላ ካንህያ ማዓንዳጉዲ ደንጊታሚ ዋርቄፓ ኮሽንቴ ዓይህ ባኣዚ ጊኢጊሼ።»

7 «ዋኣሪ ጋፓኔና ማዢንቴ ታጳ ፔቴ ጎኦኮ ዓፒላ ዬያ ማኣርኮ ካራ ማሂ ኮሼ። 8 ዬንህ ጎኦኮ ዓፒሎ ፔቴ ፔቴዘንህኮ ዖደሱማ ላማታሚ ላሆ ዋዳ፣ ዓጮ ዳልጉማ ዖይዶ ዋዳ ማዒ ቢያህ ሄኮ ማዖንጎ። 9 ደንጋህ ፔቴ ዛላ፣ ላሃህ ባጎ ዛላ ማሂ ዋላ ካንህጋፓ ሲኬ፤ ጎኦኮ ዓፒሎ ላሃሳዘ ጳንጨንቴ ቤርቶ ዛሎና ዓፒላፓ ማዢንቴ ማኣርይዳ ጌህንቶንጎ። 10 ፔቴ ዛላ ዓኣ ጎኦኮ ዓፒሎኮ ጋፒንዖ ዛሎ ዓጮይዳ ደንጊታሚ ሱህ ኮሽ ጌህ። 11 ሱዖ ጋርይዳ ደንጊታሚ ሞኦኖ ዓንጎና ኮሽንቴ ዓይህ ባኣዚ ጌልዜ፤ ዬያይዲ ላምዖ ዛሎ ዋላ ካንህ ፔቴ ካራ ማዓንዳጉዲ ጊኢጊሼ። 12 ዑህ ዓኣዲ ዓቴያ ማዒ ዛሎ ጎኦኮ ዓፒሎ ዔኪ ዓፒሎና ማዢንቴ ማኣርኮ ዙሎ ዛሎይዳ ሱዔ። 13 ዬያታ ዓፒላ ዖደሱሞና ጎኦኮ ዓፒሎ ቢያይዳፓ ዑህ ማዒ

25:40 25:40 ዳኪ. ማዶ 7:44፤ ዔ.ብ. 8:5።

ፔቴ ፔቴ ዋዳ ሶንጌና ሃንጌና ዓፒላፓ ማዢንቴ ማኣር ኬሰኪ ካንቃያ ማዖንጎ።»

14 «ዓፒላፓ ማዢና ማኣርኮ ካራ ማዓንዳጉዲ፣ ፔቴ ዞቄ ቃላሚና ቲሽኪንቴ ዓዴ ማራይ ዒልዒ፤ ሜሌ ሃሣ ሺርኪንቴ ሻኣዣ ዒልዒዳፓ ለምዖ ካራ ቃሲ ማዢ።»

15 «ዓፒሎና ማዢንቴ ማኣር ሬኤኪ ዓርቃንዳጉዲ ዓርሲንቴ ለሾ ሚሢ ሻሪ ሚሢዳፓ ኮሼ። 16 ፔቴ ፔቴ ለሾ ሚዖኮ ዖደሱማ ሳሊ ዋዳ፣ ዳልጉማ ፔቴ ዋዳና ፓልፃና ማዖንጎ። 17 ለሾ ሚዖ ፔቴይዳ ዋላ ካኣሚ ዋሊ ዓርቃንዳጉዲ ፔቴ ፔቴ ለሾ ሚዖም ዋሊጉዲ ማዔ ለምዖ ለምዖ ዳንኬ ዓኣያ ማዖንጎ፤ 18 ዓፒሎና ማዢንቴ ማኣርኮ ደኦሎ ዛሎና ለማታሚ ለሾ ሚሢ ኮሼ፤ 19 ዬያቶኮ ዖይዲ ታሚ ቢራ ዓንገና ኮሺንቴ ቶኪ ጊኢጊሼ፤ ለምዖ ኪር ዋላ ዓይሣንዳጉዲ ፔቴ ፔቴ ለሾ ሚዖኮ ለምዖ ለምዖ ቶኪ ዓኣያ ማዖንጎ። 20 ዓፒላፓ ማዢንቴ ማኣርኮ ኬዶ ዛሎና ለማታሚ ለሾ ሚሢ ኮሼ፤ 21 ፔቴ ፔቴ ለሾ ሚዖ ዴማ ለምዖ ለምዖ ቶኪ ኮሺ ዖይዲ ታሚ ቢራ ዓንገ ቶኪ ዓኣያ ማሃ ጊኢጊሼ። 22 ዓፒሎና ማዢንቴ ማኣርኮ ዙሎ ዛላ፣ ጌይፃ ዓባ ጌላ ዛሎይዳ ላሆ ዓርሲንቴ ለሾ ሚሢ ኮሼ፤ 23 ኮጫ ዋላ ካኣማ ካሮይዳ ለምዖ ለሾ ሚሢ ኮሼ። 24 ዬንሢ ኮጫ ዋላ ካኣማ ካራ ዓኣ ለሾ ሚዖንሢ ሉኡፓ ዓርቁንቴ ቶኦኮ ሄላንዳኣና ካኣሚያ ማዓንዳያ ኮይሳኔ፤ ሃሣ ዓቴ ኮጫ ዋላ ካኣማ ካሮ ካንሣ ለምዖ ለሾ ሚዖንሢያ ዒዞ ጎይፃ ኮሺንቶንጎ። 25 ዬዖ ጎይፃና ፔቴ ፔቴ ለሾ ሚዖ ዴማ ለምዖ ቶኪ ዓኣያ ማዔ ታጾ ላሆ ቢራ ዓንገና ኮሺንቴ ቶኪ ዓኣ ሳሊ ለሾ ሚሢ ዓኣያ ማዓንዳኔ።»

26 «ታጾ ደንጎ ጋጋርሲ ሻሪ ሚሢዳፓ ኮሼ፤ ዔያቶይዳፓ ደንጋሢ ዓፒላፓ ማዢንቴ ማኣርኮ ፔቴ ዛላ ዓኣ ለሻሢ ሚዖም፣ 27 ሃሣ ደንጋሢ ፔቴ ዛሎይዳ ዓኣ ለሻሢ ሚዖም፣ ዓቴ ደንጋሢ ዓባ ጌላ ዛሎና ጌይፃ ጊንፃ ዛሎና ዓኣ ለሻሢ ሚዖም ማዓንዳኔ። 28 ሳዛኣ ዓኣ ጋጋርዛሢ ለሻሢ ሚዖኮ ዓጫፓ ዴንዲ ዓጫ ሄላንዳኣና ጌሢንቶንጎ። 29 ለሻሢ ሚዖ ዋርቁና ጳርቁ ኮሼ፤ ጋጋርዛ ሚዖኮ ዓርቆያ ማዓንዳጉዲ ዋርቁና ኮሺንቴ ሱሢ ጊኢጊሼ፤ ጋጋርዛ ዋርቁና ጳርቁ ኮሺንቴያ ማዖንጎ፤ 30 ዓፒሎና ማዢንታ ማኣር ዲኮይዳ ታ ኔኤም ዳዌ ጎይፃማ ደቁ።»

31 «ዲንኪ፣ ጋላፒ ሃሣ ዞቄ ዓፒላ ሱኪንቴ ሱኡፔፓ ጎኦቦ ዓፒላ ኮሼ፤ ዔያቶይዳ ኪሩቤኤሌ ሼኤሚና ማይሊ ሲኪ ኮሼ።» 32 ዬያ ሻር ሚዖፓ ኮሺንቴ ዋርቆና ጳርቁ ኮሺንቴ፣ ኪርና ቢር ዓንጋ ቶካ ዓኣ ዖይዶ ቱርቱርናይዳ ሱጴ። 33 ጎኦቦ ዓፒሎ ዓፒላና ማዢንቴ ማኣርኮ

ሳኮይዳ ዋሊ ሄሊ ገሢነቴ ዓይሆ ባኮይዳ ሱፃ፤ ዩካፓ ላምዖ ዓርሲነቴ ሹጫ ዓኣ ጫኣቁሞ ሳኣፂኖ ጎኑቦ ዓፒሎኮ ጊንዖ ዛሊና ገሢሄ፤ ዩያይዲ ጎኑቦ ዓፒላ ጌኤሺ ጌይነቴ ቤዘ ዑሣ ዓኣፂ ጌኤኸ ቤዘፓ ዲማሳያ ማዓንዳኔ፤ 34 ዩያይዲ ሰካፓ ጫኣቁሞ ሳኣፂኖኮ ካሮ ዋፊ፤ 35 ፊጊ ጌዔ ሎኑኸ ያይቶ ዑሣ ዓኣፂ ጌኤኸ ቤዘኮ ዙላ ዓፒላፓ ማኸና ማኣሮኮ ኬዶ ዛሎይዳ ገሢሄ፤ ጊንሣ ፖዖ ገሢሆ ሻሮና ማኣሮኮ ደኣሎ ዛሊና ገሢሄ።

36 «ዓፒላፓ ማኸነቴ ማኣሮሞ ካራ ማዓንዳጉዲ ዲንከ፤ ጋላፒ፤ ሃሣ ዞቄ ሱኡፖይዳፓ ሱከነቴ ቃራ ዓፒላ ሹኤሜና ማይሊ ሲከ ሚዛጲሶናያ ጎኑቦ ዓፒላ ኮሼ። 37 ጎኑቦ ዓፒሎም ደንጎ ቱርቱሪ ሻሪ ሚሢፓ ኮሺ ዋርቄና ዑዖ ጳርቄ ጊኢጊሼ፤ ዩያቶ ጊደይዳ ገሢሃነታ ኪራ ዋርቄና ኮሺነቴያ ማዖንጎ፤ ዩያቶ ቱርቱሮም ሞኦኖ ዓንጋፓ ማኸነቴ ደንጎ ቶኪ ኮሼ።»

27

የኦሲም ዒንጎ ባኮ ዒንጎ ቤዘ ኮሾ ጎይዖ (ኬሲ. ማፃ 38:1-7)

1 ሃሣ፡- «ሻሪ ሚሢዳፓ ታኣም ዒንጎ ባኮ ዒንጎ ቤሲ ጊኢጊሼ፤ ዩያኮ ያደሱማ ያይዶ ዋዳና ፓልፃና፤ ዓጮ ዳልጉማ ያይዶ ዋዳና ፓልፃና ማዔያ፤ ሃሣ ፊጉማ ላምዖ ዋዳና ፓልፃና ማዔያ ማዖንጎ። 2 ዋላ ካኣማ ያይዶ ዛሎ ቢያሢዳ ዳንኬ ኮሼ፤ ዩይ ዳንካ ዒንጎ ባኮ ዒንጎ ቤዘና ዋላ ማኸነቴያ ማዖንጎ፤ ዩያ ቢያሢኮ ዑዖ ሞኦኖ ዓንጎና ጳርቄነቴያ ማዖንጎ። 3 ዲቢንዖ ዋሆንዶ ኩንዔ፤ ታሚ ካኣሾንዶ ቦኣቆ፤ ጋውቸና ሃሣ ታሚ ገሢሣ ዔኤሆንዶ ባኮዋ ጊኢጊሼ፤ ዩይ ባካ ቢያ ሞኦኖ ዓንጎና ኮሺነቴያ ማዖንጎ። 4 ዒንጎ ባኮ ዒንጎ ቤዘ ዲርቃያ ማሂ ርኦጮ ጋሶናጉዴያ ሞኦኖ ዓንጊና ኮሼ፤ ዩያ ባኮም ያይዶ ሞኦኖ ዓንጊና ኮሺነቴ ሱሢ ዋላ ካኣማ ያይዶ ካራ ገሢሄ። 5 ዩና ባኬላ ዒንጎ ባኮ ዒንጎ ቤዘኮ ጊዲሚኸ ሄላንዳጉዲ ዒንጎ ቤዘኮ ዳኣሮ ዴማ ማሂ ጊኢጊሼ፤ 6 ታሚና ሚቺ ዒንጎ ባኮ ዒንጎሢ ኬደንዶ ዛጳ ሚሢ ኮሺ ሞኦኖ ዓንጎና ዑዖ ጳርቄ። 7 ዒንጎ ባኮ ዒንጎሢ ኬዳኒ ኮይሳ ዋደና ዛጳሢ ሚዖ ዒንጎ ባኮ ዒንጎሢኮ ፔቴ ፔቴ ዓጮና ዓኣ ሱዖ ጋሮ ጌልዜ። 8 ዲኮይዳ ታ ኔኤም ዳዌ ጎይዖና ዒንጎ ባኮ ዒንጎ ቤዘ ላሾ ሚሢና ኮሺጋፓ ጋሮ ጉሪ ማሂ ጊኢጊሼ።»

26:33 26:33 ዔ.ብ. 6:19፤ 9:3-5።

ዓፕላፓ ማዢንቴ ማኣሮኮ ዲሮ ጋራ ማዓ ካሮ
(ኬሲ. ማፃ 38:9-20)

9 «ዓፕላፓ ማዢንቴ ማኣሮኮ ዲሮ ጋራ ማዓ ካሮ ጉኡሢ፣ ደዲ ፓቲሌና ኮሺ፤ ጎኦሶ ዓፕሎኮ ያደሱማ ደኦሎ ዛለና ጻኤታ ዋዳ ማፃንጎ፤ 10 ዬና ደዲ ዔቃንዳጉዲ ላማታሚ ሞኦና ዓንጊ ቶኪ ዓኣ ላማታሚ ቱርቱሪ ኮሺ፤ ዔያቶይዳ ቢራ ዓንጊና ኮሺንቴ ፒዝ ጌዔ ዓንጊና ኪሬና ዓኣያ ማፃንጎ፤ 11 ኬዶ ዛሎና ዓኣ ዲሮ ጋራ ዓዳ ዒማ ጎይፆ ማዲንቶንጎ። 12 ዓባ ጌላ ዛሎና ዲሮ ጋሮም ታጾ ቶኪ ዓኣ ታጾ ቱርቱሪና ዋላ ያደሱማ ደንጊታሚ ዋዳ ማዓ ጎኦሶ ዓፕላ ዓኣያ ማፃንጎ። 13 ጌሎ ካሮ ዛላ ዓኣ፣ ዓባ ኬሰካ ዛሎና ዓኣ ዲሮ ጋሮኮ ዳልጉማ ደንጊታሚ ዋዳ ማፃንጎ። 14-15 ጌሎ ካሮኮ ሻውሎና ሚዛቆና ዛሎይዳ ያደሱማ ታጾ ደንጎ ዋዳና ፓልፃና ማዔ ጎኦሶ ዓፕላ ዓኣያ ማፃንጎ፤ ሃይሃ ቶኪ ዓኣ ሃይሃ ቱርቱሪ ዔያቶ ሬኤኪ ዓርቆንጎ። 16 ፔ ቶኦኪና ጌሎ ካሮኮ ሌሊ ያደሱማ ላማታሚ ዋዳ ማዔ ዲንኪ፣ ጋላፒ ሃሃ ዞቁ ሱኡፔይዳፓ ሱኪንቴ ሚዛጲ ሺኤሜና ዑፆ ማይሊ ሲኮና ጎኦሶ ዓፕላ ዓኣያ ማፃንጎ፤ ዬኖ ዓፕሎ ሬኤኪ ዓርቆያ ያይዶ ቶኪ ዓኣ ያይዶ ቱርቱሪ ዓኣያ ማፃንጎ። 17 ዲሮ ካሮኮ ዙሎይዳ ዙሎይዳ ዓኣ ቱርቱሪ ቢያ ፒዝ ጌዔ ቢሮ ዓንጎና ዓርቁንቴያ ማፃንጎ፤ ዬያቶይዳ ዓኣ ኪራኣ ቢራ ዓንጊና፣ ቶካ ጊንሣ ሞኦና ዓንጊና ኮሺንቴያ ማፃንጎ። 18 ዓፕሎና ማዢንቴ ማኣሮ ዲሮ ጋሮኮ ያደሱማ ጻኤታ ዋዳ፣ ዳልጉማ ደንጊታሚ ዋዳ፣ ዴጉማ ደንጎ ዋዳ ማፃንጎ፤ ጎኦሶ ዓፕላ ጉኡሢ ሻሎይዳፓ ኮሺንቴያ ማዔ ቶካ ሞኦና ዓንጊና ኮሻና ማፃንጎ። 19 ዓፕሎና ማዢንቴ ማኣሮኮ ጋሮይዳ ማዲንቶ ሚሃ፤ ሃሃ ዬያ ማኣሮንታ ጎኦሶ ዓፕሎ ፃውናኣ ቢያ ሞኦና ዓንጎና ኮሺንቴያ ማፃንጎ።»

ፖፖ ጊኢጊሺ ካፖ ጎይሢ
(ሌዊ. ዓክ 24:1-4)

20 «ፖዓ ዲሞና ቢያ ፖዔ ጎይሢ ዳዓንዳጉዲ ፖፖም ኮይሳ ቃራ ሪሚቲ ዛይቲ ኔኤም ዔኪ ዬዓንዳጉዲ ዒሰራዔኤሌ ዳሮ ዓይሢ፤ 21 ዓኣሮኔና ዒዛኮ ናኣቶና ዓፕሎና ማዢና፣ ታኣኒ ዒንሢና ካኣማ ማኣሮይዳ ፖፖ ጊኢጊሺንጎ፤ ታ ቤርቶይዳ ዲሚማፓ ካራንዳያ ሂላንዳኣና ፖዓንዳጉዲ ጫኣቁም ታኣሶቶ ሳኣፂኖኮ ቤርቶ ዛላ ዓኣ ጎኦሶ ዓፕሎኮ ዙላ ጌሃንጎ፤ ዬይ ፓጋ ዒሰራዔኤሌ ዳሮና ሃጊ ሙካንዳ ሾይንቶናም ናንጊና ካፒ ማዲንታያ ማፃንጎ።»

28

ቄኤሶ ማኣዓሢ (ኬሲ. ማፃ 39:1-7)

1 ናንገና ናንጋ ጎዳ ሃሣ ሙሴም፡- «ኔኤኮ ጌርሲ ዓኣሮኔና ዒዛኮ ናኣቶ ናኣዳኣቤ፥ ዓቢሁ፥ ዓላዜሬንታ ዒታማሬንታ ኔ ባንሢ ዔኤሌ፤ ዔያታ ቄኤሴ ማዒ ታኣም ማዳንዳጉዲ ዒሰራዔኤሌ ዴር ባኣካፓ ዲማሴ። 2 ዒዛም ቦንቾና ሚዛጰሞናኮ ማዓንዳጉዲ ኔ ጌርሲ ዓኣሮኔም ቄኤሴም ኮይሳ ዓፒላ ገኢጊሹ። 3 ታኣኒ ዲማ ዔራቶ ዒንጌ ፔ ኩጮ ዔራቶና ማዳ ዔር ዓሶ ዔኤሊጋፓ ዓኣሮኔም ዔያታ ዓፒላ ማዛንዳጉዲ ኬኤዜ፤ ያኣዒዳዛ ዓኣሮኔ ቄኤሴ ማዒ ታኣም ማዳኒ ዲማዴያ ማዓንዳኔ። 4 ዲማ ዲማ ኮሺንታንዳ ማኣዓሢ ሃካፓ ሊካ ፓይዲንታሢ ጎይፆ ማፆም፡- ዳዳ ጌሢንታ ቡራሻ፥ ዔፑዴ ጌይንታ ኬርና ቱኮ ዓፒላ፥ ቃሚሻ፥ ሹኤሚና ሲኪ ማይሊ ኮሾና ሹራቤ፥ ቶኣካ ማሮያንታ ኬርና ቱኮ ዓፒላንታኬ፤ ኔኤኮ ጌርሲ ዓኣሮኔንታ ዒዛኮ ናኣቶንታ ቄኤሴ ማዒ ታኣም ማዳንዳጉዲ ዩንሢ ዓፒሎንሢ ዔር ዓሳ ኮሾንጎ። 5 ዔያታ ዩንሢ ዓፒሎ፡- ዲንከ፥ ጋላፒ፥ ሃሣ ዞቄ ሱኡፖ ዓፒላይዳፓ ጊንሣ ዎርቄና ቃራ ሚዛጰ ዓፒላናይዳፓ ሹኤሚና ማይሊ ገኢጊሹ ኮሾንጎ።

6 «ዔፑዴ ዲንከ፥ ጋላፒ፥ ዞቄ ሱኡፖ፤ ጊንሣ ሃሣ ዎርቄና ቃራ ሚዛጰ ዓፒላናይዳፓ ሹኤሚና ማይሊ ሲኪ ገኢጊሹ ዔያታ ኮሾንጎ። 7 ላምፆ ዛላ ዎላ ካንሢንታንዳጉዲ ላምፆ ጌኤታ ካኣማ ካሮይዳ ዎጋሮጉዴ ሱሢ ኮሺንቲ ዓኣያ ማፆንጎ። 8 ዔፑዴ ማዢንቲ ባኮንሢዳፓ ዔራቶና ቃውሪ ኮሾና ኬርና ቱኮ ባካ ፔቲይዳ ዎላ ማዢናያ ማዒ ዔፑዴና ዎላ ዓይሢ ማዢናያ ማፆንጎ። 9 ሃሣ ላምፆ ዲዲ ሚዛጰ ሹቺ ዔኪ ታጶ ላምፆ ያይቆኦ ናኣቶኮ ሱንፆ ዒኣካ ቆኦቄ ቆኦቄ ፃኣፔ፤ 10 ዩያ ኔ ማዳንዳሢ ዔያቶኮ ሸይንቶ ዎዶ ዛኣሊሱዎፆ ዎሊ ሄሊሲ ሄሊሲ፥ ላሃሢ ፔቲዞይዳ ላሃሢ ጊንሣ ሚሌዞይዳ ቆኦቄ ፃኣፔ። 11 ላምፆ ሹጮይዳ ታጶ ላምፆ ያይቆኦ ናኣቶኮ ሱንፆ ቆኦቄ ፃኣፓንዳ ዔራቶ ዓኣ ጎኦባ ዓሲ ዴንቄ፤ ሹጮኮ ዎርቄና ዓጮ ማሢ ኮሹ፤ 12 ታጶ ላምፆ ዒሰራዔኤሌ ፃጶ ጶቄሣያ ማዓንዳጉዲ ላምፆ ሚዛጰ ባኮንሢ ጌኤቶ ዔፑዴ ዓፒሎኮ ሱይይዳ ሮኦኬ። ዩያይዲ ታኣኒ፥ ናንገና ናንጋ ጎዳ ቢያ ኬሊ ታ ዴር ጶቄሣንዳጉዲ ዓኣሮኔ ዔያቶኮ ሱንፆ ፔ ጌኤቶይዳ ዔኪ ሃንቶንጎ። 13 ዎርቄይዳፓ ላምፆ ፓልሞ ኮሹ፤ 14 ጌኤሺ ዎርቄይዳፓ ሱሲጉዲ

ዋላ ማርቴ ዣሎ ጉዳ ባአዚ ላምፆ ኮሺ፣ ላምፆ ፓልሞንሢ ዋላ ዓይህ።»

ዳዶ ቡራሾ
(ኬሲ. ማፃ 39:8-21)

15 «የእሲኮ ማሊያ ዔራኒ ያኦጮ ዳዶ ቡራሾ ቁኤሶ ቢያኮ ሱኡጋሢም ኮሺ፤ ማዢንቴፃ ዔፑዳ ማዢንቴ ጎይፆ ዒንሢ ባኮንሢና ማዢንቴያ ማፆንጎ፤ ሃሣ ዔፑዳ ሺኤሞና ማይሊ ሲኪ ሚዛጲሶናሢ ጎይፆ ሲኪንቴ ጊኤጌያ ማፆንጎ። 16 ያዶሱማ ኬኤላ ዋዳ፤ ጊንሣ ዓጮ ዳልጉማኦ ኬኤላ ዋዳ ማዒ ጳንጨንቴያ ያይዶ ዛላ ሃኮ ማዒያ ማፆንጎ። 17 ያይዶ ዋሊጊንፆ ጌሦናያ፣ ሚዛጲ ሹቺ ፓልሞ ዒኢካ ኮሺ፤ ቤርጋ ዋሊጊንፆ ጌሦዛይዳ ሴርዲዮኔ፣ ቶጳዚዮኔና ዊልጭ ዊልጭ ጋዓ ሚዛጲ ባአዚ፣ 18 ላምዓሳዘይዳ ቤሎሬ፣ ሴንፔሬና ዓልማዞ ጌይንጋ ባኮ፤ 19 ሃይሣሳ ቤዛይዳ ያኪንቴ፣ ኬልቁዶኔና ዓማቴሰፂኖሴ ጌይንጋ ባኮ፣ 20 ያይዳሳዘይዳ ቢሪላ፣ ሜሬጌዴና ዒያሰጲዴ ጌይንጋ ባካ ዋርቄና ኮሺንቴ ባኮይዳ ጌሢንቶንጎ። 21 ዒሰራዔኤሌ ፃጶ ጳቂሣያ ማዓንዳጉዲ ሃንሢ ታጶ ላምፆ ሚዛጶ ሹጮ ፔቴ ፔቴዞንሢዳ ያይቆኦ ናኦቶ ፔቴ ፔቴሢኮ ሱንፃ ቆኦቂ ፃኦፒንቶንጎ። 22 ዳዶ ቡራሾም ሱሲጉዲ ዋላ ማርቴ፣ ዣላሢጉዴ ባአዚ ጌኤሺ ዋርቄይዳፓ ኮሺ። 23 ላምፆ ዋርቄ ዢኢር ኮሺ ዳዶ ቡራሾኮ ኬዶ ዛሎና ዋላ ካኦማ ካርይዳ ዓይህ። 24 ዋርቆይዳፓ ኮሺንቴ ዣላሢ ማላ ላምፆ ባኮ ላምፆ ዢኢራሢና ዋላ ካንሢ ዓይህ። 25 ባጎ ዛሎና ዓኦ ላምፆ ዣላሢ ማላ ባኮኮ ካርንሢ ላምፆ ፓልሞንሢና ዋላ ካንሢ፤ ዬያይዲ ቤርቶ ዛሎና ጌኤቶይዳ ዓጊንጋ ዔፑዳ ዓፒሎኮ ሱፆና ካንሢ ዓይህ፤ 26 ጊንሣ ላምፆ ዋርቄ ዢኢር ኮሺ ጋር ዛሎና ዔፑዳይዳፓ ሄሊሲ ዓኦ ዳዶ ቡራሾኮ ደኦሎ ዛሎና ዋላ ካኦማ ካርና ካንሢ ዓይህ። 27 ዬንሢዳፓ ሜሌ ቃሲ ላምፆ ዋርቄ ዢኢር ኮሺ ቤርቶ ዛሎና ጌኤቶይዳ ዓጊንጋ ዔፑዳ ዓፒሎኮ ሱፆና ዋላ ደኦሎ ዛሎና ዓይህ፤ ዋላ ዓይሣኒ ኮይሳሢያ ሲፓ ዋላ ካኦማ ካርይዳ፣ ጊንሣ ሃሣ ዔራቶና ቃውሪ ኮሾና ኬርና ቱኮ ባኮኮ ኬዴናይዳኬ። 28 ዳዶ ቡራሾይዳ ዓኦ ዢኢራሢ ዔፑዳይዳ ዓኦ ዢኢራሢና ዋላ ዲንኮ ዣላሢጉዴ ባኮና ቱኬ፤ ያዲ ማዔቴ ዳዶ ቡራሻ ኬርና ቱኮ ባኮኮ ኬዴ ማዔሢር ኮሪንዲሞሴ።

29 «ዓኦርኔ ታኦም ዲማጴ ቤዞ ጌላ ዋዶና ዒሰራዔኤሌኮ ፃጶ ሱንፃ ቆኦቂ ፃኦፒንቴ ዬኖ ቡራሾ ማኦፆንጎ፤ ዬያይዲ ታኦኒ፣ ናንጊና ናንጋ ጎዳ ቢያ ዋዶና ዴር ታኦኮ ጳቂሳንዳኔ። 30 ታ ማሊዮ ዲማሲ ዔርዛ ባኮንሢ ኔ ዒዛም ዒዛኮ ዳዶ ቡራሾይዳ ዓጌ፤ ዓኦርኔያ

ዓፕሎና ማዢንቴ ጌኤዮ ማኣሮ ጌላ ዋዶና ዳዶ ቡራሾይዳ ዬያ ዔኪ ጌሎንጎ፤ ታኣኮ ማሊያ ዒሰራዔኤሌ ዳሮም ፔጋሲ ኬኤዛኒ ዳንዳዓንዳጉዲ ታ ቤርቶ ሺኢኪ ማዳኒ ዒ ጌላ ዋዶና ቢያ ዳዶ ቡራሾይዳ ዬንሢ ጌሦንጎ።»

ቄኤሳ ማይንታ ሜሌ ማኣዖ
(ኬሲ. ማፃ 39:22-31)

31 «ዔፑዶ ቃሚሻ ቢያ ዲንኪ ሱኡፖ ዓፕላፕ ኮሺንቴያ ማዖንጎ፤ 32 ቶኦኪና ጌልዚ ሆላ ማይንታኒ ጊኢጊሶናያ ማዖንጎ፤ ዬና ባኬላ ቡሊንቴዋጉዲ ጋርሲም ጳንጨንቴ ኩቻ ሲኮናያ ማዖንጎ። 33-34 ደኦሎ ዛሎ ዓጮና ዲንኪ፣ ጋላፒ፤ ሃሣ ዘቄ ሱኡፖይዳፕ ማዢንቴ ሮኦማኦኔ ሚያ ዓኣፖ ማላ ባኣዚ ጌሣ፤ ዬና ዓኣፖኮ ባኣኮይዳ ጌላንዳ ዋርቄይዳፕ ማዢንቴ ዳካ ዳካ ሂቾ ጌሣ። 35 ዓኣሮኔ ቄኤሴ ማዒ ታኣም ማዳኣና ዬያ ቃሚሻ ማኣዖንጎ፤ ታኣም ዲማዳ ቤዘይዳ ታ ቤርታ ዒ ጴዳ ዋዶና ማዖም ዒኢካፕ ኬሰካ ዋዶና ሂቻሢኮ ቡኡዛ ዋይዚንታንዳሢሮ ሃይቢፕ ዒዚ ዳቃንዳኔ።

36 «ጌኤሺ ዋርቄይዳፕ ፔቴ ፓልም ማዢጋፕ ዑያይዳ ሩንጊና ሩንጋ ጎዳም ዲማዳያ» ጌይ ቆኦቄ ፃኣፔ። 37 ዬያይዳሰካፕ ቶኦካ ማሪ ጌሦሣዲ ዲንኮ ዛሎ ማላ ባኮ ሱጳ፤ 38 ዓኣሮኔያ ዬና ፔ ባሊቶይዳ ጌሦንጎ፤ ዬናሮ ታኣም ዔኪ ሺኢኮ ባኮ ሺኢሺያይዳ ዔያታ ዳቤታቴያ ዒሰራዔኤሌ ዓሳ ታኣም ዒንጋ ዒንጊያ ቢያ ታኣኒ ሩንጊና ሩንጋ ጎዳ ዔካንዳኔ።

39 «ዓኣሮኔኮ ሹራቦንታ ቶኦካ ማሮ ባኮንታ ቃራ ሱኡፖ ዓፕላና ኮሺ፤ ዒዚ ኬርና ቱካ ባካ ቃራ ሱኡፖ ዓፕላና ኮሺንቴ ሺኤሜና ማይሊ ሲኪ ጊኢጊሾናያ ማዖንጎ።

40 «ዓኣሮኔኮ ዓቲንቆ ሩኣቶም ቦንቾና ሚዛጰምናኮ ማዓንዳጉዲ ሹራቦ፣ ኬርና ቱኮ ባኮንታ ቶኦካ ዓሳ ቆኦባዋ ኮሺ ጊኢጊሹ። 41 ዬያይዳጋፕ ዓካሪ ዬንሢ ዓፕሎንሢ ኔ ጌርሲ ዓኣሮኔና ዒዛኮ ሩኣቶና ማይሴ፤ ታኣም ዔያታ ቄኤሴ ማዒ ማዳንዳጉዲ ሪሚቶ ዛይቶና ኔ ዔያቶ ቲሽኪ ቄኤሴ ማሂ ታኣም ዲማሴ። 42 ካሉማ ዔያቶኮ ፔጋዲዋጉዲ ቃራ ሱኡፖ ዓፕላና፣ ዔያቶኮ ኬርናፕ ዴንዲ ሙርታሢ ሃላንዳ ቆንፄ ዔያቶም ጊኢጊሹ፤ 43 ዓኣሮኔና ሩኣቶና ቢያ ኬሊ ዓፕላፕ ማዢንቴ ጌኤዮ ማኣሮ ጌላ ዋዶና፣ ሃሣ ጊንሣ ጌኤዮ ቤዘይዳ ቄኤሴ ማዒ ማዳኒ ዒንጎ ባኮ ዒንጎ ቤዘ ባንሢ ሙካያ ዬያ ማይንቶንጎ፤ ዬያይዲያና ዔያቶኮ ካሉማ ጴዳንዲዋሢሮ ሃይቢፕ

28:30 28:30 ፓይ. ማፃ 27:21፤ ላሚ. ዋማ 33:8፤ ዒዢ. 2:63፤ ኔሄ. 7:65።

ዔያታ ቶላንዳኔ፤ ዬይ ዓካሪ ዓኣሮኔና ዒዛኮ ዜርዖናም ቢያ ዶዲ ናንጋንዳ ዋጌ ማዓንዳኔ» ጌዔኔ።

29

ቄኤሶኮ ማደም ዲማዲያ
(ሌዊ. ዓኩ 8:1-36)

1 ናንጊና ናንጋ ጎዳ ሃሣ ሙሴም፡- «ዓኣሮኔንታ ናኣቶንታ ታ ቤርታ ታኣም ማደንዳጉዲ ኔ ዔያቶ ዲማሳኒ ማደንዳ ባካ ያዲኪ፤ ዔኤቢ ቦሂሳ ባኣዚ ባኣያ ፔቴ ዋጋናና ላምዖ ዓዴ ማራናይ ዔኪ፤
2 ዛርጌ ዲኢሊ ዔኪ ዛይቶ ቲዠ ዋሂ ሙኦቃ ፃኣዛ ጌለባኣ ላኣዳ ላኣዴ፤ ሃሣ ዬያጉዲ ዛይቴ ጌለባኣ ሚሌ ላኣዳ ላኣዴ፤ ገንሣ ሃሣ ሻኣዠ ላኣዳ ላኣዲጋጋ ዛይቶ ቲዠና ቲሽኬ፤
3 ቢያሢ ሌኤማቴይዳ ጌሢጋጋ ዋጋናሢ ላምዖ ዓዴ ማራቶንሢ ሹከ፡ ታኣም ኔ ዒንጋ ዋዶና ዒንጎ ባኣዚ ማሂ ዋላ ሺኢሹ።

4 «ዓኣሮኔና ዒዛኮ ናኣቶና ታ ካኣሽኪንታ፡ ዓፒላፓ ማዠንቴ ማኣሮ ካሮ ዔኪ ሙኪጋጋ ዔያታ ፔኤኮ ዑዖ ማሰታንዳጉዲ ዔያቶም ከኤዜ።
5 ዬካፓ ዓኣሮኔም ቄኤሶ ማኣዓሢ ማይሴ፤ ዒዚ ፔኤኮ ሹራቦ፡ ዔፑዶ፡ ዔፑዶይዳ ቃሲ ማኣዒንታ ቃሚሽ፡ ዳዶ ቡራሽንታ ከርና ቱኮ ባኮ ቢያ ማኣዖንጎ፤
6 ዒዛኮ ቶኣኮይዳ ማሮ ዓፒሎ ማሪ ናንጊና ናንጋ ጎዳም ዲማዲያ» ጌይንቲ ቆኦቂ ፃኣፒንቴ ፓልማሢ ፓልሚሴ፤ ዬይ ዖኦሲም ዒዚ ዲማዲያ ማዔሢ ዔርዛ ማላታ ማዓንዳኔ።
7 ቲሽኮ ዛይቶ ዔኪ ቶኣካ ዒዛኮ ሃሂ ቲሽኬ፤

8 «ዓቲንቆ ናኣቶዋ ዒዛኮ ዔኪ ሙኪ ሹራቦ ማይሴ፤
9 ከርና ዔያቶኮ ቱኮ ባኮ ቱኬ፤ ቶኣካ ዔያቶኮ ቆኦቦ ዓጌ፤ ዓኣሮኔና ዒዛኮ ናኣቶና ኔኤኒ ቄኤሴ ማሃንዳሢ ዬያይዲኬ፤ ዔያቶና ዔያቶኮ ዜርዖ ቢያ ቄኤሴ ማዒ ናንጊና ታኣም ማደንዳኔ።

10 «ዓፒሎና ማዠና ታኣኒ ካኣሽኪንታ ማኣሮ ካሮ ዋጋናሢ ኔኤኒ ዔኪ ሙካዛ ዓኣሮኔና ዒዛኮ ናኣቶና ኩጮ ዔያቶሲ ጌሚ ቶኣካ ጌሃንጎ።
11 ዬካፓ ዋጋናሢ ዓፒሎና ማዠንቴ ማኣሮ ካራ ታ ቤርቶይዳ ሹኬ።
12 ዋጋናሢኪ ሱጉዖ ከኤላና ዔኪ ሚቺ ዒንጎ ባኮ ዒንጎ ቤዛይዳ ዓኣ ቃጵንሢ ቲሽኬ፤ ዓቴ ሱጉዖ ሚቺ ዒንጎ ባኮ ዒንጎ ቤዛኮ ዴማ ዋሃ።
13 ጎጶ ባኮ ካንቄ ሃኣቦና ማዖኮ ሻኣዠዳ ቤዛ፡ ላምዖ ጳላሢና ዬያቶ ካንቄ ሃኣቦ ዔኪ ታኣም ዒንገንታ ዒንገሢ ማሂ ሚቺ ዒንጎ ቤዛይዳ ሚቺ።
14 ዋጋናሢኪ ዓሽኮ፡ ዜዶ፡ ሩቁንቶንታ ቢያ ዔኪ ማኣሮኮ ካራፓ ሃኬ ከሲ ሚቺ፤ ዬይ ቄኤሶኮ ጎም ጌኤሻኒ ዒንገንታ ዒንገሢኬ።

15 «ለምን ዓይነት ማራቶንሂዲፓ ፔቲሂ ኔ ዔኪ ሙካዛ ዓኣሮነንታ
 ዒዛኮ ናኣቶንታ ፔኤኮ ኩጮ ዬያ ማራዓሂ ቶኦካ ገሆንጎ።
 16 ማራዓሂያ ሹኪጋፓ ሱጉያ ሚቺ ዒንጎ ባኮ ዒንጎ ቤዘኮ ያይዶ
 ዛሎ ፑጮ፤ 17 ዓሽኮ ማኤሎና ማኤሎና ቲቄ፤ ጎጶ ባኮና ጊንያ
 ቶኮ ዋኣሂና ማሰኪጋፓ ቶኦኮንታ ማሌ ማኤሎ ዓሽኮናኮ 0-ፃ ገሂ፤
 18 ዬካፓ ዓይ ማራዓሂኮ ዓሽኮ ጉቤ ሙኡዚ ዒንጊሂ ማሂ ሚቺ፤
 ዬያ ዒንጊያኮ ሳውማ ታኣም ኮሽካያ ማዓንዳኔ።

19 «ቄኤሶ ማሂያ ዋጎም ገሂንቲ ባጎ ማራዓ ዓዳሂ ኔኤኒ ዔኪ
 ሙካዛ፣ ዓኣሮነና ዒዛኮ ናኣቶና ኩጮ ማራዓሂኮ ቶኦካ ገሆንጎ
 ገዒ ኬኤዜ፤ 20 ማራዓሂያ ሹኪጋፓ ሱጉያፓ ዳካ ዔኪ ዓኣሮነና
 ዒዛኮ ናኣቶናኮ ሚዛቆ ዋዮኮ ቤርቶ፣ ሚዛቆ ኩጮና ሚዛቆ ቶኮናኮ
 ዶኦም ኬኤሎ ቲሽኬ፤ ዓቲ ሱጉያ ሚቺ ዒንጎ ባኮ ዒንጎ ቤዘኮ ያይዶ
 ዛሎ ጎኦባ ፑጮ። 21 ሚቺ ዒንጎ ባኮ ዒንጎ ቤዘይዳ ዓኣ ሱጉያይዳፓ
 ዳካ፣ ቲዦ ዛይቶይዳፓ ዳካ ዔኪ ዓኣሮነና ዒዛኮ ማኣዓሂናይዳ፤
 ጊንሂ ዓኣሮነኮ ናኣቶና ዔያቶኮ ማኣዓሂና 0-ፃ ፑጮ፤ ዬያይዲ
 ዒዛንታ ዒዛኮ ናኣቶንታ ዔያቶኮ ማኣዓሂያኣ ታኣም ዲማዴያ
 ማዓንዳኔ።

22 «ዓይ ማራዓሂኮ ማሎ፣ ካሾ፣ ጎጶ ባኮ ካንቄ ሃኣቦ፣ ማዮኮ
 ሻኣዦዳ ቤዘ፣ ለምን ጳላሂ፤ ጊንሂ ዔያቶ ካንቄ ሃኣቦንታ ሚዛቆ
 ዛሎና ዓኣ ጊንያ ቶኮ ዓሽኮ ቢያ ሙሬ። 23 ሌኤማቶይዳ ታኣም
 ሽኢሾና ዲማ ዲማ ላኣዶይዳፓ ፔቲ ሙሊሂ ዔኬ፤ ኔ ዔካንዳሂያ
 ዛይቶ ቲዦ ዋሂ ካሃናሂዲፓ ፔቲ፣ ዛይቶ ቲዦ ዋሂንቲባኣሂዲፓ
 ፔቲ፤ ዬያጉዲ ሻኣዦ ላኣዶይዳፓ ፔቲ ቃሲ ዔኬ። 24 ዬያ ሙዮ
 ቢያ ዓኣሮነና ናኣቶና ኩጮይዳ ዓይሂ፤ ዬያ ሌካ ሌካ ዠገገ ጨራሽ
 ዒንጊንታ ዲማ ዒንጊሂ ማሂ ታኣም ዔያታ ዒንጎንጎ። 25 ዔያቶይዳፓ
 ዔኪ ታኣም ሙኡዚ ዒንጊሂ ማሂ ዒንጋኒ ሚቺንቲ ዒንጊንታ
 ዒንጊያኮ ቤርቶይዳ ገሂ ሚቺ ዒንጎ ቤዘ ሚቺ፤ ዬያ ዒንጊያኮ
 ሳውማ ታና ዋዛሳያ ማዓንዳኔ።

26 «ዓኣሮነኮ ቄኤሱም ዋጎም ሹኪንቲ ዓይ ማራዓሂኮ ዚኢሮ
 ዔኪ ታኣም ሌካ ሌካ ዠገገ ጨራሽ ዒንጊንታ ዒንጊሂ ማሂ ዒንጌ፤
 ዬይ ዒንሂ ዛላ ማዓያ ማዓንዳኔ።

27 «ፔቲ ቄኤሴ ቄኤሱም ማዳ ገላኣና ቄኤሱም ዋጎም ሹኪንታ
 ዓይ ማራዓሂኮ ዚኢሮና ሚዛቆ ዛሎና ዓኣ ጊንያ ቶኮ ታኣም ሌካ
 ሌካ ዠገገ ጨራሽ ዒንጊንታ ዒንጊሂ ማዒ ዒንጊንቶንጎ፤ ዬይ ጊንሂ
 ቄኤሶ ዛላ ማዓያ ማዓንዳኔ። 28 ታኣኮ ዴራ ዳቂንቶም ማዓ ፔቲሞና

ዲንጎ ባኮ ዲንጎ ዋዶና ቆልሞኮ ዚኢሮና ሚዛቆ ዛሎና ዓኣ ገንጾ ቶካ ቄኤሶ ዛላ ማዓንዳጉዲ ታ ጌዔኔ፤ ሃይ ታ ጌዔ ባካ ለአሚንታዓኬ፤ ዬይ፥ ዲንጎ ባካ ዴራ ታና፥ ናንጊና ናንጎ ጎዳም ዲንጎጎ ማዓንዳኔ።

29 «ዓኣሮኔ ሃይቃዛ ዒዛኮ ማኣዓሢ ዒዛ ናኣቶም ማዖንጎ፤ ዔያታ ቲሽቲ ቄኤሶ ማዔ ዋዶና ዬያ ማኣዖንጎ። 30 ቄኤሶ ማዒያ ዳካላዖ ጌኤዡ ቤዘይዳ ታኣም ማዳኒ ቄኤሴ ማዒ ዓፒሎና ማዡጎጎ፤ ታኣኮ ጌኤዡ ማኣሮ ጌላ ዓኣሮኔ ናዓሢ ዬንሢ ማኣዖንሢ ላንካይ ኬሊ ማይንቶንጎ።

31 «ዓኣሮኔና ናኣቶና ቄኤሶ ማዓ ዋዶና ሹኪንታ ዓዶ ማራዓሢ ዓሽኮ ዔኪ ጌኤዡ ቤዘይዳ ካሢ። 32 ዬያ ዓሽኮ ለኤማቴይዳ ዔኪ ዓቴ ለኣዶና ዋላ ዓፒሎና ማዡጎጎ፤ ታኣኒ ዲንሢና ካኣማ ማኣሮ ካራ ዔያታ ሙዖንጎ። 33 ቄኤሶ ዔያታ ማዓኣና ጎሞ ጌኤሺዖም ዲንጎጎጎጎ፤ ሙዖንጎ፤ ዬይ ሙዓ ታኣም ዲማዴያ ማዔሢሮ ቄኤሳ ሌሊ ሙዖንጎ። 34 ዓሽካፓ ማዔቶዋ ለኣዳፓ ሙይንቱዋዖ ዓቴ ዋርቄይ ዓኣቶ ታሚና ሚቹንቶንጎ፤ ታኣም ዲማዴያ ማዔሢሮ ሙይንታኒ ኮይሱዋሴ።

35 «ዓኣሮኔና ናኣቶና ቄኤሱሞ ዔካ ዋጎ ታኣኒ ዓይሢማ ጎይዖ ላንካይ ኬሊዳ ማዲ ኩንሢ። 36 ጎሜ ጌኤሺሢም ፔቴ ፔቴ ኬሎና ፔቴ ዋፓና ዲንጎ ባኣዚ ማሂ ሺኢሺ፤ ዬይ፥ ዬያ ዲንጎ ቤዘ ታኣም ዲማሳያኬ፤ ታኣም ዲማዴያ ማዓንዳጉዲ ሪሚቶ ዛይቶ ቲዡና ቲሽኬ። 37 ዬያ ላንካይ ኬሊዳ ቢያ ማዴ፤ ዬያይዲዖና ዲንጎ ቤዘ ታኣም ዲማዴያ ማዓንዳኔ፤ ዓሲ ማዔቴያ ማሌ ባኣዚ ዬያ ቤዘ ካኣማቴ ታኣም ዲማዴያ ማዓንዳኔ።»

ቢያ ኬሊ ዲንጎ ዲንጎሢ
(ፓይ. ማፃ 28:1-8)

38 «ቢያ ኬሊ ፔቴ ሌዔ ማዔ ላምዖ ዓዴ ማራናይ ዲንጎ ባኣዚ ማሂ ዲንጎ ቤዘ ሚቹ ዲንጎ፤ 39 ማራናኣቶይዳፓ ፔቴማ ጉቴ፥ ባጎማ ዒባናኣና ሹኪ ዲንጎ። 40 ቤርታኣ ማራናዖና ዋላ ፔቴ ለኣዳ ኬሰካንዳ ቃራ ዘርጌ ዲኢሊ ፔቴ ዶሎዜ ማዓ ሪሚቶ ዛይቶ ቲዡና ዲርኪ ዲንጎ፤ ሃሢ ፔቴ ዶሎዜ ዋይኖ ዓኣፖ ዑዡ ዲንጎ ባኣዚ ማሂያኣ ሺኢሺ። 41 ላምዓሳ ማራናዓሢ ሳዓ ዒባናኣና ሹኪ ዲንጎ ባኣዚ ማሂ ሺኢሺ፤ ጉቴሎ ኔ ዲንጎ ጎይዖ ዲኢላ፥ ዛይቶ ቲዡ፥ ዑዡዋ ዲንጎ፤ ዬይ ታና፥ ናንጊና ናንጎ ጎዳም ዲንጎጎ ታ ሙኡዚ ዲንጎሢኬ፤ ሳሙኣ ታና ዋዛሳያ ማዓንዳኔ። 42 ቢያ ዋይ ሃይ ሚቹ ዲንጎጎ ታ ዲንጎጎ ታኣኒ ዲንሢና ካኣማ፥ ዓፒላፓ ማዡጎጎጎ፤ ማኣሮ ካራ ዲንጎጎ ታኣኒ ዮይሳኔ፤ ታኣኒ ታኣኮ ዴርና ካኣማንዳሢና ኔኤናኣ ታ ጌሰታንዳሢ ዲኢካኬ። 43 ዬያይዲ ታ ዴር፥ ዲሰራዔኤሌና ታኣኒ

ካአማንዳኔ፤ ታኣኮ ቦንቻኣ ዬያ ቤዞ ታኣሞ ዲማዲያ ማሃንዳኔ።
 44 ታኣኒ ዒንጎ ባኮ ዒንጎ ቤዞንታ ዓፒሎና ማኪንቴ ማኣሮ ታኣሞ
 ዲማሳንዳኔ፤ ታኣሞ ዔያታ ቄኤሴ ማዒ ማዳንዳጉዲ ዓኣሮኔንታ
 ዒዛኮ ናኣቶንታ ታኣኒ ዲማሳንዳኔ። 45 ታኣኮ ዴሮ፣ ዒሰራዔኤሌ
 ባኣካ ታኣኒ ናንጋንዳኔ፤ ታ ዔያቶኮ ጸኣዛሢ ማዓንዳኔ፤ 46 ታ ዔያቶኮ
 ባኣካ ናንጋኒ ጊብፄ ዓጮይዳፓ ታ ዔያቶ ዔከ ከሴ፣ ናንጊና ናንጋ
 ጎዳ ማዔ ዔያቶኮ ጸኣዛሢታሢ ዔያታ ዔራንዳኔ፤ ጎኔና ታ ዔያቶኮ
 ጸኣሲ፣ ናንጊና ናንጋ ጎዳኬ» ጌዔኔ።

30

ዑንጅ ጨቢሶ ቤዞ
 (ኬሲ. ማፃ 37:25-28)

1 ናንጊና ናንጋ ጎዳ ሃሣ ከኤዛዎ፡- «ጨቢሶንዶ ዑንጅም ማዓንዳ
 ቤሲ ሻሪ ሚሢዳፓ ኮሼ፤ 2 ዎዶሱማ ፔቴ ዋዳ፣ ዓጮ ዳልጉማ ፔቴ
 ዋዳ፣ ለካ ዴጉማ ጊንሣ ላምዎ ዋዳ ማዒ ጊኢጊንቴ ያይዶ ዛላ ዋላ
 ካአማያ ማዎንጎ። ያይዶ ዛሎና ካአማ ካሮይዳ ዓኣ ዳንኮንሢ ቢያ
 ዒዛና ዋላ ፔቴ ማዒ ኮሺንቴያ ማዎንጎ፤ 3 ዒንጎ ቤዞኮ ቤርቶ፣
 ያይዶ ዛሎንታ ዳንኮንሢ ቢያ ጌኤሺ ዋርቄና ጳርቄ ዓጮዋ ዋርቄና
 ማሢ ኮሼ። 4 ላምዎ ዋርቄ ከኢኢ ኮሺ ዒንጎ ቤዞሎ ከዶንዶ
 ዛጳሢ ሚፃ ጌላንዳ፣ ዋርቆና ኮሺንቴ ዳኣሮ ዴማ ዓይሣ። 5 ዛጳ
 ሚዎዋ ሻሪ ሚሢዳፓ ኮሺ ዋርቄና ጳርቄ። 6 ዬና ዒንጎ ቤዞ ጎኦቦ
 ዓፒሎና ጫኣቁም ታኣቦቶናኮ ቤርቶ ዛላ፤ ሃሣ ታኣኒ ኔኤና ዋላ
 ካአማ ታኣቦቶ ዑፃ ዓኣ ጎሞ ጌኤሺያ ዔርዛ ጉኡፖኮ ቤርቶ ዛላ
 ጌሣ፤ 7 ዓኣሮኔ፣ ጉቶ ጉቶ ፖፖ ጊኢጊሻኒ ሙካኣና ቃራ ሳውቃ ዑንጅ
 ዒንጎ ቤዞይዳ ጨቢሶንጎ። 8 ሃሣ ዋንቶ ዋንቶዎ ፖዎ ፖዒሳኣና
 ዬያጉዲ ማዳንጎ፤ ሃይ ዑንጅ ዒንጎ ዒንጊፃ ሙካ ሾይንቶ ቢያና
 ጋፑዋዎ ማዳንታያ ማዓኒ ኮይሳኔ። 9 ዬና ዒንጎ ባኮ ዒንጎ ቤዞይዳ
 ላኣጊንቴ ዑንጅ፣ ቆልሞ ሹኪ ዒንጎ ዒንጊሢ፤ ሃሣ ሃኣኮይዳፓ ዒንጎ
 ባኣዚ ዒንጊፖ፤ ዎይኖ ዑኩዋ ዒኣካ ዋሃፖ። 10 ዓኣሮኔ ለዓ ለዓ
 ፔቴና ጎሞ ጌኤሺያም ሹኪንቴ ቆልሞ ሱጉፃፓ ዔከ ያይዶ ዳንኮንሢ
 ዑይዳ ጌሢ ዒንጎ ቤዞሎ ጌኤሾ ዋጎ ከጎሣንጎ፤ ዬይ ዎጋ ሙካ
 ሾይንቶ ቢያና ለዓ ለዓ ማዳንቶንጎ፤ ዬያይዲ ሃይ ዒንጎ ቤዞ ናንጊና
 ናንጋ ጎዳሢም ፔቶ ዲማዲያ ማዎንጎ» ጌዔኔ።

ጸኣሲ ካኣሽኪንታ ማኣሮም ዒንጊንታ ዒንጊፃ

11 ናንጊና ናንጋ ጎዳ ሙሴም፡- 12 «ዒሰራዔኤሌ ዴሮ ኔ ፓይዳ
 ዎዶና ዲማ ዲማ ዶርዓ ዔያቶ ዓርቁዋጉዲ ዴራ ፔኤኮ ሽምፖ

ዛሎም ማዓ ባኣዚ ጨሰንጎ። 13 ዳር ባኣካ ፓይዲንታ ፔቴ ፔቴ ዓሳ ዓፒሎና ማዢንቴ፣ ታኣኮ ማኣርይዳ ዒንጎም ዔርቴ ጎይፆ ላሆ ገራኣሜ ማዓ ሹቺ ቢራ ታና፣ ናንጊና ናንጋ ጎዳሚም ዔኪ ሸኢሾንጎ፤ 14 ዳር ፓይዲዳ ጌላኒ ዳንዳዓሚ፣ ጌይፆ፡- ለዓ ላማታሚ ኩሜሢና ዩያፓ ዑሣ ማዔሢ ቢያ ዩኖ ዒንጊፆ ዒንጎንጎ፤ 15 ዔያታ ፔኤኮ ሸምፓሢ ዛሎ ዩኖ ዒንጎ ባኮ ዒንጋ ዎደና ፆርጎጫሢ ታቴያ ማንቃሢ ሄኮ ጨጋንዳኣፓ ዓቴም ፆርጎጫሢኮ ጨጋ ሚርጌ፣ ማንቃሢሲ ዳካ ማፆፖ። 16 ዩያ ዒንጊፆ ዒሰራዔኤሌ ዳርይዳፓ ቡኩሲ ዔኪ ዓፒሎና ማዢንቴ፣ ታኣኮ ማኣር ማዶም ፔኤሾ፤ ዩይ ዒንጊፆ ዔያቶኮ ሸምፓሢ ዛሎ ማዓንዳኔ፤ ታኣኒያ ዔያቶ ጳቂሢ ካፓንዳኔ» ጌዔኔ።

ዎኣሢ ማሰቶ ሳኣኔ

17 ናንጊና ናንጋ ጎዳ ሃሣ ሙሴም፡- 18 «ዎኣሢ ማሰቶ ሳኣኔ ሞኦኖ ዓንጎና ኮሺ፣ ቶኪ ዓኣ ሞኦኖ ዓንጎና ማዢንቴ ሳኣኖ ጌሃ ቤዘይዳ ጌሢ፤ ዩኖ ናንጊና ናንጋ ጎዳም ዒንጎ ባኮ ዒንጎ ቤዘና ዓፒሎና ማዢንቴ ማኣርናኮ ሳዛ ጌሢ ዎኣሢ ዎሃ። 19 ዓኣርይንታ ዒዛኮ ናኣቶንታ ዩያ ዎኣፆና ፔኤኮ ኩጮና ቶኮና ማሰቶንጎ። 20 ዩያ ዔያታ ማዳኒ ኮይሳሢ ዓፒሎና ማዢንቴ ማኣር ጌላንዳሢና ሙፆ ዒንጊፆ ዒንጎ ቤዘ ሸኢካንዳሢኮ ቤርታኬ፤ ያዲ ዔያታ ማዶቶ ሃይቢዳፓ ቶላንዳኔ፤ 21 ዩያር ዔያታ ሃይቁዎጉዲ ዔያቶኮ ቶኮና ኩጮና ዔያታ ማሰቶንጎ፤ ዩይ፡- ዔያቶና ዔያቶኮ ጊንፃፓ ኬሰካንዳ ዜርፃ ናንጊና ካፓንዳ ዎንኬ» ጌዔኔ።

ዛይቶ ቲዦ

22 ናንጊና ናንጋ ጎዳ ሙሴም፡- 23 «ቃራ ሳውቃ ዳኤሻ፣ ላሆ ደሎዜ ማዓንዳ ኬርቤ፣ ፔቴ ኮኦማ ማዓንዳ ቄሬፓ ጌይንታ ሚፆ ቁኤር፣ ፔቴ ኮኦማ ማዓንዳ ቃራ ሳውቃ ማኣቴ፣ 24 ላሆ ሙላሢ ቤርጉዳ ጎፆ ዑንጅ ዔኬ፤ ዩይ ቢያሢ ዓፒሎና ማዢንቴ፣ ታኣኮ ማኣርይዳ ዒንጊንቲ ዔርታሢጉዳያ ማፆንጎ፤ ዩያይዳ ፆይደ ደሎዜ ዛይቴ ዎሃጋፓ፣ 25 ሳውቃ ቲሺጉዲ ዲማዳ ዛይቴ ቲሺ ኮሺ፤ ዩይ ዲማዳ ዛይቴ ቲሺ ማዓንዳኔ። 26 ዓፒሎና ማዢንቴ፣ ታኣኒ ዒንሢና ካኣማ ማኣር፣ ጫኣቁዎ ታኣቦቶ፣ 27 ዳጌ ሎኦኩንታ ዩያ ዑፃ ዓኣ ባኮ ቢያ፣ ፖፆ ጌሃ ሻርኖንታ ዩያይዳ ጊኣጊሾ ባኮ፣ ዑንጅ ጨቢሳኒ ጊኣጊሾ ቤዘ፣ 28 ሚቺ ዒንጊንታ ባኮ ዒንጎ ቤዘንታ ዒኣካ ዓኣ ባኮ ቢያ፤ ዩያጉዲ ዎኣፆ ማሰቶ ሳኣኖንታ ጌሃ ቤዘዎ ዩያና ቲሺኬ።

30:13 30:13 ኬሲ. ማፃ 38:25-26፤ ማቲ. 17:24። 30:18 30:18 ኬሲ. ማፃ 38:8።

29 ዬያይዲ ሃንሢ ቢያ ኔ ዲማሲሢና ፔቶ ዲማዴያ ማሃንዳኔ፤ ዔያቶ ካአማ ዓሲ ማዔቲያ ማሌ ባአዚ ቢያ ታአም ዲማዴያ ማዓንዳኔ።
 30 ዓአሮኔና ናአቶና ቁኤሴ ማዒ ታአም ማዳንዳጉዲ ዔያቶ ቲሽኪ ቁኤሴ ማሃ፤ 31 ዒሰራዔኤሌ ዴሮማአ ሃዚ ጌዒ ከኤዜ <ሃይ ታአም ዲማዴ ቲዠ ዛይታ ሙካ ሾይንቶና ቢያ ታ ማዶም ማዓያ ማፖንጎ፤ 32 ጉሪ ዓይጎ ዓሲ ዑሢዳአ ማፖም ቲሽኪንቶ፤ ዬያ ማላያ ማሌ ቲሽ ኮሽፖቲ፤ ዬይ ዲማዴያ ማዔሢሮ ዒንሢና ኮሽ ዔራቀቲ። 33 ዬያ ማላ ቲሽ ኮሻሢ፤ ሃሃ ዬያ ቲዠይዳፓ ዔኪ ቁኤሴ ማዒባአ ዓሲ ቲሽካሢ ታአኮ ዴሮይዳፓ ፔቲሢ ማዒ ፓይዲንታዓኬ» ጌዔኔ።

ዑንጅ ጊአጊሾ ጎይፖ

34 ናንጊና ናንጋ ጎዳ ሙሴም፡- «ፔቲ ፔቲሢኮ ዴኤሡማ ሄኮ ማዔያ ኮዠ ሳውቃ ዴኤሾ፤ ዬይያ፡- ፆዳያ ማዔ ማአሢ፡ ኪቤይዳፓ ዔውታ ሳውቃ ቲሽ፡ ሳውቃ ማአሢንታ ቃራ ሳውም ዓአ ዑንጅዎ ዔኪ፡ 35 ሳውቃ ዴኤሾ ኮሻ ዓሳ ኮሻሢጉዲ ቃራ ሳውም ዓአ ዑንጅ ጊአጊሾ። ጌኤሽ ሃሃ ዲማዴያ ማዓንዳጉዲ ሶኦጌ ጊዳ ዋሃ። 36 ዬያይዳፓ ዳካ ዔኪ ዑዲ ሽኢቹሰካፓ ታአኒ ኔኤና ካአማ፡ ዓፒሎና ማዠገንቲ ማአሮ ዔኪ ዓአዲ ጫአቁም ታአሶቶኮ ቤርታ ጌሢ፤ ዬይ ዑንጅ ኮሽ ዑሣ ዓአዴ ጌኤሽ ዲማዴያ ማዓንዳኔ። 37 ዬያይዲ ዒንሢም ማዓ ማሌ ዑንጅ ኮሽሢዳፓ ዒንሢና ካፑዋቲ፤ ታአም ዲማዴያ ማዔሢሮ ዒንሢ ዬያ ዔራቀቲ። 38 ዬያጉዴ ባአዚ ማዲ ሳውሞና ዋዛዲጊ ማላ ዓሲ ዓአቲ ታአኮ ዴሮይዳፓ ፔቲሢ ማዒ ፓይዲንታዓኬ» ጌዔኔ።

31

ባሰለዔኤሌና ዔኤሊያቤና (ኬሲ ማፃ 35:30—36:1)

1 ናንጊና ናንጋ ጎዳ ሙሴም፡- 2 «ሃይሾ ታአኒ ዪሁዳ ማአራፓ ሁኡሬ ጎፖሢኮ ናአዚ ናፖ ማዔሢ፡ ዑኡሬ ናአዚ፡ ባሰለዔኤሌ ደኦሬኔ፤ 3 ዓይጎ ባአዚያ ማፖም ኩቺ ማዶ ሃአማቶ ዔራንዳጉዲ ጸቂሥሢና ጨንጨምና፤ ሃሃ ዔራ ማዓንዳጉዲ ታአኮ ዓያኖንታ ዋልቁያ ታ ዒዛም ዒንጌኔ፤ 4 ዬያሮ ጨንጨምና ማዶንዶ ጎይሢ ማሊ ከሲ ዋርቁይዳፓ፡ ቢራና ሞኦኖ ዓንጎናይዳፓ ዲማ ዲማ ባአዚ ዒ ኮሻንዳኔ። 5 ዬያጉዲ ፓልሞም ማዓ ሚዛጶ ሹጮ ቆኦቂ

30:38 30:38 ኬሲ ማፃ 37:29።

ኮሻኒ፡ ሚሢያ ዓርሳኒ፡ ማሌ ማዶ ቢያ ዔራቶና ማዳኒ ዒ ዳንዳዓኔ።
 6 ዒ ዛና ዋላ ሃሣ ማዳንዳጉዲ ዳኣኔ ማኣሮይዳፓ ዓይሳማኬ ናኣዚ
 ዔኤሊያቤ ታ ዶኤሬኔ፤ ታ ኔና ዓይሢ ባኮ ቢያ ዔያታ ማዳንዳጉዲ
 ኩቺ ሃኣማቶ ዓኣ ማሌ ዓሰማኣ ቢያ ዳኤፕ ዔራቶ ታኣኒ ዒንገኔ።
 7 ማዳንታንዳጉዲ ታ ዓይሢ ባካ ያዲኬ፡- ታኣኒ ዒንሢና ካኣማ
 ዓፕሎና ማኸንታ ማኣሮ፡ ጫኣቁሞ ታኣቦቶንታ ዎዶ ካሮንታ፡
 ዓፕሎና ማኸንታ ማኣሮ ጋራ ማዶ ባኮ ቢያ፡ 8 ዴጌ ዳልጎ ሎኦኩንታ
 ዬያም ኮይሳ ባኮ፡ ጌኤኩ ዎርቃፓ ኮሺንታ ፖፖ ጌሃ ሻርኖና ዬያም
 ኮይሳ ባኮ ቢያ፡ ዑንጅ ዒንጊፃ ዒንጊንታ ቤዞ፡ 9 ሚቺ ዒንጎ
 ዒንጊያም ማዓ ቤዞና ዬያም ኮይሳ ባኮ ቢያ፡ ዎኣፃ ማሰቶ ሳኣኖንታ
 ጌሃ ቤዞንታ፡ 10 ዓኣሮኔና ዒዛኮ ናኣቶና ቁኤሴ ማዒ ማዳኣና ዔያታ
 ማኣዓንዳ ሚዛጶ ዲማዴ ማኣዓሢ፡ 11 ቲኩ ዛይቶና ታኣም ዲማዴ
 ቤዞም ማዓ ኮኩ ሳውማ ዓኣ ዑንጅ፡ ዬያ ቢያ ባኮ ዔያታ ማዳንዳሢ
 ታ ኔና ዓይሢ ጎይያማኬ» ጌዔኔ።

ሃውሽሞ ዶኤሬንቲ ኬሎ

12 ናንጊና ናንጋ ጎዳ ሙሴ ዓይሣ፡- 13 «ዒሰራዔኤሌ ናኣቶም
 ሂዚ ጌዒ ኬኤዞ፡- ሃውሽ ኬሊ ማሂ ታ ዶኤሬ ቦንቾ ኬሎ ካፑዎቲ፤
 ዓይጎሮ ጌዔቶ ዬይ ታኣኒ፡ ናንጊና ናንጋ ጎዳ ታኣም ዲማዴ ዴሬ
 ማሂ ዒንሢ ዶኤሬያ ማዒያ ዔርዛያ ማዒ ሙካ ሾይንቶ ቢያይዳ
 ታኣና ዒንሢናኮ ባኣካ ዶዲ ናንጋንዳ ማላታ ማዔሢሮኬ። 14 ታኣም
 ዲማዴያ ማዔሢሮ ሃውሽ ኬሎ ቦንቾ ኬሊ ማሂ ቦንቾዎቲ፤ ዬያ
 ቦንቾ ኬሎ ካፑዎፖ ማዶ ኬሊ ማሃ ዓሲ ቢያ ዎዎዲንቶንጎ።
 15 ዒንሢ ዒንሢኮ ማዶ ማዳንዳ ላሆ ኬሊ ዒንሢም ዓኣኔ፤ ላንካሳ
 ኬላ ጋዓንቲ ታኣም ዲማዴ ሃውሺሢ ኬሊኬ፤ ዬኖ ኬሎና ማዶ
 ማዳሢ ቢያ ዎዎዲንቶንጎ። 16 ዒሰራዔኤሌ ዴራ ዬኖ ኬሎ ዶዲ
 ናንጋ ጫኣቁሞ ማላታ ማሂ ካፖንጎ፤ 17 ዬይ ታኣና ዒሰራዔኤሌ
 ዴሮኖኮ ባኣካ ናንጊና ዶዲ ናንጋ ማላታ ማፖንጎ፤ ዓይጎሮ ጌዔቶ
 ታኣኒ ናንጊና ናንጋ ጎዳ ጫሪንጮና ሳፖና ላሆ ኬሊዳ ማኸ
 ኩርሴሰካፓ ላንካሳ ኬሎ ማዶ ታኣኒ ሃሺ ኬሎታሢሮኬ» ጌዔኔ።

18 ናንጊና ናንጋ ጎዳ ሙሴና ሲና ዲኮይዳ ጌሰቴሰካፓ ያኣሲ
 ፔኤሮ ፔ ዓይሢፃ ፃኣፔ ላምፖ ዓርሲንቲ፡ ማርኮ ማዓ ሹጮንሢ
 ሙሴም ዒንገኔ።

31:15 31:15 ኬሲ. ማፃ 20:8-11፤ 23:12፤ 34:21፤ 35:2፤ ሉዊ. ዓኬ 23:3፤ ላሚ.
 ዎማ 5:12-14። 31:17 31:17 ኬሲ. ማፃ 20:11።

32

ዎርቆና ጾኦዞ ማሂ ማዠና ናኣሪ
(ለሚ. ዎማ 9:6-29)

1 ሙሴ ዲኮይዳፓ ከዲዎ ዲኣካ ሚርጌ ኔጌሂ ዴራ ዛጊ ፔቱሞና ዓኣሮኔ ኮራ ቡከንታዎ፡- «ጊብፄ ዓጮይዳፓ ኦና ዔከ ከሴ፣ ሙሴ ጎዎሂ ዎዎይቲቲያ ኦ ዔራዎሴ፤ ዩያሮ ኦኡኮ ቤርታ ቤርታ ዓኣዲ ኦና ዔከ ዓኣዲንዳ ጾኦዞ ኦኡሞ ኮሼ» ጌዔኔ።

2 ዓኣሮኔያ፡- «ዲንሂኮ ላኣሎንታ ዓቲንቆንታ ዉዲሮ ናኣታኣ ፓልማ ዎኖ ዎርቆ ቢያ ቡኩሲ ታኣሞ ዔከ ዩዑዎቲ» ጌዔኔ።

3 ዩያሮ ዴራ ቢያ ዔያቶኮ ዓኣ ዎርቆ ዴንዳ ቢያ ከሲ ዓኣሮኔሞ ዔከ ሙከኔ። 4 ዲዚ ዩያ ዎርቆ ዴንዳሂ ቢያ ዔከ ታሚዳ ዓጌኔ፤ ዩይ ዎርቃ ዓልቃዛ፣ ዎርቆ ዔከ ዔኤቢኮ ጋርካ ዎሄሰካፓ ናኣሪ ማሂ ማዠኛ ከሴኔ።

ዴራ፡- «ዲሰራዔኤሌ ዓሲዮቲ! ጊብፄ ዓጮይዳፓ ኦና ዔከ ከሴ፣ ኦ ጾኦዞሂ ሃያከ!» ጌዔኔ።

5 ዓኣሮኔ ዩያ ዛጋዎ ዎርቆና ማዠኛ ናኣራሂኮ ቤርታ ዩያ ጾኦዞ ሚንጎ ቤሲ ኮሼ፡- «ዚሮ ናንጊና ናንጋ ጎዳ ቦንቾ ከሊ ማዓንዳኔ» ጌዒ ዴሮሞ ከኤዘኔ። 6 ዚሮ ጉቲሎ ጉቲ ዓሚ ቆልሞ ዔከ ሙከ ሚቲ ዲንጎ ዲንጊጾንታ ዳቂንታሞ ማዓ ፔቱሞና ሹከ ዲንጎ ዲንጊጾዎ ሸኢሹኔ፤ ዲማና ዴራ ዴዒ ሙዒ ዑሽከሰካፓ ኮርጋኒ ዔቁኔ።

7 ዩያሮ ናንጊና ናንጋ ጎዳ ሙሴሞ፡- «ጊብፄ ዓጮይዳፓ ኔኤኒ ዔከ ከሴ ኔኤኮ ዴራ ፔና ዲኣሲ፣ ታናኣ ሃሼሂሮ ዑኩና ዔያቶ ባንሂ ከዴ፤ 8 ዴራ ታ ዔያቶ ዓኣዲንዳጉዲ ዓይሂ ጎይይዳፓ ኔጉዎዎ ዳቢንቲኔ፤ ዎርቆ ሸኤሽ ማዠና ናኣሪ ማላታ ካኣሽኮ ጾኦዞ ማሂ ኮሽ ዔያታ ካኣሽከኔ፤ ሚቲ ዲንጎ ባኣዚያ ዩያሞ ዲንጊ ጊብፄ ዓጮይዳፓ ኦና ከሴ፣ ኦኡኮ ጾኦዞ ሃያከ» ዔያታ ጌዔኔ። 9 ዴራ ዎዚጉዴ ዎይዚ ዲያያታቶ ታ ዔያቶ ዔሬኔ፤ 10 ሃሂ ሃይሾ ታ ዔያቶ ዑፃ ሚርጌና ዳጋዲ ባይዚ ታ ዔያቶ ጊኣጌሂሮ ታኣኮ ዳጎ ማሂ ማሊፖ፤ ኔና ታኣኒ ጋዓንቲ ዳልጊ ዴሬ ማሃንዳኔ» ጌዔኔ።

11 ሙሴ ጋዓንቲ ፔ ጾኦዞ ማዔ ናንጊና ናንጋ ጎዳ ሸኢቃዎ፡- «ናንጊና ናንጋ ጎዳሂዮ! ኔኤኮ ዴኤፖ ቢታንቶና ዎልቆና ዓውሲ፣ ጊብፄ ዓጮይዳፓ ኔ ከሴ ኔኤኮ ዴሮይዳ ሃያይዲ ኔ ዓይጋ ዳጋዳይ?

12 ጊብፄ ዓሳ ሃያ ዓሳ ዔያቶኮ ጾኦሲ ጊብፄ ዓጮይዳፓ ዔከ ከሴሂ

32:1 32:1 ዳከ. ማዳ 7:40። 32:4 32:4 1ካኣቶ. ማ 12:28፤ ዳከ. ማዳ 7:41።
32:6 32:6 1ቆሮ. 10:7። 32:11 32:11 ፓይ. ማጻ 14:13-19።

ዲኮይዳ ዔያቶ ዋዳኒና ፔቶ ባባይዛኒኬ። ጌዒ ኑና ሚኢጫንዳጉዲ ኔ ዓይጎር ማሌይ? ሃሢ ዳጎይዳፓ ዓቶም ጌይሢባንሢ ማዔ፤ ሃያ ቢያ ባይሲንቶ ኔኤኮ ዳሮ ዑፃ ሄሊሲፖ። 13 ኔኤኮ ዓይሎ ዓብራሃሜንታ ዪሳክቄንታ ያይቆኦሙኣ ማሌ፤ ዜርዖ ዔያቶኮ ጫሪንጫ ዉጫሢጉዲ ኔ ሚርጊሻኒና ኔ ዔያቶም ዒንጋኒ ጉሙርሴ ዓጩሎዋ ናንጊና ዔያቶ ዓጩ ማሂ ኔ ዔያቶም ዒንጋኒ ጫኦቄ ጫኦቄዋ ማሊ ጸቂሢ» ጌዔ። 14 ዩያሮ ናንጊና ናንጋ ጎዳ ዳጎይዳፓ ዓቶም ጌይሢባንሢ ማዒ፣ ዔያቶ ዑፃ ዓጋኒ ማሌ ፑርቶ ዲማ ዲማ ደርዓሢ ኬይሱዋዎ ሃሽ።

15 ዩካፓ ሙሴ ላምዎ ዛሎና ታጰ ዓይሢፃ ፃኣፒንቴ ላምዎ ዓርሲንቴ ሹጮንሢ ዔኪ ዲካፓ ኬዴ። 16 ዩንሢ ዓርሲፃ ሹጮንሢ ኮሽሢና ጊዳ ዓኣ ዓይሢፃ ቆኦቄ ፃኣፒሢ ያኣሲኬ።

17 ዴራ ዣላሢ ዒያሱ ዋይዛዎ ሙሴ ኮራ፡- «ጉርደይዳ ያልዚ ጌሉጉዲ ጋዓ።» ጌዔ።

18 ሙሴ ጋዓንቴ፡- «ሃይ ዋይዚንታሢ ኮሢ ዑኡሲ ማዓንዳኣፓዓቴም ያልዚና ባሽ ዓሲኮ ሄርሽንቴ ዑኡሲ፤ ሃሃ ባሽንቴ ዴሪኮ ዒላቴ ዑኡሲያቴዋሴ» ጌዔ።

19 ሙሴ ጉርደ ሙኪ ሄላዎ ያኦዞ ማሂ ኮሽና ናኣርማንታ ዴርኮዋ ኮዎ ዛጋዎ ዒናፓ ዳጋዲ ዒ ዔኪ ሙኬ ዓርሲንቴ ሹጮንሢ ዲኮ ዴማ ዠቢ ሚንሢ። 20 ሃሃ ዔያታ ያኦዞ ማሂ ኮሽ ናኣርማ ዔኪ ታሚዳ ዓጊ ዓልቁሲ ሊኢቃዳንዳያ ሄላንዳኣና ጊኢጩ ዋኣሢና ሞራራዎ ዒሲራዔኤሌ ዴሮ ዑሽ። 21 ዒማና ዒዚ ዓኣር፤ ኮራ፡- «ፔቶ ሃይ ዴራ ኔና ዋዎዴዎዴይ፤ ሃያጉዴ ፑርታ ጎሚይዳ ዔኪ ኔ ዔያቶ ጌልዜሢ?» ጌዔ።

22 ዓኣር፤ ማሃዎ፡- «ታ ጎዳሢዮ! ታ ዑፃ ዳጋዲፕ፤ ዴራ ፑርታ ባኣዚ ማዳኒ ዋያጉዴ ባቃና ዴንሢ ዓሲታቴያ ኔኔኒ ዔዔራ፤

23 ዔያታ ገብፃ ዓጩይዳፓ ኑና ዔኪ ኬሴ፣ ሙሴ ዋዎይቴቴያ ኑ ዔሩዋሴ፤ ዩያሮ ኑኡኮ ቤርታ ቤርታ ኑና ዔኪ ዓኣዳንዳ ያኦዞ ኑኡም ኮሽ» ጋዓዛ፣ 24 ታኣኒያ ዔያቶኮ ዋርቆ ፓልማሢ ኬሲ ዔኪ ሙካንዳጉዲ ዓይሢም፣ ዔያታ ፔኤኮ ፓልማሢ ቢያ ዔኪ ሙኬ፤ ዩያ ፓልማሢ ቡኩሲ ዔኪ ታሚዳ ታኣኒ ዓጋዛ፣ ሃይ ናኣር ማላሢ ማኸንቴ ኬሰኬ።»

25 ዓኣር፤ ዴሮ ዳኪ ሃሽሢና ዔያቶኮ ሞርካ ዔያቶ ሚኢጫንዳጉዲ ማሄሢያ ሙሴ ዛጌ። 26 ዩያሮ ሙሴ ጉርደ ጌሎ ካራ ዔቃዎ፡- «ናንጊና ናንጋ ጎዳ ዛላ ማዔዞንሢ ቢያ ሃኒ ታ ባንሢ ሙኩዋቴ!» ጌዒ ዑኡዞ ዴጊዲ ኬኤዛዛ፣ ሌዊ ዓሳ ቢያ

32:13 32:13 ማኸ. ማፃ 22:16-17፤ 17:18።

ዒዛ ኮራ ቡከኔ፤ 27 ዒዚ ዔያቶም፡- «ዒንሢ ፔቴ ፔቴሢ ዒንሢኮ ጩንቸ ዓፓር ዔኪ ካራፓ ካሮ ሄላንዳኣና ጉርዶ ሃንቲ ዒንሢኮ ጌርሲንሢ፤ ዒንሢኮ ዒጊኖንታ ዒንሢኮ ዓሺኖዎ ዎዳንዳጉዲ ዒሰራዔኤሌኮ ሆኦዛሢ ማዔ ናንጊና ናንጋ ጎዳ ዒንሢ ዓይሄኔ» ጌዔኔ። 28 ሌዊ ዓሳ ዬያ ጌይንቲሢ ዎይዚ ዬኖ ኬሎ ሃይሃ ሺያ ዓሲ ዎዳኔ። 29 ሙሴያ ሌዊ ዓሰም፡- «ሃኖ ዒንሢ፤ ዒንሢኮ ዓቲንቆ ናኣቶንታ ዒንሢኮ ጌርሲንሢያ ዎዲያና ናንጊና ናንጋ ጎዳም ማዳ ቄኤሴ ማዒ ዒንሢና ዒንሢ ዲማሴሢሮ ናንጊና ናንጋ ጎዳ ዒንሢም ዓንጅ ዒንጌኔ» ጌዔኔ።

30 ዚሮ ጉቴሎ ሙሴ ዳሮም፡- «ፑርታ ዴኤፒ ዳቢንቲ ዒንሢ ዳቤኔ፤ ያዲ ማዔቴያ ናንጊና ናንጋ ጎዳ ጴዳ ዳኮ ሃሃ ላሚ ታኣኒ ኬሰካንዳኔ፤ ጎዎንቲ ዒንሢኮ ጎሞ ዓቶም ጌይሳኒ ታ ዳንዳዓንዳኣናንዳኔ» ጌዔኔ። 31 ሙሴ ናንጊና ናንጋ ጎዳ ባንሢ ማዒ ዳንዲ፡- «ሃይ ዳራ ፑርታ ዳቢንቲ ዳቤኔ፤ ዎርቄና ኮሺንቲ ባኣዚ ሆኦዛ ማሂ ካኣሽከኔ፤ 32 ሃዳራ ዔያቶኮ ጎሞ ዓቶም ጌዔ፤ ኔ ዔያቶኮ ጎሞ ዓቶንጎ ጌይንዲዎያ ማዔቴ ኔኤኒ ፃኣፔ ማፃኣፓፓ ታ ሱንፆ ዑጩ ባይዜ» ጌዔኔ።

33 ናንጊና ናንጋ ጎዳ ዒዛም፡- «ሱንፆ ታኣኒ ባይዘንዳሢ ጎሜ ማዳ ዓሰና ታና ሆዬሴ ዓሰከ። 34 ሃሢ ዓኣዲጋፓ ታ ኔኤም ኬኤዛ ቤዛ ዳሮ ዔኪ ዓኣዳ፤ ታኣኮ ኪኢታንቻሢ ኔኤኮ ቤርታ ቤርታ ኔና ዔኪ ዓኣዳንዳሢ ዔሬ፤ ጋዓንቲ ዎዳ ሄላዛ ሃያ ዳሮይዳ ዔያታ ማዳ ጎሞሮ ማቶ ዓጊ ታኣኒ ዓታዓከ» ጌዔኔ።

35 ዎርቄና ማኸንቲ ናኣሮ ሆኦዛ ዔያቶም ኮሻንዳጉዲ ዓኣሮኔ ዔያታ ማታሴሢሮ ናንጊና ናንጋ ጎዳ ዳሮይዳ ፑርታ ዶርፆ ዳከኔ።

33

ዒሰራዔኤሌ ዳራ ሲና ዳካፓ ዓኣዳንዳጉዲ ሆኦሲኮ ዓይሢያ
 1 ናንጊና ናንጋ ጎዳ ሙሴም፡- «ኔኤና ጊብፃ ዓጫፓ ኔ ዔኪ ከሴ ዳራ ቢያ ሃኖ ቤዛፓ ዔቄ፤ ዓብራሃሜም፤ ዩሳኣቄም፤ ያይቆኦቤና ዔያቶኮ ዜርፆናም ቢያ ታ ዒንጋኒ ጫኣቄ ዓጮ ዓኣዲዎቲ።
 2 ዒንሢኮ ቤርታ ቤርታ ዒንሢ ዔኪ ዓኣዳንዳፆ ታኣኮ ኪኢታንቻሢ ታ ዳካንዳኔ፤ ካኣናኔ ዓሰ፤ ዓሞራ ዓሰ፤ ሄኤቲ ዓሰ፤ ፔርዜ ዓሰ፤ ሂዎቄና ዒያቡሳ ዓሰ ታ ዒንሢኮ ቤርታፓ ኬሲ ዳካንዳኔ። 3 ዒንሢ ዓኣዳ ቤዛ ዔኤሲና ዲኢቄና ኩሜ ማሊ ዓጩከ፤ ጋዓንቲ ዒንሢ

32:32 32:32 ዓይኡ. 69:28፤ የሃ. ሆፔዳ 3:5። 33:1 33:1 ማኸ. ማፃ 12:7፤ 26:3፤ 28:13።

ዋይዚ ዒፃ ዓሲ ማዕሣረ ታ ዒንሣ ጎይፃ ዋዲ ባይዙዋጉዲ ታ ዒንሣና ዓኣዳባኬ» ጌዔኔ።

4 ዳራ ቢያ ዬያ የዩሳ ሃይሶ ዋይዘያ ዒናፓ ዬኤኬኔ፤ ዒማፓ ዓርቃየ ዓይጎዋ ፓልሞ ባኣዚ ፓልማኒ ዔያታ ኮሲባኣሴ። 5 ናንገና ናንጋ ጎዳ ዳርሞ ሂዚ ጌዒ ከኤዛንዳጉዲ ሙሴ ዓይሣኔ፡- «ዒንሣ ዋይዚ ዒፃ ዓሲኬ፤ ፔቴናታየ ታ ዒንሣና ዋላ ዓኣዳቶ ጋፒሲ ታ ዒንሣ ባይዘንዳኔ፤ ሃሣ ዒንሣኮ ፓልሞ ባኮ ዒንሣ ዑፃፓ ጉሱዋቴ፤ ታ ዒንሣ ዋዋዳንዳታቴያ ሃጊ ታኣኒ ፔጋሳንዳኔ።» 6 ዬያሮ ዒሰራዔኤሌ ዳራ ሲና ዲኮ ሃሺ ዳንዳሰካፓ ፓልሞ ባኮ ቢያ ጉሴኔ።

ዓፒሎና ማዢንቴ ጾኦሲ ዳርና ካኣማ ማኣሮ

7 ዒሰራዔኤሌ ዳራ ዲንኪ ዳዒ ቤዛ ቢያይዳ፡ ሙሴ ዓፒሎና ማዢንቴ ማኣሮ ጉርዶይዳፓ ሃኪሲ ደቃኔ፤ ዬይ ማኣራ፡- «ናንገና ናንጋ ጎዳ ዳርና ካኣማ ማኣሮ» ጌይንቴኔ፤ ናንገና ናንጋ ጎዳሣና ጌሰታኒ ኮዔሣ ቢያ ዒኢካ ዓኣዳኔ። 8 ሙሴ ዒኢካ ዓኣዳ ዋዶና ቢያ ዳራ ፔኤኮ ማኣሮ ካራ ኬሰኪ ዔቁ ሙሴ ዬያ ዓፒሎና ማዢንቴ ማኣሮ ጌላንዳኣና ዒዛ ዛዛጋኔ። 9 ሙሴ ዒኢካ ጌሌሰካፓ ፒዝ ጌዒ ዔቃ ሻኣራ ኬዲ ዓፒሎና ማዢንቴ ማኣሮ ካራ ዔቃኔ፤ ናንገና ናንጋ ጎዳሣያ ሻኣሮ ባኣካ ማዒ ሙሴና ጌሰታኔ። 10 ፒዝ ጌዒ ዔቃ ሻኣራ ዓፒሎና ማዢንቴ ጌኤዢ ማኣሮ ካራ ጴዳዛ ዳራ ዳንቃየ ፔኤኮ ማኣሮ ካራ ጉምዓቲ ዘጊ ዘጊ ጾኦሲ ካኣሸካኔ። 11 ዓሲ ፔኤኮ ላጌና ዋላ ጌሰታጉዲ ናንገና ናንጋ ጎዳ ሙሴና ዋላ ዒማና ፔጌና ጌሰታኔ፤ ዬካፓ ሙሴ ጉርዶ ባንሣ ማዓኔ። ዒዛ ማኣዲ ማዳ ዳጌሣ፡ ኔዋ ናኣዚ፡ ዒያሱ ጋዓንቴ ዓፒሎና ማዢንቴ ጌኤዢ ማኣሮ ሃሺ ማሌ ቤሲ ዳንዲዋሴ።

ጾኦሲ ዳርይዳፓ ዲማዲንዲዋኣያ ማዒያ ላሚ ጫኣቄሣ

12 ሙሴ ናንገና ናንጋ ጎዳሞ፡- «ሃያ ዳር ዬኖ ዓጨሎ ታ ዔኪ ዓኣዳንዳጉዲ ኔኤኒ ታና ዓይሣኔ፤ ጋዓንቴ ታኣና ዋላ ያና ኔ ዳካንዳቴያ ኔ ታኣም ከኤዚባኣሴ፤ ታና ኔ ዔራያ፡ ሃሣ ቦንቻያ ማዕሣ ኔ ታኣም ከኤዜኔ፤ 13 ዬይ ያዲ ማዕቶ ኔኤም ታ ማዳንዳሣና ኔና ታ ዋዛሲ ናንጋንዳጉዲ ኔኤኮ ማሊያ ታኣም ፔጋሲ ከኤዜ፤ ሃያ ዳር ኔ ፃጲ ማሂ ኔ ዶኦሬሣ ማሌ» ጌዔኔ።

14 ናንገና ናንጋ ጎዳ፡- «ታኣኒ ታ ቶኦኪና ኔኤና ዋላ ዓኣዳንዳኔ፤ ኮሹሞ ታ ኔኤም ዒንገ ኔና ሃውሺሳንዳኔ» ጌዔኔ።

15 ሙሴ ማሃየ፡- «ኔ ኦኡና ዋላ ከሰኩዋያ ማዕቶ ኦና ሃያ ቤዛፓ ከሲፖ፤ 16 ኦኡና ዋላ ኔ ከሰኩዋያ ማዕቶ ኔኤኮ ዳርናኣ ማዶም ታ ዛሎና ኔ ዋዛዳያ ማዕሣ ዓሲ ቢያ ዋይቲ ዔራኒ ዳንዳዓንዳይ?»

ሳይይዳ ዓኣ ሜሌ ዳርይዳፓ ቢያ ኑና ደማ ማሃሢ ኔኤኮ ኑኡና ዋላ ማዕዲያቱዋዓዳ?» ጌዔኔ።

17 ናንጊና ናንጋ ጎዳ ሙሴም፡- «ኔና ታ ኮሺ ጎናሲ ዔራያ ማዔሢርና ኔ ዛሎና ታ ዋዛዳሢር ኔ ጋዓ ባኮ ቢያ ታ ማዳንዳኔ» ጌዔኔ።

18 ሙሴ ዒማና፡- «ሂዳቶ ኔኤኮ ቦንቾ ታና ፔጋሲ ዳዌ» ጌዔኔ።

19 ናንጊና ናንጋ ጎዳ ዒዛም፡- «ታኣኮ ኮሹሞ ቢያ ታ ኔኤም ቤኤዛንዳኔ፤ ታኣኮ ጌኤዡ ሱንጾዋ ታ ኔኤም ኬኤዛንዳኔ፤ ታኣኔ ናንጊና ናንጋ ጎዳኬ፤ ዳቤሢም ታ ዓቶም ጋዓንዳዛንሢም ዓቶም ጋዓንዳኔ፤ ሚጨንታንዳዛንሢምአ ታ ሚጨንታንዳኔ። 20 ዓሲ ታና ዛጊ ሃይቁዋጾ ዓቲ ናንጉዋኣሢር ታኣኮ ዓኣፖ ካር ኔኤኔ ዛጋኒ ዳንዳዑዋሴ። 21 ጋዓንቴ ሃይካ ታኣኮ ዑኬ ላሎ ዑፃ ኔ ዔቃንዳ ቤሲ ዓኣኔ። 22 ታኣኮ ቦንቾ ዴዲጾኮ ማላታ ማዔ ዓኣፓ ደካ ፖዓ ፖዒ ዓኣዳኣና ላሎኮ ፃሄ ዛኣዚንጾ ባኣኮ ታ ኔና ጌልዛንዳኔ፤ ታኣኔ ጾኣኪ ዓኣዳንዳያ ሄላንዳኣና ታ ኩጮና ታ ኔና ካንቁ ዓኣቻንዳኔ፤ 23 ዩካፓ ኩጮ ታ ሺኣሻንዳኔ፤ ኔኤኔ ዒማና ታኣኮ ዓኣፖ ካርቱዋንቴ ዙሎ ዛጋንዳኔ» ጌዔኔ።

34

ጊንሣ ላሚ ኮሺንቴ ዋጋ ፃኣፒንቴ ሹጮንሢ (ላሚ. ዋማ 10:1-5)

1 ናንጊና ናንጋ ጎዳ ሙሴም፡- «ቤርታኣርንሢ ማላያ ላምጾ ሹቹ ዓርሲ ኮሺ፤ ታኣኔያ ኔኤኔ ቤርታ ሚንሢዛንሢዳ ዓኣ ባኮ ፃኣፓንዳኔ። 2 ዚር ጉቴ ታኣና ዋላ ካኣማኒ ጊኣጊንቴ ሲና ዱኮ ቶኣኮ ኬሰኬ። 3 ኔኤና ዋላ ዓይጎ ዓሲያ ሙኮፖ፤ ዱኮኮ ዋኖ ዛሎና ማዔቶዋ ዓይጎ ዓሲያ ዴደፖ፤ ማራይ ማዔቶ ባይ ዓይጎ ቆልሞዋ ዱኮ ዳማ ሄንቆፓ» ጌዔኔ። 4 ዩያር ሙሴ ላምጾ ሹቹ ቤርታኣርንሢጉዬያ ዓርሳ፡ ዚር ጉቴሎ ጉቴ ዓሚና ዔቁ ናንጊና ናንጋ ጎዳ ዒዛ ዓይሢ ጎይጾ ዓርሲንቴ ሹጮ ዔኪ ሲና ዱኮ ኬሰኬ።

5 ዒማና ናንጊና ናንጋ ጎዳ ሻኣሬና ኬዲ ዒዛና ዋላ ዒኣካ ዔቁ፡- «ታኣኔ ናንጊና ናንጋ ጎዳኬ» ጌዒ ፔኤኮ ደማዴ ሱንጾዋ ዔርዜኔ።

6 ናንጊና ናንጋ ጎዳ ዒዛኮ ቤርቶና ዓኣዳጾ ሄዚ ጌዒ ኬኤዜኔ፡- «ታኣኔ፤ ናንጊና ናንጋ ጎዳ ማዔ ጾኦሲኬ፤ ታኣኔ ማኣራያ ሃሣ ዓቶም ጋዓያኬ፤ ታኣኔ ዳጋም ኔጋያ፡ ናንጊና ናንጋ ናሹሞና ጉሙርቁንጉጻኣ ታኣኮ ሚርጌኬ፤ 7 ታኣኮ ናንጊና ናንጋ ናሹሞ ባይዙሞጾ ዴንዲ

ሺያ ሾይንቲ ሄለንዳኣና ታ ካፓያኬ፤ ጎሜና ደብንቲና ቢያ ታ ዓቶም ጋዓያኬ፤ ጋዓንቲ ጊንሣ ሃሣ ዴንዲ ሃይሣሶና ያይዳሶ ሾይንቶ ሄለንዳኣና ዓድንሣ ዛሎ ጎሞሮ ናኣቶይዳ ታ ሜቶ ዓጉዋ ሃሻያቱዋሴ።»

8 ሙሴ ቤዘማና ሳዖ ባንሣ ጉምዓቲ ዚገ ካኣሽካዖ፥ 9 ሂዚ ጌዔኔ፡- «ናንገና ናንጋ ጎዳሢሃ! ጎኔና ኔ ታኣና ዋዛዳያ ማዔቶ ኔ ኑኡና ዋላ ከሰካንዳጉዲ ታ ኔና ሺኢቃኔ፤ ሃይ ዴሬ ዋይዚ ዒፃያኬ፤ ጋዓንቲ ኑኡኮ ጎሞና ፑርቶ ማዶና ቢያ ዓቶም ጌዔ፤ ሃሣ ኔ ዴሬ ማሂያ ዔኬ።»

ቤርታኣ ጩኣቁሞኮ ላሚ ዓካዲያ (ኬሲ. ማጻ 23:14-19፤ ላሚ. ዋማ 7:1-5፤ 16:1-17)

10 ናንገና ናንጋ ጎዳ ሙሴም፡- «ሃይሾ ዓካሪ ታኣኒ ዒሰራዔኤሌ ዴሮና ጩኣቁሞ ጩኣቃንዳኔ፤ ሃያኮ ቤርታ ሳዖይዳ ዓይጎ ዴሬ ኮራ ማዳንቲ ዔርቲባኣ ፑኡፒ ባኣዚ ታ ዔያቶኮ ቤርታ ማዳንዳኔ፤ ታ ኔጋቲ ጌዒ ዒጊቻያ ማዔ ዴኤፒ ባኣዚ ማዳንዳሢሮ ታኣኒ፥ ናንገና ናንጋ ጎዳ ዩንሣ ማዳንዳ ዴኤፖ ባኮንሣ ዔያቶ ባኣካ ናንጋ ዴራ ቢያ ዛጋንዳኔ። 11 ሃሮ ታ ዒንሣም ዒንጋ ዋጎ ካፑዋቲ፤ ታኣኒያ ዓሞራ ዓሶ፥ ካኣና ኔ ዓሶ፥ ሂኢታ ዓሶ፥ ፔርዜ ዓሶ፥ ሂዋዌና ዒያሱሳ ዓሶ ዒንሣኮ ቤርታፓ ኬሲ ዳካንዳኔ፤ 12 ዔያታ ዒንሣ ባይዛንዳ ፒሮ ዒንሣም ማዓንዳሢሮ ዒንሣ ዴንዳ ቤዛ ዓኣ ዴሮና ዋላ ጩኣቁሞ ጩኣቁፖቲ፤ 13 ዔያቶኮ ያኦዘም ዒንጎ ባኮ ዒንጎ ቤዞ ደይሲ ባይዙዋቲ፤ ካኣኦ ባዖዋ ሻሁዋቲ፤ ዓሼራ ጌይንታ ዔያቶኮ ካኣሽኮ ያኦዜሎ ማላቶ ሜንሣ ከኤራዋቲ።

14 «ታኣኒ፥ ናንገና ናንጋ ጎዳ ታጊዳፓ ሜሌ ያኦሲ ካኣሽከንታንዳጉዲ ኮዑዋ ያኦሲታሢሮ ታ ጊዳፓ ዓታዛ ሜሌ ያኦዞ ካኣሽኪፖቲ፤ 15 ዒዞ ዓጮይዳ ናንጋ ዓሶና ዋላ ጩኣቁሞ ጩኣቁፖቲ፤ ዓይጎሮ ጌዔቶ ፓሡዋ ዔያቶኮ ያኦዞም ዚገ ዔያታ ካኣሽካኣና፥ ዒንጎ ባኣዚ ዔያታ ዒንጋኣና ዒንሣ ዔያቶና ዋላ ፔቲ ማዓንዳጉዲ ዒንሣ ዔያታ ያኦጮንዳኔ፤ ዒንሣያ ዔያታ ፔኤኮ ያኦዞም ዒንጋ ሙዖ ሙዓኒ ጋዓንዳኔ፤ 16 ዒንሣኮ ዓቲንቆ ናኣቶም ዔያቶኮ ዉዲሮ ናኣቶ ዒንሣ ያኦጮም ናኣታ ዔያቶ ዔካዛ፥ ዩንሣ ዉዲሮ ናኣቶንሣ ፔኤኮ ካኣሽኮ ያኦዞ ካኣሽኪያና ዒንሣኮ ዓቲንቆ ናኣቶ ደቢሻንዳኔ።

34:7 34:7 ኬሲ. ማጻ 20:5-6፤ ፓይ. ማጻ 14:18፤ ላሚ. ዋማ 5:9-10፤ 7:9-10።
34:13 34:13 ላሚ. ዋማ 16:21።

17 «ዓንጊ ዓልቁሲ ካኣሽኮ ጾኦሲ ሜሌ ኮሺፖቴ፣ ካኣሽኪያ ካኣሽኪፖቴ፤

18 «ለኣዶ ሙዒ ጦንቾ ኬሎ ካፒ ሌዓ ሌዓ ጦንቾዋቴ፤ ዋይቤ ዓገሩኮ ዴንዲ ለንካይ ኬሊ ሄለንዳእና ላኣዳ ሙዑዋቴ፤ ዓይጎር ጌዔቶ ገብጻይዳፓ ዒንሢ ኬሰኬሢ ጌሮ ዓገሩይዳኬ።

19 «ቶይዶ ማዒ ሾይንታ ዓቲንቆ ናኣታ ቢያ ታኣርኬ፤ ቤርታ ሾይንቲ ዓይጎ ቆልሞኮዋ ቢያ ገማይ ማዔቶዋ ዓዴ ማራይ ታኣርኬ፤

20 ጋዓንቲ ሃርኮ ቤርቶ ናኣቶ ዛሎ ማራናይ ዒንጋኒ ዒንሢ ዳንዳዓኔ፤ ዬያ ዛሎ ዒንሢ ዒንጋኒ ዳንዳዒባኣቲ ጋዓንቲ ሃር ናዖኮ ባቃሮ ማንሡዋቴ፤ ዓሲኮዋ ቶይዲ ናይ ዓቲንቁ ዛላ ማራናይ ዒንጋኒ ዒንሢ ዳንዳዓኔ።

«ዒንጎ ባኣዚ ዓርቁዋዎ ያናታቴያ ታ ቤርቶ ኩቺ ጉሪ ሙኮፓ።

21 ማዶ ዒንሢኮ ቢያ ዒንሢ ማዶኒ ላሆ ኬሊ ዒንሢም ዓኣኔ፤ ዬያር ጎሽካኣናታቶዋ ሃኣኮ ቡኩሶ ዋዶኮ ለንካሳ ኬሎና ፔቴታዎ ማዶ ማዶፖቴ።

22 «ቤርታ ካፃ ሃኣኮ ዒንሢ ቡኩሳ ዋዶና ሃኣኮ ካፃዎ ጦንቾ ኬሊ ጦንቾዋቴ፤ ሌዖኮ ጋፒንፃ ዒንሢ ቱኬ ሚዎ ዓኣፖ ቡኩሳ ዋዶናኣ ወልሾ ዴማ ዒንሢ ናንጌ ዋዶ ማሊ ጦንቾንታ ጦንቾ ጦንቾዋቴ።

23 «ሌዔይዳ ሃይሢ ማይንቲ ዓቲንቃ ቢያ ዒሰራዔኤሌ ጾኦዛሢ ማዔ ናንገና ናንጋ ጎዳ ዚጊ ካኣሽካኒ ሙኮንጎ። 24 ሜሌ ዳር ቢያ ዳውሲ ባይዚ ዒንሢኮ ዓጮ ታኣኒ ዳልገሻንዳኔ፤ ዬያር ዬንሢ ሃይሆ ጦንቾ ዋዶንሢዳ ታ ኮይላ ዒንሢ ሙካኣና ዒንሢኮ ዓጮ ያሊ ዔካኒ ጾኦኒያ ዒንሢ ኮራ ሙካዓኬ።

25 «ታኣም ዒንሢ ቆልሞ ሹኪ ዒንጋ ዋዶና ሙኩቃ ፃኣዛ ጌሌ ካሣና ዋላ ታኣም ዒንጊፖቴ፤ ዑሣ ዓኣዲዎ ጦንቾ ኬሎም ሹኪንቲ ቆልሞ ዓሽካፓ ዚር ጉቴ ሄለንዳኣና ዓይሲ ጌሢፖቴ።

26 «ሌዓ ሌዓ ዒንሢኮ ሃኣኮኮ ቤርቶ ናንገና ናንጋ ጎዳ ማዔ ጾኦዛሢ ማኣሪ ዔኪ ሙኮዋቴ።

«ማራናይ ማዔቶ ዋናናይ ዒንዶ ዲኢቆና ዋላ ካሢፖቴ።»

34:17 34:17 ኬሲ. ማጻ 20:4፤ ሌዊ. ዓክ 19:4፤ ላሚ. ዋማ 5:8፤ 27:15።
34:18 34:18 ኬሲ. ማጻ 12:14-20፤ ሌዊ. ዓክ 23:6-8፤ ፓይ. ማጻ 28:16-25።
34:19 34:19 ኬሲ. ማጻ 13:2። 34:20 34:20 ኬሲ. ማጻ 13:13። 34:21 34:21 ኬሲ. ማጻ 20:9-10፤ 23:12፤ 31:15፤ 35:2፤ ሌዊ. ዓክ 23:3፤ ላሚ. ዋማ 5:13-14። 34:22 34:22 ሌዊ. ዓክ 23:15-21፤ ፓይ. ማጻ 28:26-31። 34:25 34:25 ኬሲ. ማጻ 12:10። 34:26 34:26 ላሚ. ዋማ 24:21፤ 26:2።

27 ናንጊና ናንጋ ጎዳ ሙሴም፡- «ኔኤና ማዕቶዎ ዒሰራዔኤሌ ዳሮና ታ ጩኣቃንዳ ጩኣቁማ ሃኖ ቃኣሎ ጎይፆና ማዕሢሮ ሃያ ቃኣሎ ማፃኣፔይዳ ፃኣፔ» ጌዔኔ። 28 ሙሴ ዓይጎዎ ሙዒ ዑሽኩዎፆ ናንጊና ናንጋ ጎዳና ዎላ ያይዲታሚ ኬሊና ያይዲታሚ ዋንቲና ዴዔኔ፤ ናንጊና ናንጋ ጎዳ ዒማና ዓርሲንቲ ሹጮንሢዳ ጩኣቁም ዔርዘያ ማዕ ታጾ ዓይሢፆንሢ ፃኣፔኔ።

ሙሴኮ ሲና ዲኮይዳፓ ኬዲፆ

29 ሙሴ ናንጊና ናንጋ ጎዳና ዎላ ጌሰቲ ዳዔሢሮ ታጾ ዓይሢፆንሢ ዔኪ ሲና ዲኮይዳፓ ኬዳኣና ዓኣፖ ካራ ዒዛኮ ፖፖዓኔ፤ ዒዛም ጋዓንቲ ዬይ ቢያ ዔርቱዎያኬ። 30 ዓኣሮኔንታ ዳሮ ቢያሢንታ ሙሴ ዛጋኣና ዓኣፖ ካራ ዒዛኮ ፖዓሢ ዴንቃፆ ዒዛ ባንሢ ዑካኒ ዒጊጨፎኔ። 31 ሙሴ ጋዓንቲ ዔያቶ ዔኤላዛ፣ ዓኣሮኔና ዳሮኮ ሱኡጎና ዒዛ ባንሢ ሙኬም ዒዚ ዔያቶና ጌሰቲኔ። 32 ዬካፓ ዒሰራዔኤሌ ዳራ ጉቤ ዒዛ ኮራ ቡኪንታዛ፣ ሙሴያ ሲና ዲኮይዳ ናንጊና ናንጋ ጎዳ ዒዛም ዒንጌ ዎጎ ቢያ ዔያቶም ኬኤዜኔ። 33 ሙሴ ዔያቶና ዎላ ጌሰቲ ጋፔሰካፓ ዓኣፖ ካሮ ፔኤኮ ሻኣሾና ካንቁኔ፤ 34 ሙሴ ናንጊና ናንጋ ጎዳና ዎላ ጌሰታኒ ዓፒሎና ማዢንቲ፣ ፆኣሲ ዳሮና ካኣማ ማኣሮ ጌላ ዎዶና ሻኣሻሢ ዓኣፖ ካራፓ ዔካኔ፤ ዬካፓ ጊንሢ ኬሰካኣና ዒዛም ዓይሢ ኬኤዘና ባኮ ቢያ ዒሰራዔኤሌ ዳሮም ዒ ኬኤዛኔ። 35 ዔያታ ዓኣፖ ካራ ዒዛኮ ፖዓንቲ ዛጋኔ፤ ዬያሮ ናንጊና ናንጋ ጎዳና ዎላ ጌሰታኒ ዒ ዓኣዳንዳ ዎዶ ሄላንዳኣና ዓኣፖ ካሮ ፔኤኮ ሻኣሻሢና ዒ ካንቃኔ።

35

ዓይሁደኮ ሃውሾ ኬሎ ቦንቾ ዎጎ

1 ሙሴ ዒሰራዔኤሌ ዳሮ ፔቲይዳ ዔኤላፆ፡- «ዒንሢ ኩንሣንዳጉዲ ናንጊና ናንጋ ጎዳ ዒንሢም ዒንጌ ዎጋ ያዲኬ፡- 2 ዒንሢ ዒንሢኮ ማዶ ማዳንዳጉዲ ላሆ ኬሊ ዒንሢም ዓኣኔ፤ ላንካሳ ኬላ ጋዓንቲ ዒንሢ ሃውሻንዳጉዲ ታና፣ ናንጊና ናንጋ ጎዳም ዲማዴ ኬሊታሢሮ ዬኖ ኬሎ ማዶ ማዶ ዓይጎ ዓሲያ ማፆም ዎዲንታንዳያ ኮይሳኔ፤ 3 ዬያሮ ሃውሾ ኬሎና ዒንሢኮ ማኣሮይዳ ታሚታፆ ዔኤሢሢፖቲ» ጌዔኔ።

34:29 34:29 2ቆሮ. 3:7-16። 35:2 35:2 ኬሲ. ማጻ 20:8-11፤ 23:12፤ 31:15፤ 34:21፤ ፓይ. ማጻ 23:3፤ ላሚ. ዎማ 5:12-14።

**ጌኤዠ ማኣሮሞ ዒንገንታ ዒንገሢ
(ኬሲ. ማፃ 25:1-9)**

4 ሙሴ ዒሰራዔኤሌ ዳሮሞ ቢያ፡- «ናንገና ናንጋ ጎዳ ዓይሤ ባካ ያዲ ጋዓያኩ፡- 5 ናንገና ናንጋ ጎዳሞ ዒንጎ ባኣዚ ዒንጉዋቴ፤ ዒንጎ ባኣዚ ዒንጋኒ ኮዔሢ ቢያ ዒና ናሽኬሢጉዲ ዋርቄ፡ ቢራ ዓንገ፡ ሞኦኖ ዓንጋ፡ 6 ሚዛጲ ሱኡፖ ዓፒላ፡ ጮልዔ፤ ሃሣ ዲንከንታ ዞቄ ቃላሚና ዑሽንቴ ማራይ ጋፓኔ፡ ዋኣሪ ጋፓኔና ኮሽንቴ ዓፒላ፡ 7 ዞቄ ቃላሚ ዑሽንቴ ዓዴ ማራይ ጎሮ፡ ሽርከንቴ ጉላሞቤ፡ ሻሪ ሚሢ፡ 8 ፖፖ ፖዒሶ ለሞባሢ፡ ቲሽኮ ዛይቶ ቲዠና ዑንጅ ሳውቁሳ ዲማ ዲማ ባኩ፡፡ 9 ቄኤሶኮ ሱኡጋ ማኣዓ ዲማጴ ዔፑዶ ማኣዓሢንታ ዳዶ ቡራሾይዳ ጌሢንታ ማራጌዶንታ ሜሌ ፓልሞ ባኮ ዔኪ ሙኮንጎ፡፡»

**ያኦሲ ካኣሽከንታ ዓፒሎና ማዢንቴ ማኣሮኮ ጋራ ኮይሳ ሜሆ
(ኬሲ. ማፃ 39:34-43)**

10 «ዒንሢ ባኣኮይዳ ዓኣ ኩቲ ሃኣሚ ዓሲ ቢያ ናንገና ናንጋ ጎዳ ዓይሤ፡ ዓይጎ ባኣዚያ ማዳኒ ሙኮንጎ፤ 11 ዬይ ማዢንታንዳ ባካ፡ ዓፒሎና ማዢንቴ ማኣሮኮ ጋሮና ዙሎናይዳ ቃሲ ሱዮ ዓፒሎ፡ ዓርቆ ባኩንታ ላሾ ሚያንታ፡ ጋጋርዞንታ ቱርቱሮንታ፡ ቶኮንታ፡ 12 ጫኣቁሞ ታኣሶቶንታ፡ ዛጰ ሚያንታ፡ ጎሞ ዓቶም ጌይያ ዔርዛ ታኣሶቶ ካሮ ካንቆ ጉኡፖንታ፡ 13 ጴጌ ሎኣዠንታ ዛጰ ሚያንታ ዲማ ዲማ ሚሆ፤ ዬያጉዲ ሃሣ ያኦሲም ዒንገንታ ዲማጴ ካሦ፡ 14 ፖፖ ጌሦ ሻርኖና ዬያም ኮይሳ ዲማ ዲማ ሚሆ፡ ፖፖ ፖዒሶ ለሞባሢ፡ 15 ዑንጅ ጩቢሶ ቤዘና ዛጰሢ ሚያ፡ ቲዠ ዛይቶ፡ ሳውቃ ዑንጅ፡ ዓፒላፓ ማዠና ማኣሮኮ ካሮ ዋዶ ዓፒሎ፡ 16 ሚቲ ዒንገንታ ባኮ ሚቾ ቤዞ፡ ታሞ ካኣሾ ሞኦኖ ዓንጎ፡ ዛጰሢ ሚያንታ ዬያኮ ሚሆ፡ ማሰቶ ሳኣኖንታ ጌሦ ባኩ፡ 17 ቆልፖ ጋሮ ጎኣሶ ዓፒሎ፡ ቱርቱሮና ቶኮና፡ ቆልፖ ጋሮኮ ካሮ ጎኣሶ ዓፒሎ፡ 18 ፃውኖ፡ ዓፒሎና ማዢንቴ ማኣሮኮ ቱኮ ሱዞ፡ 19 ቄኤሳ ዲማጴ ቤዞይዳ ማዳ ዋዶና ማኣዓ ሚዛጲሶና ማኣዓሢ፤ ዬይያኣ፡- ቄኤሳሢ ዓኣሮኔና ዒዛኮ ናኣቶናም ኮሽንታ ያኦሲም ዲማጴ ዓፒሎሞ ቢያ ኮሾንጎ» ጌዔኔ።

ዴራ ዔኪ ሙኬ ዒንጎ ባኮ

20 ዬካፓ ዒሰራዔኤሌ ዴራ ቢያ ሙሴ ቤርታፓ ኬሰኪ ዴንዴኔ፤ 21 ዓፒሎና ማዢንቴ፡ ናንገና ናንጋ ጎዳ ዴሮና ካኣማ ማኣሮ ማዢን ፔቴ ፔቴሢ ዒንጋኒ ዒና ናሽኬሢጉዲያ ናንገና ናንጋ ጎዳሞ ዒንጎ ባኣዚ ዔኪ ሙኬኔ፤ ዬያይዲ ያኦሲ ካኣሽከ.ፆ ማዶም ማዓ፡ ቄኤሶ ማኣዓሢም ኮይሳ ባኣዚ ቢያ ዔኪ ሙኬኔ። 22 ዒንጎ ባኣዚ ዒንጋኒ

ኮዔ ላአላ፡ ዓተንቃ፡ ፔቴ ፔቴሢ፡- ዳዶ ፓልማሢ፡ ዋዮ ዋርቃ፡ ኩጮ ዠኢራሢ፡ ሆላ ማአፆ ቁንቶንታ ዋርቆ ፓልማሢንታ ዔኪ ሙኪ ናንገና ናንጋ ጎዳሮ ማዓንዳጉዲ ዒንገጌ። 23 ሚዛጶ ሱኡፖ ዓፒላ፡ ጮልዔ፤ ሃሣ ዲንኪና ዘቄ ዓፒላ፡ ዋአሪ ጋፓኔና ኮሺንቴ ዓፒላ፡ ዘቄ ቃላሚና ዑሺንቴ ዓዴ ማራይ ጎር፤ ዬያጉዲ ሺርኪንቴ ጉላምቤ ዓአሢያ ቢያ ዔኪ ሙኬ። 24 ቢራታቴያ ሞኦና ዓንገረ ዒንጋኒ ዳንዳዓሢ ቢያ ዒንጎ ባኮ ናንገና ናንጋ ጎዳም ዔኪ ሙኬ፤ ዓይጎ ባአዘማአ ማዓ ሻሪ ሚሢ ዓአሢያ ዔኪ ሙኬ። 25 ሱኪ ዔራ ላአላ ፔ ኩጮና ዔያታ ማዴ ባኮ ቃራ ሱኡፖ ማአፆንታ ጮልዔ፤ ሃሣ ዲንኪ ዘቄ ዓፒላአ ዔኪ ሙኬ። 26 ዬያጉዲ ሃሣ ዒንጋኒ ኮዔ ላአላ ዋአሪ ጋፓኔና ሱኪንቴ ፓቴሌ ኮሺ፤ 27 ዔያቶኮ ሱኡጋ ጌኤዠ ዔፑዶ ዓፒሎና ዳዶ ቡራሻ ጌሢንታ ማሪገዶና ማሌ ዳማ ዳማ ፓልሞ፡ 28 ፖናና ተዠናም፤ ዬያጉዲ ዑንጃ ሳውቁሳያ ማዔ ዳማ ዳማ ሳውቁሳ ባኮንታ ዘይቴያ ዔኪ ሙኬ። 29 ዓቴንቆንታ ላአሎንታ ማዔ ዒሰራዔኤሌ ዴራ ቢያ ናንገና ናንጋ ጎዳ ሙሴ ዓይሢ ማዶም ኮይጎ ባኮ ዔያቶኮ ዒና ናሽኬ ጎይያ ናንገና ናንጋ ጎዳም ዔኪ ሙኪ ዒንገጌ።

ባሰሊዔኤሌና ዔኤሊያቤና
(ኬሲ. ማፃ 31:1-11)

30 ሙሴ ዒሰራዔኤሌ ዓሶም ሂዚ ጌዔ፡- «ናንገና ናንጋ ጎዳ ዪሁዳ ዜርዖይዳፓ ሁኡሬኮ ናአዚ ናዖ፡ ዑኡሬ ናአዚ ባሰሊዔኤሌ ደኦሬ፤ 31 ዖኦሲ ዒዛ ፔኤኮ ዓያኖ ዋልቆና ኩሚያ ማሂ ዓይጎ ባአዚያ ማፆም ሃአሚ ማዒ ማዲንታ ማዶ ማዲኒ ዳንዳዓንዳጉዲ ሃአማቶንታ ዔራቶንታ ጳቂሥሢያ ዒዛም ዒንገጌ። 32 ዔራቶና ማዶንዶ ማዶኮ ጎይያ ገኢገሺሢሢንታ ዬያ ማለንቴ ባኮ ዋርቄና ቢራ ዓንገና ሞኦና ዓንጎናአ ጳርቂ ኮሻኒ፡ 33 ሹቺንታ ሚሢንታ ዓርሲ ኮሻኒ፤ ዬያጉዳያ ማሌ ዔራቶና ማዶ ባኮ ማዲኒ ዔራቶ ዒዛም ዒንገንቴ። 34 ዒዛንታ ዳኣኔ ዜርዖይዳፓ ማዔ ዓይጎማኬ ናአዚ ዔኤሊያቤንታም ዔያቶኮ ኩጮ ሃአማቶ ማሌ ዓሶ ዔያታ ዔርዘንዳጉዲ ዔራቶ ዒንገንቴ። 35 ዓንገረ ዓልቂሲሢ፡ ማዶንዶ ማዶኮ ጎይሢ ገኢገሺሢሢ፡ ቃራ ሱኡፔ ዓፒላ፡ ጮልዔ ዓፒላ፡ ዲንኪንታ ዘቄ ቃላሚና ዑሺንቴ ሚዛጶ ዓፒላ፤ ዬያጉዲ ዓፒሎ ዲዓ ማሌ ደርዘ ኮሺ ባኮ ቢያ ሚዛጶ ሳኒ ዳንዳዓ ሃአማቶ ዔያቶም ዒንገንቴ፤ ዔያታ ዓይጎም ማፆም ዔራቶና ማዶንታ ማዶና ሃአማቶና ማዶንታ ባኮኮ ቢያ ጎይሢ ገኢገሻያኬ» ጌዔ።

36

1 ሙሴ፦ «ናገረና ናገጋ ጎዳ ዔራቶና ጳቂሥሢና ዒንጌዘንሢ፤
ዓፒሎና ማዢንቴ ማኣሮ ማዢኒ ኮይሳ ባኮ ቢያ ገእሊሻኒ ዔራቶ
ዓኣዘንሢ፤ ባሰሊዔኤሌና ዔኤሊያቤና ናገረና ናገጋ ጎዳ ዔያቶ
ዓይሢ ጎይዖ ቢያ ባኮ ዔያታ ማድንጎ» ጌዔኔ።

ዴራ ዒንጌ ባኮኮ ሚርጊዖ

2 ሙሴ ባሰሊዔኤሌና ዔኤሊያቤና፤ ዩያጉዲ ናገረና ናገጋ
ጎዳ ዴማ ዔራቶ ዒንጌ ዓሰና ዔያቶ ማኣዳኒ ናሽኬ ማሌ ዔሮ
ዓሰ ቢያ ዔኤሊ ማድ ዔያታ ዓርቃንዳጉዲ ዔያቶም ከኤዘኔ።
3 ዒሰራዔኤሌ ዓሳ ዓፒሎና ማዢንታ ጌኤዢ ማኣሮ ማዢም ጌዒ
ዔኪ ሙኬ ባኮ ሙሴ ኮራፓ ዔያታ ዔኬኔ፤ ዒሰራዔኤሌ ዴራ
ጋዓንቴ ጉቶ ጉቶ ዔያቶኮ ዒንጎ ባኮ ሙሴም ዔኪ ሙኮ ሃሺባኣሴ።
4 ዩካፓ ማድ ገእሊሻ ማዳ ዔሮ ዓሳ ቢያ ፔኤኮ ማድ ሃሺ፤ ሙሴ
ኮይላ ሙኬኔ፤ 5 ዔያታ ሙሴም፦ «ናገረና ናገጋ ጎዳ ዓይሢ ማድም
ኮይሳሢኮ ዑሣ ሚርጌ ዒንጎ ባኣዚ ዴራ ዔኪ ሙኪሢዳኬ» ጌዔኔ።
6 ዩያሮ ሙሴ ዓፒሎና ማዢንታ ጌኤዢ ማኣሮም ኮይሳ ባኮ ዔኪ
ሙኩዋጉዲ ጉርዶም ቢያ ከኤዘኔ፤ ዩካፓ ዴራ ዔኪ ሙኪያ ሃሽኔ፤
7 ዩይ ዒንገንቴ ባካ ማድ ቢያ ኩንሢ ጊዲ ዓዓቴኔ።

ዓፒሎና ማዢንቴ ዖኦሲ ዴሮና ካኣማ ማኣሮ (ኬሲ. ማፃ 26:1-37)

8 ማድ ገእሊሻ ማዳ ዓሰ ባኣካፓ ሚርጌ ዔራቶ ዓኣዘንሢ ዖኦሲ
ዴሮና ካኣማ፤ ዓፒሎና ማዢንታ ማኣሮ ማዢኔ፤ ዔያታ ዓፒሎና
ማዢንቴ ማኣሮም ጮልዔ፤ ሃሣ ዲንኪና ዘቄ ሱኡፖ ሱኮናያና
ከሩቤኤሌ ጊዳ ሲኪንቴ ኮሺንቴ ታጾ ጎኦሶ ዓፒላኣ ኮሺኔ። 9 ፔቴ
ፔቴ ጎኦሶ ዓፒሎኮ ጎጾ ዋሊጉዴያ ማዓፃ ዖዶሱማ ላማታሚ ሳሊ
ዋዳ፤ ጎጾ ዳልጉማ ዖይዶ ዋዳኬ። 10 ዩንሢ ደንጎንሢ ፔቴይዳ ዋላ
ካንሢ፤ ሃንጎ ደንጎንሢያኣ ዒማይዲ ዋላ ካንሢ ዔያታ ሲኬኔ።
11 ዋላ ካኣሚ ሲኪንቴ ጎኦሶ ዓፒሎይዳፓ ፔቴ ዘሎ ዓጮይዳ
ጮልዔ ሱኡፔ ዓፒላና ኮሺንቴ ሱሢ ኮሺኔ፤ ማሌ ዘሎይዳ ካንሢ
ሲኪንቴ ጎኦሶ ዓፒሎንሢዳፓ ፔቴ ዘሎና ዩኖጉዲ ማዳኔ፤ 12 ፔቴ
ቤርታሳ ጎኦሶ ዓፒሎ ዑፃ ደንገታሚ ሱሢ፤ ዩያጉዲ ሃሣ ላምዓሳ
ጎኦሶ ዓፒሎኮ ጋፒንዖሮይዳ ሃንጎ ሱዖኮ ቤርታ ቤርታ ማዓንዳ
ደንገታሚ ሱሢ ዔያታ ኮሺኔ። 13 ላምዖ ዘሎና ዓኣ ጎኦሶ ዓፒሎ
ካንሢ ፔቴ ማሃኒ ደንገታሚ ዋርቄና ኮሺንቴ ዓይሣ ባኣዚ ዔያታ
ኮሺኔ።

14 ዓፒሎና ማዢንቴ ማኣሮ ዎዶ ካራ ማዓንዳ ታጾ ፔቴ ጎኑሶ
 ዓፒሎ ዋኣሪ ጋፓኔ ሱኪ ኮሾና ዓፒሎ ዔያታ ጊኢጊሼኔ። 15 ቢያሢኮ
 ጎጾ ሄኮ ማዔ ፔቴ ፔቴ ጎኑሶ ዓፒሎኮ ዎዶሱማ ሃይሢታሚ ዎዳ፣ ጎጾ
 ዳልጉማ ዎዶ ዎዳኬ። 16 ደንጋሢ ፔቴ ዛሎና፣ ላሃሢ ባጎ ዛሎና
 ማሃ ዎላ ካንሢ ዔያታ ሲኬኔ። 17 ፔቴ ዛሎ ጋፒንፆ ጎኑሶ ዓፒሎኮ
 ዓጫ ደንጊታሚ ሱሢ፣ ላምዓሳ ዛሎኮ ጋፒንፆ ጎኑሶ ዓፒሎኮ
 ዓጫ ዛሎይዳ ደንጊታሚ ሱሢ ዔያታ ዓኣሄኔ። 18 ላምዎ ዛላ ዓኣ
 ጎኑሶ ዓፒሎ ካንሢ ፔቴ ዎዶ ካራ ማሃኒ ሞኦና ዓንጊና ደንጊታሚ
 ዓይሆ ባኣዚ ዔያታ ኮሼኔ። 19 ዙሎ ዛሎና ዎዶ ካራ ማዓንዳጉዲ፣
 ፔቴዞ ዞቄ ቃላሚ ዑሾና ዓዴ ማራይ ጎሮና ባጎዞ ሺርኪንቴ ጉላምቤ
 ዜዲና ላምዎ ጎኑሶ ዓፒሎ ዔያታ ኮሼኔ።

20 ዓፒሎና ማዢና ማኣሮ ሬኤካንዲያ ፒዜ ላሾ ሚሢ ሻሪ
 ሚሢዲፓ ዔያታ ኮሼኔ። 21 ፔቴ ፔቴ ላሻሢ ሚያኮ ዎዶሱማ ታጾ
 ዎዳ፣ ዳልጉማ ፔቴ ዎዳና ፓልፃና ማዓዛ፣ 22 ዎላ ካንሢ ሄኮ
 ማዔያ ላምዎ ዳንኬስኬንሢ ዓኣኔ። 23 ዓፒሎና ማዢንቴ ማኣሮኮ
 ደኣሎ ዛሎና ላማታሚ ላሾ ሚሢ ዔያታ ኮሼኔ፤ 24 ላማታሞ
 ዓርሲያ ሚያኮ ዴማ ላምዎ ላምዎ ቶኪ ጌሢ ዎዶዲታሚ ቢራ
 ዓንጊ ቶኪ ዓኣያ ማሃ ኮሼኔ። 25 ዓፒሎና ማዢና ማኣሮኮ ኬዶ
 ዛሎና ላማታሚ ላሾ ሚሢ ዔያታ ኮሼኔ፤ 26 ፔቴ ፔቴ ዓርሲያ
 ሚያ ላሻሢኮ ዴማ ላምዎ ላምዎ ቶኪ ጌሢ ዎዶዲታሚ ቢራ ዓንጊ
 ቶኪ ዓኣያ ማሃኔ፤ 27 ዓፒሎና ማዢንቴ ማኣሮኮ ዙሎይዳ፣ ዓባ
 ጌላ ዛሎና ላሾ ሚሢ ዔያታ ኮሼኔ፤ 28 ጊንፆ ዛሎና ኬኤፃ ዎላ
 ካኣማ ካሮይዳኣ ላምዎ ላምዎ ላሾ ሚሢ ኮሼኔ። 29 ዩንሢ ካኣማ
 ካራ ዓኣ ላሾ ሚያንሢ ዴሞ ዛሎና ዎላ ካኣሚ ዴንዲ ፔቴ ዛሎ
 ሙስኩሎ ሄላንዳኣና ዓርቁንቴያኬ፤ ላምዎ ካኣማ ካሮይዳ ኮሺንቴ
 ላሾ ሚያንሢያ ዒማይዲ ኮሺንቴያኬ። 30 ዩያሮ ፔቴ ፔቴ ላሾ
 ሚያ ፃጳ ላምዎ ቶኪ ዓኣያ ማዓንዳጉዲ ማሃ ሳሊ ላሾ ሚሢ ቢራ
 ዓንጊዲፓ ኮሺንቴ ታጾ ላሆ ቶኪ ዓኣኔ።

31 ታጾ ደንጎ ጋጋርሲ ሻሪ ሚሢዲፓ ኮሼኔ፤ ዩያሮ ደንጎንሢ
 ዓፒሎና ማዢንቴ ማኣሮኮ ፔቴ ዛሎና ዓኣ ላሾ ሚያንሢሞ ማዓዛ፣
 32 ደንጎንሢ ሃሃ ባጎ ዛሎና ዓኣ ላሾ ሚያንሢሞ ማዔኔ፤ ዩያጉዲ
 ሃሃ ደንጎንሢ ዓፒሎና ማዢንቴ ማኣሮኮ ዙሊና ዓባ ጌላ ዛሎይዳ
 ማሃ ኮሺንቴኔ። 33 ላሾ ሚያኮ ጎኑሶ ዛሎና ሳዛ ዓኣ ጋጋርዞ ሚያ
 ዓፒሎና ማዢንቴ ማኣሮኮ ፔቴ ዛሎ ዓጫፓ ዴንዲ ባጎ ዛሎ ዓጫ
 ጋፒንፆ ሄላንዳኣኔ፤ 34 ላሻሢ ሚያ ዎርቁና ጳርቁ ኮሼኔ፤ ጋጋርዞ
 ዳኮንዶ ካራ ማዓንዳጉዲ ዎርቁና ዢኢሮ ኮሼኔ፤ ጋጋርዞኣ ዎርቁና

ጳርቂንጉቴ ኮሽኬኔ።

³⁵ ጎኑሶ ዓፒሎዎ ሚዛጲ ዓፒላይዳፓ ኮሽኔ፤ ዩይያ ጮልዔ፥ ዲንኪ፤ ሃሣ ዘቄ ሼኤሚና ሱኮናያ ማዓዛ፥ ኪኢታንቻሢ ኪሩቤኤሌ ማላታ ማይሊ ሲኪንቴኔ። ³⁶ ጎኑሶ ዓፒሎ ዎላ ዓይሣ ያይዶ ቱርቱሪ ሻሪ ሚሢዳፓ ዎርቄና ጳርቂ ዔይታ ኮሽኔ፤ ዩያቶይዳ ዓኣ ኪሮዎ ዎርቄና ኮሽኔ፤ ቱርቱሪ ዔይታ ያይዶ ቶኪ ቢራ ዓንገና ማገፍኔ፤ ³⁷ ዓፒሎና ማዢንጉቴ ማኣሮኮ ካሮ ጮልዔ፥ ዲንኪና ዘቄ ሱኡፔ ሼኤሚና ማይሊ ሲኪ ሚዛጲሶና ጎኑሶ ዓፒላ ኮሽኔ፤ ³⁸ ዩዮ ጎኑሶ ዓፒሎም ኪሬ ዓኣ ዶንጎ ቱርቱሪ ኮሽኔ፤ ዩያቶኮ ታኣቦቶ ሬኤኮንታ ፒዝ ገዔ ዓንጎዎ ዎርቄና ጳርቂ ዔይታ ኮሽኔ፤ ቱርቱሮንሢያ ዔይታ ዶንጎ ሞኦና ዓንገ ቶኪ ኮሽኔ።

37

ጫኣቁሞ ሳኣፂና ኮሽኔ ጎይያ

(ኬሲ. ማፃ 25:10-22)

¹ ሻሪ ሚሢና ጫኣቁሞ ጌሎና ታኣቦቶ ጌይንታ ሳኣፂና ባሰለዔኤሌ ኮሽኔ፤ ዩያኮ ያዶሱማ ላምዎ ዎዳና ፓልፃና፥ ጎጶ ዳልጉማ ፔቴ ዎዳና ፓልፃና፥ ሌካ ጳጉማ ፔቴ ዎዳና ፓልፃና። ² ጋሮንታ ዙሎንታ ጌኤሽ ዎርቄና ጳርቂ ዒ ኮሽኔ፤ ዳኣሮ ዓጮ ጉቤ ዎርቄና ጳርቂ ጊኢጊሽኔ፤ ³ ኬዲሢም ማዓንዳ ሱሢ ያይዶ ዎርቄ ዢኢሮ ማሢ ኮሽኔ፤ ዩንሢያ ፔቴ ዛሎና ላምዎ ዢኢሮ፥ ባጎ ዛሎና ላምዎ ዢኢሮ ያይዶ ቶኮይዳ ኮሽኔ ዎላ ዓይሢኔ። ⁴ ዛጳሢ ሚያዎ ሻሪ ሚሢ ዓርሲ ኮሽኔ ዎርቄና ዒዚ ጳርቂኔ። ⁵ ታኣቦቶኮ ዓጫኣ ዓጫ ዓኣ ዢኢራሢዳ ጌልዜኔ። ⁶ ያዶሱማ ላምዎ ዎዳና ፓልፃና፥ ጎጶ ዳልጉማ ፔቴ ዎዳና ፓልፃና ማዔ ጎሞ ዓቶም ጌይያ ዔርዛ ጉኡፖ ጌኤሽ ዎርቄና ዒዚ ኮሽኔ፤ ⁷ ጎኣሲ ዓኣያ ላምዎ ኪሩቤኤሌ ዱይንጉቴ ዎርቄና ኮሽኔ፤ ⁸ ጎሞ ዓቶም ጌይያ ዔርዛ ጉኡፖይዳ ፔቴዞ ፔቴ ዛሎና፤ ላምዓሳዞ ባጎ ዛሎና ማሢ ካሮና ዎላ ፔቴ ማሢ ዒዚ ጊኢጊሽኔ። ⁹ ኪሩቤኤላ ጋኣዞ ፔኤሲ ሌካ ጳጉዲ ፒሽ፥ ዩሮ ጉኡፔሎ ካንቃያ፤ ሃሣ ዎሊ ዛዛጋያ ማሢ ዒዚ ኮሽኔ።

ዮኦሲም ዱማጳ ካሣ ጌሣ ጳጌ ሎኦኮፍ

(ኬሲ. ማፃ 25:23-30)

¹⁰ ያዶሱማ ላምዎ ዎዳና፥ ጎጶ ዳልጉማ ፔቴ ዎዳና፥ ሌካ ጳጉማኣ ፔቴ ዎዳና ፓልፃና ማዔ ጳጌ ሎኦኮፍ ሻሪ ሚሢና ዒዚ ኮሽኔ። ¹¹ ዩያ ጌኤሽ ዎርቄና ጳርቂ፥ ዓጮዎ ዎርቄና ጳርቂ ዳኣራ ማሢ

ኮሺኔ። 12 ሃሃ ዓጮ ጉቤ ፔቴ ኬኤላ ዋዳ ማዓ ዋርቁና ጳርቁ ማሂ ጊኢጊሺኔ። 13 ኬዲም ማዓንዳ ሱሂ ያይዶ ዋርቁ ዠኢሮና ኮሺ ያይዶ ቶኮንሂ ደቁንቴ ያይዶ ዛሎይዳ ኮሺኔ። 14 ዴጌ ሎኦኦ ኬደንዶ ዛጳሂ ሚያ ጌልዞ ዠራሂ ዓጮ ዛሎይዳኬ። 15 ዛጳሂ ሚያዎ ሻሪ ሚሂና ኮሺ ዋርቁና ዒ ጳርቁኔ። 16 ዴጌ ሎኦኦይዳ ጌሂንታ ዲማ ዲማ ማዲንቶ ሚሆ ዋርቁና ዒዚ ኮሺኔ፤ ዬይያ፡- ዑኦ ዲያ ጉንጉላሂና ሳኣኖናኬ።

ፖፖ ጌሃ ሻርኖ
(ኬሲ. ማፃ 25:31-40)

17 ፖፖ ጌሃ ሻርኖ ጌኤሺ ዋርቁና ዒዚ ኮሺኔ፤ ሃሃ ቶኮንታ ፒዝ ጌዔ ዓንጎዎ ዋርቁ ዲይ ኮሺኔ፤ ፓልሞም ማዓ ቡኖ ማላቶ ያለና ዋላሺና ዓኣያ ማሂ ዒዚ ኮሺኔ።

18 ፔቴ ዛሎና ሃይሃ፤ ባጎ ዛሎና ሃይሃ ማዒ ጎኦባፓ ዬያቶኮ ላሆ ካኣፒ ኬሰካንዳጉዲ ማሂ ዒዚ ጊኢጊሺኔ። 19 ላሆ ካኣፖ ፔቴ ፔቴዞንሂኮ ያለና ዒላሺና ዓኣ ሌውዜ ሚጺሎ ቡኖ ማላ ሃይሃ ሃይሃ ዑሽኮ ዓንጎ ማላ ቡኒ ዒኣካ ጊዳ ማዠንቴ ዓኣኔ። 20 ፖፖ ጌሃ ሻርኖኮ ፒዝ ጌዒ ዔቁ ዓንጋ ያለና ዒላሺና ዓኣ ሌውዜ ሚያ ቡኖ ማላያ፤ ሃሃ ያይዶ ዑሽኮ ዓንጎ ፓልሞ ማላ ማላታ ጊዳ ኮሺንቴ ዓኣያኬ። 21 ሃይሃ ዋኣፃ ማዔ ካኣፖንሂኮ ፔቴ ፔቴ ዋኣዎኮ ዴማ ፔቴ ያሊ ኮሺንቴ ዓኣኔ፤ 22 ያሎንታ ካኣፖንታ ፖፖ ጌሃ ሻርኖኣ ዋርቁ ዲይ ፔቴ ማሂ ኮሻናያኬ። 23 ፖፖ ጌሃ ሻርኖኮ ላንካይ ፖዒ፣ ጋውቺንታ ጋውጮ ጌሃ ቤዞንታ ጌኤሺ ዋርቁና ዒዚ ኮሺኔ። 24 ፖፖ ጌሃ ሻርኖና ማዶ ሚሆ ቢያ ኮሻኒ ኩርሴሂ ሃይሂታሚ ዶንጎ ኪሎ ጊራሜ ማዓ ጌኤሺ ዋርቁኬ።

ዑንጅ ጨቢሶ ቤዞ
(ኬሲ. ማፃ 30:1-5)

25 ያደሱማ ፔቴ ዋዳ፣ ጎጳ ዳልጉማ ፔቴ ዋዳ፣ ሌካ ዴጉማ ላምፖ ዋዳ ማዒ ያይዶ ዛላ ሄኮ ማዔያ ዑንጅ ጨቢሶ ቤሲ ሻሪ ሚሂና ዒዚ ኮሺኔ፤ ካኣማ ካር ያይዳሂዳ ዓኣ ዳንኮንሂ ዬያና ዎላ ፔቴ ማዒ ኮሺንቴያኬ። 26 ቤርቶንታ ዎላ ካኣማ ያይዶ ካርንታ ዳንኮንታ ቢያ ጌኤሺ ዋርቁና ጳርቁ፣ ዓጮዎ ዋርቁና ዳኣራ ማሂ ዒዚ ኮሺኔ። 27 ዓጮ ዳኣራ ማሂ ኮሻና ባኮኮ ዴማ ላምፖ ዋርቁ ዠኢሮ ኮሺ ላምፖ ዛሎይዳ ሻውሎና ሚዛቆናይዳ ዓይሂ ጊኢጊሺኔ፤ ዬንሂ፣ ዬያ ዑንጅ ጨቢሻሂ ኬደንዶ ዛጳ ሚያ ጌላንዳጉዲ ኮሺንቴያኬ። 28 ዛጳ ሚያንሂ ሻሪ ሚሂና ዒዚ ኮሺ ዋርቁና ጳርቁኔ።

ቲዡ ዛይቶና ዑንጅና
(ኬሲ. ማፃ 30:22-38)

29 የኦሲም ዲማጳ ቲዡ ዛይቶንታ ቃራ ሳውሞ ዓኣ ሳዊ ዑንጅ ሳዋ ባኮ ኮሻ ዓሳ ኮሻሢ ጎይያ ገኢጊሺ ዒዚ ኮሼኔ።

38

የኦሲም ሚቺ ዒንጎ ባኮ ዒንጎ ቤዘ
(ኬሲ. ማፃ 27:1-8)

1 ሚቺ ዒንጎ ባኮ ዒንጎንዶ ቤዘ ሻሪ ሚሢና ዒዚ ኮሼኔ፤ ዬይያ፡-
ይይዶ ዛላ ዋላ ካኣማያ የደሱማ ደንጎ ዋዳ፣ ጎጶ ዳልጉማ ደንጎ
ዋዳ፣ ሌካ ዴጉማ ሃይሃ ዋዳ ማዓያኬ፤ 2 ዒንጎ ባኮ ዒንጎ ቤዘና
ዋላ ፔቲ ማዒ ኮሺንቲ ዳንኮንሢ ደይዶ ዛሎና ጌሢ ቢያሢ ሞኦና
ዓንጎና ዒ ጳርቂ ገኢጊሺ። 3 ዒንጎ ባኮ ዒንጎ ቤዘይዳ ዓኣ ማዲንቶ
ሜሆ፡ ዖቶ፡ ታሞ ካኣሾ ቦኦቆ፡ ዳኮ ሺልፖ፡ ኪሮ፡ ታሞ ጌሢ ዔኤሃ
ቤዘዋ ሞኦና ዓንጎና ዒ ኮሼኔ፤ 4 ሮኦጩ ማላ ሞኦና ዓንገ ኮጩ
ዒዚ ኮሼኔ፤ ዬይ ዓንጎ ኮጩ ዒንጎ ባኮ ዒንጎ ቤዘኮ ሃካሢ ሄላያ፡
ዒንጎ ባኮ ዒንጎ ቤዘኮ ዳሞ ዛላ ማሃ ዒዚ ኮሼኔ፤ 5 ኬደንዶ ዛጳሢ
ጌላንዳ ካራ ማሃ ደይዶ ዢኢሮ ኮሺ፡ ደይዶ ዛሎና ዓይሣኔ። 6 ዛጳሢ
ሚያዋ ሻሪ ሚሢና ኮሺ ሞኦና ዓንጎና ጳርቂ ገኢጊሺ። 7 ሚቺ ዒንጎ
ቤዘኮ ጎኦቦና ጎኦቦና ዓኣ ዢኢራሢዳ ጌልኬኔ፤ ዬና ሚቺ ዒንጎ
ቤዘላ ኮሺንቲሢ ላሾ ሚሢና ኮሺንቲያ ማዓፖ ጋራ ጉሪኬ።

ዋኣያ ማሰቶ ሳኣኖ
(ኬሲ. ማፃ 30:18)

8 ዋኣያ ማሰቶ ሳኣኖ ጌሃ ቤዘዋ ሞኦና ዓንገና ዒዚ ኮሼኔ፤
ዬያ ሞኦና ዓንጎ ዒዚ ዔኬሢ ዓፒሎና ማዢንቲ፡ የኦሲ ዳሮና
ካኣማ ማኣሮ ካሮይዳ ማዳ ላኣላ ዔኪ ሙኬ ሞኦና ዓንጎ
ሌማሌኤሻሢዳፓኬ።

ዓፒሎና ማዢንቲ ማኣሮኮ ቃምፖ ጋሮ
(ኬሲ. ማፃ 27:9-19)

9 ዓፒሎና ማዢንቲ፡ የኦሲም ዲማጳ ማኣሮኮ ቃምፖ ጋሮ ጎኦቦ
ዓፒላ ሚዛጲ ሱኡፖ ዓፒላና ዒዚ ኮሼኔ፤ ጎኦቦ ዓፒሎኮ የደሱማ
ድኦሎ ዛሎና ጃኤታ ዋዳኬ፤ 10 ጎኦቦ ዓፒሎ ዓርቃ ላማታሚ
ቲርቲሪና ላማታሚ ቶኪያኣ ሞኦና ዓንገና ዒ ኮሼኔ፤ ቲርቲሮኮ ዓኣ
ኪሮና ፒዝ ጌዔ ዓንጎ ቢራ ዓንገና ዒዚ ኮሼኔ፤ 11 ኬዶ ዛሎ
ቃምፖ ጋሮኮዋ ኮሺያ ዬና ጎይያኬ፤ 12 ዓባ ጌላ ዛሎና ደንገታሚ

ዋዳ ያደሱሞ ዓኣ ጎኡቦ ዓፒላ ዓኣኔ፤ ዩንሢኮዋ ታጾ ቶኪ ዓኣ ታጾ ቱርቱሪ ዓኣኔ፤ ቱርቱሮንሢኮዋ ቢራ ዓንገና ኮሺንቴ ኪሬና ያደሲ ዓንገና ዓኣኔ። 13 ጌሎ ካሮይዳ ዓባ ኬሰካ ዛሎና ዓኣ ቃምፆ ጋሮኮ ዳልጉማ ዶንጊታሚ ዋዳኬ። 14-15 ዓፒሎና ማዢንቴ ማኣሮ ጌሎ ካሮኮ ፔቴ ፔቴ ዛሎና ታጾ ዶንጎ ዋዳ ማዔ ያደሱሞ ዓኣ ጎኡቦ ዓፒላ ዓኣኔ፤ ዩንሢ ዔቁሳ ቶኪ ዓኣ ሃይሣ ቱርቱሪ ዓኣኔ። 16 ዬኖ ቃምፆ ጋራሎኮ ዙሎይዳ ዓኣ ጎኡቦ ዓፒላ ቢያ ሚዛጲ ሱኡፖ ዓፒላና ኮሺንቴያኬ፤ 17 ቱርቱሮንሢኮ ቶካ ኮሺንቴሢ ሞኦና ዓንገናኬ፤ ኪሮና ፒዜ ዓንጎና፣ ሃሣ ቱርቱሮኮ ቶኦኮ ካንቆሢያ ቢራ ዓንገና ኮሺንቴያኬ፤ ዬኖ ቃምፆኮ ዙላ ዓኣ ቱርቱራ ቢያ ፒዘ ጌዔ ቢራ ዓንገና ዓርቂንቴያኬ፤ 18 ቃምፆ ጋሮ ጌሎ ካሮ ጎኡቦ ዓፒላ ጮልዔ፣ ዲንኪ፤ ሃሣ ዘቄ ሱኡፔይዳፓ ሱኪንቴ፣ ሽኤሜና ኩቻ ማይሊ ሲኮና ሚዛጲ ጉኡሢ ዶዲ ሻሎና ኮሺንቴያኬ፤ ዬይያ ቃምፆ ጋሮኮ ጎኡቦ ዓፒሎጉዲ ያደሱማ ላማታሚ ዋዳ፣ ሌካ ዴጉማ ዶንጎ ዋዳኬ፤ 19 ያይዶ ሞኦና ዓንገ ኦኪ ዓኣ ያይዶ ቱርቱሪና ዬይ ሬኤኪንቴኔ፤ ዬያቶይዳ ዓኣ ኪራ፣ ሬኤካ፣ ፒዘ ጌዔ ዓንጋ፣ ቢራ ዓንገና ኮሺንቴያኬ፤ 20 ዓፒሎና ማዢንቴ ማኣሮና ዙሎ ቃምፆ ዲሮኮ ጎኡቦ ዓፒሎም ማዓ ፃውና ቢያ ኮሺንቴሢ ሞኦና ዓንገናኬ።

ዓፒሎና ማዢንቴ ማኣሮይዳ ማዲንቶ ሜህ

21 ታጾ ዓይሢፃ ፃኣፒንቴ ላምፆ ዓርሲያ ሹጮንሢ ጌሢንቴ ናንጋ ቤዛ፣ ዓፒሎና ማዢንቴ ያኦሲም ዲማዴ ማኣሮ ማደም ኮይሳ ዲማ ዲማ ዓንጋ ያዲኬ፤ ዩንሢ ዲማ ዲማ ዓንጎንሢኮ ፓይዶ ሺኢሽሢ ሙሴ ማዓዛ፣ ኮሺንቴሢ ጋዓንቴ ቁኤሳሢ ዓኣሮኔ ናኣዚ ዒታማሪ ሱኡጌ ማዔም ሌዊ ዓሶ ዛሎናኬ።

22 ዪሁዳ ዜርፆይዳፓ ሁኡሬኮ ናኣዚ ናይ ማዔሢ፣ ዑኡሬ ናኣዚ ባሰሊዔኤሌ፣ ናንገና ናንጋ ጎዳ ሙሴ ዓይሢ ጎይፆ ቢያ ባኮ ኮሺኔ፤ 23 ዳኣኔ ዜርፆይዳፓ ማዔ ዓይሳማኬ ናኣዚ ዔኤሊያቤ ዒዛ ማኣዲ ዓንገ ሽኤሻያ፤ ሃሣ ማደኮ ማደንዶ ጎይፆ ኬሳ ዔራቶ ዓኣያ፤ ዬያጉዲ ሃሣ ጮልዔ፣ ዲንኪ፤ ሃሣ ዘቄ ሱኡፔፓ ሱኪ ሚዛጲ ዓፒላ ዲዓ ዶርዜኬ።

24 ዓፒሎና ማዢንቴ ጌኤጉ ማኣሮ ማዢም ማዓንዳጉዲ ያኦሲም ዲማዲ ዒንገንቴ ዋርቆ ቢያኮ ዴኤሡማ ፔቴ ሺያ ኪሎ ገራሚ ማዓያኬ። 25 ቢያ ዴሮይዳፓ ቡኬ ቢሮ ዓንጎ ዴኤሡማ ሃይሣ ሺያና ያይዶ ፃኤታና ሃይሢታሚ ኪሎ ገራሚ ማዓያኬ። 26 ዬይያ፣ ዴራ ፓይዲንቴ ዋደና ፃኣፒንቴ ዓሳ ፔቴ ፔቴሢ ዒንጋኒ ኮይሳማ ጉዴያ ጨጌሢ ቢያ ማዓያኬ፤ ዴሮ ፓይዶይዳ ጌሌዘንሢ

ለማታሚ ሌዔ ኩሜያና ዩካፓ ዑሣ ማዕያ ላሆ ዌኤታና ሃይሣ ሺያና ደንጎ ዌኤታና ደንጊታሚ ዓቲንቄኬ። 27 ሃይሣ ሺያና የይዶ ዌኤታ ኪሎ ገራሜ ማዓ ቢሮ ዓንጋ ዓፒሎና ማዢንቲ፣ ያኦሲም ዲማዳ ማኣሮንታ ጎኦ ባፒሎ ደቂ ዔቂሶም ማዓ ፔቲ ዌኤታ ቶኪንታ ኮሺያም ማዕኔ፤ ዩይ ፔቲ ፔቲ ቶካ ሃይሣታሚ የይዶ ኪሎ ገራሜ ቢራ ዓንጊ ማዓያና ማዳንታንዳጉዲ ጌይንቲ። 28 ሃንጎ ዓቲ ሃይሣታሚ ኪሎ ገራሜ ማዓ ቢሮ ዓንጎና ባሰሊዔኤሌ ቱርቲሮኮ ባኣሎንታ ፒዜ ዓንጎንታ ሙሰኩሎዋ ኮሺ። 29 ያኦሲም ዲማዳ ዒንጊንቲ ሞኦኖ ዓንጎኮ ዴኤሁማ ላምዖ ሺያና የይዶ ዌኤታና ላማታሚ ደንጎ ኪሎ ገራሜ ማዓያኬ። 30 ዓፒሎና ማዢንቲ፣ ያኦሲ ዴሮና ካኣማ ማኣሮ ጌሎ ካሮኮ ማርሾ ካሮ ዔቂሶ ቶኮንታ፣ ሞኦኖ ዓንጎ ኮጩሎንታ፣ ሞኦኖ ዓንጎና ኮሺንቲ ዒንጎ ባኮ ዒንጎ ቤዘንታ፣ ዒንጎ ቤዘይዳ ማዳ ማዳንቶ ሜሆ ቢያሣንታ ሞኦና ዓንጊና ዒዚ ኮሺ፤ 31 ዙሎይዳ ዓኣ ቃምዖ ጋሮ ዲሮንታ ቃምዖ ጋሮ ጌሎ ማርሾ ካሮ ዔቂሶ ቶኮንታ፤ ዩያጉዲ ሃሣ ዓፒሎና ማዢንቲ ማኣሮና ዙላ ዓኣ ቃምዖ ዲሮና ፃውኖዋ ቢያ ዒ ኮሺ።

39

ቄኤሶኮ ማኣዓሢ
(ኬሲ. ማፃ 28:1-14)

1 ቄኤሳ ያኦሲም ዲማዳ ቤዘይዳ ማዳ ዎደና ማኣዓንዳ ሚርጌ ሚዛጲ ማኣዖ ጮልዔ፣ ዲንኪ፤ ሃሣ ዘቄ ሱኡፖ ዔያታ ኮሺ፤ ዓኣሮኔኮዋ ቄኤሱዋ ማኣዓሢ ናንጊና ናንጋ ጎዳ ሙሴም ዓይሣሢ ጎይዖ ዔያታ ኮሺ።

2 ዔፑደዋ ዎርቄ ፓቲሌና፣ ጮልዔና ዲንኪ ሃሣ ዘቄ ሱኡፖና ኮሺንቲ ሚዛጲ ዓፒላ ዔያታ ኮሺ፤ 3 ዎርቆዋ ዱዒ ጉኡዒሲ ፓቲሌጉዲ ማሃጋፓ ቲቄ ቲቄ ጊኢጊሺ፤ ዩያ ጮልዔ፣ ዲንኪ፤ ሃሣ ዘቄ ሱኡፖና ሲኪንቲ ሚዛጲ ዓፒሎይዳ ኩቻ ማይሊ ሲኬ።

4 ጊኤቶይዳ ዓጊንታ ላምዖ ሱሢ ኮሺ ዔፑደ ዓርቃንዳጉዲ ዓጮና ዓጮና ዓይሣ። 5 ናንጊና ናንጋ ጎዳ ሙሴ ዓይሣሢጉዲ ዎርቄ ፓቲሌና፣ ጮልዔ፣ ዲንኪ ሃሣ ዘቄ ሱኡፖና ኮሺንቲ ሚዛጲ ዓፒላ ዔራቶና ማይሊ ሲኪንቲ ቃልሾ ፔቲ ማሃ ዔፑደና ዎላ ዓይሣ ኮሺ፤ 6 ሜሬጊዴ ጌይንታ ሚዛጲ ሹጮዋ ጊኢጊሺ ዎርቆ ፓልማሢና ዎላ ዔያታ ዓይሣ፤ ዩያቶይዳ ታጾ ላምዖ ያይቆኦና ናኣቶኮ ሱንፃ ሃኣማቶና ቆኦቄ ፃኣፒንቲ፤ 7 ዩያታኣ ናንጊና ናንጋ ጎዳ ሙሴ ዓይሣ ጎይዖና ታጾ ላምዖ ዒሰራዔኤሌ ዓሶ ማኣሮ ፃጾ ቤዘ ዔቃያ

ማዒ ማለንታንዳጉዲ ጌኤቶይዳ ዓገንታ ዔፑዶኮ ሱፆይዳ ዔያታ ዓይህኔ።

ዳዶ ቡራሽ
(ኬሲ. ማፃ 28:15-30)

8 ዳዳ ማኣዒንታ ቡራሻ ዔፑዳ ኮሺንቲ ባኮ ማላ ባኣዚና ሃኣማቲ ኮሺንቲ፤ 9 ዩይያ ላምፆ ጳንጨንቲያ ያይዶ ዛሎና ሞላ ካኣማያ ያደሱማ ፔቲ ኬኤላ ሞዳ፣ ጎጾ ዳልጉማ ዒማጉዲ ማዔያኬ፤ 10 ሚዛጾ ሹጮፎ ያይዶ ቤሲ ፓቂ ዔያታ ጌህኔ፤ ዩይያ፡- ቤርታሳ ቤዘይዳ ስርዲዮኔ፣ ቶጳዚዮኔንታ ዊልጭ ዊልጭ ጋዓ ሚዛጾ ሹጮ፤ 11 ላምዓሳ ቤዛ ቤሉሬ፣ ሴንፔሬና ዓልማዘ ጌይንታ ሹጮ፤ 12 ሃይህሳ ቤዛ ያኪንቲ፣ ኬልቄዶኔና ዓሚቴሰዒናሴ ጌይንታ ሹጮ፤ 13 ያይዳሳ ቤዛ ቢሪላ፣ ሜሬጊዴና ዒያሰጲዴ ጌይንታ ሹጮ፤ ዩይያ ቢያ ሞርቆና ኮሾና ባኮ ዑፃ ጌህንቲያኬ። 14 ሚዛጾ ሹጮንህ ታጾ ላምፆ ዒሰራዔኤሌ ዓሶ ፃጾ ዛላ ማዒ ማለንታንዳጉዲ ፔቲ ፔቲ ሹጮ ዑፃ ታጾ ላምፆ ያይቆኦ ባኣቶ ፔቲ ፔቲህን ሱንፃ ቆኦቂ ፃኣፒንቲ። 15 ዳዶ ቡራሽም ሱሲጉዲ ማርቲ ሱፆ ባኣዚ ሞርቆና ዔያታ ኮሺኔ፤ 16 ላምፆ ሞርቆ ፓልሞ፤ ገንህ ሃህ ላምፆ ሞርቆ ዢኢሮ ኮሺ፣ ላምፆ ዢኢሮንህ ዳዳ ዓኣ ቡራሽኮ ኬዴ ሞላ ካኣማ ካሮይዳ ዓይህኔ። 17 ላምፆ ሞርቆ ፓቲሎንህ ዢኢሮንህና ሞላ ዔያታ ዓይህኔ፤ 18 ሜሌ ላምፆ ሞርቆ ፓቲሎንህን ቶኦኮ ላምፆ ፓልሞንህና ሞላ ካንህኔ፤ ዩይያጉዲ ጌኤቶና ሊካ ኬዳ ዔፑዶ ሱፆኮ ቤርቶና ሞላ ዓይህኔ። 19 ቃሲ ላምፆ ሞርቆ ዢኢሮ ኮሺ ዔፑዶኮ ቤርቶ ዛሎና ዓኣ ዳዶ ቡራሽኮ ላምፆ ጋሮ ዛሎ ቶኦኮና ዓይህኔ። 20 ሄሊሳፆ ላምፆ ሞርቆ ዢኢሮ ኮሺ ጌኤቶና ሊካ ኬዳ ቤርቶ ዛሎና ላምፆ ዔፑዶ ሱፆንህዳ ዴሞ ዛሎና ዓይህኔ፤ ዩንህ ሞላ ዓርቂንቲዘንህ ዔራቶና ማይሊ ሲኪንቲ ቃልሾኮ ኬዶ ዛላ ካኣማ ካሮ ዓጫኬ። 21 ናንገና ናንጋ ጎዳ ሙሴም ዓይህ ጎይፆና ዳዶ ኪኢሶይዳ ዓኣ ዢኢሮንህ ዔፑዶ ዢኢራህና ሞላ ጮልዔ ፓቲሌና ዔያታ ቱኬኔ፤ ዩያ ጎይፆና ዳዶ ቡራሽኮ ቃልሻ ዑፃ ማዔህሮ ዑኬና ቡሊንቲሞያ ዶዲኬ።

ሜሌ ቄኤሶ ማኣዓህ
(ኬሲ. ማፃ 28:31-43)

22 ዔፑዶ ዑፃ ቃሲ ማይንቲንታ ቃሚሻ ኮሺንቲህ ገቤ ጮልዔ ሱኡፔ ዓፒላናኬ፤ 23 ቃሚሾኮ ቶኦካ ጌላ ካሮ ዓጫ ቡሊንቲሞፑጉዲ ጳንጨ ሲኪንቲያኬ፤ 24-26 ቃሚሾኮ ዴሞ ዛሎ ዓጫ ናንገና ናንጋ

ጎዳ ሙሴም ዓይህ ጎይጾና ጮልዔ፡ ዲንኪ፤ ሃሣ ዞቄ ሱኡፔና ሲኪንቴ ሚዛጲ ዓፕላና ኮሺንቴ ርኦማኦ፤ ሚፆ ዓኣፖ ማላ ዓኣፒ ሼኤሚና ማይሊ ሲኪንቴ ዓኣኔ፤ ዩንሢ ዓኣፖንሢኮ ባኣካ ዓኣዲ ዓኣዲ ጌኤሺ ዋርቄና ኮሺንቴ ሂቻ ዓኣኔ።

27 ዓኣሮኔና ዒዛኮ ናኣቶናም ደርዜ ዲዔ ሚዛጲ ዓፕላና ኮሺንቴ ሹራቤ፡ 28 ቶኦኪ ፆሾ፡ ቆኦቤ፤ ሃሣ ቆንፆያ ዔያታ ገኢጊሼኔ። 29 ኬርና ቱኮ ቃልሾ፡- ጮልዔ፡ ዲንኪ፤ ሃሣ ዞቄ ሱኡፔና ሱኪ ኮሺንቴ ሚዛጲ ዓፕላ ገኢጊሺ፡ ናንጊና ናንጋ ጎዳ ሙሴ ዓይህሢ፡ ሼኤሚና ሃኣማቴ ማይሊ ዔያታ ኮሼኔ። 30 ካኣታ ቶኦካ ዓጋ ቦንቾ ባኮ ማላያ፡ ፆኦሲም ዲማዴ ቆኦቤ ጌኤሺ ዋርቄና ኮሺ፡ «ናንጊና ናንጋ ጎዳም ዲማዴያ» ጋዓያ ጌዳ ቆኦቄ ፆኣፔኔ። 31 ናንጊና ናንጋ ጎዳ ሙሴም ዓይህሢ ጎይጾ ቶኦኮ ፆሾሢኮ ቤርቶ ዛሎይዳ ዩያ ዔያታ ጮልዔ ፓቴሌና ቱኬኔ።

ማዳ ቢያኮ ጋፒዖ
(ኬሲ ማፃ 35:10-19)

32 ዓፕሎና ማዢንቴ፡ ፆኦሲ ዴርና ካኣማ ማኣሮኮ ማዳ ጉቤ ዩያይዲ ጋፔኔ፤ ዒሰራዔኤሌ ዓሳ ናንጊና ናንጋ ጎዳ ሙሴም ዓይህ ጎይጾ ማዳኔ፤ 33 ዓፕሎና ማዢንቴ ማኣሮንታ ጋራ ማዲንቶ ሚሆዋ ቢያ ሙሴ ኮራ ዔያታ ዔኪ ሙኬኔ፤ ዩይ ሚሃ ሃካፓ ለካ ፓይዲንታሢ፡ ኪራ፡ ላሻሢ ሚፆ፡ ጋጋርዛ፡ ቱርቱሮንታ ዔቂሶ ቶካ፡ 34 ዓደ ማራዖ ጎርና ኮሺንቴ ዞቄ ቃላምና ዑሾና ካንቆ ጉፓሎንታ ሺርኪንቴ ጉላምቦ ዜዶና ኮሺንቴ ካንቆሢ፡ ዲማሲዖር ጎኦቦ ዓፕላ፡ 35 ዓርሲንቴ ሹጫ ጋራ ዓኣ ዋጋ ፆኣፒንቴ ጫኣቁም ታኣቦታ፡ ዛጰ ሚፆንታ ጎም ዓቶም ጌይፆ ዔርዛ ጉኡፓ፡ 36 ዴጌ ሎኦኩንታ ዒኢካ ማዳ ማዲንቶ ሚሆንታ ጉቤ፤ ፆኦሲም ዒንጎ ባኣዚ ማሂ ዒንጊንታ ሙዓ፡ 37 ጌኤሺ ዋርቄና ኮሺንቴ ፖፆ ጌሃ ሻርና፡ ጌሢንታ ፖፆንታ ማዲንቶ ሚሃ፡ ፖፆም ኮይሳ ለምባሢ፡ 38 ዋርቆና ኮሺንቴ ፆኦሲም ዒንጎ ባኮ ዒንጎ ቤዛ፡ ቲዡ ዛይታ፡ ቃራ ሳውዋ ዓኣ ዑንጃ፡ ዓፕሎና ማዢንቴ ማኣሮኮ ማርሾ ካሮም ኮሺንቴ ጎኦቦ ዓፕላ፡ 39 ሞኦኖ ዓንጎና ኮሺንቴ ፆኦሲም ዒንጎ ባኮ ዒንጎ ቤዛ፡ ሞኦኖ ማሰቶ ሳኣኖንታ ጌሃ ቤዛ፡ 40 ዓፕሎና ማዢንቴ ማኣሮኮ ቃምፆ ጋሮም ማዓ ጎኦቦ ዓፕላ፡ ቱርቱሮና ዩያታ ዔቃ ቶካ፡ ቃምፆ ጋሮ ጌሎ ማርሾ ካሮም ኮሺንቴ ጎኦቦ ዓፕሎንታ ቱኮ ሱዛ፡ ዓፕሎና ማዢንቴ ማኣራ ዴቂንታ ፆውና፡ ዓፕሎና ማዢንቴ ማኣራ ማዲንቶ ሚሃ፡ 41 ቄኤሳሢ ዓኣሮኔንታ ናኣቶንታ ጌኤዡ ማኣሮይዳ ቄኤሴ

ማዒ ማዳኣና ማኣዓ፣ ያኦሲም ዲማዴ ሚዛጳ ማኣዓሢንታኬ።
42 ናንጊና ናንጋ ጎዳ ሙሴ ዓይሢ ጎይዖ ዒሰራዔኤሌ ዓሳ ማደ ቢያ
ማዴኔ፤ 43 ሙሴያ ቢያ ባኮ ዛጊ ናንጊና ናንጋ ጎዳ ጌዔማ ጎይዖ
ማዴንጉሚ ዴንቁኔ፤ ዩያሮ ሙሴ ዔያቶ ዓንጃኔ።

40

ዓፒሎና ማዢንቴ ማኣራ ደቁንቴሢና ማዳኣ ዓርቁንቴሢ

1 ናንጊና ናንጋ ጎዳ ሙሴም ሂዚ ጌዔኔ፡- 2 «ቤርታሳ ዓጊና
ጃኤሮኮ ቤርታሳ ኬሎና ዓፒሎና ማዢንቴ፣ ታኣኒ ዴሮና ካኣማ
ማኣሮ ደቁ። 3 ታጳ ዓይሢያ ፃኣፒንቴ ጫኣቁሞ ታኣቦቶ ዩኖ ኬኤዖኮ
ጋራ ጌሢ፣ ዲማሲያሮ ኮሺንቴ ጎኦቦ ዓፒሎ ቤርቶ ዛሎና ሱጻ።
4 ዴጌ ሎኦኮዋ ጋሮ ጌልዚ ዒኣካ ማዴንቶ ሜሆ ቢያ ዩያ ዑፃ
ጌሢ፤ ፖዖ ጌሦ ሻርናዋ ጌልዚ ፖዖ ዒኣካ ጌሢ፤ 5 ዋርቆና ኮሺንቴ፣
ዑንጅ ጩቢሾሢ ጫኣቁሞ ታኣቦቶኮ ቤርታ ጌሢ፤ ዓፒሎና ማዢንቴ
ማኣሮኮ ጌሎ ካራ ጎኦቦ ዓፒሎ ሱጻ። 6 ሚቺ ዒንጎ ባካ ዒንጊንታ
ቤዞ ዓፒሎና ማዢንቴ ማኣሮ ጌሎ ካሮኮ ሆታ ጌሢ። 7 ዓፒሎና
ማዢንቴ ማኣሮና ሚቺ ዒንጎ ቤዞናኮ ባኣካ ዋኣዖ ማሰቶ ሳኣኖ ጌሢ
ዋኣሢ ኩንሢ። 8 ቃምዖ ጋራ ማዓ ካሮ ማሂ ዲርቁ፤ ጎኦቦ ዓፒሎ
ማርሾ ካራ ሱጻ።

9 «ዩካፓ ዓፒሎና ማዢንቴ ማኣሮንታ ዒኣካ ማዴንቶ ሜሆንታ
ጌኤኮ ዛይቶና ቲሽኪ፣ ታኣም ዲማሴ፤ ዲማዴ ጌኤሽኬያ
ማዓንዳኔ። 10 ሄሊሳዖ ዒንጎ ባኮ ዒንጎ ቤዞንታ ዒኣካ ማደ
ሚሆዋ ጌኤኮ ዛይቶና ቲሽኪ ታኣም ዲማሴ፤ ዩይ ፔቶ ጌኤሽኬያ
ማዓንዳኔ። 11 ዋኣዖ ማሰቶ ሳኣኖና ጌሦ ቤዞና ዒዞ ጎይዖ ቲሽኪ
ታኣም ዲማሴ።

12 «ዓኣሮኔንታ ናኣቶንታ ዒኣካ ካራ ዔኪ ሙኪ ዋጎ ጎይዖና
ማሰታንዳጉዲ ዔያቶም ኬኤዘ፤ 13 ቁኤሶ ማኣዓሢ ማይሲ ዛይቶና
ዓኣሮኔ ቲሽኪ፤ ዩያይዲ ቁኤሴ ማዒ ታኣም ማዳንዳጉዲ ታኣም
ዲማሴ። 14 ናኣቶዋ ዒዛኮ ዔኪ ሙኪ ሹራቦ ዔያቶ ማይሴ።
15 ዔያታኣ ታኣም ቁኤሴ ማዒ ማዳንዳጉዲ ዔያቶኮ ዓደ ኔ
ቲሽኪሢሂጉዲ ዔያቶዋ ቲሽኪ፤ ዔያቶ ኔ ቲሽኪሢሂሮ ሙካ ዋዶ
ቢያይዲ ቁኤሴ ማዒ ታኣም ዔያታ ማዳንዳኔ።»

16 ሙሴያ ናንጊና ናንጋ ጎዳ ዒዞ ዓይሢማ ጎይዖ ቢያ ባኮ
ማዴኔ። 17 ዩያሮ ጊብጃ ዓጫፓ ዔያታ ኬሰኬ ላምዓሳ ሌዖኮ ቤርታሳ
ዓጊና ጃኤራ ቤርታሳ ኬሎና ዓፒሎና ማዢንቴ፣ ያኦሲ ዴሮና ካኣማ
ማኣራ ደቁንቴኔ። 18 ዓፒላፓ ማዢንቴ ማኣሮኮ ቶኮ ዔቁሲ፣ ላሻሢ

ሚያንታ ቱርቱርዋ ዔቁሲ ጋጋርዘዋ ሙሴ ዓይሄኔ። 19 ናንገና ናንጋ ጎዳ ዓይሄ ጎይያ ዓፕሎና ማዢንቴ ማኣሮ ካንቆ ባኮና ካንቄኔ፤ ዙሎ ጊንሣ ዑፃ ቃሲ ካንቆሢና ካንቄኔ፤ 20 ለምፃ ዓርሲንቴ ሹጮ ዔኪ ጫክቁዋ ታኣቦቶ ጋራ ጌሢ፤ ዛጳሢ ሚያዎ ታኣቦቶኮ ዢኢራሢዳ ጌልዚ፤ ጎሞ ዓቶም ጌይያ ዔርዛ ጉኡፖና ታኣቦቶ ካሮ ዎዳኔ፤ 21 ጫክቁዋ ታኣቦቶ ዓፕሎና ማዢንቴ ማኣሮ ጌልዚ፤ ዲማሳ ጎኡቦ ዓፕሎ ሱፄኔ፤ ዩያይዲያና ናንገና ናንጋ ጎዳ ዓይሄ ጎይያ ታኣቦቶ ጴዲዋጉዲ ዒዚ ዓኣቼኔ።

22 ዓፕሎና ማዢንቴ ማኣሮ ጋራ ዴጌ ሎኦኮ ጌልዚ፤ ዲማሳ ጎኡቦ ዓፕሎኮ ዙለና ኬዶ ዛላ ጌሢኔ። 23 ናንገና ናንጋ ጎዳ ዓይሄሢጉዲ ዒዘም ዒንጎያ ማዒ ዒንገንታ ካያ ዩሮ ዴጌ ሎኦኮሎ ዑፃ ጌሢኔ። 24 ፖፃ ጌሦ ሻርሮ ዓፕሎና ማዢንቴ ማኣሮ ጋሮ ጌልዚ፤ ዴጌ ሎኦኮኮ ቤርቶይዳ ዶኦሎ ዛለና ጌሢኔ። 25 ዩያጉዲ ሃሣ ናንገና ናንጋ ጎዳ ዓይሄ ጎይያ ዒኢካ ናንገና ናንጋ ጎዳ ቤርታ ፖፃ ፖሚሴኔ። 26 ዎርቆና ኮሺንቴ ዒንጎ ባኮ ዒንጎ ቤዘዎ ዓፕሎና ማዢንቴ ማኣሮ ጌልዚ፤ ዲማሳ ጎኡቦ ዓፕሎኮ ቤርቶ ዛላ ጌሢኔ። 27 ናንገና ናንጋ ጎዳ ዓይሄ ጎይያ ቃራ ሳሙዎ ዓኣ ዑንጅ ዒኢካ ዒዚ ጩቤሴኔ። 28 ዲማሳ ጎኡቦ ዓፕሎዎ ዓፕሎና ማዢንቴ ማኣሮኮ ጌሎ ማርሾ ካራ ሱፄኔ። 29 ዒኢካ ጌሎ ካርኮ ቤርቶ ዛላ ሚቺ ዒንጎ ባካ ዒንገንታ ቤሲ ኮሺ፤ ሚቺ ዒንጎ ባኮንታ ሃኣኮኮዎ ዒንጎ ዒንገያ ናንገና ናንጋ ጎዳ ዓይሄ ጎይያና ዒኢካ ሺኢሹኔ፤ 30 ዎኣያ ማሰቶ ሳኣሮዎ ዓፕሎና ማዢንቴ ማኣሮና ሚቺ ዒንጎ ቤዘናኮ ባኣካ ጌሢ፤ ዎኣሢ ኩንሢኔ። 31 ሙሴ፤ ዓኣሮኔ፤ ዓኣሮኔኮ ናኣታኣ ፔኤኮ ኩጮና ቶኮና ዒኢካ ማሰቴኔ፤ 32 ዔያታ ዓፕሎና ማዢንቴ ማኣሮ ጌላ ዎዶና፤ ሃሣ ያኦሲም ዒንጎ ባኮ ዒንጎ ቤዘ ባንሢ ዑካ ዎዶና ቢያ ናንገና ናንጋ ጎዳ ዓይሄሢጉዲ ዩያ ዔያታ ማዳኔ። 33 ሙሴ፤ ዓፕሎና ማዢንቴ ማኣሮና ያኦሲም ዒንጎ ባኮ ዒንጎ ቤዘናኮ ቃምዒ ጋርሲ ዲማሴኔ፤ ቃምፃ ጋሮ ጌልዛ ማርሾ ካሮይዳ ዲማሳ ጎኡቦ ዓፕላ ሱፄ ዩያይዲ ማዶ ቢያ ኩንሢኔ።

ናንገና ናንጋ ጎዳኮ ቦንቾ
(ፓይ. ማፃ 9:15-23)

34 ዩካፓ ዓፕሎና ማዢንቴ ማኣራ ሻኣሬና ካንቄንቴም ናንገና ናንጋ ጎዳኮ ቦንቾ ፔጋሲ ዳዎ ዓኣፓ ዲካ ፖዓ ዩያ ኬኤያ ኩሜኔ። 35 ዩያይዲፓ ዔቄያና ሙሴ ዓፕሎና ማዢንቴ ማኣሮ

40:25 40:25 ኬሲ. ማፃ 30:11-16። 40:26 40:26 ማቴ. 17:24። 40:34 40:34 1ካኣቶ. ማ 8:10-11፤ ዒሲ. 6:4፤ ሂዚ. 43:4-5፤ ዮሃ. ያፕዳ 15:8።

ጌላኒ ዳንዳዒባኣሴ። 36 ዒሰራዔኤሌ ዓሳ ዳንኪ ደዔ ቤዞ ሃሺ
 ዓገፀኒ ዳንዳዒህሂ ሻኣራ ዓፒሎና ማዢንቴ ማኣሮ ዑፃፓ ዔቃኣና
 ሌሊኩ፤ 37 ሻኣራ ዒኢካ ዓኣ ጎይሣ ዓኣንቴ ዔያታ ዓኣ ቤዛፓ ሃሺ
 ዓኣዲቆሴ። 38 ዔያታ ሃንታ ዎዶና ቢያ ሮኦሪ ናንጊና ናንጋ ጎዳኮ
 ቦንቾ ፔጋሲ ደቆ ሻኣራ ዓፒሎና ማዢንቴ ማኣሮ ካንቃንቴ፣ ዎንቶ
 ሃሣ ዔያ ማኣሮ ዑፃይዳ ታሚ ዔኤታንቴ ዒሰራዔኤሌ ዓሳ ዛጋኔ።

ጌሌዢ ማግኒት

**The Holy Bible in the Maale language of Ethiopia,
using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማግኒት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929